

## **Buk Ngr Sam**

### **Natq Ngr Nzaplxtqngr Mz**

### **Buk Ngr Sam**

Sam lcng tqnginidr nabz kxtr ngrdr lr Jiu x nzkrka'-krdr kx nzngr-zvz-ngrdr. X mrlz nzvz-nqblq-krung mz nzangio-krug Gct x nzkrka'-krbzku bade. Sam nzkrzlzr nzokatr-krdr nigu x nzamqtr-krdr drtwrgu. Takitrde kxnzetu rgung nzyapwxtipx-krmlr bagu drtwr ngr Sam lcng.

Leplz nzqqlung kx nzryrng Sam lcng x nzyrtlr yiz siu-esz' (1,000). A' Devet kx ryrbz kxkqlu mz Sam kcng trtqki-esz'-nzpnu-nzlvqn (150). Nza-kiolr Sam lcng mz dzu rdr nzlvqn nzrpibzlr 'buk.' Kxnzalvztrng mz Nzryrngkxtr nzrpilr kx namrlzu r Sam nzpnu-esz'-nrade-esz'. A' kzdung Sam nzrlxlvzng, x rblx nzrpinger namrlzu r Sam kznike.

#### **Namrlzu R Sam Lcng Nidr Seleng**

- 1) Nabz ngr nzyrni-krbz ncblo o leplz kxkqlu mz Gct murde narlxtibzlr bade nzokatr-krde nidr mz nzkxpu-krdrng. Mc Sam 13 x 44.
- 2) Nabz ngr nzrglqpxngr Gct. Mc Sam 8 x 115.
- 3) Nabz ngr nzawi-ngrbz mz Gct. Mc Sam 34 x 67.
- 4) Nabz ngr nzbtrtkr drtwr ncblo o leplz kxkqlu kx Gct sa na-arlapxle nidr mz nzayzlu-krbzle nzkrka'-krdr. Mc Sam 11 x 125.
- 5) Nabz ngr Jerusalem mrkc tqtungr Mangr-nzangiongr Yawe mz Newz Saeon, murde Gct mnc mrlcde. Mc Sam 46 x 87.

- 6) Nabz ngr nznginikr Gct King r lr Jiu. Mc Sam 29 x 93.
- 7) Nabz ngr nzabrtzlvzkr lr Jiu king rdr kc tqyrlqzbz Yawe badr mz nzaovxio-krde enqmi rdrng. Mc Sam 2 x 72.
- 8) Nabz kx nzngnelz-ngrdr Jerusalem mz nzangiongr. Mc Sam 84 x 122.
- 9) Nabz ngr nzyrplapxngr kx na-alvztr-ngrdr leplz mz nqm q kxtubq x nqm q kx vz-rbr. Mc Sam 1 x 73.
- 10) Nabz kx rpile doa kx takitrde nzprtrkrde mz Mangr-nzangiongr Yawe, x doa kx takitrde nzayrplapxkr Yawe nide. Mc Sam 15 x 24.
- 11) Nabz kx pipxle be ngr lr Israel badr Yawe. Mc Sam 68 x 105.
- Mzli kc tztwzng r lr Jiu nabz nedrng, ngaldr li lxblr. X ngaldr lcng nzngi-kzte-lzbqng, murde ngalrde krali yokaetipxle drtwr ngr krkc kai. Rblx nzpipx-krgr kxmu ngaldr krali amrlx. A' kzdung nzpipxlr drtwr kcpwz mz natq kx blepxngr. Mc Sam 146:2.
- Naglqlzx Gct rngc mzli ka tqlube-ngrne,  
X na-angrlvzx nide.
- Kzdung nzpipxlr drtwr kcpwz mz nzymne-ebzpxngr. Mc Sam 18:2. Kzdung natq kx apule 'lrpalvc' nzkrlyz-tpwzlr lrtzlvz ngrgung. A' natq lcng nztakitrdz nzpipxkrdr drtwr kcpwz tzpipxlr lr Jiu. X krlzamu nzrmcti-krmu drtwr ngrde mz ngalrde krali o veatibzmu mz kzdq lrtzlvz o rlwxamu natq lc mz Nzalvztr-ngrng Kxmyapxbz kc tqyc mz nibr buk lc. Kzdq kz natq kxmule lc tqngi 'temz ngr lomr kc tqyrputrngr nipna.'

Nim lrpalvc nyznge peto,  
X Mevalu nge kx arlapxle ninge.

Kzdung nzipix-krdrle nzayzlulr. Mc Sam  
75:10.

Rpile kx, “Sa naodatix zmatq ngr kxdrka'-  
ngrng,

A' zmatq ngr kxnztubqng sa na-aetunepxbo.”

Sam rtqmqz nzvz-nqblqlr letz ngr alfabet scdr  
lr Jiu. X Sam lcdeng nidr seleng: 9—10, 25, 34,  
37, 111, 112, 119, x 145. X nztekqtr-ngrleng mz  
Natqgu vz-nqblqlr letz ngr alfabet scgu. Delc  
nzxlr-krnguleng blepx kxpipz mz nzxlrngr mz  
nzycmne-krng. Mz drtq Sam lcng, kzdq natq  
kxtpowz rpile kx, ‘Kzdq nabz ngr A, B, C.’

Mzli kang kqlu nzycmnebzng mz Gct mz nzrpi-  
krbzlr kx, ‘Yawe.’ Murde krlc drtqde kc tqpibzle  
badr. X drtq lc yr-kzkr mz Natqgu.

Kzdung mzli kxmu nzwzngnr lr Jiu Sam nedr  
tutr angidr mz nzngnrng mz nabz negung. Delc  
tztekqtrngnr kzdung Sam x kzdung nctr mz nzvz-  
nqblq-krde nabz negung. Sam lcng nidr seleng:  
13:6; 41:13; 47:6; 72:18-19; 75:1; 89:52; 106:48;  
107:8-9, 21-22, 31-32; 116:1-9; 118:1-4, 10-12, 15-  
16, 28-29; 134 amrlx; 136 amrlx; 141:1; 148  
amrlx. Sam 23 yc mz Buk Ngr Nzangiongr mz  
#87, mz nzvz-nqblq-krde nabz negu.

## **Buk Kc Kai**

### **1**

*Sam 1—41*

*Nzmnc-zpwxngr*

<sup>1</sup> Nzmnc-zpwxngr trvzpxpuu mz nzvz-nqblqngr  
nqmq kr kxdrka'-ngrng,

- X nztu-ngrbz mz lrpzki nyz kxnzaleng alwx.  
 X trvzpxpuu mz nzprtr-ngrbz mz  
 kxnzxrnga-ngrdr Yawe.
- <sup>2</sup> A' nzabrtzngr angidr lc vzxpm mz drtwr kx  
 elalm mz nzvz-nqblqngr Loukxtr sc Yawe,  
 X mz nzaoti-zvzkr drtwr natqde ngrlx x  
 nrlckxbq.
- <sup>3</sup> Leplz lcng nzapulr nounc kcng dzbrdr tzkrlzob-  
 zlr lue,  
 X leu rdr trnzbloung.
- X nzdo-zlwzng mz nzvz-krm nrpr angidr.  
 Da kx nzalelr nradr yc-zvzbz.
- <sup>4</sup> A' kxdrka'-ngrng trnzwailru.  
 Nzapulr leu kxglr kcng tztakitrpwzlr nzngc-  
 ngr.
- <sup>5</sup> Delc trnatu-amqngi-ngrdru mzli kc na-ayzlu-  
 ngrbz Gct da mz leplz.  
 X trnaprtrpwzung mz kxnztubqng.
- <sup>6</sup> Murde lrpzki rdr tutr me nzayrplapxngr.  
 A' Yawe aclvebzle nzi r leplz kxnztubqng.

## Sam Krali (2)

### *KxnzmcpX Ne Gct*

#### *Kxnzngqngung*

- <sup>1</sup> Lr mrkzbleng nzngqngung mz nzngyatikr  
 drtwrdr Yawe.  
 Murde mane nzyrlqtingr drtwr mz nzatrkati-  
 ingr nide.
- <sup>2</sup> King rdrng x kxnzrmailz rdrng nzyrlwr-lxblrng  
 Mz nzoliqti-krdr nzota-krdr badr Yawe x  
 KxnzmcpX nede. ☆

☆ **Sam Krali (2):2** Aposol 4:25-26

- 3 Nzrpilr kx, “Na-axtzbzku nzmnc lz-krbzku mz zmatq ngrdr,  
Mz nznikitx-krgru nqvi kc tzpe-ngdrdr nigu,  
murde drtqgu naopx.”
- 4 A' King Yawe kc tqmncm Heven yrpalelvzle nidr,  
X xtrnga-ngrde drtwr kcng tzyrlqlr.
- 5 Ycmne-zngyabz badr,  
X nzmwxlr-ngdrdr natqde kxpq.

### *Natq Yawe*

- 6 Murde rpile kx, “Yrlqpex King kc tqmcpxpex Jerusalem  
Mrkc Saeon, newz kxtr nyznge.”
- 7 X King kc tqmcpx Gct, rpile kx, “Napibo nike pim Yawe bange.  
Rpimle kx, ‘Nim Mrlxnge, abzo mzbq ka, sa na-aelwapx-ngrbo mz leplz nzngini-krnge Trtem. ✧
- 8 Rlxtim bange x sa nakabo bam zmatq ngr nzaclvengr neidung amrlx,  
Murde leplz mz nrlc tulvzo nangi nemqng.
- 9 Sa na-aovxioq mrnyzdr mz nzxplr-zlwz-krm,  
Kc na-apule bz kc tqrniglc botol.’ ” ✧  
Natq kx pibz Yawe mz Mevalu nede delcng.

### *Kxnzyrplapxng*

- 10 Delc nimu king x kxnzrmailzng mz nrlc nayrplapxamu,  
X nalalztq-angidramu, mzli ka tqycbe-ngrbz mzli.
- 11 Narnrctrpzmu mz nzamrlue-krmu Yawe,

---

✧ **Sam Krali (2):7** Aposol 13:33; Hibru 1:5 ✧ **Sam Krali (2):9**  
Nzaelwapxng 2:26-27

X mz nzwztr-krbzmu bade.  
 12 Yrngzobzmu mz Mrlxde,  
 Murde ma tqodatile nimu,  
 Mz zngya ngr drtwrde kc tqwou.  
 A' nimu amrlx kcng tzrlatrpzng bade, sa  
 namnc-zpwxamu.

### Sam Kratoq (3)

#### *Nou Nzarlaxngr X Nzaovxiongr*

Nabz ne Devet,  
 kc tqyrle mzli kc tqdwasz-ngrde mrlxde Absalom.

1 Yawe, enqmi rngeng nzkqlu-zlwzng,  
 X nztutitr zvz nardr ninge.

2 Nzrpilr mz nzyapwxti-krdr ninge kx,  
 "Gct trtxpnzng nzoatr-krde nide."

3 A' Yawe, nim kx mnc-ngale-zvzle ninge.  
 Nim nou nzaovxio-krnge x nim kx apqtrp  
 drtwrnge.

4 Delc tqrlxti-ngrbo nzoatr-krm ninge,  
 X ayzluome natqng mz newz kxtr nyzm.

5 Murde namwi-angidrx mz nrlckxbq x melz-  
 mopwc' mz nourla,  
 Mz nzaclve-angidrq ninge.

6 Kxmule-esz' nztu-ngalelvzlr ninge siu ngr en-  
 qmi,  
 A' trtxpnzng nzmwxlr-krnge.

7 Murde krka'-ngrne kx, "Yawe, Gct rng, vzm  
 arlapx ninge,  
 X katxpxbz zmatq ngrdrng."

8 Yawe, nim nou nzarlaxngr,

X da kxmrlzting amrlx kabzme mz leplz nemqng.

## Sam Krapwx (4)

*Abtrpzmu Drtwrmu Mz Gct*

Nabz ne Devet.

*Gct Rnge*

- <sup>1</sup> Gct, ayzlum nzkrka'-krnge,  
Murde dwaki-zvzme bange.  
X mzli kc tqkxpu-ngrne, okatrq ninge.  
Delc naycng r mz drtwrm ninge x naxlr-  
ngrne natqng.

*Kxnmnc-mrbrng*

- <sup>2</sup> ?Nimu leplz, myx mzli kx naesakingr nzatrkatikrmu nzmyalz-krnge?  
?X myx mzli kx naesakingr nzmrlzkr bamu da kx ngi brmrda x nzpokianger?
- <sup>3</sup> Murde nakrlzamu kx Yawe mcpdle nigr leplz kxntubqng kx nanginedeng.  
X mzli kc nakrka'-ngrbo bade, sa na-ayzlumle natqng.
- <sup>4</sup> Bzkq nabztq ngr nelzmu mailzle nimu mz alwx.  
A' na-aoti drtwrmu nqmq krmu mz nzyrbq-lrpi-krmu mz nelvq nyzmu mz nrlckxbq.  
☆
- <sup>5</sup> Zbz na-abtrpzmu drtwrmu bade,  
X nakabzmu bade blz, mz nzvz-nqblq-krqu natq kc tqkapxmle bagu.

*Gct Rnge*

- 6 Yawe, leplz nemqng nzqqlung kx nzrpimlr bange kx, “?Myx mzli kx namnc-zpwx-nrgu?”  
Delc tqkrka'-ngrbo kx na-amrlzq nigr.
- 7 Murde mzli kc tqamrlz-ngrn ninge, abrtz-zlwzx Myaszpxle nzabrtzkr leplz kx dakxnzng nadr x waen mqdr kqlu.
- 8 Mzli kc tqyrbq-ngrne, mwi-angidrx mz nrck-xbq,  
Murde nim kx aclve-zpwxle ninge.

## Sam Kranzlvqn (5)

### *Nivz Lrm O-ngalelvzle Nigr*

Nabz ne Devet kx yrbzle mz kxrmailz ngr dzbe kxnzngrng.

### *Nzkrka'ngr*

- 1-2 Yawe, nim King x Gct rnge. Rlxtibo bam kx naxlrme natqnge,  
X na-aoti kz drtwrm, mz nzatutr-krm nzkrka'-krnge.
- 3 Kxetu, mz nourla kang kqlu natqnge sa navzbz bam.  
X nakrka'-zvzbo bam, mz nzaenzli-krbo natqm kxmrlz.

### *Kxdrka'-ngrng*

- 4 Yawe, trnginipqu Gct kx abrtzlvzle da kxtrka.  
X trmnc-lxblrwamuu mz kxdrka'-ngrng.
- 5 Leplz kx nzglqpx-lzbqng trtxpnzngr nzmncr-krbzlr bam,  
Murde rblxbz mz leplz kx mrlz-zvzbz badr nzale-krdr alwx nztutr-krbzlr mz mzpq.



<sup>6</sup> Odatiq kxnzpokiang,  
X obqso-zvzq kxnzrnibqng x kxnzesabrting.

### *Kxnztubqng*

<sup>7</sup> A' mz nzaodu-zvz-krm, delc navztr-ngrne  
Mangr-nzangiong r nim,  
X nayrngzobo mz nzamatqng r nim.

<sup>8</sup> Yawe, mailz ninge mz nqm q krm kxtubq,  
murde enqmi rnge nzkqlu-zlwzng.  
X aelwa-zpwx-ngrm bange me pnz drtwrm.

### *Kxdrka'-ngrng*

<sup>9</sup> Da angidr trvzpxpuu mz nao enqmi r ngeng.  
Murde mz nabzdr la nzodatingr tpxwz.  
X mz nzymne-krdr nzmailzlr leplz  
Mz nzbatr-krbzlr nzbz-krdr esz'-krdr. ✧

<sup>10</sup> Gct, plzpx alwx ngrdr x ayrplapx nidr,  
Mz nzprt看-mou-krdr mz trtxki scdr.  
Mapulrpxngr nidr mz nzkqlukr alwx ngrdrng,  
Murde nzpctxpx-zvz-ngrdr nim.

### *Kxnztubqng*

<sup>11</sup> A' leplz amrlx kcng tzabrtrpzlr drtwrdr bam  
na-abrtzng.  
X nangr-along mz nzalal-krm drtwrdr.  
Aclve-angidr kxnzmrlztilr nim  
Murde nabilvzlr nim.

<sup>12</sup> Yawe, amrlz-zvzq kxnztubqng. X nivz lrm o-  
ngalelvzle nidr  
Mz nzapu-krde temz ngr lomrdr kc tqyrpu-  
trngr nipna.

---

✧ **Sam Kranzlvqn (5):9** Rom 3:13

## Sam Kraesz'mz (6)

### *Drle Mzke'*

Nabz ne Devet kx yrbzle mz kxrmailz ngr dzbe kxnzngrng.

### *Nzkrka'ngr*

- 1 Yawe, kxmule-esz' drtwrm nya,  
A' bzkq pnanatiq x ayrplapxq ninge.
- 2 Kxetu, nayc mz drtwrm ninge murde yangrn-gapex.  
X axplr mou nrkrdrtnge murde yagox-zlwzx.
- 3 ?Rnrcti-lzbqtrpo bam mz zmwxlz,  
X aenzli-alopex nzokatr-krm ninge?

### *Nzarlapxngr*

- 4 Yawe, tekqtr drtwrm x arlapx ninge,  
Mz nzaodu-krm kc tqyc tqyc.
- 5 Murde mz nzbzngr trpengr nzrglqlzngr nim.  
X mz gq nzangiongr nim kc tqyrkrpxpebz.

### *Nzyrningr*

- 6 Drtnge mewepe mz nzkrka'-zvz-krbo bam.  
X mz nrlckxbq kang kqlu, nqni x pilo pnrnge  
nzlrpr-ngrdr drle mzke'.
- 7 Mzke' vaotxtrpebz x tropxpeu,  
Murde nzyrni-krnge lc nzngi-batrplr enqmi  
rngeng.

### *Nzaovxiongr*

- 8 Nimu leplz kxdrka'-ngrng amrlx, dwaszpeamu  
ninge!  
Murde Yawe sa tqlalztqpem mz nzyrni-  
krnge.
- 9 Xlrpemle nike rlx tibo,

X sa na-ayzlumle natqngē.

- <sup>10</sup> Krka'-ngrne kx drtq enqmi rngeng namya x  
narnrcti-lzbq-kzng mz zmwxlr,  
X naplc-aning mz nzaovxio-krnge nidr.

## Sam Krarlimz (7)

*Yawe Pipxle Nztubqkr Lepz O Nzvz-rbr-krdr*  
Nabz ne Devet, kx ngr-ngrbzle mz Yawe,  
mzli kc Kus, ncblo ngr nqvi lr Benjamin,  
tqatrkatī-ngrde nide.

### *Vz-rbrx O Trtingr*

- <sup>1</sup> Yawe, Gct rnge, arlapxbz ninge mz mq ncblo  
kcng tzayotilr ninge.  
Murde nim me rlakitr̄x.
- <sup>2</sup> Murde ma tzkivztibzlr nrkrdr̄tqngē mz nzapu-  
krdr̄ laion,  
X nzkilznedr ninge me trpnzngr kx naoka-  
trle ninge.
- <sup>3</sup> ?Yawe, Gct rnge, nike ale-rbrx?  
?Mqngē alele dq da kxtr̄tubqu?
- <sup>4</sup> ?Myx kxmule, alebo dq da kxtr̄ka mz kzten-  
geng?  
?O atrkatix dzbede negrng mz nzarlapx-  
krnge enqmi rgrng?
- <sup>5</sup> Nzmu kx tqmule lcde, sa tqmrlz nzrlr-krbzme  
ninge mz mq enqmi rngeng,  
Mz nzmaneuti-krdr̄ ninge mz nzapu-krdr̄  
kuli x nzlolvz-krdr̄ ninge.  
X natabrt̄ilr ninge x narnzbr̄tiolr ninge mz dr̄tc',  
X na-ayrbq̄txdr̄ namz rnge elr.

*Aryrplapx Kxnz̄vz-rbr̄ng*

- 6 Yawe, tumilzm zngya x aesaki leplz kcong  
tzngyati drtwrdr ninge.  
Okatr ninge murde yrlqpeq mzli r nzpipx-  
krm nztubqkr leplz amrlx o nzvz-rbr-krdr.
- 7 Ayrlwr leplz mz nrlc tulvzo murde natu-  
ngalelvzlr nim,  
Mz nzaclve-krm nidr Heven.
- 8 Yawe, nim kx rpibz mz leplz kx nztubqng o  
nzvz-rbrng.  
Pipxbz mz leplz kx mnctr-zpwxpebo bam  
murde nabzngc opx x tubq.
- 9 Aesaki nqm̄q krdr kxdrka'-ngrng x tu-zvzbx mz  
nibr kxnztubqng.  
Murde nim kxtubq-esz'ngr x obqplxq nabz x  
nzvzkr nardr.
- 10 Gct kxmyatxlz, nim temz ngr lomrncg kc  
tqyrputrngr nipna.  
X arlapxq krkcng nabzdr tq̄lq.
- 11 Tubqq mz nzryrlq-krm drtwr.  
X pipxq kx takitrde nzayrplapxngr kxnzvx-  
rbrng.

### *Tekqtr Nqm̄q Nr Drtwrm*

- 12-13 Nzmu kx trnztekqtrlr̄u nqm̄q krdr kxtrka, sa  
nayrlamzq toki r vea scm,  
X nalalvzq popz' scm mz nzpnz-krm nidr mz  
nipna kxngc.
- 14 Kxdrka'-ngrng nzpetilr rtq̄ da kxtrka.  
X lvlczm nc nzodatingr. X nrade yrlq̄bzle ngi  
nzpokianger.
- 15 Trtxki kc tzamwiti-ngrdr leplz,  
Sa naprtz-mou-ngrdr.

- 16 Drtwr ngr nzkxpungr kcng tzesabrti-ngrdr  
leplz, sa nangq-moulr nidr.  
X nzodangr kc tzalelr sa naetq-moungr  
drtqdr.
- 17 Nangrx mz nzglqlz-krnge Yawe kc tqmyalz-  
esz'ngr!  
X na-awibo bade murde tubq-esz'ngr!

## Sam Krartqmz (8)

### *Drtwr Kx Yrlq Kxrpalz*

Nabz ne Devet kx yrbzle mz kxrmailz ngr dzbe  
kxzngrng.

**1 Yawe, nim Kxetu rgr.**

**Drtqm myalz-esz'ngr mz nrlic tulvzo.**

X nzmyalz-krm myaszlzle bongavz.

**2** Mz nzvz-nqblq-krde me pnz drtwrm, doa kxzn-  
topwzng nzglqlzlr nim.

X natqdr ailvzole nzrpibqtikr enqmi rmqng  
x awx-nabule nidr. ☆

**3** Kxrpalz, mzli kc tqobqlz-ngrne mz bongavz,  
Mclzx nzlulikr temz x vri kcng tqwz-  
ngrnqng.

**4** ?A' memule tqmatq-ngrgr mz drtwrm?

?X memule tqmrlzti-ngrn nigr leplz txneng?

**5** Murde wz-ngrn leplz vzo kxpipz mz lr Heven,  
X kabzme badr zmrlue x nzamatqngr.

**6** Yrlqq nidr mz nzaclve-krdr da kcng tqwz-ngrn,  
X da amrlx nzyclzbzng mz zmatq ngrdr. ☆

**7** Nzaclvelr animol krbzq,  
X animol kzpeto kz.

---

☆ **Sam Krartqmz (8):2** Matiu 21:16 ☆ **Sam Krartqmz (8):6**  
Hibru 2:6-8; 1 Korint 15:27

Sam Sam Krartqmz (8):8 xiv Sam Sam Krarpwxmz X Kranzpnv (9 x 10):8

<sup>8</sup> X nidr kxnzetung r utc x nc,  
X da amrlx kx nzwrneng prla.

<sup>9</sup> **Yawe, nim Kxetu rgr,**  
**Drtqm myalz-esz'ngr mz nrlc tulvzo.**

## **Sam Krarpwxmz X Kranzpnv (9 x 10)**

*Nztaokr Kxdrka'-ngrng*

Nabz ne Devet kx yrbzle mz kxrmailz ngr dzbe  
kxnzngrng.

*Kzdq Nabz Ngr A, B, C*

<sup>1</sup> Awi Yawe! Naglqpx-atwrnr-ngrne nim.

Ale-zvzq da kcng tzkctipxng, x napipxxng.

<sup>2</sup> Angrlvzx drtqm.

Bilvzx nim kc tqmyalz-esz'ngr.

<sup>3</sup> Brngzvxitx nyzylukr enqmi rnge mz nzmc-krde  
nim.

Bz x tao-ngrde nzulrm.

<sup>4</sup> Clvetio-lzbqx x rpiq kx tubqx.

Clveq leplz amrlx mz nzwxbuo-krme mz  
tron, x ayzlu-ngrbzme da badr.

<sup>5</sup> Dalr nrlc nzmailzlr kxdrka'-ngrng.

Delc napnanati-ngrn nidr x

Drtqdr na-amrbrtx-alobzme.

<sup>6</sup> Doa ngr alwx lcng nzyrkrtrpeng.

Enqmi rngeng trpengr nzdcpx-krdr mz  
drtwr leplz x mztea nyzdr amznrpe-ngrnq.

<sup>7</sup> Eu, a' Yawe ngini-alom King.

Elalvzx nzwxbuo-krme mz tron nyzm murde  
nzayzlu-krbzme da mz leplz tubq.

<sup>8</sup> Eu, murde nzaclve-krm nrlc tubq-esz'ngr,

*Esakrlrngr nzipx-krm nztubqkr leplz o trt-  
ingr.*

<sup>9</sup> *Gct, nim lrpalc nyz kxnzobqszong.*

*Glxx kx nim me nzrlakitrkr mzli kx prtzngr  
da.*

<sup>10</sup> *Gct, krkcng tzkrlzlr nim nzabrtrpzlr drtwrdr  
bam.*

*Itoto x doa amrlx kcng tzrtangrtilr nim,  
trmrbrtru mz drtwrm.*

<sup>11</sup> *Itoto x nigu amrlx napipxbzku mz kxnzmnc-  
mrbrng da kcng tqale Yawe.*

*Jerusalem ngi mzteadau nyzde mrkc tqmnc-  
ngrde. Na-angrlvzku nide.*

<sup>12</sup> *Jzslc krkcng tzrnibqting leplz mz nzayzlu-kr-  
mopwzle badr da kcng tqtrka tzalelr.*

*Kxnzmncng mz drtq kxetq sa na-ayzlu-  
kzpze badr natq ngr nzyrni-krbzlr bade.*

<sup>13</sup> *Kxetu, naye mz drtwrm ninge x mcom kxmu  
nzaetq-krm enqmi rngeng drtqngc.*

*Kxrpalc, bzkq rlrpx-ngrn nzbz-krngc.*

<sup>14</sup> *Kxarlapx, naelalc-ngrm drtwrnge nzarlapx-  
krm ninge.*

*Lcplz kxkqlu Jerusalem sa naxlr lr nzglqlz-  
krngc nim.*

<sup>15-16</sup> *Lalztqmamu! Yawe aelwapx-lzbqngc mz  
nztubqkr nzayzlu-krbzle da mz lcplz.*

*Murde lr mrkzbleng nztao-moung mz gq kx  
nzekqtilr.*

*Mz br kx nzatu-kapqlr, nzdwatr-moung elr.*

*Mz trtxki kx nzamwilr, nzprtz mou kxdrka'-  
ngrng elr.*

<sup>17</sup> *Mz nzesablqti-krdr Gct,*

*Nabz-ngdrdr leplz ngr nrlc.*

- 18 Nzmu nakxpung, trtxpnzngr nzmrbtritrkr  
drtwr Gct nidr.  
Nzobqtixngr kxtrnzrngiscung trtxpnzngr  
nzbotxpx-krde.
- 19 Natulzme Yawe, mz nzaryplapx-krm lr  
mrkzbleng amrlx.  
Na-aelwapx-ngrn kx drtwr kxnzetung amrlx  
ngi brmrda.
- 20 Namwxlrtilr x na-amrluelr nim.  
Nakrlzlr kx nidr leplz txneng, x sa nabzng.

## (10)

- 1 Opxm kx mncme rlu, Yawe.  
Opxm kz kx mnc-kapqq mzli kc tqkxpu-  
ngrgr.
- 2 Obqm! Kxdrka'ngr glqpx-lzbqmile nzayoti-krde  
leplz kxnzkxpung.  
Pnz drtwrnge kx sa namwati-lzbq mz br  
scde.
- 3 Pipxle kx nzaotikr drtwrde da kxtrka zlwz ngi  
da kxmrlz mz nzbilvz-zvz-krdele.  
Pivxile Yawe x ptxpx-ngrde nide, a' amrlzle  
leplz kx nztrkibrng.
- 4 Rblx nzrtangrti-krde Gct murde glqpx-lzbq.  
Rblx nzrmcti-krde Gct murde mz drtwrde  
trtxpnzngr Gct.
- 5 Rlr! Xplrmi-zlwzle nzmncngr kxtrka, a' ptxpx-  
ngrde me pnz drtwrm.  
Suti txpwz drtwrde nzyrpalelvz-krde enqmi  
rdeng.
- 6 Sc tqrpipele kx, "Trpnzngr da kxtrka kx  
naprtzm bange,  
X trpnzngr nzodatingr ninge kalr."



- 7 Sc tqglqlz-zvzle alwx x nzpokianger.  
 Natqdeng amrlx ngi dalr nzrpikitingr, nzr-  
 pibqtingr, x nzrpilzng. ✱
- 8 Trmrlzu nzmnc-kapq-aepztr-krde mztea mz  
 nzrnibq-krde kx nabzdr lq.  
 Tu zvz mz nzaenzli-krde ncblo kxesz'nebz.
- 9 Tqtu-kapq apule laion kc  
 Tqtcngzpxm mz gq nyzde mz nzkivzti-krde  
 ncblo kx trxplru.
- 10 Vz zvz nzxplr-zlwz-krde.  
 Vz zvz nzatrkatikrde nzmncr kxnzkxpung.
- 11 Vz-rbr kxdrka'ngr mz nzrpi-krde kx, "Gct  
 trobqpepuu bange.  
 Wzx a' trkrlzleu da kcng trka tqalex."
- 12 Wztitxpxbz nzwzkr ncblo kxdrka'ngr, kx Yawe,  
 mz nzayrplapx-krm nide.  
 Wai-ngrn da lc murde bzkq mrbrtr mz  
 drtwrm kxnzkxpung.
- 13 Wai-ngrdele kxdrka'ngr pxtxpx-ngrde nim.  
 X rpile kx, "Gct trtxpnzng nrayrplapx-krde  
 ninge."
- 14 Xlqkqamu nimu kxdrka'-ngrng, murde Gct  
 mcle da kxtrka lcng amrlx tqaleamu.  
 X oliqtile nzokatr-krde kxnzkxpung kcng  
 tzrtangtilr nide.  
 Xlrle nidr murde nide kc tqokatr zvz kxn-  
 zobqszong.
- 15 Yawe, katxpxbz zmatq ngr kxdrka'-ngrng.  
 Yrpalelvz nidr x ayrplapxng mz da kxtrka  
 kcng tzalelr, navz x naesaki zpwx.
- 16 Yawe, nim King.  
 Yc zvz nzaclve-krm nrlc.

---

✱ (10):7 Rom 3:14

Yrlqtxpx mz drtc' nyzm krkcng trnzangiolru  
nim.

17 Zmatq ngrm etu-esz'ngr, murde krlzpe-kaiq  
nike narlxtibz kxnztubqng.

Zbq kalvz axplrq nidr x kabzme badr nike  
nzrlxtilr.

18 Zbo ngr leplz kxnzobqszong x kxnzkxpung, sa  
na-arlapxbzmeng mz zmatq ngr leplz mz  
nrlc ka.

Zmwxlr amrlx sa na-aesaki-zvzq.

## Sam Kranzpnu-esz'-nrade-esz' (11)

### *Yawe Nide Me Rlakitrx*

Nabz ne Devet kx yrbzle mz kxrmailz ngr dzbe  
kxnzngrng.

1 Kztengeng, Yawe nide me rlakitrx.

A' myx kxmule tqrpi-ngrnamu kx, "Ngrlrlz  
mz newz mz nzrlapx-krm.

2 Murde leplz kxdrka'-ngrng nzmnc-kapqti-zvzlr  
leplz kxnztubqng,

Mz nzpnz-krdr nidr mz nipna.

3 Trpengr doa x da kx na-abrkitrku drtwrgu,

X nigu kxnabzdr lqngi, trpengr da kx na-  
aleku."

4 Bzkq kxmu nzymne-krmamu lc bange, murde  
Yawe kc tqmncbe mz Mangr-nzangiongr  
nide,

X sc tqwxubube mz tron nyzde Heven mz  
nzobqplx-krde nabz leplz amrlx.

5 Yawe sc tqobqtr vzv mz nzmncr kxnztubqng x  
kxdrka'-ngrng.

X pxtxpx-ngrde nzrmcng kxnzrnibqng.

- 6 X mz nzayrplapx-krde nidr, sa nartctio-ngrbze  
badr muli rplz kxngc na-apule nzdckr  
tewa.  
X sa na-abxutile nidr mz nzulr nenq kxpq.
- 7 A' krkcng nabzdr tqłqngi sa namncng badr,  
Murde Gct tubq-esz'ngr x mrlz bade da  
kxtubq.

## Sam Kranzpnu-esz'-nrade-li (12)

### *Da Kxtrka Mz Nrlc Tulvzo*

Nabz ne Devet kx yrbze mz kxrmailz ngr dzbe  
kxnzngrng.

- 1 Yawe, okatrp ninge murde trpengr mrlx kxtubq  
kx mnc mzli ka.  
Murde mz nrlc tulvzo leplz kxnzmrlzng  
nzayrkrxtxtrpeng.
- 2 Leplz amrlx mz nrlc nzapokiati-lzbqng.  
Nzalqngitilr nzycmnengr mz drtwr kx xlva.
- 3 Rlxtibo bam nzaesaki-krm natq leplz  
kxnzpokiang,  
X odati nidr mz nzglqpx-lzbq-krdr.
- 4 Murde nzrpilr kx, "Naogr nalctwz txpwz mz  
nztwz-krgr da kx suti drtwrgr.  
X trpnzng kx naetum bagr."
- 5 A' Yawe rpile kx, "Mcpex nzaetq-ngrbz drtq  
kxnzkxpung,  
X nztangqgxr kxnzmwati drtwrng.  
Delc na-arlapxx nidr mzli ka.  
Da kc tqwai nzsutikr drtwrdr le."
- 6 Yawe, abrtprzkr drtwrgr mz natqm lcng, tqłubq  
tqlq.

Murde nzopx-krdr apule silvz kc tzayrleni-  
ebirngr mz nyr.

7-8 Kxmule-esz' leplz lcngr trmya-ngru drtqdr  
nzglqpx-lzbq-krdr,

X nzrglqlz-krdr da kxtrka mz nrlc tulvzo,

A' lxngitigr kx sa na-aclve-zpwxq nigr,

X sa na-arlapx-zvzbzme nigr mz mq leplz  
lcngr tzdrka'ngr.

## Sam Kranzpnu-esz'-nrade-tq (13)

*?Yawe, Na-aenzli-alopex Nim?*

Nabz ne Devet kx yrbzle mz kxrmailz ngr dzbe  
kxznzngng.

<sup>1</sup> ?Yawe, myx kxmule, namrbrtitr-alope drtwrm  
ninge?

?Namnc-rlru-alopeme bange?

<sup>2</sup> ?Nelznge navzdz-alopem?

?X drtwrnge navz-alope?

?X namnclz-alopebo mz zmatq ngr enqmi  
rngeng?

<sup>3</sup> Yawe, obqm bange x ayzlum natqnge.

Ka-mop bange nzxplr-krnge murde ma  
tqbzx.

<sup>4</sup> Bzkq rlr-ngrbzme mz enqmi rngeng nzpi-krdr  
kx nzaovxiopelr ninge.

X bzkq rlr-ngrbzme nzabrtzlvz-krdr  
nznrcti-lzbq-krnge.

<sup>5</sup> Murde abrtprpo drtwrnge mz nzaodu-krm kc  
tqyc tqyc.

X sa na-abrtz-zlvz-ngrne nzarlapx-krm  
ninge.

- 6 Yawe, sa nangrbo bam murde amrlz-zlwzpeq ninge.  
Mz da amrlx kx kame bange, Yawe, sa nangrbo bam.

## Sam Kranzpnu-esz'-nrade-pwx (14)

### *Nzngqngukr Kxtrnzrlxngitiung*

Nabz ne Devet kx yrbzle mz kxrmailz ngr dzbe kxnzngrng.

- 1 Leplz kxnzngrngung mz drtwrdr nzrpilr kx,  
“Trpnzngr Gct.”  
Leplz lcng nzvz-rbrng x nzale-txpwzng da kxtrka zlwz.  
Trpnzngr leplz lcng kxtubq.
- 2 Yawe mncom Heven, x sc tqmcomle leplz amrlx,  
Mz nzmckrde neke yrplapx mz nzrtangrti-krde nide.
- 3 A' nzesablqtilr Gct amrlx ngrdr  
x drtwrdr esz'ti mz nzale-krdr da kxtrka.  
Trpnzngr nidr kxes' kxtubq. ✧
- 4 Delc tqrpinger Yawe kx, “Leplz lcng tztrkang  
nznibqtitxdr leplz nengeng  
Nzapulr kx nznibqng da kx nangqdr.  
X mrbrtr mz drtwrdr nzkrka'-krmlr bange.  
?Myx kxmule, trnzkrzlru da kxtubq?”
- 5 A' narngidrtio-lzbqng x namwxlrlvzti-lzbqng,  
Murde Gct tedr badr kxnztubqng.

---

✧ **Sam Kranzpnu-esz'-nrade-pwx (14):3** Rom 3:10-12

<sup>6</sup> Vz zvz nzrpwa'-krbzlr me pnz drtwr kxnzrlxn-giting.

A' Yawe mnc-ngalelvzle leplz nedeng.

<sup>7</sup> Sutitx zlwz drtwrnge kx Gct rgu kc Saeon narlapxle leplz nedeng.

Murde mzli kc nayzlu-mou-ngrmle, namnc-zpwxku badr.

X nigu lr Jekop drtwrgu sa naelalzm.

X nigu lr Israel sa na-abrtz-ngrgu da lc. ☆

## **Sam Kranzpnu-esz'-nrade-nzlvqn (15)**

### *Doa Kx Tubq Mz Nzobqkr Gct*

Nabz ne Devet.

<sup>1</sup> ?Yawe, neke navztrpz Mangr-nzangiongr nim?  
?X neke takitrde nzangio-krde mz newz kxtr nyzm?

<sup>2</sup> Doa kxmule lc nabzde nalqngi.

Nqm̄q krde natubq. X natqde nangi da angidr.

<sup>3</sup> A' bzkq rpibqti leplz. Bzkq atrkatile kztede.

X bzkq pikitile kxnzesotrpzng bade.

<sup>4</sup> Napxtxpx-ngrde kxdrka'-ngrng.

A' na-amatqle kxnzamrluelr Yawe Gct.

Na-atutr-zvzle nzesalz-krdeng,

Kxmule-esz' rblxbz bade.

<sup>5</sup> Narlxtile kxnzrbilqngr kx takitrde trauscedec kctqrlrpx-ngrde.

Bzkq pokiatitrle mrlx kxtubq,

Kxmule-esz' leplz nzrpilr naxpelr nide.

Doa kx vz-nqblqle natq lcng sa natu-amqngi  
zvz.

## **Sam Kranzpnu-esz'-nrade-esz'mz (16)**

*Drtwr Ngr Nzmmc-zpwxngr*

Nabz ne Devet.

*Nzkrka'-krnge*

<sup>1</sup> Yawe, arlapx ninge,

Murde nim kx abrkitrx drtwrnge.

<sup>2</sup> Nim Kxetu rnge

X nou da kxmrlzting amrlx kcng tqngiscn-  
geng.

<sup>3</sup> Leplz nemqng kcng tztrng mrka mz nrlc,

Nzmyalz-zlwzng x mrlz bange nzmnc-krgr  
badr.

<sup>4</sup> Nzfxpukr krkcng tzangioldr kxtrngiu Gct angidr  
sa nartxlvzlvz zvz.

A' trna-angiowxu gct rdr kxnzmncng  
mzlilxlr,

X trnakrka'pou badr.

X trtxpnzngr nzpulio-krnge mepyr ngr blz  
mz olta nyzdr.

<sup>5</sup> Yawe, apume bange drtc' kxmrlz nyznge x tzme  
bange lrpzki kx nao-zlix.

X nzlu-krnge yctrpz bam.

<sup>6</sup> X mrlzm bange me ngi bz ngr da kx katimeng  
x da kx trkatipwe'u bange.

Murde mrlzm bange da amrlx kcng tqkati-  
meng mz nznigini-krme bange trtenge.

### *Nzglqlz-krnge Yawe*

- <sup>7</sup> Yawe, naglqlz-zvzx nim mz nzmailz-krm ninge.  
Murde mz nrckxbq aopxme nabznge mz  
nzaongr drtwr kxmrlz.
- <sup>8</sup> Dcpz vzv mz drtwrge kx mnc-zvzme bange.  
X trpnzngz doa x da kx na-aycngzrlle ninge,  
murde tu-zvzme mz nibzngz.
- <sup>9</sup> Delc nabznge tqabrtz-zlwz-ngzde x drtwrge  
tqelalz-ngzrme.  
X tqmnc-zpwxpe-ngzrne.
- <sup>10</sup> Murde tr-rlrpx-ngzrwq zmatq ngr nzbzngz  
nzaovxio-krde ninge, ncblo kxtr nem.  
X trayrbqtxwq nrkrdrtqngz mz gq mz  
nzmibi-krde.
- <sup>11</sup> A' aelwa-zvz-ngzrm bange drtwr ngr nzmnc-  
zpwxngz:  
Nzabrtz-zlwzngz kxmyalz vzpxm mz nzxngi-  
ngzrbz nim.  
X da kxmrlzting nzvzpx-zvzmqng mz mqm.  
☆

## **Sam Kranzpnu-esz'-nrade-rlimz (17)**

### *Sa Namcx Mzpq*

Nabz ne Devet.

### *Trvz-rbrwxu*

- <sup>1</sup> Yawe, lalztqm mz nzrlxti-krbo nztubqngz.

---

☆ **Sam Kranzpnu-esz'-nrade-esz'mz (16):11** Aposol 2:25-28,  
31; 13:35



- Xlrm natqnge murde nzkrka'-krbo bam  
trvzpxpuu mz naonge, a' vzdz-zpwxm mz  
nabznge.
- 2 Mzli kc napipx-ngrn neke vz-rbr, mnc mz  
nrlarde nyznge,  
Murde nim kx rkrlz nike tubq.
- 3 X krlz-zvzq nzaokrnge drtwrge  
X obqplxq nabznge mz nrckxbq.  
A' trpnzngr da kx vz-rbr kx rmctiq.  
X pnzpe drtwrge kx naonge trna-akawi-  
ngrwxu alwx.
- 4 Tralewxu da kx nzrtultrngr, da kc tzwai  
kzdung leplz.  
Murde vz-nqblq-zvzx natqm.
- 5 Trtaowxu mz nzatalzngr,  
Murde o-zli-zvzx lrpzki rm.

### *Nzkrka'ngr*

- 6 Gct, krka'bo bam murde lalztq-zvzme bange.  
Kxetu, xlrn natqnge.
- 7 Delc na-aelwa-ngrme bange nzaodu-krm kc  
tqyc tqyc.  
Murde mzli kc tzrlatr-ngrbz leplz bam, ar-  
lapxbzme nidr mz mq enqmi rdrng.
- 8 Aclve angidr ninge na-apule dztum kx matq  
zlwz mz drtwrm.  
X amnc-kapqbz ninge da kc tqwai kio mz  
nzwxbulvzo-krde neideng.
- 9 Murde ma kxrka'-ngrng tzlolvlzr x tznibqlr  
ninge,  
Mz nztu-ngalelvz-krdr ninge.
- 10 Trpnzngr nzrycngz mz drtwr kx ycbz badr.  
A' nzglqpx-lzbq-zvzng.

11 Trpengr nrlarde kx navzkix, murde nzmnc-ngalelvzpelr ninge.

X tzryrlqng drtwr kx nametxbo badr.

12 Nzapulr laion kcng tzaenzli-kapqlr

Mzli kx nadwa-ngrmlr mz nzpesaliti-krdr ninge.

### *Nzayrplapxngr*

13-14 Yawe, otaamu badr enqmi rngeng x aovx-iong.

Kapxm ninge mz mq kxdrka'ngr lcng mz zmatq ngrm.

Arlapx ninge x ayrkrtxtr nidr.

Murde nzabrtz-krdr yc txpwz mz nrlc ka.

Ayrplapx leplz ngr nrlc mz zvetq kc tqoliqtipeq nakabzme badr,

Navz navz nakrlzbzle doa nedrng x doa ne doa nedrng.

15 A' krlzx kx sa namcx mzpq mz nzvz-nqblq-krde nztubq-krnge.

X mzli kc natulz-ngr-mopwc', sa na-abrtz-ngrne nzmnc-krbo bam.

## **Sam Kranzpnu-esz'-nrade-rtqmz (18)**

*Yawe Nide Temz Ngr Lomr Kc Tqyrputrngr  
Nipna*

Nabz ne Devet, ncblo ne Yawe, kx yrbzle mz kxrmalzl ngr dzbe kxznzngrng,  
mzli kc Yawe tqarlapx-ngrbzle nide mz zmatq ngr enqmi rdeng x King Sol.

### *Nqmq Kr Yawe*

- 1 Yawe, mrlztix nim  
Murde axplrq ninge.
- 2 Nim Gct rnge, x butqbr kx rlakitr.  
Nim lrpalc nyznge peto,  
X Mevalu rnge kx arlapxle ninge.  
Nim nou zmatq rnge apule temz ngr lomrnge  
kc tqyrputrngr nipna.
- 3 Kqle-zvzx nim kc tqtakitrde nzrglqlzng,  
X vzme arlapxq ninge mz mq enqmi rngeng.

### *Nzkrka'-krnge*

- 4-6 Yawe, mzli ka tqkxpu-ngrne kqlex nim mz  
nzokatr-krm ninge.  
Murde ycpe pipz nzbz-krnge.  
Opxm kx zmatq ngr nzbzngr sa na-aovxiole  
ninge,  
Mz nzpe-amqngi-krde ninge.  
A' krlzx kx sa naxlrme ninge mz Mangr-  
nzangiongr nim,  
Mz nzayzlu-krme natqng.

### *Zmatq Ngr Yawe*

- 7 Mzli kc Yawe nakaputr-ngrmle, zmatq ngrde  
myalz apule nengq.  
Nrlc ycngrlr-atwrnrngr x wai-kzle nou  
newzng.  
Murde Gct ngyati zlwz drtwrde enqmi rn-  
geng.
- 8 X natqde apu-kzle trmami kc tqyrpupx.  
X ncte vzpx-ngrm zsikapu. X naode rlxpx-  
ngrm nyr x rplz kxpq.
- 9 Lvpxle bongavz,  
X vzom tuom mz dcbz kx botapz'.

- 10 X kzdq enjrl lvcmio-animle nide.  
Mz nzrtwz-krdr nenq.
- 11 Nzlo ngr zbo ngr tewa  
Apule lrpz kx mnc-kapqpx-ngrmle.
- 12 X aelwapx-ngrde zmatq ngrde mz zyzlr kxluli.  
Mz nabz zbo lc bzlrpc tqpctipx x muli-aes  
tqrlxtiom vzmi rplz kxngc.
- 13 Yawe myatxlz-esz'ngr, ngi-batrpzle  
nzyrpupxkr bzlrmei.  
X natqde nzxlr mz nrlc tulvzo.
- 14 Rpna-ngrbzle nipna x aodalitile enqmi rngeng.  
Vz-nqblqzbz bzlrpc x nzvo-alo-ngrdr.
- 15 Mzli kc Yawe tqpnanati-ngrde enqmi rngeng,  
Natqde apzlmle me boo-ngrng,  
X atu-lxlr-ngrde nou nrlc.

### *Nzarlapxkr Yawe Ninge*

- 16 Yawe rtrngztiomle ninge mz nzokatr-krde  
ninge  
Apule kx veclzmle ninge me boongr prla.
- 17 Kxmule-esz' yangrngatrpo mz nzxplrkr enqmi  
rngeng,  
A' sc tqvz zvz nzarlapx-krde ninge.
- 18 Nzvzmqng mz nzota-krgr badr mzli kc tqprtilz-  
ngrde ninge nzkxpu-ngrng.  
A' Yawe sc tqtum mz nibrng.
- 19 Mailzle ninge me nzmnc-zpwx-ngrne,  
X arlapxle ninge, murde abrtzlvzle ninge.

### *Nzvz-nqblq-krnge Yawe*

- 20 Yawe rka-zvzm bange da kxmrlzting mz nzvz-  
nqblq-krde nztubq-krnge.  
X ayzlu-ngrmle da bange murde nabzng  
lqngi.

- 21 Vz-nqblq-zvzx nqm̄ kr Gct r̄nge,  
X tresabl̄qtiwxu nide.
- 22 Yrlq-angidrx Lou kxtr scdeng,  
X aoti zvz drtwr̄nge nat̄qdeng.
- 23 Trvz-rbrwxu mz nzm̄nc-kr̄nge,  
A' yrlqpx-lzbq̄nge mz nzalengr alwx.
- 24 Yawe ayzlu-ngr̄mle da bange mz nztubq-kr̄nge,  
Murde nabz̄nge lq̄ngi mz nzobq-kr̄de.

*Yawe Badr Leplz*

- 25 Yawe, yrlq-zvzbz nat̄qm̄ mz kr̄kcng tzyrlq̄bzlr  
nat̄qdr bam.  
X amrl̄zq kr̄kcng nqm̄ kr̄dr tq̄mrlz.
- 26 Tubq̄bzme mz kr̄kcng nabz̄dr tq̄tubq̄.  
A' lolvzq̄ mz br scm kr̄kcng tzesabr̄ng.
- 27 Avzd̄zq kr̄kcng tzavzo-lzbq̄ng.  
X avzoq̄ kr̄kcng tzgl̄qlz-lzbq̄ng.
- 28 Yawe, nim nou nzlu-kr̄nge, mz nzapu-krm  
kxr̄tekatr lam pnr̄nge.  
X ayr̄kr̄pxq̄ da kxtr̄ka amrl̄x mz nzm̄nc-  
kr̄nge, mz nzapu-krm zyzlr x nyr kxpq̄.
- 29 Gct, r̄ka-zvzme bange zmat̄q ngr̄ nzota-kr̄gr  
badr enq̄mi r̄ngeng.  
X axpl̄r-zvzq̄ ninge mz nzdwa-ngalet̄r-kr̄bo  
nabxbz ngr̄ lrp̄alvc nyzdr.

*Nzmyapxkr Yawe*

- 30 Nqm̄ kr̄ Yawe tubq̄-esz'ngr̄, x nat̄qde ngi da  
angidr̄ zvz.  
X nginibzle lrp̄alvc nyzdr kr̄kcng tzrlat̄rp̄zng  
bade.
- 31 Yawe nide txpwz Gct angidr̄,  
X butq̄br̄ nyzgu.

*Kxokatr*

- 32 Nide Gct kc tqaxplr-zvzle ninge,  
X tzbzle lrpzki rnge kxtubq kx nao-zlix.
- 33 Axplr-zvzbzle nanycnge  
Mz nzvzne-krnge mz nartrkla ngr newz.
- 34 Alvztrple bange nzrpnangr,  
Murde nakrlzx nzrvecngr nalr popz'.
- 35 Yawe, apume bange temz ngr lomrnge kc  
tqyrputrngr nipna.  
X zmatq ngrm ngi popz' ngr nibrnge. Vzome  
murde namyalzx.
- 36 Okatr-zvzq ninge, x rblx enqmi rngeng nzlolvz-  
krdr ninge.  
X trnzta-pulro-ngrdru ninge mz drtc'.

*Kxaovxio*

- 37 Maneux enqmi rngeng,  
Vz vz x lolvz-zpwxng mz nzodati-krnge  
nidr.
- 38 Tzx nidr, vz vz x nztaong amrlx mz drtc'.  
X trpnzng kx tulzm.
- 39 Axplrq ninge mz nzotangr.  
Delc tqaovxio-ngrne enqmi rngeng.
- 40 Nim kx rngi-batrp nzdwaszkr enqmi rngeng  
ninge,  
Murde naodatix krkcng tzpxtpx-ngrdr  
ninge.
- 41 Nzbztidr nzyrningr kx naokatrng. Nzkqlelr  
Yawe.  
A' trpnzng kx arlapxle nidr.
- 42 Wibrtix nidr, vz vz nzapulr bq kc tqtwz nenq.  
X rnzbrtix nidr, vz vz nzapulr dxlrbi ngr  
lrpzki.

*King Kxmcpx Yawe*

- 43 Arlapxbzme ninge mz mq leplz kx nzmwati  
drtwrdr ninge.  
X yrlqq ninge mz nzacive-krnge drtc' nyz-  
drng,  
Murde lr mrkzbleng namnclzmqng mz  
zmatq rnge.
- 44 Nzyrngzomqng bange  
X nzvz-nqblqlr natqnge.
- 45 Nzrnrcitr-lzbqmng bange.  
Nzprpxmqng mz lrpalvc nyzdr. X  
nzmexmqng bange.
- 46 Yawe, nim Gct kx lu. Glqpxx nim murde nim  
butqbr nyznge.  
Glqlz-zvz-ngrne nim murde arlapx-zvzq  
ninge.
- 47 Ayrplapx-zvzq enqmi rngeng.  
X okatrq ninge nzaovxio-krnge lr mrkzbleng,
- 48 Mz nzarlax-krm ninge mz mqdr.  
Yawe, ngi-batrpe' nzaovxio-krnge enqmi rngeng.  
X tu-zvzme mz nibrnge mzli kc ncblo nzrpilr  
naota-ngrgr badr.
- 49 Gct, sa naglqlzx nim mz mzlr lr drtqbrng  
amrlx,  
Mz nzangrlvz-krnge nim. ☆
- 50 Yawe, ninge Devet, king nem, x okatr-zvzq  
ninge mz nzaovxio-krngeng.  
Aodu-zvzq ninge kc tqmcpqx x leplz ngr nqvi  
lrnge, tqyc, tqyc.

---

☆ **Sam Kranzpnu-esz'-nrade-rtq mz (18):49** Rom 15:9

## Sam Kranzpnu-esz'-nrade-rpwxmz (19)

*Zyzlr Ngr Bongavz X Zyzlr Ngr Natq Gct*

*Zyzlr Ngr Nepi, Temz, X Vri*

- 1 Nzmyalzkr Gct nzmc mz bongavz,  
X dalr bongavz amrlx.
- 2 Mz nrckxngrlx, nepi aelwa-ngrde zmatq rde,  
Da kc tzwai temz x vri mz nrckxbq.
- 3 Kxmule-esz' bongavz trpnzngr naode x nepi  
trycmneu,  
X trpnzngr natq kxnztwz temz x vri,
- 4 A' nrpa scdr vzpx, krlzbzle leplz amrlx mz nrck  
tulvzo. ✧  
Gct yrlqzbzle nrckxbq nangi ma nyz nepi kx  
mwipx-ngrmle.
- 5 Mz nourla, nzvzpx-ani-krm nepi ma nyzde  
apule nzabrtzkr ncblo kx yrlz ate.  
X apu-kzle ncblo menrpa kc tqoliq mz nze-  
sangr.
- 6 Nepi lc prtzm mz nzngrlr-krde mz bongavz.  
Ngrlr, krlzbzle nrlarde kc tqtakiole.  
X yzlr ngrde yzlro-ngrm mz da amrlx.  
Da kc tqwai Natq Yawe mz nyzlro-krmle mz  
leplz amrlx.

*Natq Yawe Apule Zyzlr Kx Pnamilxtile Nabz  
Leplz*

- 7 Natq Yawe amrnale nzlukr nabz leplz mz  
nzmrlzvxi-krde.

---

✧ **Sam Kranzpnu-esz'-nrade-rpwxmz (19):4** Rom 10:18



- Akrlztrle kxnzngqngung murde trycnglrlo.
- 8 Natq Gct aelalzmlle drtwr kxnzrvz-nqblqng mz nztubq-krde.  
Aelwapx-ngrde da kx yc-kapq mz nzobqplx-krde nabz.
- 9 Nzamrluengr Yawe tqyc tqyc murde lq-esz'ngr.  
Natq Yawe rsakrlrngr murde da angidr zvz.
- 10 Delc nzsutikr drtwrnge natqde namyaszpxle trau kxkqlu,  
Murde vzpx-ngrm nzabrtzng r kx myaszpxle dakxnzng kcng tqbrngzvxi.
- 11 Mz nzvz-nqblq-krnge natqde, aelwapx-ngrmle bange da kxmrlzting.  
X mz nzlaltq-krnge mz natqde, atubqtimle nzmnc-krnge.
- 12 Kxetu Yawe, ipq ninge mz alwx kznikeng yc-kapqtrp bange,  
Murde rblxm bange nzmc-krngeleng.
- 13 X lolvz-amqngi ninge,  
Murde ma tqvz zvz nzale-krnge alwx Kcng tqotr ngr drtwrnge nzale-krngeleng.  
Murde nabzng natr x natubqbo mz nzobq-krm.
- 14 Yawe, nim butqbr kx rlakitr.  
Krka'-ngrne kx natqngeng x nzaotikr drtwrnge navz-nqblq-zvzlr me pnz drtwrm.

## Sam Kranzpnu-li (20)

### *Nzkrka'ngr Mz Nzaovxiokr King*

Nabz ne Devet kx yrbzle mz kxrmailz ngr dzbe kxnzngng.

*Nzkrka'kr Pris Ne Gct Badr Leplz*

1 Yawe, nim Gct r melrmqgr Jekop.

X krka'-ngrgr kx na-ayzlume natq king rgr.

X mzli kc nakxpu-ngrde okatrpz nide.

2 Mz nzmnc-krm Newz Saeon mz Mangr-  
nzangiongr,

Acive x axplr nide.

3 Abrtzlvz da kx rlr-ngrbzle bam.

X suti drtwrgr nzelalz-krm drtwrm mz blz  
kx angle mz olta nyzm.

4 Kabz bade da kcng tqkuti drtwrde,

X angidatibz nepu nr drtwrdeng amrlx.

5 X sa namalqlvzkr nzaovxio-krde.

X naglqlzkr nim, Gct rgr.

Yawe, ayzlum natqdeng amrlx. Eu, angida.

*Nzkrka'kr King Devet*

6 Yawe, ninge king kc tqmcpqxq.

X mzli ka krlzpx kx okatrq ninge mz nza-  
ovxiongr.

X sa na-ayzluome natqng mrla tqmnc-ngrn  
Heven kxtr,

X nakame bange zmatq ngr nzngini-krnge  
Ngrlrvea.

7-8 Kzdung leplz nzabrtrpzlr drtwrdr mz ami  
nedrng,

X kzdung mz dalr nzotangr.

Da lcdeng trnaokatrlru nidr x nztaong mz vea.

A' Yawe Gct rgr, tu-amqngi-zvzkr, murde  
abrtxtrpwzkr drtwrgr bam.

*Leplz Amrlx*

9 Yawe, kabz zmatq ngr nzaovxiongr mz king  
nem.

X mz nzkqle-krbzkr nim, ayzlum natqgr.

## **Sam Kranzpnu-li-nrade-esz'** **(21)**

*Nzglqlz-ngrbz Nzaovxiokr Yawe*

Nabz ne Devet.

*King Devet Glqlzle Gct*

- <sup>1</sup> Yawe, ninge king nem x abrtz-zlwzx murde  
nizrka-krme bange zmatq.  
Bilvzx nzaovxio-krbzme enqmi rngeng.
- <sup>2</sup> Da amrlx kcnq tqstuti drtwrnge, tqrlxtibo.  
X sc tqkatimeng x alebzmeng amrlx.
- <sup>3</sup> Vzpe me bange mz nizrka-krme da kxmrlzting.  
X alaome mz narng kraon kx ngi gol.
- <sup>4</sup> Rlxtibo nzlungr bam,  
X kapeme bange nzlungr lc tqboi.
- <sup>5</sup> Leplz kxkqlu nzxlrir nrpa ngr drtqng, murde  
okatr-zvzq ninge.  
X nzamatqlr ninge, murde armyalzq ninge  
mz nznigini-krnge King.
- <sup>6</sup> Da kxmrlz kcnq tqkatimeng bange, sa nayc-  
alomqng bange.  
X abrtz-zvz-ngrne nzmnc-krme bange.
- <sup>7</sup> Yawe kc tqrninr, ninge king nem x abrtzpo  
drtwrnge bam,  
Murde namnc-zpwxx mz nzaodu-krm kc  
tqyc tqyc.

*Lepz Nzglqlzlr Gct*

- <sup>8</sup> Yawe, aovxio-zvzq enqmi rmqng,  
X lolvztiq krkcnq amrlx tzpztzpx-ngrdr nim.

- 9 X mz nzlolvzti-krm lc nidr, odatiq nidr, apule  
nyr kc tqangcle nrlc.  
Yawe, miltxo-zvzq nidr x ayrkrtxtrq nidr  
mz nyr.
- 10 Trpnzngr kx rlapx mz nqvi lrdr,  
Murde nibqtiqng amrlx.
- 11 Mz nzyrlq-krdr drtwr ngr nzota-krmu badr mz  
vea,  
Trna-angidalru drtwr lc tzyrlqlr.
- 12 Murde nzdwaszlr nim  
Mz nzpnz-krm nidr mz nipna scmqng.

### *Lepz Amrlx*

- 13 Yawe, glqlz-ngrgr nim nzxplr-esz'ngr-krm.  
X angrlvzkr nim mz zmatq ngrm.

## **Sam Kranzpnu-li-nrade-li (22)**

### *Nzrlxtingr X Nzrlxngitingr*

Nabz ne Devet kx yrbzle mz kxrmailz ngr dzbe  
kxnzngrng.

### *Nzrlxtingr*

- 1 Gct! Gct o! ?Memule tqvzszpe-ngrn ninge? ☆  
? X memule tqpctxpx-ngrn nzokatr-krm  
ninge x trlaltqpepqu mz nzkrka'-krnge?
- 2 Yrniti-zvzbo bam ngrlx x nrlckxbq,  
A' trmnc-zpwxwxu murde trayzlumeu  
natqnge.

### *Nzrlxngitingr*

- 3 Nim King rgr kxtr-esz'ngr kc tqaclvele nigr lr  
Israel.  
X angio-zvzkr nim.

---

☆ **Sam Kranzpnu-li-nrade-li (22):1** Matiu 27:46; Mak 15:34

- 4 Melrmqgrng nzabrtrpzlr drtwrdr bam.  
Nzlxngitilr nim x arlapxq nidr.
- 5 Nzmnc-xglelr nim x tu-zvzbzme mz nibrdr.  
Nzrlxtibzlr nzokatr-krm nidr x angidatibzme  
natqdr.

### *Nzrlxtingr*

- 6 A' nzapusrng ninge brmrda.  
Nzngangr-ngrdr ninge mz nzobqszo-krdr  
ninge.
- 7 Nzycngrlrmlr nandr bange x nzmabqtimlr be-  
naodr bange. ✧  
X nzxtrnga-ngrdr ninge. ✧
- 8 Nzrpimlr kx, "Abrtrpzme drtwrm mz Yawe, a'  
namckr ena nzarlapxkr Gct nim mzli ka.  
Murde trokatrleu nim, kxmule-esz' rpiq kx  
mrlzti-zlwzle nim."

### *Nzrlxngitingr*

- 9-10 Yawe, yzuo mz zbq kc tzmcngr mzke', krlzmle  
mzli ka,  
Abrtr-zvzbo drtwrnge bam mz nzngini-krm  
Gct rnge.  
Murde aclve-angidr q ninge mz nzrmcng r mzke',  
X mz nzyq-krnge neyr lxenge.
- 11 Bzkq rlaszq ninge, murde trpnz-moungr kx  
naokatrle ninge,  
Mz nzesotrpe-krm enqmi rngeng bange.

### *Nzrlxtingr*

- 12 Yawe, enqmi lcng tztu-ngalelvzlr ninge.

---

✧ **Sam Kranzpnu-li-nrade-li (22):7** Matiu 27:39; Mak 15:29

✧ **Sam Kranzpnu-li-nrade-li (22):7** Luk 23:35

- X nzrpilr nanibqlr ninge mz nzapu-krdr poi  
kz peto.
- 13 Naodr mznem mz nzvz-krmlr bange,  
Mz nzmakx-krdr ninge mz nqngidr kxmalc.
- 14 Nzxplr-krnge yrkrpxpe apule lue kc tzpulio mz  
drtc' kx mingr.  
Mrkcngr tzaxvctrngr nrvr rngeng nzb-  
plctipeng, x nqmq nr nabzng baonepe.
- 15 Mzli trnaboipeu nzbatr-krme nzbz-krnge.  
Murde mewe-zvzpep x drtwrnge brlxkz  
apule nabr kxngibr mz nepi. ✧
- 16 Kxdrka'-ngrng nztu-ngalelvzlr ninge, nzapulr  
kuli kx namaneutilr ninge,  
X sc tzmaplxtitrpebzlr mqngeng x nanycn-  
geng. ✧
- 17 Mcx kx ninge nrvr-nrbalqtxpe.  
X nzobqszneopelr x nzyrpalelvzpelr ninge.
- 18 Nzakiti-lzbq-ngrdr nctq lrpz scnge,  
X nzkq scnge kc boi nzayrleo-ngrdr daes, mz  
nzkrlz-krdr doa kx narngisc. ✧
- 19 Yawe, bzkq mncme rlr.  
A' vz-anim mz nzokatr-krm ninge.
- 20 X arlapxbz nzlu-krnge mz mq ncblo kxayo  
lcng,  
Tzmaneutilr ninge mz nzapu-krdr kuli kz  
peto.
- 21 X mnc-ngalelvz ninge, murde ma tzluplxtilr  
ninge mz toki r vea scdr  
Tzapulr nqngi poi kz peto.

---

✧ **Sam Kranzpnu-li-nrade-li (22):15** Jon 19:28 ✧ **Sam  
Kranzpnu-li-nrade-li (22):16** Matiu 27:35; Jon 20:25 ✧ **Sam  
Kranzpnu-li-nrade-li (22):18** Matiu 27:35; Mak 15:24; Luk 23:34;  
Jon 19:24

*Nzrlxngitingr*

- 22 Mz nzyrlwr-lxblrkr leplz nemqng,  
Sa nabilvzx nim, mz nzrpi-krbo mz mzlen-  
geng da kx aleme bange. ☆
- 23 Murde sa napipxbo badr kx, “Nigu kxnzawz  
neng Yawe, naglqlzku nide!  
Eu. Nigu lr Israel na-amrlueku nide mz  
nzamatq-zvz-krgru nide!
- 24 Kxmule-esz' nigu kxnzobqszong, a' Gct trobqs-  
zoleu nzxpxu-krgrung,  
Murde trpxtxpx-ngrdeu nzayzlu-krmle natq-  
gung.”
- 25 Delc Yawe, narka-ngrbo blz ngr nzawingr kc  
tqpiibo, mz nzyrlwr-lxblrkr leplz nemqng.  
Murde nim nou nzrglqlz-krnge.
- 26 X mz nibrde, sa nakrlcng mz dakxnzng  
kx vzpxm mz blz kc tqkabo bam.  
X sa naglqlzlr nim mz nzbrtikr drtwrdr nim.  
Amrlz-zvzbz nidr mz nzmnc-zpwx-krdr.
- 27 Yawe, lr mrkzbleng amrlx sa na-aoti drtwrdr  
nim mz nzplzpx-krbzlr alwx ngrdr bam.  
X neidu lcng amrlx sa na-angiolr nim,
- 28 Mz nzngini-krm King kx matq-esz'ngr  
Kc tqaclve-zvzle nidr.
- 29 Delc kxnzetzung badr leplz nedrng sa nayrng-  
zobzng bam,  
Mz nzavzo-lzbq-krbzlr bam.
- 30 X doa negrng kz sa nawztrpzng bam,  
Mzli kc naxlrtr-ngrmlr bagr nrpa ngrm,
- 31 Mz nzrpi-krbzkr badr kx,  
“Yawe arlapx-zvzle leplz nedeng.”

---

☆ **Sam Kranzpnu-li-nrade-li (22):22** Hibru 2:12

## Sam Kranzpnu-li-nrade-tq (23)

### *Kxacle Sip*

Nabz ne Devet.

<sup>1</sup> Yawe, aclve-zvzq ninge apux sip nem.

X trtxpnzngr da kx mnctxpx-ngrne.

<sup>2</sup> Mailz-zvzq ninge me ycngr lue x dakxnzng,

Murde na-amax mrkc tqycngr nrw.

<sup>3</sup> Amrnaq nzlu-krnge.

X aelwa-zvz-ngrme lrpzki kxtubq, murde  
drtqm tr zl wz.

<sup>4</sup> Nctoko scm tzmle nzti bange.

X bz scm abrmle drtwrnge mz da kx prtz.

Kxmule-esz' vztrx mz nzlo,

a' trtxpnzngr da

kx namwxlrtix.

Murde nim Yawe, kc tqmncme bange.

<sup>5</sup> Alebzme nange dakxnzng,

Mz mzlir enqmi rngeng.

Aelubzme narng tolo,

X drtwrnge elalzm.

<sup>6</sup> Krlz-angidrx kx sa naka-zvzme bange zmrlz

ngrm x nivz lrm,

X sa namnc-zvzx ma nyzm.

## Sam Kranzpnu-li-nrade-pwx (24)

*King Kc Tqmatq Vztr Mangr-nzangiongr Mz  
Mzteadau Nyzde*

Nabz ne Devet.

*Neke Takitrde Nzprtr-krde Mangr-nzangiongr*



- 1 Nrlc atwrnrngr nyz Yawe,  
X doa amrlx mz nrlc nedeng x da amrlx mz  
nrlc scdeng. ✧
- 2 Murde nide Kxrpalz kc tqwz-ngrde nrlc,  
X yrqlqzbzle prla x drtc' mz zmatq ngrde.
- 3 ?Mz nzaotikr drtwrgu zmatq lc, neke tubqzb  
bade nzvzdbz mz newz nyz Yawe?  
? X neke takitrde nzprtr-krde Mangr-  
nzangiongr nide?
- 4 Lepzl kx nabzdr lq x nzmnc-krdr tubq  
Nztakitrdzr nzodutr-lxblr-krbzlr mz Yawe.  
Natqdr nzangidati-zvzlr.  
X trnzangiolru mqngr da kx nzlz.
- 5 Lepzl kxnmulr lcng nztubqzbzng mz nzobqkr  
Yawe.  
X Gct r Jekop lc sa na-amrlzle x na-arlapxle  
nidr.
- 6 Lepzl lcng nzrtangrtilr me pnz drtwrde,  
X suti drtwrdzr nzxngi-krbzlr nzulrde mz  
Mangr-nzangiongr nide.

*King Kc Tqmatq*

- 7 **Lvxpxbzmu bade naonrx ngr Jerusalem,  
X naonrx ngr Mangr-nzangiongr kcng  
tqblzlongr,  
Murde King kc Tqmatq navztrp.**
- 8 **?King kznilc tqmatq?**  
Krlc Yawe, kc tqrninr, tqxplr.  
Krkc tqaovxio zvz mz vea.
- 9 **Lvxpxbzmu bade naonrx amrlx,  
X naonrx kcng tqblzlongr,  
Murde King kc Tqmatq navztrp.**

10 **?King kznilc tqmatq?**

Krlc Yawe, Ngrlrvea ngr ami nedeng.

Nide King kc Tqmatq.

## **Sam Kranzpnu-li-nrade-nzlvqn (25)**

*Doa Kc Tqabrtr-zvzbzle Drtwrde Mz Yawe  
Drtqde Trmyau*

Nabz ne Devet.

*Kzdq Nabz Ngr A, B, C*

*Nzkrka'ngr*

1-2 Awi Yawe mz nznigini-krm Gct rnge.

Abrtr-zvzbo drtwrnge bam mz nzkrka'-krbo  
bam.

Bzkq rlr-ngrbzme mz enqmi rngeng nzaovxio-  
krdr ninge.

*Bzkq nzamyatimlr drtqnge.*

3 Clvebz doa kc tqabrtr-zvzbzle drtwrde bam,  
murde drtqde ma tzamyatibz.

Clveti-lzbq vzv doa lc, a' mrlx kx ani txpwx  
nzota-krmu ncdx, mrlz nzmyakr drtqde.

4 Da kx sutitx-zlwzbx drtwrnge bam, nzalvztr-  
krme bange nqm q krmqng amrlx.

*Delc nakrlz-zpwx-ngrne lrpzki rm.*

5 Elalvzx nzokatr-krme ninge mz nzvz-nqblq-  
krnge natqm.

*Eu. Murde nim Gct rnge kc tqarlapxle ninge,  
x tqabrkitr-zvzx drtwrnge nim.*

6 Gct, aelwapx-zvzm nzaodu-krm x nivz lrm  
bange.

Gct, ale da lc, da kc tqwai-pnzq mzli kc bqnc.  
7 Ipq ninge mz alwx kcng tqalexng mzli kc  
tqngini-ngrne obla, murde nim mrlz-  
esz'ngr.

Ipqpx nzvz-rbr-krngeng amrlx  
mz nzdcpxkr mz drtwrm nzaodu-zvz-krm.

### *Nqmq Kr Yawe*

8 Jzs-zvzq leplz mz nzmncngr kxmrlz x kxtubq.  
Jzsiq mz nzalvztr-krm kxnzaleng alwx,  
murde nao-zlilr nzti rm.

9 Kxrmailz, aelwapx-ngrbzme mz kxnzavzo-  
lzbqng da kxtubq.

Kxakrlz, alvztr-zvz-ngrn nidr me pnz  
drtwrm.

10 Lrpzki rmqng amrlx nzaelwapxbzlr mz leplz  
nemqng nzaodu-krm x nzangidati-krm  
natqm.

Lepz lcng nzyrlq-zvzlr nzalvztr-krm x  
nzesz'tikr drtwrmu badr.

11 Ma-nqblq natqm kc tqesalz-ngrn mz nzipqpx-  
krm alwx rngeng,

Murde nzqqlu-zlwzng.

12 Nekeng nzlxngiti-angidrlr natqm,  
Nzo-zlilr lrpzki angidr mz nzalvztr-krm nidr.

13 Olvz x ncblo lcng sa namnc-zpwxng.  
Oliqtibz drtc' kc tqpibzme, murde doa ne-  
drng namnc-kzng elr.

14 Pqtr mz drtwrm leplz kcng tzamrluelr nim.

Pipx-zvzbzme da kx na-alelr mz nzvz-nqblq-  
krdr nzesz'tikr drtwrmu badr.

### *Nzkrka'ngr*

15 Rtxtrpwo nibrnge bam mz nzmnc-xgle-krnge  
nim.

- Rlapx-zvzx mz nzokatr-krm ninge.
- 16 Suti drtwrnge kx naobqme bange x nayc mz drtwrm ninge.  
Sutitx drtwrnge murde trpengr kztenge x trmnc-zpwxpewxu.
- 17 Trte, katxpxbz nztalvzokr nabznge.  
Tekqtr drtwrm x arlapxbz ninge mz nzkxpu-krngeng.
- 18 Vz zvz nzaotikr drtwrm nzkxpu-krnge x nzetqkr drtqnge,  
Vzm x ipqpxbz alwx rngeng.
- 19 Wx-nzlongr nabznge nzkqlu-zlwzkr enqmi rngeng.  
Wzpx zlwz mz drtwrdr nzatrkatikrdr ninge.
- 20 Xplrlvzbz ninge mz enqmi rngeng mz nztukrme mz nibrnge.  
X bzkq rlr-ngrbzme badr nzamyatikrmlr drtqnge, murde nim me rlakitr.
- 21 Yawe, arlapx ninge murde tubqx x nabznge lqngi.  
Yrlqtr-zvzbo nzlu-krnge bam.
- 22 Zmatq ngrm, navzm mz nzarlapx-krbzle nigr lr Israel mz  
Ztrkang amrlx kcng tqrmctikr mzli ka.

## Sam Kranzpnu-li-nrade-esz'mz (26)

*O-zli-zvzx Nzti Kxtubq*

Nabz ne Devet.

<sup>1</sup> Yawe, pipxbz kx ninge ncblo kx nabzde lq.

**Murde o-zli-zvzx nzti kxtubq,**

- X abrtr-zvzbo drtwrnge bam.
- <sup>2</sup> Obqtr angidr mz nabznge,  
X mc kxmu nzvzkr nqm q nr drtwrnge.
- <sup>3</sup> Murde nivz lrm rtwayz-zvzm bange,  
X nzaodu-krm mailz-zpwxle ninge.
- <sup>4</sup> Traodu-lzbqkru badr leplz kxnztrkang.  
X trabrtzlvzwxu kxnzpokiang.
- <sup>5</sup> Pxtxpx-ngrne nzngi-te-krgr badr kxnzaleng  
alwx.  
X drtqnge sa nzmnc-krgr badr kxdrka'-  
ngrng.
- <sup>6</sup> Yawe, ycpqx mqnge mz nzvz-nqblq-krnge  
Loukxtr scm, murde natubqbo mz nzobq-  
krm,  
X naprtrpo mz leplz nemqng mz nzvz-ngale-  
krgr olta nyzm.
- <sup>7</sup> X ngr-ngrgr nabz ngr nzawingr  
Mz nzale-krm da kxmrlzvxiting.
- <sup>8</sup> Mrlzm bange Mangr-nzangiongr nim,  
Mrkc tzmcngr nzmyalz-krm.
- <sup>9-10</sup> Mz nzmilxtxo-krm leplz kcng tztakitrd r nza-  
yrplapxng,  
Bzkq apusr-ngrn ninge kxnzaleng alwx, x  
kxnzrnibqng,  
X kxdrka'-ngrng kcng tzrtwz-zvzng dalr  
nzamcti-rbrngr,
- <sup>11</sup> **Murde o-zli-zvzx nzi kxtubq.**  
Ycngr mz drtwrm x arlapx ninge.
- <sup>12</sup> X sa naglqlz-ngrne nim mz mzlr leplz nemqng  
Murde tu-zvzme mz nibrnge x tubqbo mz  
nzobq-krm.

## Sam Kranzpnu-li-nrade-rlimz (27)

*Nim Mevalu Rnge X Trpnzngr Kx Namwxlritix*  
Nabz ne Devet kx yrbzle mz kxrmailz ngr dzbe  
kxznzngng.

### *Lrpalvc Nyznge*

- 1 Yawe, nim Mevalu rnge kx arlapx-zvzle ninge.  
X trpnzngr kx namwxlritix.  
Trnarnrcti-lzbq-ngrneu murde nim lrpalvc  
nyznge.
- 2 Mzli kc kxdrka'-ngrng natz-ngrdr ninge mz  
nznibq-krdr ninge,  
Enqmi lcng sa nataong.
- 3 Kxmule-esz' ami kxetu navzm mz nzoti-krmlr  
ninge, a' trpnzngr nzmwxlr-krnge.  
X kxmule-esz' otakr badr, a' drtwrnge sc  
tqabrtr-zvzbo bam.

### *Ma Nyzm*

- 4 Yawe, da kx rlxtitxpwo bam nide sele: Sutitx  
zlwz drtwrnge nzmnc-zvz-krnge mz ma  
nyzm.  
Murde naxngi-zvzbo nzulr nzmyalz-krm mz  
nzaoti-zvzkr drtwrnge me pnz drtwrm.
- 5 Murde krlzx kx sa na-acive-angidrq ninge mz  
mzli r nzxpxu-krnge.  
X na-amnc-kapqq ninge mz Mangr-  
nzangiongr nim, mz nzngini-krm butqbr  
kx rlakitrx.
- 6 Sa nabatrp'e' nzaovxio-krnge enqmi lcng tztu-  
ngalelvzlr ninge.

X sa namalq-zlwzx nzka-krbo bam blz mz  
Mangr-nzangiongr nim.

X nangr-ngrbo bam nabz ngr nzawingr.

### *Nzkrka'-krnge*

7 Yawe, xlrn nzkrka'-krnge mz nzkqle-krnge  
nim.

X nayc mz drtwrm ninge mz nzayzlu-krme  
natqng.

8 Mzli kc tqrp-igrme kx, "Vzm mz nzangio-krm  
ninge."

X ayzlu bo natqm kx, "Eu, ninge la navzbo."

9 Delc, bzkq mnc-rlrume bange. Ninge kxnzawz  
nem.

X bzkq esablqtiq ninge mz nzngyatikr  
drtwrm ninge.

Murde okatr-zvzq ninge mzli kc.

Mevalu rnge, bzkq pxtpx-ngrn ninge mz  
nzaxtx-krm ninge.

10 Kxmule-esz' trtenge x lxenge nzaxtxdr ninge,  
A' nim la tqaclve-angidrq ninge.

### *Nzti Kx Tubq*

11 Alvztrp nqm q krmqng bange.

X mailz ninge mz nzo-zli-zvz-krnge nzti kx  
tubq murde enqmi rngeng sa tzaukztilr  
ninge.

12 Bzkq rlr-ngrbzme nzlolvz-krdr ninge.

Nzpokatitrlr ninge x nzamwxlr-ngrdr ninge  
mz nzycmne-zngya-krdr.

13 Yawe, krlzpe x nzmrlz-zlwz-krm

Sa nakrlzmle ninge mzli ka mz nrlc.

14 Mzlengeng, na-abrtr-ngrbzku drtwrgu mz  
Yawe.

X naxplrku mz nzlxngiti-krigule.  
Bzkq matitr drtwrgu nide,  
A' drtwrgu na-abrtr-zvzbzku bade.

## Sam Kranzpnu-li-nrade-rtqmz (28)

### *Acive Alo Nigr*

Nabz ne Devet.

<sup>1</sup> Yawe, kqlex nim murde nim butqbr kx rlakitr.  
Bzkq apume bange kxnradrtqde ngq.

Murde ma tqbzx nzmua napx-ngrn nzxlrngr  
nzyrni-krnge.

<sup>2</sup> Mzli kc tqobqtr-ngrbo Mrkc Tqtr mz nzmnc-  
krnge Mangr-nzangiongr nim, x glalz  
mqnge mz nzkrka'-krbo bam,  
Xlrm natqnge x okatrp ninge.

<sup>3</sup> Bzkq apusr-ngrn ninge kxdrka'-ngrng kcng  
tztrngz-zvzbzng da kxtrka.

X nzrpilr kx nidr ncblo ngr nivz, a' trtingr.

<sup>4</sup> Ayzlu-mopwz mz nzayrplapx-krm nidr mz da  
kxtrka x nztrkcalrngr kcng tzalelr,

Kabz badr da kx takitrde nzvz-rbr-kdrng.

<sup>5</sup> Murde matitrpe drtwrdr da kcng tqwz-ngrn x  
da kxetuting tqaleqng.

Dekc namilxtxo-ngrn nidr x bzkq da kx na-  
ale-moulr.

<sup>6</sup> Yawe, glqlz-lxblrkr nim

Murde ayzlume natqnge mz nzokatr-krm  
ninge.

<sup>7</sup> Nim lrpalvc nyznge x temz ngr lomrnge kc  
tqyrputrngr nipna.

Abtrrpo drtwrnga bam x okatr-zvzq ninge.



Delc tqelalz-ngrm drtwrnge

X tqawi-zvz-ngrbo bam mz nzngrngr.

<sup>8</sup> Yawe, nim lrpalc nyzgr kx rlakitrkr.

X nim nzxplr-krnge, ninge king kc tqm-cpxbzme.

<sup>9</sup> Amrlz nigr leplz nemqng mz nzarlapx-krm nigr,

Mz nznngini-krgr sip nemqng keng tqaclve-zvzq.

## Sam Kranzpnu-li-nrade-rpwxmz (29)

### *Natq Yawe Mz Trlipu*

Nabz ne Devet.

<sup>1</sup> Nimu enjrl ngr Heven nayrngzobzmu mz Yawe,  
Mz nzmckrmu nzmyalz-krde x zmatq ngrde.

<sup>2</sup> Napipxamu kx takitrde nzamrluengr drtqde,  
Mz nzangio-krmu nztr-esz'ngr-krde.

<sup>3</sup> Murde natq Yawe aelwapx-lzbqngr mz trlipu.  
Nate kxmatq o-zlile dcpwe mz nzapu-krde  
bzlrmei prla.

<sup>4</sup> Natq Yawe matq-esz'ngr.  
Eu. Natqde xplr zlwz.

<sup>5</sup> Natq Yawe rpesaliti nc trpili,  
Mz nzapu-krdr nounc kx nzlapizting.

<sup>6</sup> Natq Yawe aycnglrle newz nyzgung,  
Mz nzapu-krdr ncblo kx nzelang.

<sup>7-8</sup> Natq Yawe batrpzle bzlrpc.  
X bzlrmei ngrde aycnglrle peto.

<sup>9</sup> Natq Yawe apule nenq kc tqrkqtuti nc yrni x  
krlxpqtile leu rdr.

X kxnzangiong amrlx mz Mangr-nzangiongr  
nzrpilr kx, "Gct, nzmyalz-esz'ngr-krm  
glqlz-ngrgr nim!"

10 Nubla ngr tewa kxetu yclzbz mz zmatq ngr  
Yawe,

Mz nznngini-krde King kc tqacive alo.

11 X mz zmatq lc axplrle nigu leplz nedeng  
Murde namnc-zpwxku.

## Sam Kranzpnu-tq (30)

*Yawe Alrti-zvzle Nzyrnibungr Mz Nzalalz-krm  
Drtwr*

Nabz ne Devet.

1 Yawe, glqpxx nim mz nzarlapx-krm ninge mz  
mq enqmi rngeng.

Murde tr-rlr-ngrpwzmeu badr nzaovxio-  
krdr ninge murde ma tzbilvzlr ninge.

2 Yrnibo bam mz nzokatr-krm ninge,  
X amrlz-mowq nrkrdrdqng.

3 Mzli kc tqycpe pipz nzbz-krnge,  
Arlapxq ninge x nrkrdrdqng trnavzopeu mz  
gq.

4 Yawe, tr-esz'ngrn, x nigr leplz nemqng na-  
angrlvzkr nim,

Mz nzawi-krbzkzr bam da kx aletiqng.

5 Zngya ngr drtwrm trboiu,  
A' nzaodu-krm nigr tqyc tqyc.

Kxmule-esz' yrributikr nrckxbq,  
A' nzyrni-krgr sa nalrtipxle nzabrtz-krgr mz  
nzmc-krgr zyzlr mz nourla kxtpwz.

6 Yawe, mzli kc tqmnc-zpwx-ngrne, rpi-zvzx kx,  
"Trpengr doa x da kx namwxlritix."

- 7 Murde xngibo nzamrlz-krm ninge, mz nzapu-  
krm rtabu kx xplr kx tu-ngalelvzle ninge.  
A' mzli kc tqprtzngrm da kxtrka bange,  
opxm kx esablqtime ninge, sc tqmwxlz-  
zlwzpx.
- 8 Delc Yawe, tqkqle-ngrne nim.  
X rlxitibo nzyzluti-krm ninge.
- 9 Rpibo bam kx, "Bzkq rlrpx-ngrn nzvzo-krnge  
mz gq,  
Murde trpnzng da kx mrlz kx naprpxm mz  
nzbz-krnge.  
X rblxpe nzyapwxtipx-krbo mz leplz mz  
nzangidati-krm,  
Nzmu namibilzpemc mz drtc'.
- 10 Yawe, xlrn natqng ninge nzyckr drtwrm ninge.  
Kxetu nge, okatrp ninge."
- 11 Alrtibzme nzyrnibu-krnge mz nzalalz-krm  
drtwrnge,  
Mz nztekqtr-krbzme nzvzkr drtwrnge mz  
nzabrtz-krnge.
- 12 X rblxm bange nzmnc-lrpi-krnge.  
A' navz zvz nzangrlvz-krnge nim. Awi kxetu,  
Yawe!

## **Sam Kranzpnu-tq-nrade-esz'** **(31)**

### *Nzbrkr Drtwr X Nztalvzokr Nabz*

Nabz ne Devet kx yrbzle mz kxrmailz ngr dzbe  
kxznzng.

### *Nzbrkr Drtwr*

- 1 Yawe, nim me rlakitr.  
Bzkq rlrpx-ngrn nzaovxiokr enqmi rngeng ninge.

- A' arlapx ninge, murde ale-zvzq da kxtubq.  
2 Ayzlu-anim nzyrni-krnge mz nzarlapx-krm  
ninge.  
Nanginim butqbr kx namnc-kapqpx-ngrmc.

*NztaIvzokr Nabz*

- 3 Mz nzngini-krm lrpalc ngr nzrlapxngr,  
Aclve x mailz ninge mz nzvz-nqblq-krde  
natqm.  
4 Bzkq rlr-ngrme nzprtz-krnge mz trtxki kc  
tzamwi-kapq enqmi rngeng,  
Murde nim me rlakitr.

*Nzbrkr Drtwr*

- 5 Yawe, aprcbo mqngrnge mz mqm. ✧  
Murde nim Gct kc tqbrti drtwr mz nzxpepx-  
krm ninge.  
6 Kxetu, abrtxtrpo drtwrnge bam,  
A' ptxpx-ngrne krkcng tzangioldr mqngr da  
txneng kx nzlz.  
7 Drtwrnge sa naelalzm x na-abrtzlvzx nzaodu-  
zvz-krm,  
Murde okatr-zvzq ninge mz mzlir nzetqkr  
drdqnge x nzkxpu-krngeng.  
8 X tr-rlr-ngrpwzmeu ninge mz mq enqmi rn-  
geng,  
A' amnc-nrwx-ngrbzme nabznge mz nzvzne-  
krnge.

*NztaIvzokr Nabz*

- 9 Yawe, nayc mz drtwrm ninge murde nabznge  
talvzo.  
Mzke' vaotxpe-ngrde nzyrni-zlvz-krnge x  
nrkrdrdqnge mewetxpengr.

---

✧ **Sam Kranzpnu-tq-nrade-esz' (31):5** Luk 23:46

- 10 Yangrngapex mz nzvzkr drtwrnge x drtqnge  
satxpe murde bztipenge nzyrningr.  
Drtqnge yayrpe-ngrde nzmnc-rbr-krnge x  
nipenge nrvr-nrbalq.
- 11 Enqmi rngeng nznelvztilr ninge  
X kxnmnc-aepztrpqng bange nzobqszopelr  
ninge.  
Kxkrlzti-lzbqkr badr nzapusr-ngrdr ninge da  
kxtrka  
X krkng tzmclr ninge mz lrpzki nzdwa-  
ngrdr ninge.
- 12 Leplz amrlx mrbrtinetrpe drtwrdr ninge,  
opxm kx bzpex.  
Apunepubo badr brmrda.
- 13 Mnc-zvzx mz zmwxlz mz nzxlz-krnge nzlc-  
awakr enqmi rngeng,  
Kcng tzyrlqlr drtwr kx nanibq-ngrdr ninge.

*Nzbrkr Drtwr*

- 14 A' Yawe, nim Gct rnge,  
X abrtrpo drtwrnge bam.
- 15 Arlapx ninge mz enqmi rngeng kcng tzayotilr  
ninge,  
Mz nzaclve-angidr-krm ninge.
- 16 Amrlz ninge, kxnzawz nem,  
Mz nzarlapx-krm ninge murde nzaodu-krm  
tqyc tqyc.

*NztaIvzokr Nabz*

- 17 Yawe, bzkg rlrpx-ngrn nzkqle-krnge nim  
nzamyati-ngrm drtqnge.  
A' amyatibz drtq kxdrka'-ngrng murde  
napwrkilvc-ngrdr nzbz-krdr.

18 X na-aesakile natq kxnpokiang x kxnzqlqpx-  
lzbqng,  
Kcng tzxtrnga-ngrdr kxnztubqng.

*Nzbrkr Drtwr*

19 Myatxpx zlwz da kxmrlzti kcng tqyrlqq nangi  
sc krkcng tzamrluelr nim.

Murde aelwapxpe-ngrn kx acive-zpwxq  
krkcng tzrlatrpzng bam.

20 Leplz nemqng nzrlapxng mz drtwr kx nzyrlq  
enqmi rdrng x nznelvztingr nidr,

Murde amnc-aepztrpzme nidr bam.

21 Yawe, glqpx-ngrne nim nzaodu-krm ninge.

Murde mzli kc enqmi rngeng tztu-ngalelvz-  
ngrdr lrpalc nyznge, mnc-zpwxm mz nze-  
tukr nivz lrm.

22 Mwxlr x murde opxm kx maszlrpx-ngrn ninge.

A' xlrme nzqle-krnge nim kx naokatrq  
ninge.

23 Nigu leplz neng Yawe naka-lzbqzbzku bade.

Murde acleve kxnzlvz-nqblq-zpwxlr nide, a'  
ayrplatipxle kxnzqlqpx-lzbqng.

24 Bzkq nabzgu tzprlzm, a' natu-amqngiku

Mz nzbrtikr drtwrgu nide.

## **Sam Kranzpnu-tq-nrade-li (32)**

*Nzawingr Mz Nzipqpxngr*

Kzdq nzaongr drtwr kx yr Devet.

*Naplzpxbzku Alwx Rgung Mz Yawe*

1 Doa kx nzipq mz alwx ngrde

Drtwrde elalz-zlwzm.

- 2 Murde mz nzobqkr Yawe trvz-rbrpeu.  
A' plzpxle alwx rdeng murde ma tqyc-kapq  
da kxtrka mz nabzde. ✧
- 3 Yawe, mzli kc tqpxtpx-ngrne nzplzpx-krbo  
alwx rngeng bam,  
Drtqnge satx zlwx mz nzetq-zvz-krde.
- 4 X drtqnge tropx-pnzu mz nzayrplapx-krm  
ninge ngrlx x mz nrlckxbq.  
X yangrngatxpex nzapu-krnge lxbi kcng tqn-  
gibr mz nepi.
- 5 Pnzpe drtwrnge kx naplzpxbo alwx rngeng  
bam.  
X mz nzplzpx-krboleng, trpnzngr kx yrlq-  
kapqbo bam.
- Delc tqipqpe-ngrn ninge,  
X katxpx-ngrbzme nzmrlpukr alwx rngeng  
amrlx.
- 6 X nigr leplz nemqng nakrka'bzkr bam mzli ka.  
Murde mzli kc nzxpungr na-apune-ngrmle  
nrc kc tqoda,  
Trtxpnzngr nzkrly-krmlr nigr.
- 7 Nim me rlakitr x ayrbqpxq ninge mz da  
kxpertz.  
Mzli lc tqxlrx nabz kxyrlvi kx nim nou  
nzrlapxngr.

*Navz-nqblqku Natq Yawe*

- 8 Rpm Yawe kx, "Sa na-aelwa-ngrbo bam lrpzki  
kc nao-zliq,  
Mz nzmailz-krnge nim.
- 9 A' bzkq apuq hcsi kx narde mqngi,

Kx vz-nqblqle me pnz drtwr ncblo mz nqvi  
kcng tzpetrpz bade.”

10 Kxdrka'-ngrng sa na-ayrplapxng mz alwx ngr-  
drng.

A' nigu kcng tqbrti drtwrgu Yawe sa namcku  
kx aodu-zvzle nigu.

11 Nigu kxnztubqng na-angrlvz-nrgu Yawe.  
Na-abrtz-nrgu nide.

## **Sam Kranzpnu-tq-nrade-tq (33)**

*Angrlvzku Yawe Mz Nabz Kxyrlvi*

Nabz ne Devet.

*Nabz Kxmrna*

1 Naelalvzku Yawe, nigu kx nztubqng.  
Murde mrlzvxi nzglqpx-krngu nide.

2 Na-angrlvzku nide mz nabz kx yrlvi mz nzaw-  
ingr,

X mz nzayrni-krngu gita x ukzlele.

3 Nangr-ngrbzku bade nabz kxmrna,  
Mz nzmqlvz-krngu nide.

4 Murde natqdeng amrlx tubq-esz'ngr,  
X da amrlx kcng tqaletileng takitrde nzbtrtikr  
drtwrgu.

5 Mrlz bade da kx mrlz x tubq.  
X mz nrlc tulvzo nzaodukr Yawe tqvzpe  
tqvzpe.

*Kxrpalz*

6 Yawe wz-ngrde bongavz mz natq kx kapxle,  
X nepi, temz, x vri amrlx mz nzycmne-krde.

7 Ata-lxbltrle dcpwe me esz',



- X yrlqzbzle bz ngr prla amrlx.  
8 Nigu leplz amrlx mz nrlc, ncblo, olvz, x doa  
kxnztopwzng,  
Na-amrlueku x na-amatqku Yawe, Kxrpalz.  
9 Murde wz-ngrde nrlc mz nzycmne-krde,  
X mz nzrkapx-krde natq dekc tqycngr.  
10 Yawe atrkatile drtwr kx nzyrlq leplz,  
X ngi-batrpzle trnzngidati-kru mrkc tqpnz  
drtwrdr.  
11 A' drtwr kx yrlqleng ngidati zvz,  
X nqm q nr nabzde tqvzpe tqvzpe.  
12 Sa namrlz bz mz lr drtqbr kcng tzangi olr Yawe  
murde nide Gct rdr.  
Murde leplz kcng tqmcpzle kx nangi nedeng  
nzabrtz-zvzng.

### *Lr Nrlc*

- 13-14 Yawe obqom mrkc tqwxbuo-ngrmle mz tron  
nyzde Heven,  
Mz nzmco-krmle leplz amrlx mz nrlc ka.  
15 Ngi batrpzle nzao-krdr drtwrdr,  
X krlzle da amrlx kcng tzalelrng.  
16-17 King traovxiou mz nzxplrkr ami nede.  
X ncblo ngr vea tr-rlapx-kzu mz nzxplr-krde  
x hcsi nede.

### *Kxarlapx Kxokatr*

- 18 A' Yawe kc tqaclvele krkcng tzamatqlr nide,  
X nzbarti drtwrdr nzaodu-zvz-krde nidr.  
19 Arlapzle nidr mz nzbzng,  
X axplrle nidr mz mzli r dzbi.  
20 Mnc-xgleku Yawe nzokatr-krde nigu.  
Murde nide temz ngr lomrgu kc tqyrputrngr  
nipna.

- 21 Abrtzlvzku nide,  
X drtwrgu abrtprzku mz drtqde kxtr.  
22 Krka'ku kx Yawe na-aodu-zvzle nigu  
Mz nzbtrtkr drtwrgu nide.

## Sam Kranzpnu-tq-nrade-pwx (34)

### *Kxrka X Kxokatr*

Nabz ne Devet,  
mzli kc narpi-ngrbz nalukurnr-ngrde mz mz  
Abimilek, kc tqmapulr-ngrde nide x sc tqvzpe.

### *Kz dq Nabz Ngr A, B, C*

- 1 Awi-zvzbo mz Yawe,  
X tramawxu nzglqpx-krnge nide.  
2 Bilvz-zvzx Yawe mz nabznge,  
Murde nimu kx nzaetqzbz drtqmu na-  
abrtzlvzamu da kcnq tqaleleng.  
3 Clve Yawe doa x da amrlx. Naglqlzku drtqde.  
X napipx-lxblr-ngrgu nzetu-krde.  
4 Da kcnq tqmwxlrtix, arlapxpebz Yawe ninge mz  
da lcnq amrlx.  
Murde mzli kc tqkrka'-ngrbo bade, ayzlumle  
natqnge.  
5 Elr! Na-abrtprzmu drtwrmu mz Yawe, murde  
ma drtqmu tqmya,  
X na-abrtzlvzamu nzokatr-krde nimu.  
6 Gct, mzli kc nzmnc-krnge tqtrka-ngrde, arlapxq  
ninge,  
Mz nzatutr-krm nzkrka'-krnge.  
7 Ii! Enjrl ne Yawe arlapxle leplz mzli kc drtqdr  
tqetq-ngrde,  
Murde aclvele krkcng tzmyatitrlr Yawe.

- 8 Jzsamu ena nzmrlzkr Yawe x na-abrtr-krbzmu drtwrmu bade.  
Murde krkcng tqaclveleng nzabrtz-zvzng.
- 9 Kxnvzv-nqblqlr natq Yawe nzrngiscng da amrlx.  
Delc nimu leplz nedeng na-amrlue-ngrnamu nide.
- 10 Laion kx nzxplrng nzkrlzlr nzbrtalengr,  
Leplz kx nvzv-nqblqlr Yawe, trpnzng da kx mrbrpxm badr.
- 11 Mrlxngeng x inyxngeng, lalztqmamu bange,  
Murde na-alvztrpo bamu kxnamu nzamrlu-engr Yawe.
- 12 ?Nike suti drtwrm?  
?Nzlungr kxmrlz kxboi?
- 13 Obq zpwx, x bzkq pokiaq.  
Bzkq ycmne-atrkatiq leplz,
- 14 Prszpx nqm q kxtrka. X ale zvz da kxmrlz.  
X nasuti drtwrm nzmnc-zpwx-krmu badr leplz mz nrwx.
- 15 Rlxtibz ncblo kxtubq mz Yawe nzokatr-krde nide.  
X Yawe sa naxlrbzle nzkrka'-krde mz nzaclve-krde nide.
- 16 Sa napnanatile krkcng tzale-zvzng da kxtrka.  
Trobqpwzu badr x mzli kc nabz-ngrdr, ani txpwz nzmrbtrkr mz drtwr nidr. ☆
- 17 Takitrde nzxlr-krbz Yawe natq leplz kxnvz-tubqng mzli kc tzyrni-ngrbzlr bade,  
Murde ngi nqm q krde nzokatr-krde leplz nedeng.
- 18 Vz zvz nzesolvzti-krde krkcng drtwrdr tqvz,

- X nzamnc-lrpi-krde krkcng nabzdr tqyrnibu.  
19 Wzpxtx zlwz nzxpxukr ncblo kxtubq.  
A' Yawe sa na-arlapxle nide mz da lcong  
amrlx.  
20 X mz nzaclve-zpwx-krde nide,  
Trpnzngr nrvr ngrdeng kx nztavxi. ✧  
21 Yawe sa na-ayrplapxle kxdrka'-ngrng kcng  
tztrkalr-ngrdr kxnztubqng.  
X nqmq krdr lc tqtrka sa nanibq-moule nidr.  
22 Zvz Yawe nztu-krbzle mz nibr kxnzawz ne-  
deng.  
X trpnzngr nzayrplapx-krde krkcng tzabrtr-  
pzlr drtwrdr bade.

## Sam Kranzpnu-tq-nrade-nzlvqn (35)

*Yawe, Amyatibz Drtq Krkcng Nanibqlr Ninge*  
Nabz ne Devet.

### *Enqmi Rngeng*

- 1 Yawe, tu-ngalelvz ninge, murde enqmi rngeng  
nztu-ngalelvz-kzlr ninge,  
X vecamu badr krkcng tqveckr badr.  
2-3 Yrlqbz temz ngr lomrm kc tqyrputrngr nipna,  
X twzm popz' x nipna scmqng,  
Mz nzarlapx-krm ninge mz ncblo kcng tzmaneu-  
tilr ninge.  
X apqtrp drtwrnge kx tume mz nibrnge.  
4 Aovxiong x amyatibz drtq leplz kcng tzrpilr  
nanibqlr ninge.

---

✧ **Sam Kranzpnu-tq-nrade-pwx (34):20** Jon 19:36

- X krkcng tzipilr na-atrktilr ninge, nabzdr  
nzmu natalvzo x nadwaszlr nim.
- 5 Atwzlr-ngrm enjrl nem mz nzmaneuti-krde  
nidr.  
Na-apusr-ngrde nidr leu kxglr kxyrklz kcng  
tqvXu-pulrtine nenq.
- 6 Navoneng mz lrpzki kx miglq x tu r nzlo,  
Murde nataong mz nzdwasz-krdr enjrl lc.
- 7 Kxmule-esz' trpnzngr da kxrka kx alebo badr,  
A' se tzatu-kapqng br scdr x tzeqng gq mz  
nzlolvz-krdr ninge.
- 8 Mz drtwrnge mrlz nzpwrkilvc-krdr nzodatingr  
nidr,  
Mz nztao-mou-krdr mz br x trtxki kcng  
tzyrlqlr.

*Nzayzlu-ngrmlr Nivz Lrng Mz Da Kxrka*

- 9 Gct, mzli lcde sa na-abrtzlvzx nim,  
X drtwrnge elalzm mz nzarlapx-krm ninge.
- 10 X mz nabzngc atwrnrngr, sa narpix kx,  
"Trpnzngr kx apule nim.  
Murde arlapxq kxtrnzplung mz mq kxnzx-  
plrng,  
X kxtrpnzngr scdr zmatq mz kxnzrngiscng  
zmatq."
- 11 A' kxdrka'-ngrng nzabetitrlr ninge mz da kx  
tralewxu.  
Nzrpilr kx ninge kc tqrwzngr dalr nzkx-  
pungr.
- 12 Alebo badr da kxmrlz, a' nzayzlu-ngrmlr mz  
da kxrka,  
Kx talvzongr nabzngc.
- 13-14 Mz nzyagox-krdr, vzti drtwrngeng.  
X axtx-zvzx dakxnzng,

- X biox narngē mz nzkrka'-krngē nidr,  
Da kc tqwaisr-ngrne mzlengeng x kztengeng.  
Murde yc-zlwzngr drtwrngē nidr,  
Apule kx vzngr drtwrngē x yrnitix lxenge  
mzli kc tqbz-ngrde.
- 15 A' mzli kx mnc-ngrne mz nzkxpungr,  
Nzyrlwr-lxblrngē mz nzyrpalelvz-krdr ninge.  
Leplz kxtrkrlzwxung delcng tzatrkatī-zvzlr  
ninge.
- 16 Nzxt rnga-ngrdr ninge mz da kx prtīlzlēng  
ninge,  
X nzmadrqtimlr nqngidr bange.

*Arlapx Ninge!*

- 17 ?Yawe, nzatrkatīngr ninge lc, nakrlz bzle mzli  
kznike?  
Arlapx ninge mz leplz lcng tzapulr laion kx  
nangqdr ninge.
- 18 X sa na-awibo bam mz mz leplz nemqng  
Mzli kc nayrlwrngē mz nzangio-krgr nim.
- 19 Leplz lcng nzpxtpx-krdr ninge trpnzngē  
noude. ✧  
Bzkq rlr-ngrbzme badr nzabrtzlvz-krdr nzkxpu-  
krngeng,  
X nzyrpalelvz-krdr nzvzkr drtwrngē.
- 20 Trnzkr lzlrū nzymnēngē mz nrwx.  
A' nzpikiti-zvzlr krkcng tzmnc-lrpingē mz ma  
nyzdr.
- 21 X nzpībqti-kzlr ninge mz nzrpi-krdr kx,  
“Eke! A' mcpekr da kxtrka kc tqaleq.”

*Ayrplapx Nidr!*

- 22 Yawe, krlzq nikeng nzalemlr bange.  
Bzkq mnc-lrpiq x obqlvztx-ngrn nidr.
- 23 A' vzm, tum mz nibrnge,  
X ota-ngrbz ninge.
- 24 Bzkq rlr-ngrbzme badr nzbilvz-krdr ninge.  
A' pim bange trnzvz-rbr-krpwc'u murde  
tubqq mz nzryrlq-krm drtwr.
- 25 Bzkq rlr-ngrbzme nzrpi-krdr kx sc tzaovx-  
iopelr ninge,  
X me pnz drtwrdr ngidape.
- 26 Amyatibz drtqdr krkcng tzabrtzlvzlr nzetqkr  
drtqng.
- Krkcng tzobqszolr ninge drtqdr nzmu  
namya-zlwzng mz mz leplz x  
namanepeng.
- 27 A' kztengeng kcng tzsuti drtwrdr kx natubqbo  
mz nzobq-krm, batrpz badr nzmqlvlz-  
krdr nim,  
Mz nzrpi-zvz-krdr kx, "Yawe, myalz-esz'-  
ngrn! X abrtzlvzq nzmnc-zpwxkr kxn-  
zawz nem."
- 28 X mz zbq lc sa naglqlz-zvzx nim,  
Mz nzangrlvz-krnge nztubq-zlwz-krm.

## Sam Kranzpnu-tq-nrade-esz'mz (36)

*Brti Drtwrnge Kx Sa Na-aovxioq Kxdrka'-  
ngrng*

Nabz ne Devet, kxnzawz ne Yawe.

- <sup>1</sup> Gct, nzmncngr kxtrka vzdz-zvzm mz nabz  
kxdrka'-ngrng,

- X sc tqrpipebzle badr kx, “Bzkq amrlueamu Gct.” ✧
- <sup>2</sup> X batrpzle nzglqpx-lzbq-krdr.  
Murde nzrpilr trmcwq alwx rdrng x trna-ayrplapxwq nidr.
- <sup>3</sup> Natqdr trka-esz'ngr x yctr-ngrpwz nzpokianger.  
Delc trtxpnzng nzalet-krdr da kxmrlz x tubq.
- <sup>4</sup> Mz nrlckxbq sc tzaoti drtwrdr nzryrlq-krdr drtwr kxtrka.  
Nzpxtxpx-ngrdr nzi kxtubq mz nzmrlzkr badr lrpzki kx vz-rbr.
- <sup>5</sup> Yawe, nzmyatxlzkr nzaodu-zvz-krm  
X nzangidati-zvz-krm natqm nzkrllzlr bon-gavz. ✧
- <sup>6</sup> Nztubq-krm vzdz krlzbzle newz kxnmzialzng, x vzo kz la me boongr.  
Murde aclve-zpwxq leplz x animol mz nzsakrlrngr.
- <sup>7</sup> Gct, nzaodu-krm leplz mrlz-zlwzm bagr,  
Murde apusr-ngrm nigr nei kio kcng tzwxbulvzong lxedr.
- <sup>8</sup> Mz nzrka-zvz-krm nagr dakxnzng, dakxnzng lcong yctxpxng zvz.  
Murde avzo-zvzme zmrlz ngm bagr, apule lue kc tqyrletx alo.
- <sup>9</sup> X nim narlue r nzlu-krgr,  
Kc tqapu-zvzmle bagr nzyrlelz-krm aulz.
- <sup>10</sup> Yawe, navz zvz nzaodu-krm nigr kcng tzvz-nqblqlr nim,  
Mz nzamrlz-krm kx nabzdr tubq.

---

✧ **Sam Kranzpnu-tq-nrade-esz'mz (36):1** Rom 3:18 ✧ **Sam Kranzpnu-tq-nrade-esz'mz (36):5** Sam 57:10; 71:19; 103:11; 108:4



- 11 Bzkq rlrpx-ngrn mq kxdrka'-ngrng nzlolvz-krdr ninge,  
X kxnzqlqpx-lzbqng bzkq nanycdr nznzlv-zolr ninge.
- 12 Murde brti drtwrge nzaovxio-krm kxdrka'-ngrng.  
X mz nztao-krdr, trpengr nztulz-mou-krmlr.

## Sam Kranzpnu-tq-nrade-rlimz (37)

*Kxnzabrtrpzlr Drtwrdr Mz Yawe Sa Natwzlr  
Drtc' Kc Tqpile Nakabzle Badr  
Nabz ne Devet.*

*Kzdq Nabz Ngr A, B, C \**

*A, B (1-4)*

- 1-4 Abrtzlvz nzwztr-krbzme mz Yawe,  
X sa nakabzle da kcnq tqpq mz nabzm.  
Ale da kxmrlz x abrtrpz drtwrm bade,  
Murde namnc-zpwxq mz drtc' kc tqpile kx  
nakabzle bamu.  
Bzkq witibz nelzm nzmncr kxdrka'-ngrng,  
Murde mzli trnaboiu x sc tzbzpeng.  
Bzkq kcmnz-ngrbzme nzalengr da kcnq tzalelr,  
Murde nzlu-krdr sa namrbc nzapulr nabr  
kxglr mz mzli r nepi.  
*C, D (5-7)*
- 5-7 Clveti-lzbq, x aenzli-lrpi mz nzabrtr-krbzme  
drtwrn mz Yawe.

---

\* **Sam Kranzpnu-tq-nrade-rlimz (37):** Drtc' ngi kz kzdq nzymne-ebzpxngr, drtwr ngrde da kx mrlzting amrlx kcnq tqesalz Yawe navzpxmqng mz mqde.

Bzkq nabzm talvzo mz nzrmc-krm leplz  
kxnzrngiscng nzvz-nqblq-krdr nqmq krdr  
kxtrka.

Da kx na-aleq, mnc-xgle txpwz Yawe,  
X abrtprz drtwrm bade, murde sa naokatrle  
nim.

Delc sa na-aelwapx-ngrbzle nzopxkr nztubq-  
krm,  
Mz nzapu-krde nilz r nepi kc tqvz-esz'ngr  
mzli kc bea.

*E, G (8-11)*

8-11 Eu, bzkq drtwrm ngya x nabzm talvzo  
Murde da lcng li ma tzkatrpnzng bam drtwr  
kxtrka.

Eu, murde kxnzabrtprzlr drtwrdr mz Yawe sa  
nangi nyzdr drtc' kc tqpile nakabzle badr,  
A' kxdrka'-ngrng sa namaszlrtpx-ngrng.

Glqpx Yawe kx mzli trnaboipeu x kxdrka'-ngrng  
sc tzmrbrpeng.

Kxmule-esz' rtangrtiq nidr a' trpengr nzmc-  
krmleng.

Gct rlr-ngrbzle drtc' nyzde mz kxnzavzo-lzbqng.  
X sa na-abrtzng mz nzmnc-zpwx-krdr elr.

*I, J (12-15)*

12-15 Ili! Kxnztubqng x kxtrnzrngiscung na-  
aclvetio-lzbqng  
Murde kxdrka'-ngrng nzglalzpelr toki r vea  
x popz' scdr.

Ili! A' kxdrka'-ngrng na-aclvetio-lzbq-kzng  
murde toki r vea scdr sa nanibq-moule  
nidr,

X Yawe sa naplameitibzle popz' scdr.

Jzs Yawe krkcng tzryrlqng drtwr kx na-atrkati-  
ngrdr kxnztubqng

X nzmadviti-zvzbzlr nqngidr badr.  
Jzsl nidr mz nzodati-krde nidr,  
X yrpalelvz-zvzle nidr murde trpnzngr  
nzxplr-krdr.

*K, L, M, N (16-22)*

<sup>16-22</sup> Kxetu Yawe aclve-zvzle kxnvz-nqblqlr nide,  
X nikeng kabzle badr nangisc-alopedr.  
Kabzle badr dakxznng kxkqlu mz mzli r dzbi,  
X okatrle nidr mzli kx prtzngr da.  
Lalztqmamu! Murde kxdrka'-ngrng sa nabzng,  
mz nzapu-krdr nrpq da kc tqplclqom  
X enqmi r Yawe lcng sa nangiliang na-apulr  
zsikapu.

Mclr ncblo kxtubq, kxmule-esz' kxpipzne,  
Myaszpxle da kxkqlu kxngisc ncblo kx-  
drka'ngr.

Murde Yawe sa nakatpxpbzle zmatq ngrdr  
kxdrka'-ngrng,  
A' sa naokatrle kxnztubqng.

Ncblo kxdrka'-ngrng nzbi-txpwzlr nzrlxngr, x  
trnzkrzlru nzrka-niwzlrngr.

A' kxnmrlzng yc mz drtwrdr nzrka-niwzlr-  
krdr vzmi kxnamnzo-mzleu.

Ncblo kcng tqamrlzng Yawe sa nangi nyzdr drtc'  
kc tqpile nakabzle badr.

A' leplz kcng tqpilzeng sa nabzng.

*O, P (23-26)*

<sup>23-26</sup> Oblamzngeng, bztipex nzmncngr, x ninge ka  
tqnginipenge lrtzlvz.

X mcx kx nqm q kr ncblo kxtubq nide sele.

Okatr-zvzle leplz mz nzrlr-nrbalq-krde dztudeng,  
x doa nedeng ngi da kxmrlz kx kabz Gct  
bade.

Yawe okatr-zvzle nide x doa nedeng trnzyr-  
nitrpwzung nadr dakxznng.

Pq mz drtwr Yawe nzaelwa-krbzle mz leplz  
lrpzki kx nao-zlilr,

X mailz-zvzle krkcng tzabrtz-ngrdr nqmq  
krde.

Pipxle kx kxmule-esz' nanycdr miglqpx, a' trnz-  
taoung,

Murde sc tqlolvz-amqngileng.

*R, S (27-29)*

27-29 Rtxtiamu nibrmu da kxtrka, x aleamu da  
kxmrlz,

Murde neidu nemung namnc-along mz drtc'  
kc tqpi Yawe nakabzle bamu.

Rpi Yawe kx mrlz bade da kxtubq,

X okatr-zvzle kxnzabrtrpzlr drtwrdr bade.

Sa naokatr-zvzle nidr,

A' doa ne kxdrka'-ngrng sa nabzng.

Sa nangi nyz leplz kxnzmrlzng drtc' kc tqpi Yawe  
nakabzle badr,

X sa namnc-alopeng elr.

*T, V (30-33)*

30-33 Takitrde kx ncblo kxmrlz dekc tqvzkipxm  
natq ngr nzyrplapxngr,

X nikeng pitileng tubq.

Takitr-kzde nzkrly-angidr-krde Lou amrlx sc Gct  
rde,

X nzlolvz-amqngi-zvz-krdeleng.

Vz zvz kxdrka'-ngrng nzaukzti-krdr leplz kxnzm-  
rlzng,

Murde nanibqlrng.

Vz zvz Yawe nzkapx-krmle ncblo kxmrlz mz mq  
enqmi rdeng,

X mzli kc natwz-ngrdr nide mz kot, trnza-  
ovxiolru nide.

*W, X (34-36)*

34-36 Wz zvz mz nzabrtr-krbzmu drtwrmu bade,  
Murde sa nangi nyzmu drtc' kc tqpile nakab-  
zle bamu mz nzamatq-krde nimu.

X sa namcamu nzmaneutipx-krde kxdrka'-ngrng.  
Xlrnamu natqnge. Mcx kzdq ncblo kx-  
drka'ngr kxtrka-esz'ngr, x atrkati-zvzle  
leplz.

Xplr-esz'ngr x obqszo-ngrde leplz amrlx.  
X kxmule-esz' rtangrtix nide, a' trmcpewxu,  
murde mrbrpe.

*Y, Z (37-40)*

37-40 Yrlq angidr mz drtwrm ncblo kxmrlz kx-  
tubq, murde mnc mz nrw, x  
X doa kxnmika mz neidu lrde nzkqlu-  
zlwzng.

Yrpalelvzx kxdrka'-ngrng murde sa nabzting,  
X doa lr neidu lrdr sa naykrtxong.

Zvz Yawe na-arlapxle kxnztubqng.  
Murde nide me nzrlakitr lr mz mzli r nzkxpu-  
krdr.

Zvz Yawe na-arlapxbzle nidr mz mq kxdrka'-  
ngrng,  
Murde nzbtri drtwrdr nide nzokatr-krde  
nidr.

**Sam  
Kranzpnu-tq-nrade-rtqmz**

## (38)

*Zmrlepu R Alwx Rngeng X Nzatrkatikr Enqmi  
Rngeng Ninge*  
Nabz ne Devet.

### *Alwx*

- 1 Yawe, kxmule-esz' ngyati drtwrm ninge,  
A' bzkq ayrplapxq ninge.
- 2 Murde nipna scmqng tupe bange,  
X pnzplrope-ngrn ninge.
- 3 Nngitxtr-zlwzpx nzyatikt drtwrm ninge.  
X yangrngazlwz-ngrne alwx rngeng.
- 4 Zmrlepu r alwx lcng sc tqayrngzpupele ninge,  
X apupex ncblo kx boo mz alwx ngrdeng.
- 5 Nzngqngu-plxsr-krnge aetqpemle drtqng,  
Apule kxsqki kx mibi x brtu.
- 6 Alwx rngeng nzyrlamyro-ngrdr ninge.  
Delc drle mzke' tqtao zvz mz zbq kang kqlu.
- 7 Nzyagox-krnge apule nyr kx ngcpxm mz nrkr-  
drtqng.  
X nzxplr-krnge yrkrtpxpebz.
- 8 Nzetqkr drtqng wibrti-zlwzpe-ngrde ninge.  
X bztipenge nzyrningr murde drtqng rkrkx-  
zlwzpe.

### *Zyagox*

- 9 Yawe, krlzpeq da amrlx kcng tqpq zlwz mz  
drtwrnge murde namnc-zpwxx.  
X xlrpe-kzpe' nzyrke-zlwz-krnge.
- 10 Mzli ka drtqng mewepe x nzycmi-krnge vz-  
ebirpengr,  
X mzke' obqkipele mrkzble.

- 11 Kztengeng nzngangrpe-ngrdr ninge murde  
kxsqki rngeng.  
X kxnginingeng trnzetrpepqngqu bange.
- 12 Krkcng tzipilr nanibqlr ninge,  
Nzamwipelr trtxki rnge.  
X krkcng tzaetqmlr drtqng, sc tzipilr naodatilr  
ninge.  
X sc tzryrlq-zvzng drtwr mz nzatrkatikrdr  
ninge.

### *Enqmi*

- 13 A' opxm kx trxlrxu nzymnekr enqmi rn-  
geng.  
X trkrlzwxu nzymnengr.
- 14 Eu, apubo badr kx nradrtqde ngq,  
X trayzlupwc'u natqdr.
- 15 Murde nim Yawe kx na-ayzclubzle nika nza-  
lemlr bange,  
Mz nzngini-krm Gct rnge kc tqabrtrpo  
drtwrnge bade.
- 16 Bzkq rlr-ngrbzme nzabrtzlvz-krdr nzetqkr  
drtqng.  
X bzkq nzglqpx-lzbqng mz nzaovxio-krdr  
ninge.
- 17 Murde ycpe pipz nzodati-krdr ninge,  
X nzetq-zvzkr drtqng tryrkrtpxpeu.
- 18 Naplztppx nzvz-rbr-krngeng,  
Murde nzbatrplr nzknkr drtqng.
- 19 Enqmi rngeng nzxplrng x nzlu-zpwxng.  
X nzklung kx nztrkati nivz lrdr ninge.
- 20 Da kxmrlz kcng tqalebo badr, nzayzlumlr mz  
da kxrka.

Nzpxtxpx-ngrdr ninge murde vz-nqblqx  
nzmncngr kxtubq.

21 Yawe, bzkq amnctxnq ninge esz'-krnge,  
X bzkq mnc-zvzme rlu.

22 Kxetu, vz-anim mz nzokatr-krm ninge,  
Murde nim Mevalu rnge.

## Sam Kranzpnu-tq-nrade-rpwxmz (39)

*Nzlukr Leplz Mrbcnepwz Apule Nzyrplaokr  
Nrc Kxesz'*  
Nabz ne Devet.

*Nzlu-krnge Mrbcnepwz*

1 Yawe, pnzpe drtwrnge kx namnc-lrpitxpwo, a'  
bzkq alex alwx mz nzlctr-krbz drtwrnge  
bam mz nzkxpu-krngeng.

Murde kxdrka'-ngrng lcng tzmnc-  
aepztrpqng bange, ma tzxtrnga-ngrdr  
nzlqngi-krm.

2 X kxmule-esz' trycmnewxu,  
A' nzkxpu-krngeng etunepx zvz, delc tqtalv-  
zongr nabznge.

3 X mz nzaotikr drtwrnge nzkxpu-krngeng, nz-  
talvzokr nabznge mrilvzole ninge.

X mzli kc tqrbxlm bange nzmnc-lrpi-krnge,  
sc tqrpibebo bam kx,

4 "Yawe, nzlu-krnge mrbcnepwz. ? Memule  
tqpxlavxpx-ngrbzme nzkxpu-krnge?

? Myx mzli kx naesakingr trnzmnc-zpwx-  
krpwc'u lc?"



5 Murde nim kx amrbctrp nzlu-krnge. X mzli kx lutix ngi da txne mz nzobq-krm.

**Nzlukr leplz mrbcnepwz apule nzyr-plaokr nrc kxesz'.**

*Bzkq Ayrplatipx-zvzq Ninge*

6 Nzwz-katongr ngi brmrdaqr apule nounc kc trpnzngr nrade.

X mz nzbzkr leplz trpnzngr dztudrng kx natwzlr.

7 ?Kxetu nike naobqtipxx mz nzmnc-krnge lc tqngi brmrda?

Mwx namrlz nzbrti-zvzkr drtwrng nim.

8 Murde na-arlapxq ninge mz alwx rngeng amrlx, X kxnzlukurnrng ma tzyrpalelvzlr ninge.

9 Mzli ka, dcpupe mz drtwrng kx vz-rbrx nzlctr-krbz drtwrng bam mz nzxpu-krngeng.

Murde tubq nzayrplapx-krm ninge mz alwx rngeng.

10 A' bzkq ayrplatipx-zvzq ninge,

Murde yupe pipz nzbztr-krbo mz mqm.

11 Mz nzayrplapx-krm leplz, odatibzme dztudrng kcng tqmrlzbx badr.

Apusr-ngrbzmeleng da kx yrti ninr,

Murde nakrlzlr kx nzvz-rbrng mz nzobq-krm.

**Nzlukr leplz mrbcnepwz apule nzyr-plaokr nrc kxesz'.**

12 Yawe, xlrn nzkrka'-krnge x nzyrni-krnge.

Murde nzmrbcqr nzmncngr mz nrlc apunep-wzle nzwoukr betepu.

13 Ayrkrtxpx nzetqkr drtqng x aotxpxbz drtqng,

Murde mwx na-abrtztx-kaix mzli kxpipz x ninge kc tqbz ate.

## Sam Kranzpnu-pwx (40)

### *Nim Lrpalvc Kx Mncpx-ngrmc*

Nabz ne Devet kx yrbzle mz kxrmailz ngr dzbe kxznzngrng.

### *Xlrme Nzkrka'-krnge*

<sup>1</sup> Yawe, sc tqaenzli-lrpipebo bam nzokatr-krm ninge.

X mzli kc tqkqle-ngrne nim, xlrme nzkrka'-krnge.

<sup>2</sup> Veclzme ninge mz gq ngr nzbzng x mz nabz mu kxrluo.

Atuome ninge mz rplz kxetu, x trpengr doa x da kx namwxlrx.

<sup>3</sup> Alvztrpe' bange kc nabz kxmrna mz ngr-glqlzng nim.

X mzli kc naxlrngr leplz nzng-krngele, sa na-angioldr nim x na-abrtrpzlr drtwrdr bam.

### *Abrtrpo Drtwrnge Bam*

<sup>4</sup> Namrlzbz mz leplz kcng tzabrtrpzlr drtwrdr bam,

Krkcng trnzprtrpwzung mz leplz kcng tzglqpx-lzbq-ngrdr x tzpokiand.

<sup>5</sup> Yawe, nim Gct rgr x trpnzng x apule nim.

Aleme bagr da kxkqlu mz nzatutr-krm drtwr kx yrlqq mz nzamrlz-krm nigr.

Drtwrnge yrpz'trpz nzrlwxng da lcng amrlx, Murde nzkqlu-zlwzng.

### *Ka-lzbqbo Bam*

<sup>6</sup> Trsutiu drtwrm nzrka-ngrbz bam dalr nrlanc  
ayrngrng x dalr nzrkatxng alwx.

X tr-rlx-kzpe'u blz x animol kx na-angcom  
mz olta nyzm.

A' da kx suti txpwx drtwrm nzxlr-krbo natqm,  
Murde narlrpx-ngrbo nrkrdrdqng bam.

<sup>7</sup> Delc tqrpi-ngrbo bam kx, "Ninge kape.

Na-atutrx natq kcng tqyclzm mz Nzryrn-  
grkxtr.

<sup>8</sup> Gct rnge, abrtzlvzx nzale-krnge me pnz drtwrm,  
Murde nabzngc lolvz-amqngipele nzalvztr-  
krmqng." ✧

### *Nzyapwxtipx-krnge*

<sup>9-10</sup> Yawe, trnayrlq-kapqpou nzaodu-krm x  
nzangidati-krm mz leplz nemqng.

A' sa napipx-zvzbo nrpa ngr nzarlapx-krm  
nigr

Mz nzyrlwrpx-lxblr-krgr.

X krlzq kx vz zvz nzpipx-krngele.

### *Trmnc-zpwxwxu*

<sup>11</sup> Yawe, krlzx kx yckqti zvz drtwrm ninge.

X nzaodu-krm x nzangidati-krm nzngini-  
zvzmlr lrpalc kx mncpx-ngrmc.

<sup>12</sup> A' mzli ka, rblx nzrlwx-krnge nzxpungr amrlx  
kx nzprtztimqng bange.

X alwx rngeng nzmrlvzolz ninge x nzayc-  
kapqmlr bange da kxtubq.

Murde nzqqlu-zlvz-krdr nzmyaszpxlr nqngi-  
narnge.

---

✧ **Sam Kranzpnu-pwx (40):8** Hibru 10:5-7

X nabznge tqtalvzo-zlwz-ngrde.

*Krka'-mopwo Bam*

- 13 Yawe, vz-anim mz nzarlapx-krm ninge.  
Kxetu, rnekim mz nzokatr-krm ninge.
- 14 Okatrp ninge nzaovxio-krnge kxnzrpilr naodatilr ninge,  
Murde drtqdr namya x naobqszong mzli kc nadwasz-ngrdr ninge.
- 15 X leplz lcngr tzxtrnga-ngrdr ninge nelzdr navzdzm  
Mzli kc nametx-ngrmlr bange.
- 16 A' amrlz krkcng tzbtri drtwrdr nim  
Mz rka-krbzme badr nzabrtz-zlwzng,  
Murde na-awi-zvz-ngrbzlr bam nzarlapx-krm nidr  
Mz nzrpi-krbzlr kx, "Gct, nim kx myatxlz-esz'ngr."
- 17 Kxetu, trxpplrwxu x trpnzng scnge zmatq.  
Bzkq mrbtr mz drtwrm ninge.  
Murde nim txpwz Mevalu nge.  
Bzkq asaq nzokatr-krm ninge. ☆

**Sam  
Kranzpnu-pwx-nrade-esz'  
(41)**

*Yawe, Krka'-ngrne Kx Nayc Mz Drtwrm Ninge*  
Nabz ne Devet kx yrbzle mz kxrmailz ngr dzbe kxnznggrng.

*Kxnzokatrng*

- 1 Namrlzbz mz doa kcng tzmrlztilr leplz kxnzma-  
neng,  
Murde Yawe sa naokatrle nidr mzli kc  
nakxpu-ngrdr.
- 2 Sa na-aclvebzle nzlu-krdr.  
X trtxpnzngnr nzrlr-krbzle nidr mz mq enqmi  
rdrng.  
Delc tzrpi-ngrbz kx Yawe amrlzpele lr  
mrnyzdr Israel.
- 3 Sa naokatrng Yawe mz nzamrlz-mou-krde nrkr-  
drtqdr  
Mzli kc nayagox-ngrdr.

### *Enqmi Rngeng*

- 4 **Yawe, krka'-ngrne kx nayc mz drtwrm  
ninge**  
X na-amrlz mou ninge.  
Zyagox kc tqycpxm mz nabzng  
Vzpxm mz alwx rngeng kcng tzatrkatilr nim.
- 5 Enqmi rngeng nzpibqtilr ninge,  
Nzrpilr kx, “? Myx mzli kx nabz-ngrde,  
murde namrbtxtr mz drtwr nide?”
- 6 Kzdung leplz lcng tzoklatimlr ninge, nzpokratilr  
kx nzyc mz drtwrdr ninge.  
A' nzrpilr nakrlzlr kxmu nzxpu-krnge,  
murde nayapwxtinedr mz mztea amrlx.
- 7 Nztrkati nivz lrdr ninge nzpikiti-lrpi-zvzlr  
ninge.  
X nzaoti txpwz drtwrdr da kxtrka kx nadwa-  
timle ninge.
- 8 Nzrpi-awalr kx, “Mrlztxpe! Mzli ka prtilz-  
zlwzpe zyagox kxtrka,  
X mzli trnaboiu x sc tqbzpe.”

9 Mzli ka, kztenge kc tqabrtr-zlwzbo drtwrnge  
bade,  
X tqmukr ncdx, nipe-kzde enqmi nge. ✧

*Nzokatrkr Gct*

10 **Yawe, krka'-ngrne kx nayc mz drtwrm  
ninge.**

Amrlz-mopwz nrkrdrtnge murde na-ayzlu-  
mopwc' da kcng tqtrka tzalemlr bange.

11 X mzli kc trna-aovxio-ngrdru ninge,  
Sa nakrlz-angidrpex kx abrtzlvzq ninge.

12 Sa naokatrq ninge nzale-krnge da kxtubq,  
X namnc-alotrpebo bam.

*Nabz Kx Yrkrpxngr Buk Kc Kai*

13 *Naglqpxku Yawe, Gct r lr Israel.*

*Mzli ka x tqyc tqyc, naglqpxku Yawe.*

**Buk Krali**

*Sam 42—72*

**Sam Kranzpnu-pwx-nrade-li  
x Kranzpnu-pwx-nrade-tq (42  
x 43)**

*Kxmule-esz' Nabznge Talvzo*

Nabz ne nqvi lr Kora.

1 Gct, nzmingrti-zlwzkr drtwrnge nim  
Apule animol kc drtwrde tqbrlxkz mqde lue.

2 Nim Gct kc tqļu x nzsutikr drtwrnge nim apule  
nzbrlxkztikr drtwrnge lue kxbao.

?Myx mzli kx naxngi-ngrbo nzmnc-krme  
bange?

---

✧ **Sam Kranzpnu-pwx-nrade-esz' (41):9** Matiu 26:23; Luk  
22:21; Jon 13:18

3 Mz zbq kang kqlu yrni-zvzx x mnqtxpwo drlemzke' kx piz.

A' enqmi rngeng nzyrpalelvzlr ninge, nzr-pimlr kx, “?Memule Gct rm trokatrpe-ngrdeu nim? ?Bzpe?”

4 Gct, mzli ka drtwrnge yrnibutx zlwz. A' dcpx mou mz drtwrnge mzli kc ena tqmailztrngrne leplz Mangr-nzangiongr nim.

Mzli lcde abrtz-zlwzkr x ngr-katokr mz nzglqlz-krgr nim.

5 **Kxmule-esz' nabznge talvzo x nelznge vzdzm,**

**A' sa na-abrtxtrpwo drtwrnge bam.**

**Murde naglqlz-mou-ngrne nim kalr,**

**Mzli kc na-arlapxq ninge.**

6-7 Gct rnge, mzli boipe trnzkrlyzpe-krpou Israel. ?Memule tqpulio-zvz-ngrme bange nzcxpungr mz nzapu-krde lue kxvo?

Nzvzdz-krm nelznge vz-ebirnrpe-ngrm bange apule nrc kcng tzyrplalvzolzr ninge.

X nztalvzokr nabznge xplr-zlwzpe apule nzyr-pukr lue kxtalio mz nabzde.

X ebio ngr srkau amrlx kcng tqatwzlr-ngrme nzalxlvrtine-zvzlr ninge.

A' nadcpv mz drtwrnge da kcng tqmyalz tqaleq Israel,

Mrkc tqyrlengr LueJodzn x tqycngr Newz Hemon x Newz Misa.

8 Murde vz zvz nzpulio-krme nivz lrm mz zbq kang kqlu.

X ngrbo bam mz nrckxbq vzmi nzkrka'-krnge murde nim Gct kx rkam nzlungr bange.

- 9 Gct, nim butqbr nyznge. ?Memule tqmrbrtitr-  
pengr drtwrm ninge?  
?X memule tqkxpu-zvz-ngrne  
Mz nzaetqti-krm enqmi rngeng drtqnge?
- 10 Nzrpi-zvzmlr bange kx, “?Memule Gct rm  
trokatrpe-ngrdeu nim? ?Bzpe?”  
X sc tqvz zvz nzngzlvzti-krdr ninge natq  
kxtrka.
- 11 **Kxmule-esz' nabznge talvzo x nelznge  
vzdzm,  
A' sa na-abrtxtrpwo drtwrnge bam.  
Murde naglqlz-mou-ngrne nim kalr,  
Mzli kc na-arlapxq ninge.**

### (43)

- 1 Gct, pipxbz mz krkcng trnzangiolru nim kx trvz-  
rbrwxu.  
Arlapx ninge mz mq krkcng tztrkating x  
tzpokiang.
- 2 Nim me rlakitr. ?Memule tqrlasz-ngrn ninge?  
?X memule tqkxpu-zvz-ngrne  
Mz nzaetqti-krm enqmi rngeng drtqnge?
- 3 Atwzlr-ngrm bange zyzlr ngrm x nzalvztrngr  
angidrng,  
Mz nzmailz-mou-krdr ninge Saeon, mz newz  
kxtr nyzm.  
Murde nakrlzlvzbo Mangr-nzangiongr kc  
tqmnc-ngrn,
- 4 X na-angiox nim mz olta nyzm,  
Mz nzngini-krm nou nzabrtz-krnge.  
X na-angrlvzx nim mz nzayrni-krbo gita  
bam.



- 5 **Kxmule-esz' nabznge talvzo x nelznge  
vzdzm,  
A' sa na-abrtxtrpwo drtwrnge bam.  
Murde naglqlz-mou-ngrne nim kalr,  
Mzli kc na-arlapxq ninge.**

## **Sam Kranzpnu-pwx-nrade-pwx (44)**

### *Drtwrgr Esz'tipe Kx Sa Nabzpekr*

Nabz ne nqvi lr Kora kx nzyrbzlr mz kxrmailz  
ngr dzbe kxnzngrng.

### *Be Ngr Melrmqung*

- 1 Gct, xlrpekr nrpa ngr da kxetuting kcng tqale-  
bzme mz melrmqgrng mzli kc bqnc,  
Mz nzpi-krmlrle bagr mzli kc.
- 2 Nzayrplapx-krm lr mrkzbleng apule lxbi kc  
tzbolvzti mz nrlanc nyzm.  
X petio-alzuq leplz nemqng mz drtc' nyzdr  
mz nzamnc-zpwx-krm nidr.
- 3 Melrmqgr lcng trnzaovxiolru enqmi rdrng mz  
toki r vea scdr x mz zmatq ngrdr esz'-krdr.  
A' leplz nemqng nzaovxiong mz zmatq ngrm,  
mz nzxplr-krm, x mz nzmnc-krbzme badr  
mz nzaodu-krm nidr.
- 4 Gct, nim King rnge.  
Nim kx rngi-batrp nzaovxio-krgr, nigr neidu  
lr Jekop.
- 5 Milxtxopekr enqmi rgrng mz nzxplr-krm.  
X rnzlvzokr kxnzatrkatilr nigr mz zmatq ngr  
drtqm.

- 6 Murde trbrtiu drtwrnge popz' x toki r vea scnge  
Nzarlapx-krdr ninge mz nzotangr.  
7 A' ni-txpwzme kx arlapxle nigr mz enqmi rgrng,  
Mz nzamyati-krbzme drtqdr.  
8 Sa naglqlz-zvzkr nim.  
X nzawi-krbzkr bam tqvzpe tqvzpe.

*Enqmi Rgung*

- 9 ? A' memule drtqm tqsatrpe-ngrmle bagr,  
trokatrpe-ngrnqu ncblo ngr vea negrng?  
Mzli ka rlrtx-ngrpwzme mz enqmi rgrng  
nzamyati-krmlr drtqgr.  
10 X ngi-batrpeme nzdwasz-krgr nidr,  
X nztwz-krdr dztugrng amrlx.  
11 X rlr-ngrbzme badr nznibq-krdr nigr mz  
nzapu-krgr sip,  
X nzvzmilr nigr mz drtc' nyzdrng mz nzwz-  
nrbalqtr-krbzkr badr.  
12 Apule kx amwabzme nigr badr mz narnabr kx  
topwzne,  
Mz nzapusr-krm nigr brmrda.  
13 Lr mrkzbleng kcng tzmnc-aepztrpqng bagr  
nznelvzlr nigr mz nzamyati-krmlr drtqgr,  
X nzxtrnga-ngrdr nigr.  
14 X neidu mz nrlc tulvzo nzobqszo-ngrdr nigr  
Mz nzyrpalelvz-krdr nigr.  
15 Aputr-zvzbo da kxtrka mz nzobqkr leplz lcng,  
X drtqnge mya zvz.  
16 Murde xlrx natq kxtrka kcng tzpimlr bange,  
X mcx nzmnc-krm enqmi rngeng.

*Vz-nqblq-zvzku Gct*

- 17 Kxmule-esz' nzprtmqng bagr da lcng

A' trmrbrtru mz drtwrgr nim x Nzesz'tikr  
Drtwrgu.

18 Kxmule-esz' traxtxpekru nim,  
X o-zli-zvzkr nztí rm,

19 A' katrpzme nigr mz mq enqmi rgrng mz  
nznzbrti-krdr nigr, mz nzapu-krdr kuli  
kzpetong.

X nzaovxiolr nigr x kzdung nigr  
nzyrtzmqpeng mz gq.

### *Nzkrka'-krgu*

20 Gct rgr, nzmu navecpx-lzbqmgr bam,  
Mz nzangio-krgr gct kzble,

21 Tryc-kapqpwzu bam,  
Murde obqplxq nabzgr.

22 A' mz nzngini-krgr doa nemqng, vz zvv  
nznibqti-krdr nigr,  
Mz nzapusr-krdr nigr sip kcng tzmnc-  
nabung mz nznibqngr nidr. ☆

23 Kxetu rgr, bzkq esablqme. ?Memule tro-lxlvr-  
ngrpwe'u bagr?  
Vz-anim, x bzkq pxtxpx-ngrn nigr.

24 Lxlvrn bagr,  
Mz nzdcpxkr mz drtwrm nzetqkr drtqgr x  
nzkxpu-krgr.

25 Drtwrgr esz'tipe kx sa nabzpekr,  
Mz nztangqgxlz-krmgr mz drtc'.

26 Gct, vz-anim x okatrp nigr.  
Arlapx nigr murde aodu-zvzq nigr.

---

☆ **Sam Kranzpnu-pwx-nrade-pwx (44):22** Rom 8:36

# Sam Kranzpnu-pwx-nrade-nzlvqn (45)

*Nabz Ngr Nzyrlzkr King Kc Tqmyalz-esz'ngr*  
Nabz ngr nivz kx nzyr nqvi lr Kora.

## *Natqngeng*

<sup>1</sup> King nge, krlc nabz nenge kx nangr-ngrbo  
bam.

Nabznge esz'ngr natq kxmrlzting.

X nzngqpx-krm natq mz naonge

Apule nzyrlepx-krm lue mz butqbr.

<sup>2</sup> Nzobq-krm lqngipx-esz'ngr.

X natq ngr nzamrlzngr ngqpx-zvzm mz naom.

Delc tqamrlz-zvz-kzngr Gct nim.

## *Nim King Kx Xplr*

<sup>3</sup> Nim ncblo kxmyalz-esz'ngr x xplr zl wz mz  
nzotangr.

Alvco toki r vea scm mz bxli rde kc mz  
nrkalom.

<sup>4</sup> Murde kalr mz nzvo-krm mz vea na-aovxioq  
enqmi rmqng mz nzxplr-krm.

X nalolvz-amqngiq da kxtubq x leplz  
kxnavzo-lzbqng mz zmatq ngrm.

<sup>5</sup> X nipna scm qng natu x nalvctrng mz lomr  
enqmi rmqng,

X lr mrkzbleng amrlx namnclzbzng bam.

## *X Kxnmcpx*

<sup>6</sup> Nzyrlqkr Gct lc nzngini-krm King tqyc tqyc,

Mz nzaclve-krm leplz nemqng mz nzmncngr  
kx tubq-esz'ngr.

<sup>7</sup> Mrlzbz bam da kxtubq, a' px-ngrn da kxtrka.

Dekc Yawe, Gct rm, tqmcpxpe-ngrde nim mz  
nzmyaszlz-krm kztemqng.

X tqglqlz-ngrde nim,

Murde na-aelule nim tolo ngr nzabrtzng. ✧

<sup>8</sup> Lrpzmqng nzaeluti zvz mz tolo kx mnрте  
mrlzvxi.

X ncblo sc tzayrnibzng gita bam

Murde na-aelalzmle drtwrm,

Mz nabz ma nyzm kx mzte luli-esz'ngr.

<sup>9</sup> X olvi kc nangi kwin ngrm tutrpz mz nrlarm  
kxrct, nzangropliti da kx nzwzng mз gol  
kxpnapr.

Olvi lc nide kzdq inyx king kcng tzmncng ma  
nyzm.

### *Olvz Rm*

<sup>10-11</sup> Nim la nangingim Kwin. Lalztqm bange x  
aclvetio-lzbq.

Mzli kznike ncblo ngrm suti-zlwzng  
drtwrde nim mz nzlqngivxikr mzpq,

Mnclzbz bade mz nzungini-krde King x Kxetu rm.

X bzkq matq-zlwzpe mz drtwrm trtem x  
kxnginimqng.

<sup>12</sup> Kxmule-esz' lr Taea nzrkabzng da kxlqlwx  
bam,

A' bzkq nzbatrpzlr nzrnzlvzo-krm me pnz  
drtwr ncblo ngrm, kc tqngi king.

<sup>13</sup> Mzpq lxngipx-esz'ngr mz nzprtr-krm ma nyz  
king.

X lrpzmqng nzkxsilvztitr gol.

<sup>14</sup> Nim kc tqkq lrpz kxluli nzvzmibzlr nim mz  
king.

---

✧ **Sam Kranzpnu-pwx-nrade-nzlvqn (45):7** Hibru 1:8-9

- X kztemqng kx nzmnc-kamelrng nzvz-  
nqblqlr nim, mz nztutr-krbzmu mz mzte.  
15 Mz nzprtr-krmu lc ma nyzde,  
Drtwrmu elalzm x abrtz-zlwzamu.

*Mrlxmng*

- 16 King rnge, doa ncblo kcng mztr namc mz  
nqvi lrm sa nangini-kzdr king, da kc tzwai  
melrmqdrng mzli kc.  
X nangi-batrpzme nzaclve-atwrnr-krdr drtc'  
nyzm.  
17 Nabz nenge sa narkatrpz nabztq mz leplz  
nzamatq-zvz-krdr drtqm,  
X nzglqlz-krdr nim tqvzpe tqvzpe.

**Sam  
Kranzpnu-pwx-nrade-esz'mz  
(46)**

*Yawe Nide Lrpalvc Nyzgu*  
Nabz ne nqvi lr Kora.

*Me Rlakitрку*

- 1 Gct kc tqmyatxlz, nide me rlakitрку x axplrle  
nigu,  
X mz nzkqle-krqu nide mz mzli kx nzkx-  
pungr, okatrlle nigu.  
2-3 Kxmule-esz' nengq aycngrlrle nrlc, x newz  
nzbrkaong prla,  
X kxmule-esz' dxvo votrp x nrc oda,  
X newz nzyngrrl-ngrdr kz nzyrpukr nrc kxetut-  
ing,  
A' trmwxlrkuu murde abtrtpzku drtwrgu mz  
Gct.

### *Ngrlrvea Ngrgu*

- 4 Gct kc tqmyatxlz mnc mz mztea kxtr nyzde,  
Jerusalem,  
Mrkc tqpulio-ngrmle nzabrtzngr bagu,  
Mz nznngini-krgru lr mrnyzde.  
Nzvzo-krmle bagu apule lue kx yrle-kato.
- 5 X rblx nzodatingr Jerusalem murde Gct mncm  
bagu,  
X naokatrle nigu mz z bq kxmrna.
- 6 A' mz nzxlrkr lr nrlc natqde nzmwxlr-zlwzng.  
X ngyati drtwrdr nide murde aovxio-zvzle  
ami ngr kandre amrlx.
- 7 **Yawe nide ngrlrvea ngrgu,  
X nide lrpalvc nyzgu.**

### *Lrpalvc Nyzgu*

- 8 Obqamamu! Mcamu da kc tqale Yawe.  
Murde aletile da kx nzodating mz nrlc ka.
- 9 Aesakile vea amrlx mz nrlc tulvzo.  
Plameitile popz' x nipna x dalr vea amrlx x  
rtclz-ngrdeng mz nyr.
- 10 X rpilc kx, "Bzkq ota-zvzamu. A' metxpemamu  
bange murde ninge txpwz Gct.  
X ninge txpwz kx myatxlzlbz mz neidu amrlx  
mz nrlc tulvzo."
- 11 **Yawe kc tqrninr mncpem bagu,  
X nide lrpalvc nyzgu.**

# Sam Kranzpnu-pwx-nrade-rlimz (47)

*Yawe Kc Tqmyatxlz-esz'ngr*

Nabz ne nqvi lr Kora.

*Naglqpxku Yawe*

- 1 Nigu leplz amrlx na-ayrlewzku da  
Mz nzngr-abrtz-kato-krbzku mz Yawe, Gct  
rgu.
- 2 Murde na-amrlueku nide kc tqmyatxlz-esz'ngr,  
Mz nznngini-krde King kxmatq kc tqaclvele  
nrlc.
- 3 Batrpzle nzaovxio-krqu lr mrkzbleng,  
Mz nzmnczlz-krmlr bagu.
- 4 Nigu leplz ngr nqvi lr Jekop kcng tqmrlzting  
Yawe,  
Bilvzpeku drtc' kc tqmcpxbzle nangi nyzgu.

*King Rgu*

- 5 Mzli kc Yawe tqwxbuo-ngrmle mz tron nyzde  
Mangr-nzangiongr,  
Sc tqrvxupeku trpu x tqmalq-katopeku mz  
nzabrtzlvz-krqu nide.
- 6 Nangr-katobzku mz Yawe Gct rgu.  
Murde nide King rgu, nangr-katobzku bade.
- 7 Naglqlzku nide mz nabz kxyrlvi,  
Murde nide King r nrlc tulvzo.
- 8 X wxbu mz tron kxtr nyzde,  
Mz nzaclve-krde neidu amrlx.
- 9 Kxnmzmailzlr lr mrkzbleng nzaxvctr-lzbqmqng  
bagu, nigu leplz neng Gct r Ebraam.



Murde Gct kc tqmyatxlz-esz'ngr myaszpxle  
king amrlx mz nrlc.

## **Sam Kranzpnu-pwx-nrade-rtqmz (48)**

*Nzmyalzkr Jerusalem, Mzteadau Nyz Gct*  
Nabz ne nqvi lr Kora.

### *Mzteadau Nyz Gct*

- <sup>1</sup> Yawe myatxlz-esz'ngr. X takitrde nzglqlz-krngu  
nide  
Mz mzteadau nyzde kc tqycom Saeon, newz  
kxtr nyzde.
- <sup>2</sup> Nide king kx rngisc zmatq. X Newz Saeon  
myatxlz x mzte opx.  
X Mzteadau nyzde rkatrpz nzabrtzkr leplz  
mz nrlc tqlvzo.
- <sup>3</sup> Gct aelwapxpe-ngarde kx trpnzngr da kx nakx  
mz drtqgu,  
Mz nzmncpx-krngu badr mz lrpalvc nyz-  
deng mz mzteadau lc.
- <sup>4</sup> Kzdung king nzvzmqng nztung me esz'.  
Nzrpilr naotang badr lr mzteadau lc.
- <sup>5</sup> A' kx nzmclr nzmatq-zlwzkr mzteadau  
Jerusalem,  
Nzkctipx-ngdrdr x sc tzdwapeng mz zmwxlr,
- <sup>6-7</sup> Kc tqprtilzle nidr  
Apule zvetq ngr drtq olvz kx narmika.  
X nzrnrci-lzbqng  
Apule lcsu kxrtcnegr srkau ngr nounenq.

8 X mzli lcpwz, tqmnc-nrgu mzteadau nyz Gct  
rgu,  
Sc tqmcpe-kzku kx Yawe nide Gct kc tqrninr.  
X atu-amqngi-zvzle mzteadau lc,  
Da kc tzwai nzyapwxtipxkr melrmqgung le  
mzli kc.

### *Mangr-nzangiongr Gct*

- 9 Gct, aoti zvz drtwrgr nzaodu-krm  
Mz nzvztr-krgr Mangr-nzangiongr nim.
- 10 Leplz amrlx mz nrlc tulvzo sa naglqlzlr nim  
mz nzxlr-krdr nzmyalz-krm.  
Murde nzaclve-angidr-krm tubq.
- 11 X nigr lr Israel amrlx nzabrtz-ngrgr kz  
Nztubqkr da kx pipxq.
- 12 Nigu leplz neng Gct, naolvxtiku Jerusalem,  
X nabrti mzku mrkcng tztu-ngrdr kxnzaukz  
nedeng.
- 13 Naobqlvzti-zpwxku drkq ngrdeng x  
nzmqngikr lrpalc ngrdeng,  
Murde nayapwxtipx-zvzbz mz doa ne doa  
negung.
- 14 Nzmyalzkr Gct rgu sc tqaelwapx-lzbqngz mz  
mzteadau lc.  
X sc tqmailzle nigu tqyc tqyc.

## **Sam Kranzpnu-pwx-nrade- rpwxmz (49)**

*Leplz Amrlx Sa Nabzng*  
Nabz ne nqvi lr Kora.

*Narnabr Ngr Nzlu-alongr*

- 1-2 Lalztqmamu x xlrمامu natqnge, nimu nei-  
dung mz nrlc tulvzo,  
Kxmule-esz' nimu kxnzetung, leplz txneng,  
bcnyrng, x kxtrnzrngiscung.
- 3 Murde natqnge otxpx,  
X alvztr-ngrne nzyrplapxngr,
- 4 Mz nzpipx-krnge natq lrtzlvz ngrgung.  
Murde nayokaetipxx drtwr ngrdr mz nabz  
nenge.
- 5 Kxmule-esz' kxpux mz nztu-ngalelvzkr enqmi  
rngeng ninge,  
A' trmwxlrxu.
- 6 Murde kxdrka'ngr lcng nzabrtrpzlr drtwrdr mz  
trau,  
X nzglqpx-lzbqng mz nzngini-krdr bcnyrng.
- 7-9 A' trpnzng kxrkrly nzxpepx-krde nzlu-krde  
esz'-krde.  
Murde ncblo trtakitrdeu nzkapx-krde  
narnabr ngr nzlu-alongr kx yrlq Gct,  
Kxmule-esz' ka-atwrnr-ngrde trau x dztudeng  
amrlx.  
Murde rblx nzxpe-krde da kx na-arlapxle  
nide mz gq.

*Leplz Amrlx Sa Nabzng*

- 10 Leplz amrlx sa nabzng, kxmule-esz' kxnzyr-  
plapxng o kxnzngqngung.  
X dztudrng amrlx sa nabzszbzlr mz kzdung  
kz leplz.
- 11 X kxmule-esz' mzli ka nzrnginyzng drtc',  
A' gq lrdr dela nangipe ma nyzdr mz nzmnc-  
alope-krdr elr.
- 12 **Da amrlx keng tqmatq mz drtwrdr sa  
naykrpx-kzng.**

**Leplz sa nabzng da kc tzwai animol  
amrlx.**

- 13 Lrpzki r kxnzngqngung kcng tzabrtrlr drtwrdr  
mz nidr esz'-krdr x mz dztudrng,  
Yrkrtxpxpwz mz nzbzngr.

*Kxmule-esz' Bcnyrng*

- 14 Apule kx nzbzngr nide kxetu rdr kc tqmailzle  
nidr mz gq lrdr,  
Mz nzapu-krdr sip.
- X kxnztubqng sa navzneng wq mrkc  
tzyrtzmqngr namz ngrdr.  
X mz nzmibi-krdr, nzyc-rlrubzng mz ma  
nyzdr.
- 15 A' Gct sa naxpetrle ninge mz zmatq ngr  
nzbzngr,  
Mz nzarlapx-krde ninge mz gq.
- 16 Bzkq nabzmu talvzo mz nzmc-krmu bcnyrng,  
X nzkqlunepxkr dztudrng.
- 17 Murde rblx nzrtwzmingr dztung mz nzbzngr.  
Dztung la tqyc, a' nrkrdrdq la namibi.
- 18 Kxmule-esz' bcnyrng nzabrtz-zvzng mzli kc  
tzlube-ngrdr,  
X nzamatq leplz nidr murde sc tzakqlunepx-  
zvzlr dztudrng,
- 19 A' sa navzo-kzng mz gq, da kc tzwai melrmq-  
drng,  
Mz nzmnc-alo-krdr mz nzlo.
- 20 **Da amrlx kcng tqmatq mz drtwrdr mane x  
nadr tryrplatrpwzu.  
Leplz sa nabzng da kc tzwai animol  
amrlx.**

## Sam Kranzpnu-nzlvqn (50)

*Blz Angidr Nangi Nzawi-ngrbz Mz Gct*  
Nabz ne Asaf.

### *Nzyrlwrkr Leplz Neng Yawe*

<sup>1-3</sup> Yawe, nide Gct kc tqxplr esz'ngr.

X zluli rde pnamilxtile mzteadau Jerusalem  
kc tqqlngi.

A' nrlc ycngrlrlzm mz nzvz-krmlc,

Murde nyr wounepx kai mz nzangc-krde da  
amrlx,

X nounenq o-ngalelvzle nide.

X kqlele lr Heven mz nzayrlwr-lxblr-krdr  
leplz amrlx mz nrlc.

<sup>4</sup> Navzmqng mz nzmc-krdr nztubqkr natqde,  
Mz nzpipx-krde nzvz-rbrkr leplz nedeng.

<sup>5</sup> X rpibzle mz lr Heven kx, "Vzmimamu krkcng  
tzlxngitilr ninge,

X drtwrgr badr tqesz'ti mz nzangc-krmlr  
bange blz krdr, murde nayrlwr-ngalelvzlr  
ninge."

<sup>6</sup> X lr Heven nzrpilr kx, "Gct, nzaclve-krm rsakrl-  
rngr.

Murde tubqq mz nzryrlq-krm drtwr."

### *Gct Atubqtile Leplz Nedeng*

<sup>7</sup> Rpi Gct kx, "Leplz nengeng, xlrnamu natqngc.

Murde ninge Gct rmu x na-aelwa-ngrbo  
mrkc tqvz-rbrtiamu.

<sup>8</sup> Animol kc tqngi blz tqkamamu bange, trngiu da  
kx myapxbz,

Mz nzangco-zvz-krmamuleng mz olta.

- 9 X trngi-kzu da kx myapxbz nzangc-krmamu  
bange  
Gout x kzu kxncblongr dalr nardzng nyzmu.
- 10 Murde dalr peto amrlx nyzngeng,  
X wai-kzle kzu amrlx kcng tzmncng mz siu r  
newz.
- 11 Utc ngr peto amrlx nengeng,  
Nidr badr animol ngr nardzng.
- 12 Nzmu nabrtalex x drtwrnge brlxkz tr-rlxpcw'u  
bamu da.  
Murde nrlc nyznge x dalrdeng amrlx.
- 13 X trmuwxu ncvr kzu.  
X tr-rmnqwxu mepyr ngr gout.
- 14 **A' blz angidr nangi nzawi-krmamu bange,**  
X nzangidati-krmu da kx esalz-ngrmamu  
bange.
- 15 X mrlz nzkrka'-krmamu bange mzli kc tqkxpu-  
ngrnamu,  
Murde naglqlzamu ninge kalr mz nzarlapx-  
krnge nimu."

*Alwx Ngr Kxdrka'-ngrng*

- 16 A' rpibz Gct mz leplz kxdrka'-ngrng kx, "Trtak-  
itrdeu nzyapwxti-zvz-krmu Loukxtr scnge,  
Mz nzymnetr-krmu Nzryrnrkxtrng.
- 17 Murde pxtxpx-ngrnamu nzatubqti-krnge  
nimu,  
X rtctx-ngrnamu natqnge.
- 18 Alwx ngrmung nidr seleng:  
Mrlzbz bamu nzngi-kzte-krmu ncblo kx pna da,  
X nzprtr-ngrbz mz leplz kcng tzrmwimi-  
abeaneng leplz kx trngiu krnalzdr.
- 19 Ycmnetrpwzmu mz da kxtrka,

X naomu tresakiu nzrpi-twzti-krdr da kx  
nzesabrtingr.

<sup>20</sup> Pikiti-zvzamu kztemung,

X pibqti-kzamu mzlemung.

<sup>21</sup> Mz nzale-krmu da lcng sc tqmnc-lrpinebo.

X rpiamu mz drtwrmu, mrlzm bange nzale-  
krmuleng.

A' trtingr! Murde da kcng tqvz-rbrtiamu  
delcng tqaplxtipx-atebo bamu.

*Yawe Sa Na-ayrplapxle Lepz Kalr*

<sup>22</sup> "Mzli ka natekqtramu nqmq krmu,

Murde ma tqodatitxne nimu

X sc trpengr kx na-arlapxle nimu.

X bzkq mrbrtr mz drtwrmu nzamatq-krmu  
ninge.

<sup>23</sup> **Blz angidr nangi nzawi-krmamu bange.**

Murde narmctiamu nzarlapx-krnge nimu,  
mz nzvz-nqblq-krmu ninge."

## Sam Kranzpnu-nzlvqn-nrade-esz' (51)

*Nabz Lepz Kx Avzo-lzbq*

Nabz ne King Devet,

kx yrle mz nibr nzymne-plztitr-krbz Profet  
Neitzn mz nzmwimi-krde Batsibz.

*Wztibz nabznge*

<sup>1</sup> Gct, naye mz drtwrm ninge,

X atubqtim nzvz-rbr-krngeng, murde aodu-  
zvzq ninge.

<sup>2</sup> Wztibz nabznge mz alwx rngeng amrlx

Kcng tzatkatilr ninge.

<sup>3</sup> Murde opxpe mz mzke' nzvz-rbr-krngeng.

X plzpxbo nzesablqti-zvz-krnge nim,

<sup>4</sup> X myapxbz nim kc tqxpqbrlr-ngrne

Mz nznrlvzo-krnge Loukxtr scm.

Delc, tubqq mz nzrpi-krme bange kx vz-rbrx,

X mz nzyrlq-krm nzayrplapxngr ninge. ✧

### *Ipq Ninge*

<sup>5</sup> Mrlzm bange nzale-krnge alwx

Murde mzli kc tqmncbe-ngrne mz nelz lx-enge, alwx rnge ycpebz.

<sup>6</sup> A' suti drtwrm kx nabznge navz-nqblqle nzmncngr angidr.

Delc, na-alvztr-ngrn ninge murde nayrplapxx.

<sup>7</sup> Wzti-angidrbz nabznge,

Murde nzprki-krnge namyaszpxle nqbya r nrc.

<sup>8</sup> Ipq ninge murde na-abrtzx,

X drtwrnge kc tqavzbzme naelalz-mop.

<sup>9</sup> Bzkq obqtrpeq nzmyakr drtqnge mz alwx rngeng,

A' ipqpxbz alwx rngeng amrlx.

### *Tekqtrpz Nabznge*

<sup>10</sup> Gct, tekqtrpz nabznge murde natubqx,

X amrnale mqngrnge murde navz-nqblqx nim.

<sup>11</sup> Bzkq maszlrpx-ngrn ninge mz nzmncntr-krbo bam.

X bzkq katxpxq nzokatrkr Mqngm ninge.



- 12 Okatrp ninge murde na-abrtz-mou-ngrne  
nzarlapx-krm ninge,  
X drtqnge navq mz nzvz-nqblqngr natqm.
- 13 Zbz sa na-alvztrpo nqm q krmqng mz kxdrka'-  
ngrng,  
Murde nayzlu-mopwzlr bam.

### *Nawztrpo Bam*

- 14 Gct, bzkq ayzlu-mope' bange nznribq-krnge  
ncblo,  
Murde na-angrlvzx nim mz nzarlapx-krm lc  
ninge.
- 15 Kxetu, okatrp ninge  
Murde naglqlz-ngrne nim nivz lrm.
- 16-17 Trabrtz-ngrwq nzungco-ngrm blz mz olta  
nyzm.  
A' blz kx mrlzbz bam nabz leplz kx avzo-lzbq  
x plzpxle alwx ngrdeng.
- Delc trna-angco-ngrpwc'u blz mz olta nyzm,  
A' avzo-lzbq-zvztxpwo bam.

### *Blz Kxtubq*

- 18 Krka'-ngrbo bam kx naokatrpe' nigr leplz  
nemqng  
Mz nzamqngi-mou-krgr drkq ngr Jerusalem.
- 19 Murde nzungco-krmgr blz mz olta nyzm  
navzpxm mz nzka-lzbq-krbzkzr bam.  
X krlc blz kxtubq mz nzobq-krm.

## Sam Kranzpnu-nzlvqn-nrade-li (52)

### *Kxetu Kx Atrkati Leplz Mz Zmatq Ngrde*

Nabz ne Devet kx yrbzle mz kxrmailz ngr dzbe kxnzngrng, mzli kc Doek kc Edom tqvz-ngrbzle mz Sol mz nzrpi-krbzle kx, “Devet mncpe ma nyz Ahimelek.”

- <sup>1</sup> Kxmule-esz' nim ncblo kxetu kxmatq,  
a' bzkq glqpx-lzbqq mz da kxtrka kcnq  
tqaleq,  
Murde Gct vz zvz nzangidati-krde natqde.
- <sup>2</sup> A' ryrlq-zvzq drtwr kx na-atrkati-ngrn leplz.  
X mzli kc tqycmne-ngrn, natqm apule toki kx  
malc, mz nzpibqti-krm nidr.
- <sup>3</sup> Nzmlrz-zlwz-krbz da kxtrka bam myaszpxle da  
kxmrlz.  
X mz drtwrm, nzpokia-krm myaszpxle nzrpi-  
krm da angidr.
- <sup>4</sup> Nim Mepokia,  
X abrtz-zvz-ngrn nzaetq-krbzme drtq leplz  
mz natqmqng.
- <sup>5</sup> Delc sa nakilzpx-ngrm Gct nim ma nyzm mz  
nzodati-alope-krde nim.  
X sa na-ayrkrpxbzle nzlu-krm mz nrlc ka.
- <sup>6</sup> X kxnztubqng sa na-amrlue-ngrdr Gct  
nzayrplapx-krde nim.  
X sa nayrpalelvzlr nim mz nzrpi-krdr kx,
- <sup>7</sup> “Mcamu ena ncblo kc trmnc-xgleleu Gct.  
A' axplr-lzbq mz nzatrkatikrde leplz x  
nztwz-krde trau kxkqlu mz zmatq ngrde.”

- 8 A' ninge sa na-apux nc olivi kc dzbrde  
tqtu-amqngi mz nzmncpx-krmc Mangr-  
nzangiongr,  
Murde vz zvz nzbrtikr drtwrnge nzaodu-  
alokr Gct.
- 9 Delc Yawe, sa na-awi-zvz-ngrbo bam da kcng  
tqaletiqng.  
X sa napipxbo mz leplz nemqng nzmrlz-  
zlwz-krm.

## Sam Kranzpnu-nzlvqn-nrade-tq (53)

### *Nzngqngukr Kxtrnzrlxngitiung*

Nabz ne Devet kx yrbzle mz kxrmailz ngr dzbe  
kxznzngng.

- 1 Leplz kx nzngqngung mz drtwrdr nzrpilr kx,  
“Trpnzngr Gct.”  
Leplz lcng nzvz-rbrng x nzale-txpwzng da  
kxtrka zlwz.  
Trpnzngr leplz lcng kxtubq.
- 2 Gct mncom Heven, x sc tqmcomle leplz amrlx,  
Mz nzmc-krde neke yrplapx mz nzrtangrti-  
krde nide.
- 3 A' nzesablqtilr Gct amrlx ngrdr  
x drtwrdr esz'ti mz nzale-krdr da kxtrka.  
Trpnzngr nidr kxes' kxtubq. ☆
- 4 Delc tqrpinger Gct kx, “Leplz lcng tztrkang  
tznibqtitxdr leplz nengeng  
Nzapulr kx nznribqng da kx nangqdr.  
X mrbrtr mz drtwrdr nzkrka'-krmlr bange.

---

☆ **Sam Kranzpnu-nzlvqn-nrade-tq (53):3** Rom 3:10-12

?Myx kxmule, trnzkrzlru da kxtubq?”

<sup>5</sup> A' mzli ka nzmwxlr-zlwz-krdr myaspxpele  
mzli kc.

Murde Gct sa naptxpx-ngrde enqmi rgung.  
X drtqdr sa namya mz nzaovxio-alo-krgru nidr.

X namz ngrdr sa narlxbuliane-ngrbz Gct mz  
nrlc.

<sup>6</sup> Sutitx zlwz drtwrnge kx Gct rgu kc Saeon na-  
arlapxle leplz nedeng.

Murde mzli kc nayzlu-mou-ngrmle, namnc-  
zpwsku badr.

X nigu lr Jekop drtwrgu sa naelalzm.

X nigu lr Israel sa na-abrtz-ngrgu da lc. ✧

## Sam Kranzpnu-nzlvqn-nrade-pwx (54)

*Nzbrtikr Drtwrgu Gct Nzaovxio-krde Enqmi  
Rgung*

Nabz ne Devet kx yrbzle mz kxrmailz ngr dzbe  
kxnzngrng,

mzli kc lr Sifz tzvz-ngrbzlr mz Sol mz nzrpi-  
krbzlr kx, “?Krlzq kx Devet sc tqmnc-kapq mztea  
nyzgr?”

<sup>1</sup> Gct, arlapx ninge mz zmatq ngr drtqm,

X aelwzpx-ngrbz nztubq-krnge mz nztu-  
krbzme mz nibrnge.

<sup>2</sup> Xlrm natqnge

Mz nzkrka'-krbo bam.

<sup>3</sup> Kxnzaetqng drtq nzglqpx-lzbqng nzrpilr natzlr  
ninge,

- X krkcng tzxpqbrlr-ngrdr nim, nzrpilr  
nanibqlr ninge.
- <sup>4</sup> A' nim Gct kx okatr-zvzle ninge,  
Mz nzungini-krm Kxetu rnge kc tqmnc-xgle-  
zvzx.
- <sup>5</sup> Yawe Gct, ayzlu-mopwz badr da kxtrka kcng  
tzwaisr-ngrdr ninge.  
X nibq nidr murde nim kx brti drtwr.
- <sup>6</sup> Zbz sa na-abrtzlvzx nzrka-krbo bam blz mz olta  
nyzm.  
X na-awi-ngrbo bam nzmrlz-zlwz-krm.
- <sup>7</sup> Murde arlapxq ninge mz nzxpu-krngeng am-  
rlx,  
X okatrq ninge mz nzaovxio-krnge enqmi  
rngeng.

## Sam Kranzpnu-nzlvqn-nrade- nzlvqn (55)

### *Kxdrka'-ngrng X Kxamwale Kztede*

Nabz ne Devet kx yrbzle mz kxrmailz ngr dzbe  
kxzngrng, mz nzayrningr gita.

### *Nzkrka'ngr*

- <sup>1</sup> Gct, xlrn nzkrka'-krbo bam.  
X bzkq drtqm satrp nzymne-krbo bam.
- <sup>2</sup> Lalzmq bange x ayzlum natqng,  
Murde nabzng tropxpeu mz nztalvzo-krde.

### *Nzetqkr Drtq*

- <sup>3</sup> Enqmi rngeng nzkatrpqng bange nzxpungr,  
Mz nzxngitr-krnge nzymne-kato-krdr,  
Mz nznzlvzo-krdr ninge,  
X nzobq-krmlr bange mz zngya.

- 4 Nelznge vzdz-zlwzm,  
Murde ycpe pipz nzbz-krnge.
- 5 Rnrcti-lzbqpenge mz zmwxl,  
X nrkrdrtnge esz'pe-ngrde.
- 6 X rpix mz drtwrnge kx, "Nzmu nabxnge naycb-  
zle, da kc tqwai bona,  
Nalvcx x nartangrx me namnc-zpwx-ngrne.
- 7 Nalvctr-rlrux lzke,  
X namnc-lrpix esz'-krnge mrlcde.
- 8 Na-anitxpwo nzrtangrti-krnge me narlakitrx  
Mz tewa x nounenq."

### *Nzkrka'ngr*

- 9 Kxetu, akipx kxdrka'-ngrng mz nzarlxlvr-  
tkrbzme natqdr.  
Murde nzota-zvzng x nznani-lzbq-zvzng mz  
mzte.
- 10 Mz nrckxngrlx x nrckxbq  
Mztea esz'tx-ngrpwx nzxpqbrlgr lou x  
nzxpungr.
- 11 Nzodangr prt-zvzm mrlcng kqlu mz mztea.  
X me nzamwangr da tresakipxpuu  
nzpokianger x nzangqngutingr leplz.

### *Kxamwa Kztede*

- 12-14 Kztenge, mzli kc ryapwx-angidrki mz nzodu-  
krgi,  
X vztr-lxblrki mz Mangr-nzangiongr Gct.  
A' mzli ka trngiu enqmi rnge kc tqxtrnga-ngrde  
ninge,  
A' krlc nim, kc tqmuki me esz' x line-zvzki.  
X trngiu kxpptpx-ngrde ninge kc tqyrpalelvzle  
ninge,  
A' krlc nim, mrlxkztenge.

Mz nzatrkatikr enqmi rnge ninge  
Nabznge trtalvzou x krlzx nzmnc-kapqngr,  
A' nzamwa-krm lc ninge, kx mzlenge,  
Delc tqvztx-zlwzngr drtwrnge.

### *Nzkrka'ngr*

- 15 Gct, ayrkrpx-anibz enqmi lcng nabzdr x nzaokrdr drtwrdr tqdrka'ngr,  
Murde napwrkilvc-ngrdr nzbz-krdr.
- 16 Yawe, mzli kc nayrni-ngrbo bam,  
Krlzx kx sa na-arlapxq ninge.
- 17 Murde sa naxlrme natqnge mz nourla, bea, x  
mz nrlckxbq,  
Mz nzkalz-zvz-krbo bam nzlckr drtwrnge x  
nztalvzokr nabznge.
- 18 Kxmule-esz' enqmi rngeng nzklung, a' mzli  
kcpe naota-ngrgr badr,  
Sa na-amnc-zpwxq ninge mz mzlirdr.
- 19 Murde nim Gct kc nzaclve-krde tqyc tqyc.  
X sa na-ayzlume natqnge lcng mz nzaovxio-  
krm nidr mz nzotangr.  
Murde nzpxtxpx-ngrdr nztekqtr-krdr nqm q krdr,  
X trnzamlue-kzlru nim.

### *Kxamwa Kztede*

- 20 Mrlxkztenge lc, mzli kc nigr badr dzbede  
kxesz', a' mzli ka yrlqpx-lzbq mz nzesz'tikr  
drtwrgr badr.  
A' se tqrtwztiptele nigr zngya tqotapekr badr.
- 21 Nzprlxpx-krde nivz narpi-ngrbz nide ncblo  
ngrde,  
A' mz nabzde la poi kx mu ncblo.  
Mz nzymne-krde nide pakrle,  
A' natqdeng malc apule toki r vea.

*Nzkrka'ngr*

<sup>22</sup> Yawe, napipxbzkr nzxpu-krgrng bam, murde  
nalolvz-amqngiq nigr.

X tr-rlrpx-ngrwq leplz kxnztubqng nzaxtx-  
krbzlr nzlxngiti-krdr nim.

<sup>23</sup> Murde sa nartco-ngrn mz gq lrdr

Krkeng tznibqng x tzpokiang,

Mzli lc tznginibe-ngdr obla.

A' sa na-abrtr-zvzbo drtwrge bam.

## **Sam Kranzpnu-nzlvqn-nrade- esz'mz (56)**

*Mzli Kznike Mwxlr-ngrne, Abrtrpo Drtwrnge*

*Bam*

Nabz ne Devet kx yrbzle mz kxrmailz ngr dzbe  
kxnzngrng,

mzli kc tzlolvzngr lr Filistia nide mrkc mztea Gat.

*Okatrp Ninge*

<sup>1-2</sup> Yawe, nayc mz drtwrm ninge.

Murde enqmi rngeng nzkqlu-zlwzng.

X vz zvz nzmaneuti-krdr ninge x nzatrkatikrdr  
ninge,

Murde nzrpilr na-aovxiolr ninge mz  
nznzlvzo-krdr ninge.

<sup>3</sup> A' mzli kznike mwxlr-ngrne,

Abrtrpo drtwrge bam.

<sup>4</sup> **Trmwxlr tiwxu zmatq ngrdr murde abrtrpo  
drtwrge mz natqm,**

**Nim Gct kc tqglqlz-zvzx.**

<sup>5</sup> Yawe, enqmi rngeng vz zvz nzrtangr-krdr drtwr  
kx na-atrkati-ngdr ninge,



Mz nzrkatr-zvz-krmlr nzkxpungr bange.

<sup>6</sup> X nzyrlwr-lxblrng me nzmnc-kapq-ngrdr,  
Mz nzaukzti-krdr ninge, murde nanibqlr  
ninge.

<sup>7</sup> Bzkq rlr-ngrbzme nzdwa-krdr,  
A' ayrplapxng mz zngya ngr drtwrm.

### *Abtrpo Drtwrnge Bam*

<sup>8</sup> Krlz-angidrq nzrkrkxkr drtqng.  
Murde aplxtipxpeq nztaliokr drlemzke' am-  
rlx, mz nzyrtio-krmlr mz buk scm.

<sup>9</sup> X krlz-zpwxx kx mz nzqle-krnge nim, sa  
navzme x enqmi rngeng nadwaszlr ninge.  
Murde tu-zvzme mz nibrng.

<sup>10-11</sup> **Trmwxlrtiwxu zmatq ngrdr murde  
abtrpo drtwrnge mz natqm,**  
Yawe, **nim Gct kc tqglqlz-zvzx,** x brti  
drtwrnge natqm amrlx.

<sup>12</sup> X sa na-alebo bam da kcng tqpibo,  
Mz nzrka-krbo blz ngr nzawingr.

<sup>13</sup> Awi mz nzarlapx-krme ninge mz mq enqmi  
rngeng.  
Murde trpnzngr nznibq-krdr ninge,

X trmetxpou badr.  
Gct nawztr-zvzbo bam, nzmnc-krnge mz  
nrlc.

## Sam Kranzpnu-nzlvqn-nrade-rlimz (57)

*Batrpz Mz Lr Nrlc Tulvzo Nzmc-krdr  
Nzaovxio-krm*

Nabz ne Devet kx yrbzle mz kxrmailz ngr dzbe  
kxzngrng,  
mzli kc tqrlatr-ngrde mz butqbr mz nzdwasz-  
krde King Sol.

*Nayc Mz Drtwrm Ninge*

<sup>1</sup> Gct, nayc mz drtwrm ninge mz nzaelwa-krm  
bange nzmrlz-esz'ngr-krm,

Murde mnc-xglex nim mz nzmnc-zpwx-  
krnge mz mzli nzkxpungr kxtrka.

X na-apux nei bona kc tqmnczbz mz nabx lxede,  
Mz nztu-krm me mz nibrnge, navz navz mzli  
kx ayrkrpx-ngrn nzodangr.

<sup>2</sup> Gct, myalz-esz'ngrn, x sa nakqlex nim,  
Murde angidati-zvzq me pnz drtwrm mz  
nzmnc-krnge.

<sup>3</sup> Sa na-ayzlume natqng Heven mz nzarlapx-  
krm ninge.

X na-amyatibzme drtq krkcng tznzlvzolz  
ninge.

Murde aodu-zvzq ninge,

X angidati-zvzq natqm.

*Nzrtxtiolr Ninge Br*

<sup>4</sup> Nztu-ngalelvzlr ninge ncblo ngr nzodangr.

Spiz x nipna scdr nzapulr nqngi kx malc,

X natqdr nzaetq-krdr drtq apule nzrluplxtikr  
toki r vea.

**5 Lr Heven namclr nzmyalz-esz'ngr-krm.**

**X lr nrhc namclr nzaovxio-krm.**

**6** Kxmule-esz' nabzngc talvzo zlvwz murde enqmi  
rngeng nzrtxtiolr ninge br,  
A' awi Gct, kx naprtz-moung mz trtxki kx  
nzamwiti-ngdr ninge.

*Sa Na-angrlvzx Nim*

**7-8** Sa na-angrlvzx nim mz nabzngc atwrnrngr mz  
nzayrni-krbo gita bam.

Murde abrtr-zvzbo drtwrnc bam.

Nilz r nepi adwalzmlc ninge mz zbq kang kqlu.

A' mz nzdwalz-krmc mz nourla kx topwz,

Na-apule nabz nenge adwalzmlc nepi,

Mzli lc naglqlzpcx nim.

**9** Kxetu, sa na-awibo bam mz mzlr lr mrkzbleng,  
X na-angrlvzx nim mz mzlr neidung.

**10** Murde nzaodu-zvz-krm myalz krlzlezle bon-  
gavz,

X nzangidati-zvz-krm natqm. ☆

**11 Lr Heven namclr nzmyalz-esz'ngr-krm,**

**X lr nrhc namclr nzaovxio-krm. ☆**

## **Sam Kranzpnu-nzlvqn-nrade- rtqmz (58)**

*Kxdrka'-ngrng Nzapulr Ningidoe Kcng Tzr-  
makxng*

Nabz ne Devet kx yrbzle mz kxrmailz ngr dzbe  
kxnzngrng.

---

☆ **Sam Kranzpnu-nzlvqn-nrade-rlimz (57):10** Sam 36:5; 57:10;  
71:19; 103:11 ☆ **Sam Kranzpnu-nzlvqn-nrade-rlimz (57):11**  
Sam 108:1-5

*Kxnzetur Kxdrka'-ngrng*

- 1 ?Kxnzetur, myx kxmule, nzaclve-krmu tubq,  
X rsakrlrngr angidr?
- 2 Trtingr! Murde yrlqamu drtwr kx atrkatile  
leplz nemung,  
Mz nzaetq-krbzmu drtqdr mz nrlc ka.
- 3 Nimu kxdrka'-ngrng. X ale-zvzamu da kxtrka,  
Yzuo pnz mzli kc tzmcngr mzpu.
- 4 Apuamu ningidoe kcng tzrmakxng  
Mz nzatrkatikrmu leplz.
- 5 X apu-kzamu kxnradrtqdr ngq murde pxtpx-  
zvz-ngrnamu nzxlr-krmu nzyrni-krdr,  
X nzayzlu-krbzmu natqdr.

*Nzayrplapxkr Gct Kxdrka'-ngrng*

- 6 Yawe, ayrplapx leplz lcng tzapulr ningidoe, mz  
nzyrvilz-kirme nipna scdr.  
X mz nzapu-krdr poi kz peto, taglctr-kzpz  
nqngidr.
- 7 Mrlzvxitx nzbatr-krbzme nzmyakr nipna scdr,  
X nzmrbr-krdr na-apule lue kc tqmrbrlqo mz  
drtc'.
- 8 X mrlzvxix kz nzapu-krdr zwqwwq r wagq kc tq-  
rprnebz mq mz nzngrla-krde x mz nibrde  
sc tqmrbrpe mou mz nztioqr nepi le.  
X na-apu-kzlr itoto kx bz murde nzmika mzli  
kc tqpoobe-ngrde.
- 9 Gct, mzli kc tzlube-ngrdr, apusrngr nidr nabr kc  
tzikzti,  
Mz nzodati-krm nidr mz zngya ngr drtwrm.

*Nzabrtzkr Leplz Neng Gct*

- 10 Zbz nigr kxnztubq nemqng sa na-abrtz-zlwz-  
ngrgr nznibqti-krm kxdrka'-ngr lcng.

X sa naelalvzkr nzyrlekr mepyr ngrdr.

- <sup>11</sup> X sa napibzkr bam kx, "Gct, da zpwxtx! Sa nakabzme da kxmrlzting mz leplz kxnz-tubqng,  
Murde nzaclve-krm lr nrlc tubq-esz'ngr."

## **Sam Kranzpnu-nzlvqn-nrade-rpwxmz (59)**

### *Kxdrka'-ngrng Nzapulr Kuli Kzpeto*

Nabz ne Devet kx yrbzle mz kxrmailz ngr dzbe kxnzngrng,  
mzli kc King Sol tqatwzlr-ngrde ncblo mz nzaukzti-krdr ma nyz Devet, murde nanibqlr nide.

### *Kuli Kzpeto*

- <sup>1</sup> Gct rng, arlapxbz ninge mz enqmi rngeng,  
X tum mz nibrnge mzli kc naoti-ngrmlr ninge.
- <sup>2</sup> Arlapx ninge mz kxdrka'ngr lcng,  
Tzkrlzlr nznribqngr leplz.
- <sup>3</sup> Yawe, obqm! Ncblo lcng tzyrlwr-lxblrng nanibqlr ninge.  
A' trpnzng da kxtrka kx alebo badr.
- <sup>4</sup> Kxmule-esz', a' se tzoliqtilr nztz-krdr ninge.  
Tulzm x vzm mz nzokatr-krm ninge.
- <sup>5</sup> Yawe, nim Gct kc tqrninr, Gct r lr Israel.  
Dwalzm mz nzayrplapx-krm lr mrkzbleng.  
X bzkq ycngr drtwrm krkcng tzyrlqng drtwr kxtrka.
- <sup>6</sup> **Nyzyluti-zvzmlr mztea mzli kc milzpq,**

**Nzapulr kuli kzepto kcng tzkclwzng mz  
nzvzne-krdr mztea.**

<sup>7</sup> Drtwrdr n zamqmqlr x natqdr nzapulr toki r vea  
kxmalc.

Mz drtwrdr n zrpilr trpnzngr kx rkrlztrpz x  
trpnzngr nzayrplapxngr nidr.

<sup>8</sup> A' nim Yawe, yrpaelvzq kxnmnc-mrbr lcng,  
X xtrnga-ngrn nidr.

*Temz Ngr Lomgr*

<sup>9</sup> Gct rnge, abrtr-zvzbo drtwrnge mz nzxplr-krm,  
**Murde nim lrpalc nyznge.**

<sup>10</sup> X krlzx kx sa na-aovxiox enqmi rngeng,  
Murde naokatrq ninge mz nzaodu-zvz-krm.

<sup>11</sup> Yawe, nim temz ngr lomgr kc tqyrputrngr  
nipna.

Nibqti nidr, murde leplz nengeng nadcpz mz  
drtwrdr

Kx nim Gct kc tqayrplapxle kxnaleng alwx.

Aodaliti nidr mz zmatq ngrm, murde  
nataong mz drtc'.

<sup>12</sup> Batrpz mz nzglqpx-lzbq-krdr nzatao-mou-krde  
nidr.

Murde mz nzymne-krdr natqdrng ngi dalr  
alwx, mz n zrpibqtingr x n zpokianger.

<sup>13</sup> Odati nidr mz nzmilxtxo-krm nidr mz zngya  
ngr drtwrm.

Murde leplz nakrlzlr kx nim Gct kc tqaclvele  
lr Israel x lr nrlc tulvzo.

<sup>14</sup> **Nyzyluti-zvzmlr mztea mzli kc milzpq,  
Nzapulr kuli kzepto kcng tzkclwzng mz  
nzvzne-krdr mztea.**

<sup>15</sup> Nzrtangrng nadr dakxnzng me yctxpqng,

X drtwrdr nzamqmqrlr mz trnzkrlic-kru nelzdr.

### *Lrpalvc Nyznge*

<sup>16</sup> A' sa nangr-kato-zvzx mz nourla kang kqlu,  
Mz nzpipx-krnge zmatq ngrm x nzaodu-zvz-  
krm.

Murde apu-zvzme bange lrpalvc nyznge  
Kxrlakitrz mz mzli r nzkxpungr.

<sup>17</sup> Sa na-angrlvz-zvzx nim, Gct kc tqaodu-zvzle  
ninge.

**Murde nim lrpalvc nyznge** kx xplr-esz'ngr.

## **Sam Kranzpnu-esz'mz (60)**

### *Glalzm Nc Nqngq Bagr*

Nabz ne Devet kx yrbzle mz kxrmailz ngr dzbe  
kxznzngng,  
mzli kc ami nzling nzrpilr narnzlvzo-ngrdr Israel  
nzprtrpqng mz kzdq nrlar Israel. X ami ngr  
lr Edom nzprtrpqng mz kzdq nrlarde, Nabzlwa  
ngr Dcpwe, mrkc Joab kc tqmailzle ami ngr  
Israel, tzabz-ngrdr ncblo siu-nzpnu-esz'-nrade-li  
(12,000).

### *Ngrlrvea Ngrgr*

<sup>1-3</sup> Gct, mz nzngyatikr drtwrm nigr, drtqm satr-  
pem bagr.

X batrpeme mz enqmi rgrng nzprtr-krmlr  
mz nzawxo-krdr bz ngr nrlc nyzgr.

Nzatrkatikrdr nigr apule nengq mz nzaglwiti-  
krde drtc'.

X da amrlx trnzaxvctrpeung.

Dea-ngrgr vznepe mz nzvzne-krgr apukr ncblo  
kxznzrmnqng,

Mz nzaetqtitx-zlwz-krbzme drtqgr, nigr leplz nemqng.

A' suti drtwrgr nayzlu-mopwe' bagr

Mz nzamrlz-mou-krm drtc' nyzgr, murde namnc-zpwx-moukr.

<sup>4</sup> Nim Ngrlrvea ngrgr. Glalzm nc nqngq bagr, nigr kcng tzamrluelr nim,

Murde navzmgr bam mz nztu-mou-krgr me esz'.

### *Gct Ayzlu-ngrmle Natqgu*

<sup>5</sup> Mz zmatq ngrm, arlapx nigr kcng tqaodu-zvzq, X ayzlu-ngrm natqgr.

### *Da Kc Tqpi Gct*

<sup>6</sup> Gct, natqmqng nzvzpxmqng mz Mangr-nzangiongr, mz nzrpi-krdr kx,

“Mzli kc na-aovxio-ngrne, sa na-akipxbo mz leplz nengeng

Drtc' kcng mz nrlar LueJodz nrlilr.

<sup>7</sup> Murde neidu lr Gilead nengeng.

X nqvi lr Manase nenge-kzng.

X neidu lr Efrem tum mz nibrnge.

X nqvi lr Judz kx na-acive-zvzng mz zmatq rnge.

<sup>8</sup> A' enqmi rmung trna-aovxiolru nimu.

Murde lr Moab sa nawztrpqng bange

X lr Edom sa nametxmqng bange.

X sa namalqlvzx nzmilxtxo-krnge lr Filistia.”

### *Natq King*

<sup>9</sup> ? Myx kxmule, sa na-atutrq natqm lc mz nzokatr-krm ninge

Nzprtr-krnge mz lrpalc ngr mzteadau nyzdr lr Edom?



- 10 Murde mzli kc pxtpxpe-ngrn nigr,  
X trokatrwq ami negr mz nzotangr.
- 11 Gct, okatrp nigr mz nzota-krgr badr enqmi  
rgrng mzli ka.  
Murde mane nzmnc-xgle-krgr ncblo  
nzarlapx-krdr nigr.
- 12 X krlzkr kx mz nzmnc-krme bagr,  
Sa narnzlvzokr enqmi rgrng mz nzokatr-  
krm. ☆

## Sam Kranzpnu-esz'mz-nrade-esz' (61)

### *Vzmibz Ninge Mz Butqbr Kxmngi*

Nabz ne Devet kx yrbzle mz kxrmailz ngr dzbe  
kxnzngrng.

- 1 Gct, xlrn nzyrni-krnge,  
X lalztqm mz nzkrka'-krnge.
- 2 Kqlex nim murde mncx esz'-krnge, x nabznge  
talvzo zlvz.  
Vzmibz ninge mz butqbr kxmngi.
- 3 Murde nim lrpalvc nyznge,  
Me rlakitrz mz mq enqmi rngeng.
- 4 Rlr-ngrm bange nzmncpx-alo-krmc mz ma  
nyzm.  
Murde na-apux nei kio kx mnc-kapqlzbz mz  
nabx lxede.
- 5 **Gct, abrtzlvzq nzesalz-krnge nzangrlvz-zvz-  
krnge nim.**  
Murde krlc takitrde leplz kcng tzamrluelr  
nim.

- 6 Kam bange nzlungr kxboi, ninge king nem,  
Murde nzmnc-krnge navz zvz.
- 7 Okatrp ninge mz nzaclve-angidr-krnge leplz  
nengeng mz nzmnc-lz-krbo mz zmatq  
ngrm.  
Ayrbqpx ninge mz nzaodu-zvz-krm ninge x  
nzangidati-krm natqm.
- 8 **Delc na-angrlvz-zvzx nim,**  
**Mz nzale-krnge da kc tqesalz-ngrbo bam.**

## Sam Kranzpnu-esz'mz-nrade-li (62)

### *Mnc-xgle-zvzku Gct Txpwz*

Nabz ne Devet kx yrbzle mz kxrmailz ngr dzbe  
kxznzngng.

### *Mnc-xgleamu Gct*

- 1 **Gct txpwz kx mnc-xgle-zvzx mz nabznge,**  
**Murde nzmnc-zpwx-krnge vzpxm bade.**
- 2 **Nide butqbr nyznge x mevalu rnge.**  
**Nide lrpalc nyznge kx tu-amqngio-**  
**ngrne.**
- 3 Delc nimu kxdrka'-ngrng bzkq tz-zvzpeamu  
ninge mzli ka trxpwrpewxu.  
X bzkq apusr-ngrnamu ninge nzawxo-krmu  
ma kx blzlongr.
- 4 Ryrllqamu drtwr ngr nzapotxo-krmamu ninge  
me matq kc tqmnc-ngrmc.  
X abrtzlvzamu nzpokiatitr-krmu ninge.  
Murde nivz lr naomu prlxmamu bange,  
A' mz nabzmu la, ngyati drtwrmu ninge.

*Na-abrtxtrpwzmu Drtwrmu Mz Gct*

- 5 Gct txpwz kx mnc-xgle-zvzx mz nabznge,  
Murde nzmnc-zpwx-krnge vzpxm bade.**
- 6 Nide butqbr nyznge kx abrkitrx drtwrnge.  
Nide lrpalcv nyznge kx tu-amqngio-zvz-  
ngrne.**
- 7 Nzarlapx-krnge x nzmrlue-krnge yctr txpwz  
bade,  
Mz nznngini-krde butqbr nyznge kxmngi kx  
rlakitrx.**
- 8 Leplz nengeng, mz nzungidati-krbzle da kx yc  
mz drtwrmu, na-abrtxtrpwzmu drtwrmu  
bade.  
Murde nide txpwz me rlakitrku.**

*Bzkq Brti Drtwrmu Doa O Da Kzbleng*

- 9 A' bzkq brti drtwrmu leplz, murde nigu amrlx  
apu-tpwzku zskapu,  
Kxmule-esz' nigu kxnzetung o leplz txneng.  
Murde nzmu na-arsakrlrku nzmrlkr Gct x nigu,  
Nide kx mrle txpwz, a' nginigu da-nrbalq.**
- 10 X mz nzrtwz-krmu da kx suti drtwrmu,  
bzkq brti drtwrmu nzamwxlr-krmu leplz  
x nzpna-krmu dztudrng.  
X kxmule-esz' nimu bcnyrng, bzkq abrtr-  
pzm drtwrmu mz trau scmu.**
- 11 A' na-amqtrku drtwrngu mz nzxlr-krngu natq  
lcng.  
Murde Gct txpwz kc tqmatq.**
- 12 X da kx myapxbz, nzaodu-krde nigu tresakiu.  
Rpimle kx, "Mzli lcde, nzayzlu-krbo da mz  
doa navz-nqblqle da kx aleleng mz nrlc  
ka."**

## Sam Kranzpnu-esz'mz-nrade-tq (63)

### *Sutitx Zlwz Drtwrnge Nzxplr-krm*

Nabz ne Devet mzli kc tqmnc-ngrde lzke ngr Judz.

<sup>1</sup> Gct rnge, rtangrtix nim.

Murde nim kc tqbatrple nzesatpxp-zpwxkr drtwrnge.

Apux ncblo kx drtwrde brlxkz x mzte tclvr mrkc lzke,

Mz nzsutitx-zlwzkr drtwrnge nzmnc-trkrbo bam.

<sup>2</sup> Suti drtwrnge nzxngi-krbo nzulrm Mangr-nzangiongr

Mz nzmnc-krnge zmatq x zluli rm.

<sup>3</sup> Nzkriz-krnge nivz lrm myaszpx-zlwzle nzlu-krnge mz nrlc.

X glqiz-zvzx nim mz nzaodu-zvz-krm ninge.

<sup>4</sup> X sa na-awi-zvzbo bam

Mz nzglalz-krbo mqnge mz nzkrka'-krbo bam.

<sup>5</sup> Drtwrnge sa naesatpxp zpwx nzmnc-trkrbo bam.

X sa na-angrlvzx nim mz nabz kxyrivi.

<sup>6</sup> Mz nrlckxbq kang kqlu aoti zvz drtwrnge nim, Vz vz nrlc ngrlxtpx.

<sup>7</sup> X angrlvzx nim mz nzabrtzngr

Murde okatr-zvzq ninge x tu-zvzme mz ni-brnge.

<sup>8</sup> Mnc-amqngitrpo bam,

X lolvz-amqngiq ninge mz mqm kx xplr.

- 9 A' ayrkrtxong mz drtc'  
Krkng tzipilr nanibqlr ninge.
- 10 Nibqting nidr mz vea,  
Murde kuli kzpeto nangqtilr namz ngrdr.
- 11 X ninge, king nem, sa na-abrtzlvzx nim,  
Murde ngi-batrpe' nzaovxio-krnge.  
X krkng tzabrtrpzlr drtwrdr bam, sa nabilvzlr  
nim.  
Murde sa nangi-batrpezme mz kxnpokiang  
nzmnc-lrpi-krdr.

## Sam Kranzpnu-esz'mz-nrade-pwx (64)

### *Drtwr Kxtrka Trngida-pnzu*

Nabz ne Devet kx yrbzle mz kxrmailz ngr dzbe  
kxzngrng.

### *Enqmi Rngeng*

- 1 Gct, kxputxpex. Xlrm nzkrka'-krnge.  
Mwxlrtilr-zlvzx enqmi rngeng. Arlapx ninge.
- 2 Tum mz nibrnge murde kxdrka'-ngrng nzyr-  
lqng drtwr  
Mz nzesabrti-krdr ninge.
- 3 Nzxngitrkr leplz nzymne-krdr apule nzrlakikr  
toki r vea kx malc.  
X nzpnz-krdr leplz mz natq kxtrka apule  
nipna.
- 4 Nzmnc-kapqng mz nzpnz-krdr kxntubqng mz  
natq ngr npokianger.  
X trnzmwxlrung nzaniti-krdr nzatrkatikrdr  
nidr.

5-6 Nzapqtrlr drtwrdr mz drtwr kxtrka kx nzyr-lqlr.

X nzamyatxlpwzlr nzrkrlzkr leplz,

Mz nzrpi-lxblr-krdr kx, "Na-amwiku trtxki mz nzesabrti-krqu leplz.

X nzbrngztio-krqu lc da kxvz-rbr trpnzng r kx narmc x kx narkrlzti."

### *Gct Rnge*

7 A' Gct sa na-ayrplapx-anile nidr, na-apule kx pnzle nidr mz nipna scde.

X napwrkilvc-ngdr nztupekr nipna ngrdr.

8 Sa na-atrkatile nidr murde nzrpiting natq kxtrka.

X sa nayrpalelvzng krkcng tzrmcng nidr.

9 X leplz amrlx sa namwxlrtlilr Gct.

X sa na-aoti drtwrdr da kxmatq kc tqaleleng x nayapwxtipxlr.

10 Leplz kxnztubqng sa na-abrtzlvzlr Yawe x sa na-abrtrpzlr drtwrdr bade.

Leplz kx nabzdr lq sa na-awibzng bade.

## **Sam Kranzpnu-esz'mz-nrade-nzlvqn (65)**

### *Kxaodu, Kxrpalz, Kxrka*

Nabz ne Devet kx yrbzle mz kxrmailz ngr dzbe kxnzngrng.

### *Kxaodu*

1 Gct, nzglqlz-krgr nim Jerusalem tubq-esz'ngr,

X rpikr na-atutr-zpwxkr nzesalz-krbzkrng bam.

2 Murde xlrme nzkrka'-krgr,

Mz nzmnc-xgle-krgr nim.

<sup>3</sup> X kxmule-esz' nzvz-rbr-krgrng nzmrvlvzlr nigr,  
A' ipqpx zvz alwx rgrng amrlx.

<sup>4</sup> Namrlz-ngrmle bagr, nigr kcng tqmcpqxqng  
X tqvzmitrqng Mangr-nzangiongr nim.

Murde sa namnc-zpwxkr

Mz nzrtwzng da kxmrlzting mz ma nyzm.

### *Kxrpalz*

<sup>5</sup> Mevalu rgr, mzli kc tqyrni-ngrbzkr bam, ay-  
zlume natqgr

Mz nzbatr-krme nzaovxio-krgr.

Lr mrkzbleng nzmncng drtc' x trmctu mz nrlc  
tulvzo.

X sc tzabrtr-kzpzlr drtwrdr bam.

<sup>6</sup> Murde mz nzxpkr-krm atulzq newz kxetuting,  
Mz nzaelwapx-krm nzmyalzkr zmatq ngrm.

<sup>7</sup> Aoq nrwx mz nzyclwzkr srkau x aesakiq nzyr-  
pukr natq nrc. ☆

X amnc-nabuq leplz kcng tzxpqbrlr-ngrdr  
nim.

<sup>8</sup> Nzamrluengr nim mz nzetukr zmatq ngrm.

X mz nrlc tulvzo nzmqlvzlr da kcng tqale-  
qng.

### *Kxrka*

<sup>9</sup> Gct, aclve-angidrq nrlc mz nzadc-krm tewa,  
Murde dakxnzng nalvc angidr mz drtc'.

<sup>10</sup> Tewa lc tqayayrtile drtc' nyzgr,

Murde da kx petikr mz nrlanc nyzgr  
nalvcpulzmqng.

<sup>11</sup> Ycngr dakxnzng kxkqlu mrkcng amrlx tqvzkiq.

---

☆ **Sam Kranzpnu-esz'mz-nrade-nzlvqn (65):7** Sam 89:9;  
107:29; Matiu 8:26; Mak 4:39; Luk 8:24

- X bxli scgrng yrbuti zvz mz da kxmrlzting.  
12 X abrtz-zlwz-ngrgr  
Nzmc-krgr nzplckr nra nounc nyzgrng.  
13 Angrlvzkr nzyrlvzbqtikr animol negrng,  
X malqkr murde nrlanc nyzgrng brtipeng x  
ycpe pipz nzrkqlzngr.

## Sam Kranzpnu-esz'mz-nrade- esz'mz (66)

### *Nzayzlu-zvz-krbz Gct Natq Kxnztubqng*

Nabz kx nzyrbz mz kxrmailz ngr dzbe kxnzn-  
grng.

### *Lr Nrlc*

- 1 Lr nrlc amrlx  
Namalqlvzlr Gct,  
2 Mz nzangrlvz-krdr nzmyalzkr drtqde,  
X mz nzglqlz-krdr nide mz nabz kxyrlvi.  
3 X narpibzku bade kx, "Da amrlx kcng tqaleqng  
nzktitpxng.  
X enqmi rmqng nzmetspebzng bam mz  
nzetu-zlwzkr zmatq ngrm.  
4 X lr nrlc amrlx nzangiolr nim,  
Mz nzglqlz-krdr nim x nzarmyalz-krdr  
drtqm."

### *Lr Israel*

- 5 Nadcpz mz drtwrgu da kx nzktitpxng,  
Kcng tqalemqng Gct bagu, nigu leplz nedeng.  
6 Akipxle Prla Bla x aesakile nzyrlekr LueJodzn  
Mz nzyrlq-krbzle me mingrng kx navzki  
melrmqngung.  
X mzli ka na-awi-ngr-kzpzku bade da lcng.



7 Murde aclve-alole mz zmatq ngrde.

X yrlq zvz mzte lr mrkzbleng murde ma  
tzglqpx-lzbqng mz nzxpqbrlr-krdr nide.

*Nigu Amrlx*

8 A' nimu lr mrkzbleng naglqlz-kzamu Gct rgr,  
Mz nzangrlvz-kato-krmu nide.

9 Murde nide kc tqaclve-zvzbzle nzlu-krgr,  
X tr-rlrpx-ngardeu nzaovxiokr enqmi nigr.

10 Gct, kxmule-esz' atubqtipeq nigr, kx nabzgr  
nalqngi,  
Mz nzapu-krgr silvz kc tqyrleri, x zblqki rde  
navzfx.

11 X kxmule-esz' rlrpx-ngrn nzesabrtingr nigr,  
X batrpzme nzrglq-krgr da kx mrlepu.

12 X kxmule-esz' rlr-ngrbzme mz enqmi rgrng  
nznzbrti-krdr nigr,  
X vztrkr mz nabz nzkxpungr

Kx apule nyr x nrc kxoda,  
A' mzli ka sc tqyzlumipe-mope' nigr me na-  
arlapx-ngrgr.

13-15 X ayzlu-kzpe' natqng miz mlir nzkxpu-  
krngeng,  
X delc naka-ngrbo bam da kcng tqpibo.

Rtwzmc animol kxncblongr kx oliqtix miz olta  
nyzm,

Mz nzangc-krbzlr bam miz Mangr-  
nzangiong.

Murde zikapu ngrdr navzdzbz,  
Nangi dalr nzawi-krbo bam.

*Okatrle ninge*

16 Nimu amrlx kcng tzangioldr Gct, lalztqmamu  
bange,

- Mz nzpi-krbo bamu da kcnq tqalemleng  
bange.
- 17 Mz nzbrtikr drtwrnge nide, krka'bo bade,  
Mz nzoliqti-krnge nzawi-krbo bade mz  
nzayzlu-krmle natqnge.
- 18-19 X ayzlu-zpwxmle natqnge murde plztipxbo  
alwx rngeng.  
A' rblx nzxlr-krde nzkrka'kr doa kx nabzde  
blqki.
- 20 Awitx-zlwzbo mz Gct murde trpx-ngrdeu  
nzkrka'-krnge,  
X trpx-kz-ngrdeu nzaodu-krde ninge.

## Sam Kranzpnu-esz'mz-nrade-rlimz (67)

### *Lr Nrlc Naglqpxlr Gct*

- 1 Gct, naye mz drtwrm nigr,  
Mz nzamrlz-krm x nzokatr-krm nigr.
- 2 Murde lr nrlc nakrlz-zpwxlr nqmq krm  
Mz nzarlax-krm nigr.
- 3 **Mrlz neidung amrlx nzglqpx-krdr nim,  
X na-awi-ngrbzlr bam!**
- 4 Mrlz lr mrkzbleng amrlx nzangrlvz-krdr nim,  
Murde nzaclve-krm nidr tubq mz nzmailz-  
krm.
- 5 **Mrlz neidung amrlx nzglqpx-krdr nim,  
X na-awi-ngrbzlr bam!**
- 6 Gct rgu amrlzle nigu,  
Mz nzrkqlzngr dakxnzng.
- 7 X sa na-amrlz-zvzle nigu,  
Murde leplz amrlx na-amrluelr nide.

## Sam Kranzpnu-esz'mz-nrade-rtqmz (68)

*Zmatq Ngr Gct Mz Nzacive-krde Lr Israel*

Nabz ne Devet kx yrbzle mz kxrmailz ngr dzbe kxznzngng.

*Nzmyalzkr Gct*

- <sup>1</sup> Mz nzvz-krm Gct, enqmi rdeng nzodalitipeng.  
X kxnpztxpx-ngrdr nide nzdwaszlr nide.
- <sup>2</sup> Milxtxole nidr mz nzapu-krdr zsikapu kc tqwq-plx nenq.  
X nibqtile kxdrka'-ngrng mz nzapu-krdr kadol kc tqyrle mz nzngc-krde.
- <sup>3</sup> A' nigu kxntubqng abrtzlvzku nzmnc-aepztr-krbzku bade,  
Mz nzbilvz-krdu x nzmqlvz-krdu nide mz nzelangr.
- <sup>4</sup> Naglqlzku Gct mz nzangrlvz-krdu drtqde.  
Na-amyalzku nide kc tqvooom mz dcbz.  
Drtqde Yawe x na-abrtz-ngrdu nzmnc-tr-krbzku mz mzte.
- <sup>5</sup> Gct mnc Mangr-nzangiongr.  
Apubzle trte mz doa kxnbzszng x acive-kzle olvz kx nbzszng ncblo ngrdr.
- <sup>6</sup> Kxnmncng esz'-krdr amnc-tr-lxblr-kzle ng mz neidung,  
X kx drtqdr tropxu vzmi-kzle ng  
Murde namnc-zpwxng.  
A' krkng tzesablqtilr nide, avzpx-nrbalqleng.

*Mzli Kc Lr Jiu Tzrlasz-ngrdr Ijpt X Tzprtr-ngrdr Lzke* ☆

<sup>7</sup> Mz nzrlaszkr leplz ne Gct Ijpt, vzmitrleng lzke.  
X mz nzmailz-krde nidr, mncpxm mz nyr x dcbz.

<sup>8</sup> Nide Gct r lr Israel kc tqaelwapxle zmatq ngrde mz Newz Saenae.  
Murde mz nzvz-krmlle, nengq x tewa kxnze-tung nzvz-kzpqng.

*Mzli Kc Lr Jiu Naprtr-ngrdr Mz Drtc' Kc Tqipibz Yawe Badr* ☆

<sup>9</sup> Gct avzo-ngrmle tewa,  
Murde na-alu-moule drtc' nyzde kc tqmin-grpe.

<sup>10</sup> Neidu lrde kxtrnzrngiscung amncleng mz drtc' lc,  
Mz nzrka-krbzle badr da kx nzmncpxp-ngrdr.

*Mzli Nyz Kxnzryrlqng Drtwr* ☆

<sup>11</sup> Kxetu rgu Gct kapxle natq  
Kx olvz kxnzkqlung napipxlr nrpa lcde seng,

<sup>12</sup> “King x ami nedrng nzdwang.  
X nigr olvz akitikr dztu enqmi kcng tztwz ncblo ngr vea negrng.

<sup>13</sup> Akitikr da kxlqngi kxlqlwx kx nzwzngzr mz silvz x gol.

?Myx kxmule, kzdung nimu ncblo trnzprtr-ngrdru mz vea?

---

☆ **Sam Kranzpnu-esz'mz-nrade-rtqmz (68):6** Nzrlaszngr 13:17—19:19 ☆ **Sam Kranzpnu-esz'mz-nrade-rtqmz (68):8** Josua 6:1—11:23 ☆ **Sam Kranzpnu-esz'mz-nrade-rtqmz (68):10** Kxnzryrlqng Drtwr 5:16, 24, 30-31

- 14 Murde Gct kc tqrnir milxtxole king kcng,  
X namz ngrdr nztwz bene-krdr apule lrdz kx  
lvxlz nrc mepz.”

*Mzli Kc King Devet Tqyrlq-ngrde Jerusalem Mz  
Nzngini-krde Mzteadau Nyzde* ☆

- 15 Mzli kc King Devet tqyrlq-ngrde Mzteadau  
nyzde mz Newz Saeon,  
Newz Basan apule ncblo kx angya drtwrde  
nzyckr Mzteadau mrlc.

A' Devet ayzclubzle natqde mz nzrpi-krbzle kx,  
“Newz Basan, kxmule-esz' matq-esz'ngrn x  
myatxlzq,

X nra nyzmqng ngi rtrngr,

- 16 A' bzkq obqszoq newz kc tqmcpX Yawe kx  
namnc-ngrde,  
Murde sa namnc alo elr.”

*Yawe Aovxiole Enqmi Rdeng X Vzdz Mangr-  
nzangiongr Jerusalem*

- 17 Gct vom mz siu ngr sariot scdeng,  
Mz nzprpx-krmlc mz Newz Saenae x nzprtr-  
krde Mangr-nzangiongr.

- 18 Kxetu vzdz-ngrde wq,  
X aovxiole enqmi kxkqlu.

X nzkabzlr da bade, mz nzmetx-krbzlr bade,  
Kxmule-esz' kxnzxpqbrlr-ngrdr nide mzli kc.

☆

- 19 Naglqlzku Kxetu kc tqatu-amqngile nigu mz  
zbq kang kqlu.  
Murde nide Mevalu rgu.

---

☆ **Sam Kranzpnu-esz'mz-nrade-rtqmz (68):14** 2 Samwel 6

☆ **Sam Kranzpnu-esz'mz-nrade-rtqmz (68):18** Efisz 4:8

*Mzli Kc Gct Tqnibqti-ngrde King Nede Ehab X  
Nqvi Lrde Mz Nzayrplapx-krde Nidr* ✧

<sup>20</sup> Gct rgu nide Gct kc tqarlapxle leplz.

Yawe nide Kxetu kc tqkapxmle nigu mz mq  
enqmi rgung.

<sup>21</sup> X sc tqtaputibzle nardr,

Murde nzvz-rbr-zvzng.

<sup>22</sup> Rpimle bagu kx, "Kxmule-esz' enqmi rmung  
nzdwalzng mz newz

O drlve keng mz nzakitikr nrlc nidr, a' sa  
nayzlutibong.

<sup>23</sup> Murde navznenamu mz nzrnzlvzo-krmu  
mepyr ngrdrng,

X kuli nemqng drtwrdr naesatpxp zpwz mz  
nzmng-krdrle."

*Nzakaputr-ngrm Nzamyangr Mz Mzli Nyz  
King Hesekaea* ✧

<sup>24</sup> Leplz amrlx nzmclr nzvztr-krmqng leplz neng  
Gct Mrkc Tqtr,

Mz nzangrlvz-krdr Gct x King rdr.

<sup>25</sup> Dzbe kxnzngrng nzrtwayzbzng, vz-nqblqzbz  
olvi kx nzelang x nzayrlewzng nrasrpwale.

X kxnzayrning gita nzmnr-ngrmqng.

<sup>26</sup> Kxmu nzngr-krdr nide sele,

"Nagqlzku Yawe, nigu leplz nedeng, mz nzyrlwr-  
lxblr-rgu.

Nagqlzku Yawe, nigu kcng tqngi nqvi lr  
Jekop."

---

✧ **Sam Kranzpnu-esz'mz-nrade-rtqmz (68):19** 1 King 21:19; 2  
King 9:24, 36 ✧ **Sam Kranzpnu-esz'mz-nrade-rtqmz (68):23**  
2 Be Ngrdr 30

27 Neidu lcng tzvz-kzpqng, Benjamin, Judz, Sebyulon, x Naftzli.

Neidu ne Benjamin krkc tqtopwz rtwayzbz badr,

X mz nibrdr kxnzetur r Judz x leplz nedrng.

X rmnr-ngrbz neidu kx nzmncmqng mz nort, kxnzetu r Sebyulon x Naftzli.

*Lr Jiu Nzkrka'-ngrdr Lr Mrkzbleng*

28 Gct, aelwapx-moungr zmatq ngrm,

Kc tqaelwapx-ngrn tqokatr-ngrn nigr mzli kc.

29 Kapxbz natq kx king kcng tqaovxiopeq nartwzmqng da bam,

Mz nzmnc-krm Mangr-nzangiongr.

30 Ayrplapx Ijpt kc tqapule trmwzlogo kc tqmnc-kapqpxm mz nabr kc tqlvcpulzm mz nqlvi lr Lue Nael,

Ayrplapx nidr badr kztedeng murde mrlz-zvzbz badr nzotangr.

Aodali lr mrkzble lcng,

Navz navz nakrlzbzle mzli kc tzyrngzo-ngrbzlr bam.

31 Murde kxnzetur ngr Ijpt navzmqng bam,

Nidr badr lr narnrlc amrlx kcng tzaxvctrng badr,

X naxpeng trau, silvz, x da kxlqlwx

Mz nzaovxio-krm nidr mz vea.

*Nzmyalzkr Gct*

32 Nimu lr nrlc amrlx,

Nangrlvzamu Kxetu Gct.

33 Murde sc tqvzne mz bongavz, kc tqwz-ngrde mzli kc bqnc.

X nzxplrkr natqde apule natq bzlrmei.

<sup>34</sup> Napipxku zmatq ngr Gct, kc tqaelwapx-ngrde  
mz dcbz,

X mz nzaclve-krde nigu lr Israel.

<sup>35</sup> Kctitxpx-zlwzku Gct rgu Mrkc Tqtr.

X nide kc tqrkam bagu nzxplrngr x zmatq.  
Takitrde nzrglqlz-zvzngr nide.

## **Sam Kranzpnu-esz'mz-nrade- rpwxmz (69)**

*Nzkxpukr Ncblo Kxwztr-zvzbz Mz Yawe*

Nabz ne Devet kx yrbzle mz kxrmailz ngr dzbe  
kxzngrng.

*Nabzpex*

<sup>1</sup> Gct, pi-zvzbo bam kx, "Arlapx ninge!"

Murde nzkxpu-krngeng nzaetunepxpeng.

X apupex rplz kc namrbropebz mz nrlr.

<sup>2</sup> X apu-kzx kx twznede ninge drlr ngr nrc.

X mz nzboo-krnge, nabzpex, murde trpnzngr  
me nakcblztr-ngrne.

<sup>3</sup> Gct, drtqnge satxpe x drtwrnge kaatxpe mz  
nzkqle-zvz-krnge nim.

Mzke' ngqbqtxtrpebz mz nzaenzli-zvz-krnge  
nzvz-krme.

<sup>4</sup> Enqmi rngeng nzrpilr nanibqlr ninge murde  
nzxplr-zlwzng.

X nzpxtxpx-krdr lc ninge trpnzngr noude.

X nzkqlu-krdr nzmyaszpxlr nqnginarng.



Nzpokiatitrlr ninge mz nzrpi-krdr kx nakabo  
trau rde. ?A' myx kxnamu nzka-krbo trau  
r da kx tralewxu?! ✧

*Nzxrnga-ngrdr Ninge*

<sup>5</sup> A' Gct, nim txpwz kx rkrlz alwx rngeng,  
Murde trnzyc-kapqpwxung bam.

<sup>6-7</sup> Yawe, nim Ngrlrvea r ami nem,  
X nim Gct r lr Israel.

Nzatrkatilr ninge murde lxngitix nim,  
X nzamyati-zvz-ngrm drtqng.

A' bzkq rlr-ngrme bange nzamyati-krbo drtq  
leplz nemqng,  
Kcng tzlxngitilr x tzangioldr nim.

<sup>8</sup> Murde apubo lr mrkzble mz lr mrnyzng,  
X mzlengeng nzmapulrtr-ngrdr ninge peto.

<sup>9-10</sup> Kxmule-esz' nzxrnga-ngrdr ninge  
Nzaxtx-krnge dakxnzng mz nzavzo-lzbq-  
krnge,

A' mz nzpq-zlwzkr nzaotikr drtwrnge Mangr-  
nzangiongr nim,  
Apsur-ngrde ninge da kx nzangc mz nyr x  
yrkrtxo. ✧

X natq kcng tzpikiti-ngrdr nim,  
Yrplatr-kzpqng bange. ✧

<sup>11</sup> Nzypalelvzlr ninge  
Mz nzpxi-krnge lrpz ngr nzvzkr drtwr.

<sup>12</sup> Lr mztea nzpikitedr ninge.  
X ncblo kxnzrmnqng nzngr-xtrnga-ngrdr  
ninge.

---

✧ **Sam Kranzpnu-esz'mz-nrade-rpwxmz (69):4** Jon 15:25

✧ **Sam Kranzpnu-esz'mz-nrade-rpwxmz (69):9-10** Jon 2:17

✧ **Sam Kranzpnu-esz'mz-nrade-rpwxmz (69):9-10** Rom 15:3

### *Arlapx Ninge*

- 13 Yawe, arlapx ninge mzli kznike mrlzbx bam  
Mz nzmyalzkr zmrlz ngrm. ☆
- 14 A' veclzm ninge mz mu ngr nzkxpu-krngeng.  
X arlapxbz ninge mz nzngyatikr drtwr en-  
qmi rngeng ninge.
- 15 Bzkq rlrpx-ngrn nzyrlemikr dlr ngr nrc ninge,  
X bzkq botxo-alox mz nzbzlx-krmc mz gqpr.
- 16-17 Yawe, ninge kxnzawz nem. Ayzlum natqng  
murde aodu-zvzq ninge.  
X amrlz ninge murde yc mz drtwrm ninge.  
Bzkq mnc-rlrume bange.  
A' okatr ninge, murde nabzng talvzo.
- 18 Vzm bange  
X xpepxbz ninge mz mq enqmi rngeng.

### *Ayrplapx Enqmi Rngeng*

- 19 Murde krlzq enqmi rngeng amrlx,  
Kxmu nzpibqti-krdr ninge x nzamyati-krmlr  
drtqng.
- 20 Nzobqszo-krdr ninge yrnibungr nabzng.  
Yrni-ngrne nzvzkr drtwrnga,  
A' trpnzngr kxnaokatrle x na-amqtrple  
drtwrnga.
- 21 A' nzrkamqng nange dakxnzng kxpiz,  
X mz nzbrlxkzkr drtwrnga, nzrkamqng  
mqng waen kxrkk. ☆
- 22 Yawe, kxmu nzmukr leplz lcng badr kztedrng  
Mangr-nzangiongr trtubqu mz nzobq-krm.

---

☆ **Sam Kranzpnu-esz'mz-nrade-rpwxmz (69):13** Asaea 49:8;  
2 Korint 6:2 ☆ **Sam Kranzpnu-esz'mz-nrade-rpwxmz (69):21**  
Matu 27:34, 48; Mak 15:23, 36; Luk 23:36; Jon 19:28-30

- Delc, tzrtxlvlz-mou-ngrdr alwx ngrdrng x  
takitrde nzodati-krm nidr.
- 23 Akcbz mztr,  
X ayangrnge-zvzbz nrkrdrtdr. ✧
- 24 Ayrplapx nidr mz zngya ngr drtwrm,  
Kc tqapule nyr kx nange-ngrdr.
- 25 X batrpz nzbz-krdr,  
Murde ma nyzdr namznrtx-alongr. ✧
- 26 Rlxtibo bam da lcng murde ayrplapxpeq ninge,  
A' nzrtxlvlz-moplr nzetqkr drtqng.
- 27 Delc alwx ngrdrng nartxlvlz-kz-ngrdeng,  
Murde ma tzprtrng mz nzripqpx-krm alwx.
- 28 Bzkq yroq drtqdr mz Buk ngr Nzlungr,  
Mrkc tqyclz-ngrm drtq kxntubq nemqng. ✧

*Nzrglqlzng Gct*

- 29 Gct, tangigx-zvzx mz nzetqkr drtqng,  
Mzli ka tqaenzlix nzmnc-zpwxngr kc navzm  
mz nzarlapx-krm ninge.
- 30 Murde na-angrlvzx nim,  
X naglqlzx nim mz nzawingr.
- 31 Murde sa na-abrtz-ngrm nzangio-krnge nim  
Namyaszlze nzangc-krbo blz bam.
- 32 X leplz txneng na-abrtzng mz nzokatr-krm  
nidr,  
Murde apqtr-mopwzme nabzdr.
- 33 Murde lalztqzbzme mz kxtrnzrngiscung,  
X trmrbrtru mz drtwrm leplz nemqng kcng  
tzkxpung.

---

✧ **Sam Kranzpnu-esz'mz-nrade-rpwxmz (69):23** Rom  
11:9-10 ✧ **Sam Kranzpnu-esz'mz-nrade-rpwxmz**  
**(69):25** Matiu 23:38; Luk 13:35; Aposol 1:20 ✧ **Sam**  
**Kranzpnu-esz'mz-nrade-rpwxmz (69):28** Luk 10:20

- 34 Nimu bongavz x drtc' naglqpxamu Kxrpalz.  
Nimu prla x dalr prla amrlx naglqlz-kzamu  
nide.
- 35 Murde sa na-arlapxle Mzteadau nyzde x sa na-  
atulz-moule mztea ngr Judz amrlx.  
X kxnzwztrpzng bade namncng elr x nangi  
nyzdr drtc'.
- 36 X sa na-aprcbzle drtc' mz doa ne leplz nedeng,  
Murde leplz kcng tzmrlztilr nide namnc-  
zvzng elr.

## Sam Kranzpnu-rlimz (70)

### *Vz-anim Mz Nzarlax-krm Ninge*

Nabz ne Devet kx yrbzle mz kxrmailz ngr dzbe  
kxnzngrng.

- 1 Gct, vz-anim mz nzarlax-krm ninge.  
Kxetu, rnekim mz nzokatr-krm ninge.
- 2 Okatrp ninge mz nzaovxio-krnge kxnzrpilr na-  
abzlr ninge,  
Murde drtqdr namya mzli kc nadwasz-ngrdr  
ninge.
- 3 X leplz lcng tzxtrnga-ngrdr ninge drtqdr namya  
Mzli kc nametx-ngrmlr bange.
- 4 A' amrlz krkcng tzbrti drtwrdr nim  
Mz nzrka-krbzme badr nzabrtz-zlwngr,  
Murde na-awi-zvz-ngrbzlr bam nzarlax-krm  
nidr  
Mz nzrpi-krbzlr kx, "Gct, nim kx myatxlz-  
esz'ngr."
- 5 Yawe Gct, trxplr-zvzwxu, x trpnzngr scnge  
zmatq.  
Vz-anim, kx Gct.  
Murde nim txpwz Mevalu rnge.

Bzkq asaq nzokatr-krm ninge. ☆

## Sam Kranzpnu-rlimz-nrade-esz' (71)

*Nzkrka'kr Kzdq Lrtzlvz*

*Brti Drtwrnge Nim*

- <sup>1</sup> Yawe, mnc-xglex nim nztu-khme mz nibrnge.  
X bzkq rlrpx-ngrn nzaovxiokr enqmi rngeng  
ninge.
- <sup>2</sup> Lalztqm bange mz nzokatr-krm ninge.  
X arlapx ninge murde tubq-esz'ngrn.
- <sup>3</sup> Nangini-kzp me rlakitrz mz nzmnc-kapqtr-krbo  
bam.  
Murde nim butqbr x lrpalc nyznge.
- <sup>4</sup> Gct rnge, arlapx ninge mz mq leplz kxdrka'-  
ngrng,  
Kcng tzipilr naodatilr ninge.
- <sup>5</sup> Murde nim, Kxetu Yawe, kx brti drtwrnge,  
yzutr pnz mzli kc tqngi-oblabengrne.  
X sc tqvzbe nzabrtr-krbo drtwrnge bam.
- <sup>6</sup> Abzo mzli kc tzmcngr mzke', krlzmlc mzli ka,  
mnc-xgletxpwo nim,  
Mz nzaclve-zvz-krm ninge. Delc naglqlz-zvz-  
ngrne nim.

*Okatr-mop Ninge*

- <sup>7</sup> Nzrpi leplz kx ninge rlx ngr da kxtrka,  
A' nim lrpalc kxmngi kx rlakitrz.
- <sup>8</sup> X glqlz-zvzx nim mz zbz kang kqlu,

- Mz nzyapwxtipx-krnge nzmyalz-esz'ngr-krm.  
9 Delc kxmule-esz' nipenge lrtzlvz, a' bzkq drtqm satrp bange,  
X bzkq rlaszq ninge mzli ka tqyangrngape-ngrne.  
10 Murde enqmi rngeng nzycmnetr-ngrdr ninge X nzryrlqpeng drtwr,  
11 Mz nzrpi-krdr kx, "Gct sc tqrlaszpele nide. Vzmamu, nalolvzpeku murde trpengr kx narlapxle nide."

### *Arlapx Ninge*

- 12 Gct rnge, bzkq mnc-rlrume bange, A' vz-anim mz nzarlapx-krm ninge.  
13 Aovxio x odati krkcng tzrpilr natzlr x nartrkatilr ninge,  
Mz nzamyati-krbzme drtqdr x nzbatr-krbzme nzobqszokr leplz nidr.  
14 Sa na-abrtr-zvzbo drtwrnge bam, X naglqlz-ebir-ngrne nim.  
15 Kxmule-esz' da kcng tqaleq nzkqlu-zlwzng, A' mz zbq kang kqlu sa nayapwxtipxx nztubq-krm, x zmatq ngrm mz nzarlapx-krm leplz.  
16 X sa navzbo bam mz nzglqlz-krnge zmatq ngrm, Murde nim txpwz kx tubq-esz'ngr.

### *Vz Vz Nzpipx-krnge Nzmyalz-krm*

- 17 Gct, alvztrq ninge, abzo mzli kc tqngi-oblaben-grne.  
X sc tqyapwxtipxbex da kx nzkctitxpx kcng tqwz-ngrn.

- 18 Mzli ka nipenge lrtzlvz x nqnginarngē prkipe,  
bzkq rlaszq ninge.  
A' mncm bange mz nzyapwxtipx-krbo zmatq  
ngrm mz nrpr ngr leplz amrlx.
- 19 Gct, nzetukr nztubq-krm krlzle bongavz. ☆  
X trpnz-moungr kx apule nim kc tqaleti da  
kxetuting.
- 20 X kxmule-esz' batrpe' nzetukr nzkxpu-  
krngeng, a' krlzx kx sa na-amrna-mowq  
nzlu-krngē,  
Mz nzarlax-krm ninge mz gq.
- 21 Sa na-aetunepxbzme nzamatqkr leplz ninge,  
Mz nzaelalz-mou-krme drtwrngē.

### *Nabz Ngr Nzawingr*

- 22 Gct rngē, nim Gct rgr, nigr lr Israel, x sa nan-  
grbo bam mz nzayrni-krbo gita x ukzlele.  
Tr-esz'ngrn x sa naglqlzx nim murde ngida  
angidrme bagr.
- 23 Sa namalq-katox mz nzabrtz-krngē,  
X mz nabzngē atwrnrngr sa nangrbo bam  
murde arlapxpeq ninge.
- 24 Mz zbq kang kqlu sa napipxbo nztubq-krm mz  
nzokatr-krm ninge.  
Murde krlcng tzipilr na-atrkatilr ninge aovx-  
iopeqng x drtqdr myape.

---

☆ **Sam Kranzpnu-rlimz-nrade-esz' (71):19** Sam 36:5; 57:10;  
103:11; 108:4

## Sam Kranzpnu-rlimz-nrade-li (72)

*Nzaclekr King Kxnmcp*

Nabz ne Solomon. \*

*Nztubq-krde*

- 1 Gct, batrpz nzaxvctr-krbz king rgr mz zmrlz ngrm,  
X katrpz nide mz nzvz-nqblq-krde nztubq-krm.
- 2 Murde nzacle-krde nigr leplz nemqng namrlz,  
X na-atubqtibzle da mz kxnzobqszong.
- 3 X nigr amrlx sa namnc-zpwxkr,  
Mz nzmncz-krbzkr mz nztubqkr nzaclekr king rgr.
- 4 Sa natubz mz nibr kxnzobqszong,  
X sa na-arlapxle kx trpnzngr scdr zmatq mz nzaovxio-krde kxnzakxputilr nidr.

*Nzamrlz-krde Leplz Nedeng*

- 5 Nzamrluekr leplz nim sa navz zvz,  
Da kc tqwai nyzl-r-zvzkr nepi x temz.
- 6 X King nem sa na-amrlzle nigr leplz nedeng,  
Mz nzapu-krde tewa kc tqdcom mz nrlanc.
- 7 Mzli kc tqngini-ngrde king nztubqngr nae-tunepx mz nrlc,  
X nzmnc-zpwxkr leplz navz zvz da kc tqwai nyzl-r-zvzkr temz.

*Mrkc Tqacve*

- 8 Nzacle-krde yzutrle mz Lue Yufretis,

---

\* **Sam Kranzpnu-rlimz-nrade-li (72):** Jiszs sa na-angidati-zp-wxle drtwr ngr Sam lc mz nzvz-krmlc krali.



- Nakrlzbzle mz nrlc tulvzo.  
9 Enqmi rdeng sa na-aovxioleng,  
X nayrngzobzng bade.  
10 King mz nrlc tulvzo sa nartwzmqng bade dalr  
nizrle-kangr,  
Myapxbz king r trmctung, x Arabia, x Afrika,  
murde namnc-lxblrng badr mz nrw. x.  
11 King amrlx sa nayrngzobzng bade,  
X leplz amrlx sa na-angiolr nide.

*Nivz Lrde*

- 12 King lc sa natubz mz nibr kx trpnzng scdr da,  
mz nzkqle-krdr nide.  
X naokatrle kxnbzobqszong kcng tzmncng  
esz'-krdr.  
13 Sa naycng drtwrde kxtrnzxplung x kx  
trpnzng scdr zmatq.  
X na-arlapxle nra-nzlung ngr leplz.  
14 Sa naxpepxle nidr mz mq kxnbzakxputing x  
kxnbzatrkatilr nidr,  
Murde matq mz drtwrde nzlu-krdr.

*Da Kxmrlzting Kx Navzpxmqng Mz Nzachve-krde*

- 15 Leplz amrlx sa nakrka'-ngrdr nide  
Murde Gct na-amrlz-zvzle nide,  
Mz nizrpi-krdr kx, "Gct, king lc nalu angidr zvz.  
X lr Arabia narkabzng gol kxpnapr bade."  
16 Krka'-ngrgr kx nrlanc nyzgrng nalvc-angidrngr  
dakxnbzng.  
X nounc nyzgrng nadobeting na-apule nounc  
ngr drtc' kc Lebanon.  
X taon nyzgrng nayrbu mz leplz  
Na-apule nzyrukr nabr ngr nardzng.

- 17 King lc nadcpv zvz mz drtwr.  
X drtqde naye zvz mz nzapu-krde nzti-zvzkr  
nepi.  
Murde sa nangingide nou nzamrlzkr Gct leplz  
amrlx mz nrlc,  
Mz nzkrz-krdr kx matq-esz'ngr mz nzobqkr  
Gct.

*Nabz Kx Yrkrpxngr Buk Krali*

- 18 *Naglqlzku Yawe, Gct r melrmqung.*  
**Nide txpwz kxnzkctipx. Naglqlzku  
Yawe.**  
19 *Navz navz zvz nzangiongr drtqde.*  
*Nzrglqlzngr nide navz navz zvz.*  
20 Krlc me yrkrpxngr nabz x nzkrka'-ngrng kx yr  
King Devet, mrlx Jesi.

**Buk Kratt**

*Sam 73—89*

**Sam  
Kranzpnu-rlimz-nrade-tq (73)**

*Nzmnc-zpwx-krnge Yc-zvzbz Bam*  
Nabz ne Asaf.

*Nzxplrkr Kxdrka'-ngrng*

- 1 Kxmule-esz' rpiku kx, "Gct mrlzti nivz lrde nigu  
lr Israel,  
X amrlzle kx nabzdr lq,"  
2 A' nabznge nrgo.  
X nzrlxngiti-krnge ycpwz pipz nzaxtx-  
krbole.  
3 Murde mcx nzrngisc-zlwzkr kxdrka'-ngrng,  
X kcmnztz-ngrne dztu kxnzglqpx-lzbq lcong.

- 4 Mz nzaotikr drtwrnge, trpnzngr nzetqkr drtq  
kx nznngitrlr,  
A' nzyrlvz-angidrng x nzxplrng.
- 5 Lepzl lcng trpnzngr zyagox kx prtzbz badr,  
X trnzrmctilru nzxpungr.
- 6 Delc tzbi-zlwz-ngrdr mz nzglqpx-lzbq-krdr,  
X drtqdr trmyau nzrtulrtr-krbzlr me pnz  
drtwrdr.
- 7 Da kxtrka nzvzpxmqng mz nabzdr x drtwrdr,  
Apule lue kc tqyrlepzm mz nzwxpikr kx-  
pqbu.
- 8 Nzryrpalelvzng leplz kxnztubqng x nzymnetx-  
trpwzng mz da kxtrka.  
X nabzdr nzbilvzlr zmatq ngrdr mz natq ngr  
nzamwxlr-krdr leplz.
- 9 Nzycmne-atrkatilr Gct kc Heven,  
X nzrpilr kx nidr kxnzetu r leplz mz nrhc mz  
nzkra-krbzlr natq badr.

*Nzvz-rbrkr Lepzl Neng Gct*

- 10 Mzli ka kzdung leplz neng Gct nzlalztqpe-  
kzpzng badr,  
Mz nzlxngiti-krbzlr natqdr.
- 11 Nzrpibzlr badr kx, "Vz-nqblqmamu nigr,  
Murde Gct kc Heven trtxpnzngr nzmc-krde  
nimu."
- 12 Krlc nqm q kr leplz kxdrka'-ngrng.  
X kxmule-esz' nznngiscpeng da kxkqlu, a'  
drtwrdr trpnzngr nzesapx-krdr.
- 13 Gct, mz nzmc-krnge nidr, rpix esz'-krnge kx,  
"Mane nzalqti-lzbq-krnge.  
X mane nzyrlqpx-lzbq-krnge mz alwx.

- 14-15 Murde drtqnge etq zvz mz zbq kalvz, mz  
nzkxpu-zlwz-krnge.”  
A' trvz-nqblqwxu natq kxdrka'-ngrng,  
Mz nzrpi-krdr kx trmcwq alwx ngrgrng,  
Murde ma tqmailzx leplz nemqng mz nzvz-  
rbr-krdr.

### *Kxdrka'ngrng Sa Naodating*

- 16 Rblxm bange nzkrly-krnge drtwr ngr nzrlr-  
krbzme mz kxnztubqng nzkxpu-krdr,  
A' trayrplapxwq kxdrka'-ngrng.  
17 Zbz kx vztrx Mangr-nzangiongr nim mz  
nzmnc-lrpi-krnge,  
Sc tqkrlz-atex kx kxdrka'-ngrng lcng  
trpnzng nzmnc-trkrbzlr bam Heven.  
18 Murde rlr-ngrbzme badr nzvz-nqblq-krdr me  
pnz drtwrdr, kc tqbatrpzle nzodatingr nidr.  
Nzapulr kx nzvzneng mz drtc' kxmiglq kc  
tqbatrpz nztao-krdr.  
19 X nzodatingr lc nidr na-ani txpwz,  
X nzvzdz-krm nelzdr mz zmwxlr sa naprtrpz  
badr mzli kc nabz-ngrdr.  
20 Mz nzbz-ani-krdr lc, nzapulr nzrmwiblengr  
Kc tqmrbrtr mou mz nzdwalz-ngrm.

### *Nabzng Ngrgo*

- 21 Mzli kc tqxngitr-ngrne mz nabzng nzaetq-  
krme drtqnge,  
X zngya ngr drtwrnge lolvztxne,  
22 Apux poi kzpeto  
Mz nzpqbbrtxnekr narng x nzngqngu-krnge.  
23 Kxmule-esz', a' mnc-zvzme bange,  
Mz nzlolvz-amqngi-krm mqng.

24 X vz zvz nzmailz-krm ninge mz nzalvztr-krm ninge.

Murde naprtrx mz nzarmyalz-krm ninge kalr.

*Brti Drtwrnge Gct*

25 Trpnzngr da kx wz-ngrn Heven x nrlc  
Kx suti drtwrnge, a' nim txpwz, Trte.

26 Kxmule-esz' nabznge ngrgo, a' nim nzxplr-krnge,  
X namncme bange, tqvzpe tqvzpe.

27 Gct, krkcng tzpx-ngrdr nim, trnamnctrpzu  
bam mz nibr nzbz-krdr,  
Murde sa naodatiq kxtrnzabrtrpzlrudrtwrdr bam.

28 Kxetu Yawe, mrlzvxitxm bange nzmnc-aepztr-krbo bam  
Mz nzrlatr-krbo bam, murde napipx-zvzbo nqm q krm mz leplz.

## **Sam Kranzpnu-rlimz-nrade-pwx (74)**

*Bzkq Mrbrtr Mz Drtwrn Nigr Kxnzakxpu Nemqng*  
Nabz ne Asaf.

*Nzangctitx Enqmi Makxtr Nyzmqng Amrlx*

1 ?Gct, memule tqrtctx-alope-ngrn nigr,

Mz nzngyatikr drtwrm nigr sip nemqng?

2 Nadcpx mz drtwrm nigr kcng tqmcpqxng mzli  
kc bqnc, mz nzarlapx-krbzm nigr mz mq  
kxnzakxputilr nigr,

- X mz nzmnc-krme bagr mz Newz Saeon.  
3 Vztr ena mrlcde mz Mangr-nzangiongr nim  
Jerusalem,  
Murde namcq nzodati-atwrnrkr enqmi  
rgrng da amrlx mrka.  
4 Enqmi lcng nzmqlvzlr Mangr-nzangiongr  
nim,  
Nzpetr-krdr nc nqngq ngr nibr kxrmailz  
ngrdr mz nounc kx nzatulr mrlcde mz  
nzaelwapx-krdr nzaovxio-krdr nigr.  
5-6 Nztaglctilr mz xks x hama scdrng da kcng  
tzlztng amrlx mrlcde,  
Mz nzapu-krdr ncblo kx narlaking nounc.  
7 Nzkatrpzlr nyr ngr Mangr-nzangiongr nim,  
Mz nzmatinetrkr drtwrdr nztr-esz'ngr-krm.  
8 X nzangctitxdr mrkcng amrlx tqangio-ngrgr  
nim mz drtc' nyzm,  
Murde narnzlvzo-atwrnr-ngrdr nigr.  
9 Dalr nzangio-krgr nim lcng amrlx nzmrbr-  
tipeng,  
X trpengr profet kx narpim bagr mzli kx  
naesakingr nzxpungr lc.  
10 ? Gct, myx mzli kx nakrlzbz enqmi rgrng  
nzxtrnga-krdr nim?  
? Myx kxmule, narlrx-alope-ngrbzme  
nzymne-atrkati-krdr drtqm?  
11 Bzkq mnc-lrpitxn,  
A' odati nidr mz nzokatr-krm nigr.

*Nim Kxrpalz Kx Xplr*

- 12 Gct, kxmule-esz' nzmusrnepegr lc, a' nim King  
rgr yzutr pnz mzli kc bqnc.  
X nzwrde kqlu kx arlapx-ngrn nigr.

- 13 Sc tqakipxq Prla Bla mz zmatq ngrm.  
X tqtamyrnr-ngrn nardr mepwz kc tqngi  
Ijpt.
- 14 Murde aovxioq kxnzetu rdrng,  
X kabzme nrkrdrtdr nangq animol ngr lzke.
- 15 Sc tqaglwiq mrkc tqrpnakilzm aulz x narlue.  
X apz-kzq me nakawicngr LueJodzn.
- 16 Nim kxrpalz kc tqwz-ngrde ngrlx x nrckxbq,  
X nim kc tqryrlq nepi x temz mrnyzdr.
- 17 X nim kc tqryrlqbz me nangi bz ngr prla x drtc',  
X yrlq-kzpzme mzli r zbao x zpq.

*Arlapx Nigr!*

- 18 A' Yawe, nadcpz mz drtwrm kx enqmi rgrng  
nzxtrnga-ngrdr nim,  
X nzatrkatilr drtqm mz nzymne-krdr mz  
nzobqszo-krdr nim.
- 19 Bzkq mrbrtr mz drtwrm kxnzakxpu nemqng,  
Mz nzapusr-krm nigr bona kx nalolvzti kuli  
kzpeto.
- 20 Nadcpz mz drtwrm Nzesz'tikr Drtwrgu mz  
nzarlapx-krm nigr,  
Murde mzli ka ncblo kxayo nzklupeng  
kxnmnc-kapqneng mz nzlo.
- 21 Bzkq rlr-ngrbzme badr nzaovxio-krdr nigr  
kxnzakxpung,  
Murde nigr leplz txneng kx trpnzng r scdr  
zmatq naglqlzkr nim.
- 22 Gct, vzm mz nzatubqti-krm drtwr kxnzobqszo-  
zokr nim,  
Mz nzdcpxkr mz drtwrm kx nzxtrnga-zvz-  
ngrdr nim.

- 23 Bzkq mrbrtr mz drtwrm enqmi rmqng  
kx nznemi-zvzlr zngya mz nzatrkatikrdr  
nim.  
A' vzm mz nzawx-nabu-krm nidr mz natqdr.

## Sam Kranzpnu-rlimz-nrade-nzlvqn (75)

### *Waen Kx Xplr Ngr Nzayrplapxngr*

Nabz ne Asaf.

- <sup>1</sup> Gct, awitx-ngrbzkzr bam mz nzmnc-aepztr-khme  
bagr.  
Aleg da kxmrlzting. Gct, awitx-zlwzbzkr  
bam.
- <sup>2</sup> Gct rpile kx, "Yrlqpex mzli kx napipx-ngrne doa  
kx tubq x kx vz-rbr.  
X nzayzlu-krbo da badr narsakrlrng.
- <sup>3</sup> Kxmule-esz' nrlc badr leplz ngrdeng nzrncng,  
A' sa nalolvz-amqngix nou nrlc.
- <sup>4-5</sup> Pibo mz kxznzqlqpx-lzbqng kx bzkq nzglqpx-  
lzbqng  
Mz nzbilvz-krdr zmatq ngrdr.  
X pi-kzpo mz kxdrka'-ngrng kx bzkqpe  
nzarmyalz-lzbqng,  
Mz nzailvzo-krdr kztedrng."
- <sup>6</sup> Murde trpnzng me vzkpym nzarmyalzng  
Mrka mz nrlc.
- <sup>7</sup> A' Gct txpwz kx na-ayzlu-ngrbzle da mz leplz  
amrlx,  
Mz nzayrplapx-krde kxdrka'-ngrng x mz  
nzarmyalz-krde kxnztubqng.
- <sup>8</sup> Yawe ngyati zlwz drtwrde kxdrka'-ngrng.



- X mz nzayrplapx-krde nidr  
Na-apule kx rkabz badr kap ngr waen kx xplr.  
X mz nzmng-krdrle trpnzng kxpipz kx nayc-  
txo, a' nayrkrtxlm.
- <sup>9</sup> A' trtxpnzng nzesakikr nzyapwxtine-krnge Gct  
r Jekop,  
X sa na-angrlvz-zvzx nide.
- <sup>10</sup> Murde rpile kx, "Sa naodatix zmatq ngr  
kxdrka'-ngrng,  
A' zmatq ngr kxntubqng sa na-aetunepxbo."

## **Sam Kranzpnu-rlimz-nrade-esz'mz (76)**

### *Gct Kx Aovxio Zvz*

Nabz ne Asaf.

### *Kxaovxio*

- <sup>1</sup> Lr Israel nzangiolr Gct.  
X drtqde nzkriz-zlwzlr.
- <sup>2</sup> Ma nyzde tuom Jerusalem,  
Mz newz Saeon.
- <sup>3</sup> Mrlc dekc tqtwz-ngrde temz ngr lomr, toki r vea,  
x nipna scdr enqmi rdeng,  
Mz nzodati-krde dalr nzotangr amrlx.

### *Ngrlrvea*

- <sup>4</sup> Gct, nim Ngrlrvea kxmyatxlz zlwz.  
X myaszlzq newz kcng bqnc tzmyatxlzng.
- <sup>5-6</sup> Gct ngr Jekop, mzli kc tqpnanati-ngrn enqmi  
rmqng,  
Odatipeq zmatq ngr ncblo ngr vea nedrng x  
rblxbz badr nzotangr.

Ncblo amrlx kcng tzvoneng mz hcsi x hcsi nedrng  
nztatio-lxblrng x nzbzng.

Nibqtiq nidr amrlx x twzq dztudrng.

<sup>7</sup> Delc leplz amrlx tzmyatitr-zlwz-ngrdr nim,  
Murde nzngyakr drtwrm trpnzng kx naya-  
trpz.

<sup>8-9</sup> Gct, mzli kc tqpio-ngrme Heven nzvz-rbrkr lr  
nrlc,  
Mz nzarlapx-krm kxnzobqszong,

Lr nrlc lcng amrlx nzmwxlr-zlwzng  
X nzmnc-lrpitxng.

### *Ncblo Ngr Vea Nzmetxbzng Bade*

<sup>10</sup> Leplz amrlx sa naglqlz-ngrdr nim  
Mz nzaovxio-krm enqmi rmqng kcng tzngy-  
ati drtwrdr nim.

Murde ncblo ngr vea kcng trnibqtiwqng  
tzmexbzng bam,  
Nzpipxbzlr kx nanginipedr ncblo nemqng.

<sup>11</sup> Delc na-angidati-ngrgu da kx esalz-ngrbzku mz  
Yawe, Gct rgu.

X lr mrkzbleng kcng tzesotrpzng  
nartwzmqng dztudrng kxmrlzvxing mz  
Gct kc tzmyatitr zlwz, murde aovxiole  
nidr.

<sup>12</sup> Murde nide kc tqavzole kxnzetung.  
X king amrlx mz nrlc tzmwxlr-rti-zlwz-ngrdr  
nide.

# Sam Kranzpnu-rlimz-nrade-rlimz (77)

*?Nzngya-zlwzkr Drtwr Gct Mrilvzole Nivz  
Lrde?*  
Nabz ne Asaf.

## *Nzkrka'ngr*

- <sup>1</sup> Yrnibo mz Gct.  
Yrni-katobo bade murde naxlrmlle natqnge.
- <sup>2</sup> Mzli ka tqkxpu-ngrne, glalzbo mqnge mz Kxetu.  
Kxmule-esz' krka'tix nzwr nrckxbq, a'  
trxngipwc'u nzamqtr-ngrm drtwrnge.
- <sup>3</sup> Gct, kx aoti drtwrnge nim, nabznge ngrgo.  
X sc tqyrni-katopex mz nzetqkr drtqnge.

## *Nzrlxtingr*

- <sup>4</sup> Nzcxpu-krngeng aobqtx-zvzle ninge mz nrck-  
xbq,  
X rblx-kzp bange nzycmnengr mz nztalvzokr  
nabznge.
- <sup>5</sup> Aoti drtwrnge zbq kcng pnz  
X yiz kcng bqnc.
- <sup>6</sup> X drtwrnge ao-zlwzx mz nrckxbq.  
A' drtwrnge kc tqveabe kx,
- <sup>7</sup> ?Myx kxmule, Kxetu sa naptxpx-alope-ngrde  
nigr?  
?X trpengr nzmrlzti-mou-krde nigr?
- <sup>8</sup> ?Nzaodu-krde nigr sa nayrkrpx-alope?  
?X nzesz'tikr drtwrgr badr naesakipe?
- <sup>9</sup> ?Myx kxmule, Gct trnaycpeu mz drtwrde nigr?  
?X nzngya-zlwzkr drtwrde mrilvzole nivz  
lrde?

10 Xngitxtr-zlwzx  
Gct kc tqmyalz-esz'ngr traelwapxpe-ngrpleu  
zmatq ngrde bagr.

*Nqm̄q Kr Gct*

11 Yawe, sa tqdcp̄x mz drtwr̄nge nqm̄q krm̄qng,  
X da kxnzkctip̄x kcng tqaletiq̄ng mzli kc  
bq̄nc.

12 X sa na-aoti zlwz drtwr̄nge da kxmrlz kxetut-  
ing  
Kcng tqwz-ngrn mz zmatq ngrm.

13 Gct, nqm̄q krm̄qng amrlx tr-esz'ngr,  
X trpnz-moungr gct kx myaszpxle nim.

14 Nim txpwz Gct kc tqaleti da kxnzkctip̄xng,  
Mz nzbatr-krbzme mz lr mrkzbleng nzmc-  
krdr nzxplr-krm.

15 Arlapxpeq nqvi lr Jekop x Josip, murde nidr  
leplz nemq̄ng,  
Mz nzaovxio-krm enqmi rdrng mz zmatq  
ngrm.

*Zmatq Ngr Gct Mzli Kc*

16 Gct, mzli kc tqvz-ngrme, prla rnrcti-lz bq̄,  
X wai-kzle meboo-ngrng.

17-18 X drtc' ycngrlrlzm mz trlipu.  
X zbo nzadclr tewa kxetu.

X bzlrpc rpnakile nr̄lc apule nipna  
Mz nzpnamilxti-krde nr̄lc.

X bzlrmei yrpu-zlile bongavz  
Mz nzpro-krm nounenq̄.

19 Kxmule-esz' trpnznḡr kxrmc nabzlvz r nanycm  
x lrpzki rm,

A' sc tqkawicpeq meboongr ngr Prla Bla.

20 X mailzq leplz nemq̄ng mz nzapu-krdr sip,

Mz mq Mosis x Eron.

## **Sam Kranzpnu-rlimz-nrade-rtqmz (78)**

*Bzkq Apuku Melrmqgung Kcng Tzvecpx-  
lzbqmng Mz Gct*  
Nabz ne Asaf.

*Nzalvztrkr Sam Ka*

- <sup>1</sup> Leplz nengeng, lalztqmamu mz nzalvztr-krnge,  
Mz nzxlr-angidr-krmamu natqngeng.
- <sup>2</sup> Sa naryapwxbo bamu mz nzymne-ebzpxngr.  
X sa nayokaetipxbo dalr mzli kc bqnc kx  
trgalr kxrkrlz. ✧
- <sup>3</sup> Da lcng tqxlrpeku x tqkrlzpeku  
Murde nzpipem melrmqgung bagu.
- <sup>4</sup> Bzkq yrlq-kapqzbkung mz doa negung,  
A' nayapwxtibzku badr.
- <sup>5</sup> Yawe yrlqbzle loukxtr scde mz lr Israel,  
Mz nzka-krbzle natqde mz nqvi lr Jekop.  
X rngidrlvz-ngrbzle mz melrmqgu lcng  
Kx na-alvztr-ngrdr doa nedrng mz lou lcng.
- <sup>6</sup> Murde nayrlqlr lou lcng,  
X na-alvztr-kzpzlr mz doa nedrng.
- <sup>7</sup> Mz nzmu-krde lcde, nrpr ngr doa amrlx na-  
abrtrpzlr drtwrdr mz Gct,  
X na-aoti drtwrdr da kxnzketipxng kcng  
tqalele mz nzvz-nqblq-krdr natqdeng.
- <sup>8</sup> X bzkq na-apulr melrmqdrng kcng nardr  
tqmngi x tzxpqbrlr-ngrdr Gct.

Trtegu lcng nabzdr bao x nzvecpx-lzbqmqng  
bade.

*Trnzbrtiu Drtwrdr Gct* ☆

<sup>9</sup> Mzli kc bqnc kzdung lr Israel, ncblo ngr  
vea nedrng nzoliq-angidrpeng mz popz' x  
nipna scdrng,

A' mz zbq kc navecpengr, sc tzdwapeng.

<sup>10</sup> Murde trnzatutrlru Nzes'tikr Drtwrdr badr  
Gct,

X nzpctxpx-ngrdr lou scdeng.

<sup>11-12</sup> **Kxmule-esz' nzmcpelr zmatq ngr Gct,  
A' trmatqu mz drtwrdr da kxzkctipxng  
keng tqaleleng mrkc Ijpt.**

<sup>13</sup> Akipxle Prla Bla x mz nrlarde rlilr atule apule  
nztukr drkq,

Mz nzmailzo-krde leplz nedeng elr.

<sup>14</sup> X mz nzvz-krdr ngrlx, mailzle nidr mz dcbz,  
X nyr rtwayzbz badr mz nrlckxbq.

<sup>15-16</sup> Mzli kc tzmnc-ngrdr lzke, amrplxtrpzle rplz  
Kx yrlep-x-ngrm lue x ningali.

Murde narmnqng x drtwrdr naesatpx zpwx  
Mz lue lc tqkabzle badr, tqxplrm nzyrle-krde.

<sup>17</sup> Kxmule-esz', a' vz zvz nzatrkatikrdr Gct kc  
tqmyalz-esz'ngr,

Mz nzale-krdr alwx x nzxpqbrlr-ngrdr nide.

<sup>18</sup> Mz nzmqngikr nabzdr nzabzlr nzatalzng Gct,  
Mz nzka-krbzle dakxnzng kx naesapxng  
drtwrdr.

<sup>19-20</sup> Nzpibqtilr Gct, nzrpilr kx,  
"Kxmule-esz' luplxtrle rplz x lue yrlep-  
katom elr,

A' rblxbz bade nzrka-krmle nagu dakxnzng,  
Mz nzacive-krde nigu leplz nedeng.”

*Dakxnzng Kxvzom Heven* ☆

21 Yawe kx xlrle kc nzymne-krdr, drtwrde trmr-  
lzlzpuu.

X zngya ngr drtwrde kc tzapqtr-zlwzbzlr.

22 Murde trnzlxngitilru nide,

X drtwrdr trnzabrtrpwzlr bade mz nzacive-  
krde nidr.

23-24 Kxmule-esz', a' lvxpxbzle bongavz,

Mz nzatwzlrro-krmle badr dakxnzng ngr  
Heven. ☆

25 X mzli lcde, leplz txneng nzmung dakxnzng  
nan enjrl,

Mz nzangidati-krbz Gct zbrtale ngr nelzdr.

26 X mz zmatq ngrde kz

Sc tqawqpele nenq tonga x trlaki.

27 X nenq lcng li nzrtwzmqng blzmr kio,

X nzyrlwrne-krdr apule drta' ngr prla.

28 Kio lcng nztatiomqng mz drtc'

O-ngalele ma nyzdrng.

29 Gct kabzle badr nikeng nzsuti zlwz drtwrdr.

Nzngqdr x nelzdr krlc.

30 Kxmule-esz', a' drtwrdr tresapxu.

X mzli lc tzmube-ngdr,

31 Gct sc tqnibqtipebzle obla nedr kcng tzxplrng,

Mz nzngyatikr drtwrde nidr.

*Vz Zvz Nzale-krdr Alwx* ☆

---

☆ **Sam Kranzpnu-rlimz-nrade-rtqmqz (78):19-20** Nzrlaszng  
16:13; Nzqqlu-krdr 11:1-34 ☆ **Sam Kranzpnu-rlimz-n-  
rade-rtqmqz (78):23-24** Jon 6:31 ☆ **Sam Kranzpnu-rlimz-n-  
rade-rtqmqz (78):31** Nzqqlu-krdr 14; 16; 17; 21

- 32 Kxmule-esz' Gct ayrplapx-katole nidr mz alwx  
ngrdrng, a' sc tzale-zvzng alwx.  
X kxmule-esz' nzmcpelr nzale-krde da  
kxznkctipxng, a' trnzlxngitilru nide.
- 33 Zbz sc tqnibq-anipele nidr  
Mz nzapusr-krdeleng lue kc tqmilqpx mz leu  
r nya x tqmrbro mz drtc'.
- 34 Kx nibqle kcng, opxm kx drtwr kxznclubeng sc  
tqyzlu-mopwz bade,  
Mz nzplzpx-krbzlr alwx ngrdr x nzkrka'-  
krbzlr bade.
- 35 X opxm kz kx dctipx mou drtwrdr kx Gct kc  
tqrninr nide butqbr nyzdr,  
Kc tqarlapx-zvzle nidr.
- 36 Kxmule-esz', a' nzpokiatilr nide  
Mz nizrpi-krbzlr bade kx nzmrlztilr nide.
- 37 Kxmule-esz' nabzdr bao,  
X trnzatutrlru Nzesz'tikr Drtwrdr badr,
- 38 A' trodatileu nidr, murde yckqti mou drtwrde  
nidr x ipqpxbzle alwx ngrdrng.  
X nzwrde kqlu kx ngyatingr drtwrde nidr, a'  
lolvztxde zngya ngr drtwrde.
- 39 Murde krlzle kx nidr leplz x nzkrzlzlr nzbzngr,  
Mz nzapu-krdr nenq kc tqwq x sc tqama-  
neope.

*Mzli Kc Lzke* ☆

- 40 Nzwrde kqlu lzke nzxpqbrlr-ngrdr nide,  
Mz nzavzti-krbzlr drtwrde.
- 41 Zvz nzale-ebir-krdr da kx nzangyati-ngrbzlr  
drtwrde,



Mz drtwrdr kx lctr-zvzbz mz Gct kc Tqtr-  
esz'ngr.

42 Mrbrtr mz drtwrdr zmatq ngrde  
Mz nzarlax-krde nidr mz mq enqmi rdrng.

43 **Mzli kc tqale-ngrde da kxnzkctipxng**  
**Mz nzvzmipx-krde nidr Ijpt.**

*Mzli Kc Tzmnc-ngrdr Ijpt* ☆

44 X mzli kc tzmnc-ngrdr Ijpt, ngi-batrpzle lue  
kxetung nzlrtpx-krdr mepyr,  
Murde lr Ijpt ma tzrmnqng lue.

45 Atwzlr-ngrmle frck kxkqlu kx na-atrkatilr  
mrnyzdr,  
X mc kxkqlu kx namakxtilr nidr.

46-48 Nibqtibzle kzu, sip, x gout nedrng  
Mz kzdq zyagox kxtrka.

X mz nibrde atwzlr-ngrmle trlipu kxetu,  
Mz nzamzti-krbzle nounc x dalr nrlanc nyz-  
drng mz nzatatio-krmleng muli-aes.

Zbz sc tqatwzlrpe-ngrmle kionabr  
Mz nzngqti-krdr dakxnzng amrlx kx nzlu-  
tinepwzng mz nrlanc.

49 X mz nzngyati-zlwzkr drtwrde lr Ijpt kcng  
tzakxputilr leplz nedeng,  
Atwzlr-ngrmle enjrl kxnzkqlung mz nzpulio-  
krmlr nyr mz nzayrplax-krdeleng.

50 Trlolvzleu zngya ngr drtwrde,  
A' xplr-esz'ngr apule nubla ngr lue mz  
nznibqti-krde nidr.

51 Nibqtibzle doa ncblo kx ayrrngr nedrng,

Nidr kcng tzvzpxmqng mz nqvi lr Ham, doa  
ne Noa.

*Nzrlasz-krdr Ijipt* ☆

- 52 Mz nibrde sc tqrtwayzpebz mz leplz nedeng  
mz nzrlasz-krdr Ijipt.  
X mailztrle nidr lzke mz nzapu-krdr sip  
nedeng.
- 53 Acive-angidrle nidr, x trnzmwxlr.  
A' aboobzle enqmi rdrng amrlx prla.
- 54 X mz nibrde sc tqvzmitr-atele nidr mz drtc'  
kxtr nyzde, Kenan,  
Mrkc tqtungr Newz Saeon, kx nztwz mz  
zmatq ngr nzaovxio-krde.
- 55 Maneutipxle leplz kxnmnc-mrbrng mrlcde,  
mz nzvztrkr leplz nedeng mz drtc' lc.  
X sc tqakipxpebzle drtc' lc mz neidu lr Is-  
rael kcng nzpnu-esz'-nrade-li, x nzmncpx-  
alzupq'ng mz ma nyzdr.

*Mzli Kc Tzmnc-ngrdr Kenan* ☆

- 56 Kxmule-esz' nzmncpeng mz drtc' kxtr, a' sc  
tzymne-plztitrlr  
x nzxpqbrlr-ngrdr Gct kc tqrninr mz  
nzpxtpx-krdr natqdeng.
- 57 Leplz lcng nzapulr melrmqdr kcng bqnc mz  
nzesablqti-krdr nide x nzvecpx-lzbq-krmlr  
bade.  
Mz nzmu-krde lcde, trpengr kx brti drtwrde  
nidr.

---

☆ **Sam Kranzpnu-rlimz-nrade-rtqmz (78):51** Nzrlaszngr  
14—15; Josua 11:6-23 ☆ **Sam Kranzpnu-rlimz-nrade-rtqmz**  
**(78):55** Josua; Kxnzryrlqng Drtwr; 1 Samwel; 2 Samwel

- 58 Nzangyatibzlr drtwrde mz nzangio-krdr kx  
trngiu Yawe Gct angidr,  
X mz nzyrngzo-krbzlr mz mqngr da kxnzlx.  
59 Kx mcle da lcng tzaletilr, ngyati zlwz drtwrde  
leplz nedeng,  
X sc tqpxtxpxpe-ngrde nidr.  
60 Rlasz-pnzle Tentkxtr nyzde kc mztea Saelc, mz  
drtc' nyz Efrem.  
Mrkc tzmnc-kai-ngrdr badr leplz nedeng.  
61 X rlr-ngrbzle mz enqmi nztwz-krdr Bokis kc  
tqyclz-ngrm Nzesz'tikr Drtwrdr Badr,  
Kc tqngi rkx ngr zmatq x nzmyapx-esz'ngr-  
krde.  
62 X mz nzngyati-zlwzkr drtwrde leplz nedeng,  
Rlr-ngrbzle mz enqmi rdrng nznibqti-krdr  
nidr.  
63 X obla nedrng amrlx nzbzting mz vea,  
X olvi nedrng trpengr obla kx naryrlzting.  
64 Pris nedrng nzbzti-kzng mz vea,  
X olvz ngrdr nzmwxlr-zlwzng x trpnzng  
mzli kx nayrnimi-ngrdr namz ngrdr.  
65 Mz nibrde, mz drtwrdr opxm kx Kxetu apule  
ncblo kx melz-atem  
Mz nzmwingr mz nzrmnq-krde waen.  
66 X mzli lcpwz aovxiole enqmi rdeng,  
Mz nzamyati-alo-krbzle drtqdr.

*Gct Mcpxle Neidu Lr Judz, Newz Saeon, X Devet*

☆

- 67 Gct trsutiu drtwrde doa neng Josip,  
X sc tqrlaszpele drtc' nyz Efrem, kzdq mr-  
lxde.

- 68 A' mcpx-alzule neidu lr Judz,  
Mz nzmnc-krde Newz Saeon, kc tqmrlz-  
zlwz bz bade.
- 69 Mrkc dekc tqwztio-ngrde Mrkc Tqtr murde  
nayc alo elr,  
Da kc tqwai nzyc-alokr Heven x nrlc.
- 70-71 X mcpx-kzle Devet kx nawztrpz bade.  
X kapxmle nide mz nzaclve-krde sip neng  
trtede,
- Murde nangingide king r lr Israel,  
Mz nzaclve-krde leplz neng Gct.
- 72 X nzaclvekr Devet nidr tubq,  
Mz nzmailz-zpwx-krde nidr.

## Sam Kranzpnu-rlimz-nrade- rpwxmz (79)

*Kxetu, Ayzlu-ebir-ngr-mopwz Badr*

Nabz ne Asaf.

*Enqmi Rgrng*

- 1 Gct, leplz kxnmnc-mrbrng nzvztrpqng x  
nztztilr nigr,  
Murde natwzlr drtc' lc tqkame bagr.  
Nzatrkatipelr Mangr-nzangiongr nim,  
X nzodati-atwrnrpe-ngrdr Jerusalem.
- 2 Namz ngr leplz nemqng nzayrlwrtxnedr  
Ngi dakxnzng nanq utc x animol kzpetong.
- 3 Enqmi lcngr tzlakitilr leplz amrlx Jerusalem,  
X mepyr ngrdr yrlenepe apule lue.  
Mz nzm-krde lcde, trpnzngr nigr kx rlapx,  
Kx nayrtzmqrlr namz ngr kztedrng.

- 4 Lr mrkzbleng kcng tzmnc-aepztrpqng bagr  
nznelvzlr nigr mz nzamyati-ngrm drtqgr,  
X nzxtrnga-ngrdr nigr.
- 5 ?Yawe, ngyati-alope drtwrm nigr?  
?Myx kxmule, zngya ngr drtwrm lc tqapule  
nyr, kx na-angc-alopele nigr?
- 6 Bzkq, a' kx nangyati drtwrm kxtrnzrlxngitiung  
ngr mrkzbleng,  
Kcng trnzamatqlru x trnzangiolru nim.
- 7 Murde sc tznibqtipelr nigr leplz ngr nqvi lr  
Jekop,  
X tzatrkatielr drtc' kc tqkame bagr.

*Arlapx Nigr!*

- 8 Gct, bzkq ayrkrpx-ngrn nigr alwx ngr melrmq-  
grng,  
A' naye mz drtwrm nigr murde nqm q nr  
nabzgr bao-zlwzpe.
- 9 Mevalu rgr, okatrp x arlapx nigr, x ipqpxbz alwx  
ngrgrng,  
Murde leplz ma tzobqszolr nim,
- 10 Mz nzrpi-krmlr bagr kx,  
“?Myxpe Gct rmu?” ☆
- A' rlr-ngrm nzmc-krgr nzayrplapx-krm leplz  
lcng,  
Mz nzayzlu-krbzme badr nznibqti-krbzlr  
leplz nemqng.
- 11-12 Kxetu, ayzlu-ebir-ngr-mopwz badr  
Nikeng nzalelr mz nzobqszo-krdr nim.  
X arlapx kz nigr leplz nemqng kcng tzlolvztilr,  
murde ma tqbzkr,

---

☆ **Sam Kranzpnu-rlimz-nrade-rpwxmz (79):10** Sam 22:8;  
42:3; 44:16; 115:2

Mz nzayzlu-krme nzyrni-krbzkr bam.

<sup>13</sup> Murde apukr sip nemqng,

X sa na-awi-zvzpebzkr bam mz nzglqlz-alo-krgr nim.

## Sam Kranzpnu-rtqmz (80)

*Ka-mop Bagr Nzexplr-krgr Kc Pnz*

Nabz ne Asaf.

*Nigr Sip Nemqng*

<sup>1</sup> Gct, myaszlq enjrl kxnzeting.

X aclve-zvzq nigr doa neng Josip,

Mz nzapu-krgr sip nemqng.

Lalztqm bagr, nigr doa neng Israel.

<sup>2</sup> X aelwa-ngrm zmatq ngrm bagr,

Nigr nqvi lr Efrem, Benjamin, x Manase.

Vzm mz nzexplr-krm mzli ka

X arlapxbz nigr mz mq enqmi rgrng.

<sup>3</sup> **Gct, mz nzaodu-zvz-krm nigr, arlapx nigr,**

**X ka-mop bagr nzexplr-krgr kc pnz.**

*Nabzgr Talvzo*

<sup>4</sup> Yawe Gct kc tqrninr, bzkq drtwrm ngya-zvzm bagr,

A' ayzlum nzkrka'-krgr.

<sup>5</sup> Tekqtrpebzme dakxnzng nagr mz nzavz-krbzme drtwrgr.

X mz lue amnqtr-zvzpeq nigr mz drlemzkr.

<sup>6</sup> Rlrx-ngrpwzme mz lr mrkzbleng kcng tzmnc-ngalelr nigr nzyrpalelvz-krdr nigr

X nzotalvz-krdr drtc' nyzgr kx neke nartwz.

<sup>7</sup> **Gct kc tqrninr, mz nzaodu-zvz-krm nigr, arlapx nigr,**

**X ka-mop bagr nzxplr-krgr kc pnz.**

*Nigr Nqvi Lr Grep Nyzm*

- 8-9 Apusr-ngrn nigr nqvi lr grep ngr nrlanc nyzm.  
Murde mz nzvzmipx-krme nigr Ijipt,  
Apule kx bolvztipeq leplz kxnmnc-mrbrng mrkc  
Kenan,  
Murde nqvi lr grep nyzm natu-amqngi mz  
drtc' lc.
- 10-11 X bz ngr nrlanc kc tqoliqtime bagr yzutr mz  
drtc' ngr Lebanon,  
Vz krlzbzle Lue Yufretis.  
X vzki-kzple mz newz kxnzetung,  
Vz x krlzbzle Prla Meditrenia.
- 12 A' mzli ka opxm kx awxliq nabxbz ngr nrlanc  
nyzgr,  
Mz nzrlr-krbzme mz enqmi rgrng nzrtwz-  
abeane-krdr dalr nrlanc.
- 13 Lr mrkzbleng nzapulr poi kzpeto kcng tzaya-  
betilr nrlanc,  
Mz nzapusr-krdr nigr dakxnzng nadr.
- 14 Gct kc tqrnir, obqom bagr Heven.  
X okatr-mop nigr mz nzapu-krgr nqvi lr grep  
nyzm,
- 15 Kc tqpetiq  
Murde naxplrkr mz nzmnc-krgr mz drtc'.
- 16-17 Ngaprbz ncpa'bu ngrgr kx nao-zlilzkr,  
Mz nztu-zvz-krme mz nibrgr, nigr leplz  
nemqng.  
Murde enqmi rgrng nzapusr-ngrdr nigr nounc kc  
tzlakitxo x nzangc mz nyr.  
Delc naodati-ngrbzme nidr mz zngya ngr  
drtwrm.
- 18 Zbz trnaesablqtikru nim,  
A' naglqlz-zvzpekr nim mz nzalu-krm nigr.

- 19 **Yawe Gct kc tqrninr, mz nzaodu-zvz-krm  
nigr, arlapx nigr,  
X ka-mop bagr nzxplr-krgr kc pnz.**

## **Sam Kranzpnu-rtqmz-nrade-esz' (81)**

*Krkcng Naglqlzlr Ninge, Navz-nqblq-kzlr  
Natqngc*

Nabz ne Asaf kx yrbzle mz kxrmailz ngr dzbe  
kxznzgrng.

*Naglpqpxku Gct*

- 1 Namalqlvzku Gct murde nide lrpalc nyzgu.  
Nangr-katobzku mz Gct ngr Jekop.
- 2 Na-ayrnitiku gita x ukzlele x na-ayrlewzku  
nrarspwale  
Mz nzngr-krbzku bade nabz kxyrlvi.
- 3 Trpu navxutr mz nzrkqlengr leplz mz zbq  
kxznzetuting,  
Mz zbq ngr nzpokr temz x zbq ngr nzc-  
atwrnr-krde.
- 4 Murde krlc natq kx kam Gct bagu, nigu lr Israel,  
Mz nzka-krbzle loukxtr scde mz nqvi lr  
Jekop.
- 5 Pipxbzle mz melrmqgung, nidr neidu lr Josip,  
Mzli kc tqatrkatl-ngrde lr Ijpt.
- X ninge Asaf, mzli kc nzryr-krnge tqkrlzpe-  
ngrbzle me tavau,  
Xlrx kc natq kx trglxwxu, a' mz nibrde sc  
tqglx-atex.



6 Rpimle kx, “Sc tqrkaxobo da kxmrlepu kcng  
tqglqamu.

X aopxbo drtqmu mz nzwz-kato-krmu Ijpt.

7 Mzli lc tqkxpu-ngrnamu, kqleamu ninge, x sc  
tqarlapxpex nimu.

X sc tqokatrpele nimu tqvzmc mz bzlrmei.

X ni-kznge kc tqabzle nimu mrkc lzke  
Mz aulz ngr Meriba.”

### *Navz-nqblqku Natqde*

8 “Naxlrnamu da kx narngidrlvz-ngrbo bamu,  
kx leplz nengeng.

X nalalztqmamu mz natqnge.

9 Bzkq angioamu kx trngiu Yawe Gct angidr,  
Mz nzyrngzo-krbzmu badr.

10 Murde ninge Yawe, Gct rmu, ✧

Kc tqvzmile nimu mz nzrlasz-krmu Ijpt.

X sa na-amrlzx nimu mzli kx abtrrmamu  
drtwrmu bange.

11 Kxmule-esz', a' tryrlq-angidrwamuu natqnge,  
kx leplz nengeng,

Mz nzpctxpx-krmu ninge.

12 Mz nzmu-krde lcde, rlrpx-ngrbo bamu nzvz-  
nqblq-krmu narmu,

X nzale-krmu nike suti drtwrmu.

13 A' sutitx zlwz drtwrnge kx nalalztqmamu  
bange, kx leplz nengeng,

Mz nzlolvz-amqngi-krmu nqm q krnge.

14 Murde na-aovxiobo enqmi rmung

Mz nzota-krgr badr.

---

✧ **Sam Kranzpnu-rtqmqz-nrade-esz' (81):10** Nzrlaszngr 20:2;  
Lou Kcpwz 5:6

- 15 X Krkcng tzpxtpx-ngrdr ninge, sa narnrcng  
mz nzyrngzo-krmr bange,  
X na-ayrplapx-alox nidr.
- 16 A' na-amrlzx nimu leplz nengeng,  
Murde na-abrtz-zlwzamu mz nzmnc-zpwx-  
krmu.”

## Sam Kranzpnu-rtqmz-nrade-li (82)

### *Gct Pipxle Kx Kxnzetung Nzvz-rbrng*

Nabz ne Asaf.

- 1 Gct wxbuom me matq nyzde,  
Murde napipxle kx kxnzetung nzvz-rbrng.
- 2 Rpihzle badr kx, “Nzacle-krmu leplz narsakrl-  
rngr.  
A' bzkq okatramu kxdrka'-ngrng nzmyaszpx-  
krdr kxnztubqng.
- 3 Murde mz nzvz-krmu natubzmu mz nibr kx  
trpnzng scdr da x doa kxnzbzszng,  
X naokatramu kxnzkxpung x kxtrnzxpung.
- 4 Murde na-arlapxbzmu krkcng trpnzng scdr  
zmatq  
Mz mq kxdrka'-ngrng.
- 5 Ngqngu-plxsramu x trpnzng da kx krlzamu,  
murde nqm q krmung amrlx trka-zlwzng.  
X trpnzng da kx opxm mzli ka mz nrlc.
- 6 Nimu kxnzetung murde kapebo bamu zmatq  
ngr nzrmailz-krmu.  
X nimu amrlx apuamu mrlxng Gct kc  
tqmyalz-esz'ngr. ✧
- 7 Kxmule-esz', a' mrbrtr mz drtwrmu

Kx zmatq kc tqwz-xgleamu nzkrzl  
nzkatzpx-ngrbz,  
Da kc tzwai nzkatzpxpe-ngrbz zmatq mz kz-  
dung kxnzung.  
X nabz-kzamu da kc tzwai leplz amrlx mz  
nzbz-krdr.”  
<sup>8</sup> Gct, vzm mz nzacive-krm leplz mz nrlc tulvzo,  
Murde lr drtc' amrlx nzmnczbzng mz zmatq  
ngrm.

## Sam Kranzpnu-rtqmz-nrade-tq (83)

*Enqmi R Israel Mzli Kc Pnz X Mzli Ka*  
Nabz ne Asaf.

*Enqmi Rmqng*  
<sup>1-2</sup> Gct, bzkq mnc-lrpitxn,  
Murde enqmi rmqng nzxpqbrlr-ngrdr nim.  
<sup>3</sup> Sa tzryrlqng drtwr kxyc-kapq kx na-atrkati-  
ngrdr nigr.  
X nigr leplz nemqng kcng tqmrlzti-zlwzq.  
<sup>4</sup> Nzrpilr kx, “Naodatitxbzku mrnyzdr,  
Murde drtq Israel namrbtxtr alo mz drtwr.”  
<sup>5-8</sup> Enqmi kcng tzmnc-ngalelr Israel drtwrdr esz'ti  
Mz nzprtr-krbzlr mz lr Amcn x lr Mcab,  
neidu lcnq li nzvzpxmqng mz nqvi lr Lot.  
Kxntupeng badr me esz' nidr seleng:  
Nqvi lr Isc, nqvi lr Ismael, neidu lr Haga, x  
neidu lr Amalek,  
Lr mztea Taea, lr Gebal, x lr Filistia.  
X lr Asiria kxnxplrng nzngi tedr kz badr.

*Ayrplapx Nidr*

9-11 Gct, aovxio kz enqmi lcng mzli ka, da  
kc tqwai pnz nzaovxio-zvz-krm enqmi r  
melrmqgrng.

Ayrplapx nidr, da kc tqwai nzayrplapx-krm  
ami ne Jabin, King r lr Kenan x Ngrlrvea  
nede Sisera,

Mzli kc tqmilxtxo-ngrn nidr mz Lue Kison kc  
tqyc-aepztr mztea Endo,

X namz ngrdr mibio mrlcde mz mzli nyz  
Profet Debra.

X rlxti-kzpzkr nanibqti-kzq enqmi rgrng, da kc  
tqwaisr-ngrn mz lr Midizn mz nznibq-krm  
Oreb x Seeb, ngrlrvea ngrdrng.

X maneuti nidr da kc tqwai nzmaneuti-krm  
king rdr, Sebz x Salmuna, mz nznibq-krm  
nidr mz mq profet Gidion.

12 Murde leplz lcng pnz nzrpilr kx,  
“Natwzku Israel, drtc' nyz Gct, nangi nyzgu.”

☆

13 Gct, mz nzmu-krde lcde, apusrngr nidr bq r  
drtc',

X leu kxglr kx wqplr nenq.

14 Odati-atwrnrngr nidr, apubz badr nyr kxetu  
Kc tqyrkrtxongr dalr peto x nardzng mz mzli  
r nepi.

15 Maneuting x amwxlrng  
Mz nzapu-krbzme badr nounenq.

16 Yawe, amyatitx-zlwzbz drtqdr,  
Murde nakrlz-ngrdr zmatq ngrm.

17 Aovxio alo x amwxlr alo nidr

Murde nzmya-zlwzkr drtqdr nanibqle nidr.  
18 X mzli lc, sc tzkrlz-atepelr kx nim txpwx Gct kc  
tqmyatxlz-esz'ngr x drtqm Yawe.  
X nim King kc tqaclvele nrhc tulvzo.

## Sam Kranzpnu-rtqmz-nrade-pwx (84)

*Kxnmncpxmqng Mangr-nzangiongr Yawe Gct  
kc Tqrnir Nzmc-zpwxng*  
Nabz ne nqvi lr Kora kx nzyrbzlr mz kxrmailz  
ngr dzbe kxnzngng.

### *Yawe Kc Tqrnir*

1-2 **Yawe kc tqrnir, nim Gct kc tqlu.**

X mrlz-zlwzm bange Mangr-nzangiongr nim.  
Murde sutitx zlwz drtwrnge nzmncpx-krmc  
mako a ngrde,  
Mrkc tqngr-abrtz-ngrbo bam mz nabznge  
atwrnrngr.

3 **Yawe kc tqrnir, nim Gct x King rnge.**

Kxnzvdzng Jerusalem mz nzangio-krdr nim  
nzrlatrng mz olta nyzmqng.  
Murde olta nyzm apule ma nyz doa nemqng.  
Da kc tqwai utc tzwz-ngrdr ma nyz neidr, mz  
nztapirpx-krdr neimrdr.

4 X doa lcng tzmncpxmqng Mangr-nzangiongr  
nim nzmnc-zpwxng  
Mz nzangrlvz-zvz-krdr nim.

### *Newz Saeon*

5 Namrlzbz mz leplz kcng tzvzdng mz Newz  
Saeon mz nzangio-krdr nim,

Murde sa na-axplr-mowq nidr.

6 Mz nzkawi-krdr nabzlwa kxmingr narmctilr  
nabzde kx lrtng

Mz nibr nzdcrr tewa.

7 X mz nzesotr-krdr Jerusalem nzxplr-krdr sa  
naetunepx,

Murde ycpe pipz nzkrlz-krbzlr Newz Saeon  
mz nzangio-krdr nim.

X nim Gct rgr kxmyaszlze krkcng tzmncng  
mzlilxlr amrlx

Tzangiollr lr mrkzbleng.

8 **Yawe Gct kc tqrninr, nim Gct r melrmqgr  
Jekop.**

Xlrm nzkrka'-krnge mz nzvztr-krnge ma  
nyzm.

### *Nzmnc-zpwxngr*

9 Rlxtibo bam

Kx amrlz-zvzbz king rgr kc tqmcpqxq.

10 Murde nzmnc-tr-ngrbz bam mz Mangr-  
nzangiongr nim mz zbz kxesz',

Myaszpxle nzmncngr drlve keng mz nrlc mz  
zbq kang kqlu.

X nzprtr-ate-krbo mz naonrx ngr ma nyzm,

Myaszpxle nzmnc-zvz-krnge mz ma kxnze-  
tung nyz kxdrka'-ngrng.

11 Murde Yawe, nim King rgr kc tqbatrple nza-  
matqngr nigr.

X nim temz ngr lomrgr kc tqyrputrngr nipna.

X acveq nigr mz zmrlz ngrm,

Mz nzrlrpx-zvz-krbzme da kxmrlzting mz  
kxntubqng.

12 **Yawe kc tqrninr,**

Krkeng tzabrtrpzlr drtwrdr bam nzmnc-zpwxng.

## Sam Kranzpnu-rtqmqz-nrade-nzlvqn (85)

*Nzamrlzkr Yawe Mzli Kc Pnz, Mzli Ka, X Mzli Kc Navzm*

Nabz ne nqvi lr Kora kx nzyrbzlr mz kxrmalzl ngr dzbe kxzngrng.

*Mzli Kc Pnz*

- 1 Yawe, yc ngr drtwrm lr Israel mzli kc pnz,  
Mz nzamnc-zpwx-mou-krm nidr mz drtc'  
nyzm.
- 2 Sc tqipqpeq nidr, leplz nemqng, mz nzvz-rbr-  
krdr,  
X katxpxbzme alwx ngrdrng.
- 3 Mzli lcde, lolvzo-mowq zngya ngr drtwrm,  
X nrwx kc tqprlxpebzme badr.

*Mzli Ka*

- 4 Mevalu rgr, mzli ka, amnc zpwx mou kz nigr,  
X nikitx nzngyatikr drtwrm nigr.
- 5 ?Myx kxmule, nangyati-alope drtwrm nigr,  
X trpengr nyzylukr drtwrm?
- 6 Trtingr! Axplr-mop nzlu-krgr,  
Murde na-abrtz-ngrgr nim.
- 7 Yawe, aelwa-ngrm bagr nzaodu-krm kc tqyc  
tqyc,  
Mz nzarlapx-krm nigr.

*Mzli Kc Navzm*

- 8 Nabrti drtwrgu natq Yawe,

- Murde esalz-ngrmle nrwz bagu mz  
nzyrlqpx-lzbq-krqu mz dalr nzngqngungr.
- <sup>9</sup> X oliq zvz nzarlapx-krde kxnzamrluelr nide,  
Murde nzulrde naxngi-alope mz drtc' nyzgu.
- <sup>10</sup> Yawe aodu-zvzle nigu, murde nangida-  
zpwxbzku bade.  
X nzaclve-krde tubq, murde namnc-zpwzku.
- <sup>11</sup> Mz nzavzo-krmle nztubqngr lc bagu,  
Ayzlubzku mz nznngida-zpwx-krbzku bade.
- <sup>12-13</sup> Apule kx nztubqngr lc rtwayzbz bade mz  
nzatubqti-krde nabz leplz,  
Murde naoliqti-ngrdr nzvz-krmle.
- Mz nzoliqngr lc, Yawe sa narkatim bagu da  
kxmrlzting,  
X drtc' nyzgu sa nalvcngr dakxznzng kxkqlu.

## **Sam Kranzpnu-rtqmqz-nrade- esz'mz (86)**

### *Okatrp Ninge Mz Nzaodu-krm*

Nabz ne Devet.

### *Abtrpo Drtwrnge Bam*

- <sup>1</sup> Yawe, xlrn nzkrka'-krnge,  
Murde trxpnrwxu x ninge ncblo txne.
- <sup>2</sup> Nim Gct rnge. Arlapx ninge mz nzbzngr murde  
tenge nim,  
X ninge kxznawz nem kc tqmnc-xgle-zvzle  
nim.
- <sup>3</sup> Nayc mz drtwrm ninge,  
Murde vz zvz nzkrka'-krbo bam.
- <sup>4</sup> Kxetu rnge, aelalzm drtwrnga,  
Murde abtrpo drtwrnga bam.
- <sup>5</sup> Murde mrlz-esz'ngrn nzripq-zvzng.



- X aodu-zvzq krkcng tzkrka'bzng bam.
- <sup>6</sup> Yawe, lalztqm mz nzyrni-krnge,  
X ayzlum natqnge.
- <sup>7</sup> Mzli ka kqlex nim mz nzkxpu-krnge,  
Murde angidati-zvzme nzrlx-krbo da bam.
- <sup>8</sup> Kxetu, trpnz-moungr gct kx apule nim,  
Murde trpnzngr nidr kx rkrlz nzalengr da  
kxznkctipxng kcng tqale-zvzq.
- <sup>9</sup> Kxrpalz, lr drtc' amrlx kcng tqwz-ngrn  
Sa nayrngzobzng bam mz nzarmyalz-krdr  
nim.
- <sup>10</sup> Murde nim txpwz Gct,  
Kc tqmatq-esz'ngr mz nzale-krm rkx kxetut-  
ing.

### *Angio-zvzx Nim*

- <sup>11</sup> Yawe, aelwa-ngrm bange me pnz drtwrm,  
murde navz-nqblqx natqm.  
X alvztrp bange nzamrlue-zvz-krnge nim.
- <sup>12</sup> Murde nabznge atwrnrngr na-awibz bam mz  
nzngini-krm Gct x Kxetu rnge,  
X na-angio-zvzx drtqm.
- <sup>13</sup> Murde nzaodu-zvz-krm ninge etu-esz'ngr,  
Mz nzarlax-krm ninge mz nzbzng.

### *Okatrp Ninge Mz Nivz Lrm*

- <sup>14</sup> Gct, kxznzqlqpx-lzbqng nztutitr nardr ninge.  
Zbo ngr ncblo kxayo lc nzrpilr nanibqlr  
ninge, murde nzpctxpx-ngdrdr nim.
- <sup>15</sup> A' yc zvz mz drtwrm leplz, x zmrlz ngm  
myalz-esz'ngr.  
X drtwrm trngya-aniu, a' nzaodu-krm x  
nzangidati-krm tqvzpe tqvzpe.

16 Mz nzmu-krde lcde, yzlum x nayc mz drtwrm ninge.

Axplr x arlapx ninge, murde wztrpo bam da kc tqwai lxenge mz nzwztr-krbzle bam.

17 Yawe, okatrp ninge mz nivz lrm, murde drtq enqmi rngeng namyatx-zlwzng

Mzli kc namc-ngrdr nzaxplr-krm ninge x nzapqtr-krme drtwrnge.

## **Sam Kranzpnu-rtqmz-nrade-rlimz (87)**

### *Jerusalem Apule Lxe Neidu Amrlx*

Nabz ne nqvi lr Kora.

1 Yawe wz-ngrde mzteadau Jerusalem

Mz newz kxtr nyzde.

2 X mzteadau lc nzmrlzba-krdele

Myaszpxle mztea kc-kzng ngr Israel.

3 Delc nimu lr mztea nyzde,

Naxlr-ngrnamu natq kxmrlz kcng tzymnetr-ngrdr Jerusalem.

4 Gct rpile kx, "Mzli kc na-aplxtipx-ngrbo leplz

nengeng, lr mrkzble kcng tzmnc-ngalelr

Israel sa naprtr-kzng mz dzbede nenge,

Krlcng Ijpt, Bxbilon, Filistia, Taea, x Itiopia.

5 X sa narpibzlr kx Jerusalem lxe neidu amrlx

murde nzrmctitrpzlr nzlungr bade.

X ninge, Yawe kc tqmyatxlz-esz'ngr, sa natu-amqngix nide.

6 X sa nayrox drtq leplz amrlx kcng tzbrti

drtwrdr ninge,

Mz nzprtr-krdr mz neidu lr Israel.

- 7 X mzli lcde, leplz nengeng lcng amrlx sa  
naelang x narpilr mz nzngr-krdr kx,  
'Mztea nyzgu, Jerusalem, ngi narlue ngr me  
vzkipxm da kxmrlzting amrlx.' "

## **Sam Kranzpnu-rtqmqz-nrade-rtqmqz (88)**

### *Mz Nabz Nzlo*

Nabz ne nqvi lr Kora.

### *Ycpe Pipz Nzbz-krnge*

- 1 Yawe, nim Gct kx arlapxle ninge,  
X yrni-katobo bam ngrlx x nrlckxbq.
- 2 Xlrm natqng  
X lalztqm mz nzkrka'-krnge.
- 3 Murde prtizpele ninge nzxpungr kxkqlu,  
X ycpe pipz nzbz-krnge.
- 4 Mzli ka mewepex,  
X trpengr da kx nawaitrpem bange.
- 5 Nzapusr-ngrdr ninge namz kx nzyrtzmqng mz  
gq.  
Murde krlcng tzbzpeng nzmrbtrtipe drtwr  
nidr x trpengr nzmcti-krdr nzokatr-krm.
- 6 Rtcope-ngrn ninge mz gq kx vzo la,  
X tutx-ngrpwz nzlo.
- 7 Nzngyatikr drtwrm ninge batrpzle nzetq-  
zlwzkr drtqng,  
Mz nzmrvlivo-krde nabzng apule nrc kc  
tqyrplalvzo-ebir-ngrde ninge.

### *Rblx Nzglqlz-krnge Nim Mz Gq*

8 Ngi-batrpē' nzungangrkr kztengeng ninge mz  
nzmwxlr̄ti-krdr zyagox lc tqdwatimle  
ninge.

X trpengr me nayrbqkipxx.

9 Yawe, mzke' vaotxtrpebz mz nzyrningr mz  
nzvzkr drtwr̄nge.

Kxmule-esz', a' mz zbq kang kqlu glalz-zvzbo  
mqnge mz nzkrka'-krbo bam.

10 Bzkq rlr-ngrme nzbz-kr̄nge

Murde ma tqrb̄lxp̄em bange nzyapwxtipx-  
krbo nim mz leplz.

Murde kxnzlu-txp̄wzng kcng tqalebzme badr da  
kxnz̄kctip̄xng.

X namz ngr leplz trnztulzpeung mz nzgl̄qlz-  
krdr nim.

11 Trnzymnetrpe-ngrdru nzaodu-zvz-krm mz  
nabz gq kc tqngi me nzodatingr nidr.

A' n̄zangidati-krm n̄zpip̄xbz mz kr̄kcng  
t̄z̄lubeng mz nrlc ka.

12 X r̄bl̄xpebz mz kxnzyrtzmqng n̄zrmc-krdr  
nzmyalz-esz'ngr-krm murde n̄zmn̄cng mz  
nabz nzlo,

X nivz lrm m̄rb̄r̄tr-alōpe kz mz drtwr̄, mz gq  
lr̄ kxnz̄bzng.

### *Nabznge Talvzo Zlwz*

13 A' krka'-zvzbo bam mz zbq kang kqlu, kx Yawe,  
Murde nayc mz drtwrm ninge.

14 A' opxm kx drtqm̄ satrpem bange,

X sc tqesabl̄qtipeq ninge.

15 Murde ayrplat̄x̄px-zlwzq ninge, yzutr pnz mzli  
kc tqngi-ob̄labe-ngr̄ne.

- X mzli ka nzetq-zvzkr drtqnge ycpē pipz  
nzayrkrpx-krde ninge.
- 16 Nzngyati-zlwzkr drtwrm ninge apule nubla kc  
tqtzwzle ninge,  
Mz nzbatr-krbzle nzmrbkr nzlu-krnge.
- 17 X nzxpu-krnge lcng nzngrlelvzlr ninge,  
X trpengr me nayrbqkipxx.
- 18 Ngi-batrpe' kztengeng kxnmrlzng nzngangr-  
krdr ninge.  
X mzli ka nabznge talvzo zlwz mz nzmnc-  
krnge esz'-krnge mz nabz nzlo.

## Sam Kranzpnu-rtqmqz-nrade- rpwxmz (89)

*Angidati-mopwz Nzesz'tikr Drtwr Kx Yrlqbzme  
Mz Devet*  
Nabz ne Etan.

- Nzaodu-zvzkr Gct*
- 1-2 Yawe, sa nangr-zvz-ngrne nzaodu-krm,  
Kc tqyc tqyc.  
X sa nayapwxtipx-alox nzangidati-krm natqm,  
Kc tqyctx alo, da kc tqwai bongavz.
- 3 X sa nayrlq-zvzq natqm kc tqpihzme mz kxn-  
zawz nem, Devet,  
Kc tqmcpqx, mz Nzesz'tikr Drtwrmu ncd.
- 4 Rpihzme bade kx, "Ncblo kcng tzvzpxmqng mz  
neidu lrm, sa nangingpwzlr king,  
Murde nqvi lrm na-acive alo."

*Nabz Ngr Nzrglqpxngr*

5-7 Yawe, lr Heven nzglqpxlr nzangidati-krm,

- Mz nzangrlvz-krdr da kxnzktipx kcng  
tqaleq.  
Enjrl amrlx nzamlue-zlwzlr nim,  
Murde trpnzngr lr Heven kx apule nim, kc  
tqmyaszlzle nidr amrlx.
- <sup>8</sup> Yawe Gct kc tqrninr, nim txpwx kx xplr-esz'ngr,  
Mz nzangidati-krm me pnz drtwrm.
- <sup>9</sup> Kxmule-esz' srkau xplr, a' sc tqlolvzq,  
X mz nzprtz-krm nrc kxoda, lclvzbzme  
murde nrw navo. ☆
- <sup>10</sup> X aovxio-zvzq enqmi rmqng mz nzxplr-  
esz'ngr-krm,  
Da kc tqwai nztabrti-krm Mepwz ngr prla kc  
bqnc.
- <sup>11</sup> Kxrpalz, bongavz x drtc' nyzmqng,  
Murde nim kx rwzngr nrlc x dalrdeng amrlx.
- <sup>12</sup> X doa x da amrlx mz nrlc tulvzo  
Nzaxvctr-lxblrng mz nzangrlvz-krdr drtqm,
- <sup>13</sup> Mz nzrpi-krdr kx, “Nim kc tqmatq-esz'ngr,  
X nzxplr-krm etu-esz'ngr.
- <sup>14</sup> Nou nzacive-krm nrlc nidr seleng:  
Nztubqngr, nzrsaklrngr, nzaodu-zvzngr, x  
nzangidatingr.”
- <sup>15</sup> Yawe, ngi da kxmrlz nzmqlq-abrtzlvz-krgr  
nim,  
Murde xngibzkr nzulrm.
- <sup>16</sup> X ngi da kxmrlz nzbilvz-krgr drtqm,  
X nzglqlz-krgr nztubq-esz'ngr-krm mz zbq  
kang kqlu.
- <sup>17</sup> Murde axplr q nigr,  
X aovxiokr enqmi rgrng mz nzokatr-krm.

---

☆ **Sam Kranzpnu-rtqmz-nrade-rpwxmz (89):9** Sam 65:7;  
107:29; Matiu 8:26; Mak 4:39; Luk 8:24

18 Yawe, nim Gct kc tqtr-esz'ngr x angio-txpwwkr  
nim.  
Murde mcpxbzme king rgr lc tqacive-zpwxle  
nigr.

*Nzesz'tikr Drtwr Gct Ncdr Devet*

19 Mzli kc bqnc, mz nzyrlq-krm Devet nzngini-  
krde king, vzme mz profet nemqng,  
X rpibzme mz nzrmwiblengr kx,  
“Aprcbo zmatq mz kzdq ngrlrvea kx xplr,  
Mz nzarmyalz-krnge nide mz leplz txneng,  
murde nangingide king.

20 Ncblo kxnzawz nenge lc tqmcpxx, Devet,  
X aelux nide mz tolo kxtr. ☆

21 Sa namailzx nide mz mqnge.  
X sa na-axplrx nide mz zmatq rnge.

22 Kxdrka'-ngrng kcng tzngi enqmi rdeng, trtx-  
pnzngr nzyatr-krbzlr bade  
Mz nzamyati-krbzlr drtqde.

23 Murde sa natamyr-ngrbo nidr  
Mz nznibqti-krbo kxnzpxtxpx-ngrdr nide.

24 Sa na-aodu-zvzx nide x nangingide kztenge.  
X sa nabatrpo bade nzaovxio-krde mz  
drtqnge.

25 Sa nakabo bade zmatq ngr nzaclve-krde Prla  
Meditrenia,  
Navz nakrlzbzle Lue Yufretis.

26 Sa namcle kx ninge trtede,  
Kc tqngi Gct rde x butqbr nyzde kc tqrlak-  
itrle.

27 X sa na-apusr-ngrne nide mrlxnge krdau,

---

☆ **Sam Kranzpnu-rtqmz-nrade-rpwxmz (89):20** Aposol 13:22

- Mz nzarmyalz-zlwz-krbo nide mz king amrlx  
mz nrlc.
- 28 Drtwr kxeszi'ti kc tqyrlqbo bade, trtxpnzng  
nzyzpr-krde,  
Mz nzangidati-krnge nzaodu-zvz-krnge nide.
- 29 X nzyrlq-krbo nzaclvekr nqvi lrde tqyc tqyc,  
Da kc tqwai nzyc-alokr bongavz."
- 30 X rpi-mopwz Gct kx, "A' nzmua doa nedeng  
naesablqtilr loukxtr scnge,  
Mz trnzlolvz-amqngi-krdr nzalvztr-krnge
- 31 X nzmua trnavz-nqblqlru me pnz drtwrnga  
Mz nzpntxpx-krdr natqnga,
- 32 Sa na-ayrplapxxng mz alwx ngrdr,  
Mz nzaetq-krbo drtqdr mz nikeng nzvz-  
rbartilr.
- 33 A' trpnzng nzaao-krnge da kc tqesalz-ngrbo  
mz Devet,  
A' sa na-aodu-zvzx nide.
- 34 X trpnzng nztekqtr-krnge natqnga,  
A' sa na-atutr-zvzx nzesz'tikr drtwr kc tqyr-  
lqbo bade.
- 35 Esalzpex mz drtqnga kxtr  
X amqngipex kx trtxpnzng nzesabrti-krnge  
nide.
- 36-37 X nzaclvekr nqvi lrde tqyc tqyc,  
Da kc tqwai nzi-alokr nepi x nzprtz-krm  
temz x nztao-krde."

*King Kc Tqvzpxm Mz Nqvi Lr Devet, Drtwrde  
Lctrpz Mz Gct*

- 38 Yawe, rpiq da lc, a' mzli ka drtqm satrpm  
bange x rlaszpeq ninge,  
Mz nzngyati-moukr drtwrm ninge, king kc  
tqmcpxq.



- 39 Nikipeq Nzesz'tikr Drtwr kx yrlqzbzme mz mel-  
rmqgr Devet, kx natu-zvzbzme mz nibr  
nqvi lrde,  
Mz nzapusr-krbzme kraon ngr narngē brm-  
rda.
- 40 Awxlikitxopebzme drkq ngr mzteadau nyzngē.  
X odati-atwrnr-ngrbzme lrpalc nyzgrng am-  
rlx.
- 41 Enqmi rgrng amrlx nzatrkatī-zlwzlr nigr.  
X lr mrkzbleng kcng tzmnc-aepztrpqng bagr  
nzyrpalelvzlr ninge, king nem.
- 42 Murde ngi-batrpzme nzxplrkr ncblo ngr vea  
nedrng.  
X mzli ka sc tzbilvzpelr.
- 43 Amyatībzme nīpna scngeng mz nzrpna-krngē,  
X rlr-ngrbzme nzaovxio-krdr nigr.
- 44 Odatīpeq tron nyzngē,  
Mz nzkatxpx-krbzme zmatq ngr nzngini-  
krngē king.
- 45 Amyatībzme drtqngē mz mz leplz.  
X ngi-batrpē' nzngini-ani-krngē lrtzlvz.

### *Nzkrka'ngr*

- 46 Yawe, bzkq mnc-rlrume bagr.  
X bzkq apqtīpeq nigr mz nzngya-zlwzkr  
drtwrm.
- 47 A' na-aoti drtwrm nzmrbcnekr nzlu-krgr nigr  
leplz  
Mz nzmnc-krgr mz nrlc.
- 48 Trpnzngē leplz kx na-arlapx-lz bq,  
Murde nigr amrlx mnclzbzkr mz zmatq ngr  
nzbzngē.
- 49 Kxetu, opxm kx trangidatīpewq natqm kc  
tqpībzme mz Devet,

Murde trxngipepwezku nzaodu-zvz-krm kc  
bqnc.

<sup>50</sup> Bzkg mrbrtr mz drtwrm nzobqszokr leplz  
ninge, kxnzawz nem,

Murde kxnmnc-mrbr lcng sc tzbilvztipelr  
ninge.

<sup>51</sup> Yawe, enqmi rmqng nznelvztilr ninge, king kc  
tqmcpxq,

Mz nzxtrnga-krdr ninge.

*Nabz Kx Yrkrpxngr Buk Kratq*

<sup>52</sup> Na-armyalzku Yawe, kc tqngi Kxetu rgu.

Tqvzpe, tqvzpe. Eu. Na-armyalzku Yawe.

## **Buk Krapwx**

*Sam 90—106*

# **Sam Kranzpnu-rpwxmz (90)**

*Nzmrbcckr Nzluqr Leplz*

Nabz ne Mosis, ncblo ne Gct.

*Kxrpalz Kc Tqmnc-alo*

<sup>1</sup> Kxetu, yzutr pnz mzli kc, krlzmle mzbq ka  
Nzngini-krm me rlakitrkr.

<sup>2</sup> Mzli kc trwzka-ngrn nrlc x newz ngrdeng,  
mncpe-kaiq.

Murde nim Gct, x nzmnc-krm la tqyc tqyc.

<sup>3</sup> Rprime bagr kx, “Yzlu-mouamu,”

X mz nzbz-krgr yzlu-moukr mz drtc' kc tqwz-  
ngrn nigr.

<sup>4</sup> Mz drtwrgr, yiz kx siu mz nrlc ngi mzli kxboi,  
a' mz drtwrm mzli mrbcnepwz,

Apunede zbq kx esz' kx yrkrpxpe.

<sup>5-6</sup> Mz nzmiltxo-krm nigr rblx nzrlolvzng,

Apunede nzrmwiblengr kc tqmrbtrtr ani mz drtwr.

X nzmnc-krgr mrbcne apunekr nabr kx yru mz nourla x nrpqdr mztr luli.

A' kx krlzbzle milzpq sc tzblopeng x tzta-tiopeng murde nzpqr nzulr nepi.

*Nzmrbcnekr Nzlungr Mz Nrlc Ka*

<sup>7</sup> Da kc tqwai nzodati-krm nigr

Mz nzpqr zngya ngr drtwrm.

<sup>8</sup> Murde zyzlr ngrm pnamilxtile alwx rgrng

Kcng tqyrlq-kapqrng.

<sup>9</sup> X zngya ngr drtwrm amrbctrple nzlu-krgr.

X mz nzbz-ani-krgr apukr zycmini kx esz'.

<sup>10</sup> Nzmnc-krgr krlz-tpwzle yiz kxnpnu-rlimz (70),

A' nzm nkrdrtrgr kx tqxplrle krlzbzkr yiz kxnpnu-rtqmz (80).

Yiz lcng tqyctrngr nzwz-katongr x nzetqr drtq, Nzyrkrpx-aning x sc tqbzpekr.

<sup>11</sup> Nzmu namckr nzxplrkr nzngyatikr drtwrm alwx

Nzamrlue-krgr nim naetunepx kz mz nabzgr.

<sup>12</sup> Okatrp nigr mz nzkrz-krgr drtwr ngr nzmrbcnekr nzlu-krgr,

Murde nzmnc-krgr mz nrlc navz-nqblqle nzyrplapx-krm.

*Yawe, Aelwa-mou-ngrm Zmrlz Ngrm*

<sup>13</sup> Yawe, bzkq ngyati-alo drtwrm nigr, kxanzawz nemqng,

A' tekqtr drtwrm x nayc mz drtwrm nigr.

<sup>14</sup> Namc-zvzkr nzaodu-krm nigr mz nourla kang kqlu,

Murde navz zvz nzangrlvz-krgr nim mz  
nzabrtzng.

15 Kxmule-esz' yiz kqlu avz-ngrbzme drtwrgr mz  
nzxpu-krgr mzli kc,

A' tekqtrpz yiz lcng mz nzaelalz-krme  
drtwrgr mzli ka.

16 X aelwa-mou-ngrm bagr rkx kcng tzkctipxng  
mz zmatq ngrm,

Murde doa negrng namc-kzlr nzmyalz-krm.

17 Gct, Kxetu rgr, okatrp nigr mz zmrlz ngrm.

Murde nra nzvz-krgr nayc-zvzbz.

## **Sam Kranzpnu-rpwxmz-nrade-esz' (91)**

*Doa Kx Mnc-xglele Yawe*

*Lrpalvc Kx Rlakitrq*

1 Mz nzmnc-xgle-krm Yawe kc tqmyalz-esz'ngr  
Sa natubz mz nibrm.

2 X narpibzme mz Gct kc tqrninr kx, "Nim Gct  
rnge kc tqabrkitrx drtwrnge,

Mz nzapu-krme bange lrpalvc kx rlakitrx."

3 Murde sa na-arlapxle nim mz nzatrkangr kx yc  
kapq,

X mz nzrpibqtingr.

4 Sa na-acive-zpwxle nim,

Na-apule kio kc tqwxbulvzole neideng.

X sa na-angidatibzle natqdeng

Mz nzapu-krbzle bam temz ngr lomrm kc  
tqyrputrngr nipna.

*Bzkq Mwxlrq*

- 5-6 Bzkq mwxlrq mz nrckxbq x nrckxngrlx,  
Mz nzmwxlrtri-krm drka', ncblo kxayo, x  
zyagox kxnabzng.  
7-8 Murde kxmule-esz' siu ngr leplz nzbz-  
aepztrpzng bam,  
Mzli kc Gct na-ayrplapx-ngrde kxdrka'-  
ngrng,  
X mcq mz mzpq nzbz-krdr,  
A' trtxpnzng nzatrkatikrdr nim.  
9 Murde mz nzrpi-krbzme mz Yawe kx nide me  
rlakitrq,  
X mz nzmnc-xgle-krm nide kc tqmyalz,  
10 Trpnzng doa x da kx na-atrkale nim,  
X trpnzng kz zyagox kx navztrpq ma nyzm.

*Yawe Aclve-zpwxle Nim*

- 11 Murde pipebz Yawe mz enjrl nedeng nztu-  
krbzlr mz nibrm,  
X nzaclve-zpwx-krdr nim drlvekeng vzkiq.  
12 Naglqlr nim mz mqdr,  
Murde nanycm ma tqtcprtr mz rplz. ☆  
13 Mz nzmcti-krm ningidoe kc bqnc, sa na-  
aovxioq nide.  
Kxmule-esz' nide drka' kxmatq, a' sa narn-  
zlvzoq nide.

*Yawe Ycmnebzle Bam*

- 14 Murde Yawe Gct rpile kx, "Sa na-arlapxx doa  
kx mrlztile ninge,  
X sa na-aclvex nide mz nzmnc-xgle-krde  
ninge.  
15 Mz nzkqle-krde ninge, sa na-ayzlubo natqde.

---

☆ **Sam Kranzpnu-rpwxmz-nrade-esz' (91):12** Matiu 4:6; Luk 4:10-11

Kxmule-esz' da kx prtz, a' sa namnc-aepztrpo  
bade,  
X sa nakatpxpx nide mz nzkxpu-krdeng,  
X sa na-armyalzx nide.  
16 X doa lc sa namcle nzarlapx-krnge nide,  
X nakabo bade nzlungr kxboi kx na-abrtz-  
ngrde.”

## **Sam Kranzpnu-rpwxmz-nrade-li (92)**

*Da Kx Mrlzvxitxm Bange*  
Nabz ngr Sabat, z bqkxnamati.

*Mrlzvxitxm Bange Nzangio-krnge Nim*  
1-3 Yawe myatxlz-esz'ngrn.  
X mrlzvxitxm bange nzawi-krbo bam  
X nzglqlz-krnge nim,  
Mz nzayrningr gita x ukzlele,  
Mzli kznike angrlvz-ngrne nivz lrm mz nourla,  
X nzyrlq-angidr-krm natqmqng mz milzpq.  
4 Murde aelalz-ngrme drtwrnga da kxetuting  
kcng tqwz-ngrn.  
X nangrbo mz nzabrtzngr mz da lcng tqaleq.

*Murde matq-esz'ngrn*  
5 Yawe, nzwz-krmqng matq-esz'ngr,  
X nqm q nr drtwrm vzo zlwz la.  
6 Kxnzglqpx-lzbqng nzngqngung  
X nardr mqngi mz nztatrkr nzalvztr-krmqng  
mz nardr. ☆

7 Leplz kxdrka'-ngrng nzetu-krdr  
Nzapulr nabztqkr betepu kc tqwou mzli kx  
mrbcnepwz.

X da kxtrka kcng tzalelr nradr trnayc-zvzu,  
A' nzodati-krdr tqvzpe tqvzpe.

8 Krlc tqmu-ngrde lc,  
Murde nim kx rmyalz zvz.

9 Yawe, obq ena! Murde enqmi rmqng sa nabzng  
Mz nzaovxio-krm kxdrka'-ngrng amrlx.

### *Apux Nounc Kc Tqpa Zvz*

10 A' ninge kx xplr zlwz,  
Mz nzrka-krme bange zmatq ngrm.

11 Mcpex nzaovxio-krm kxnmnc-kapqng mz  
nznibq-krdr ninge.  
X xlrpex nzyrnikr kxdrka'-ngrng lcng mz  
nzaetq-ngrbz drtqdr.

12-13 Leplz kxntubqng kcng tztung ma nyz Yawe,  
X nzyrlwr-lxblrng mz makoa nyzde nzapulr  
nounc kxetung.

X nzmnc-zpwxng x nzxplrng  
Murde dzbrdr nzvzong mz drtc' kc tqngi  
natqde.

14 X kxmule-esz' nznginipedr lrtzlvz,  
A' sa navz zvz nzvz-nqblq-krdr me pnz  
drtwrde,

X nradr nayc-zvzbz,  
Mz nzapu-krdr nounc kc tqpa zvz.

15 Krlc aelwapx-ngrde nzmrlzkr Yawe,  
X nztubq-krde mz nzngini-krde butqbr kc  
tqrlakitr.

## **Sam Kranzpnu-rpwxmz-nrade-tq (93)**

*King Kc Tqmyatxlz-esz'ngr*

- <sup>1</sup> Yawe, nim King kc tqmyatxlz-esz'ngr, x rngiscm zmatq.  
Wz-ngrn nrlc x tu-amqngio me yc-ngrde x trycnglrur.
- <sup>2</sup> Nzmc-krm tqyc tqyc.  
X nznigini-krm King yc pnz kai, x sc tqwz-ate-ngrn dalr nrlc ka.
- <sup>3</sup> Yawe, srkau ngr prla, nzalxlvrti-ebir-ngrdr da.  
X natq nrc ngrde aycnglrle nrlc, mz zmatq kx xplr.
- <sup>4</sup> A' nzmyalz-krm myaszpxle srkau.  
X zmatq ngrm myaszpxle nzmatqkr natq nrc, murde nim kc tqmnctxlz tqmatq-esz'ngrn.
- <sup>5</sup> Yawe, Loukxtr scmqng tqvzpe, tqvzpe.  
X Mangr-nzangiongr nim nztr-zlwz-krde tqyc, tqyc.

## **Sam Kranzpnu-rpwxmz- nrade-pwx (94)**

*Gct Sa Na-ayrplapxle Kxdrka'-ngrng*

*Yawe, Ayrplapx Kxdrka'-ngrng!*

- <sup>1</sup> Yawe, nim Gct kc tqayzlubz mz leplz kxnzvvz-rbrng da kxnzalelr.  
Aelwapxngr zmatq ngrm.
- <sup>2</sup> Nim kx na-ayzlubz da mz lr nrlc.



Ayrplapx kxznqlqlz-lzbqng navz-nqblqle  
nike nzalelrng.

<sup>3</sup> Yawe, bzkq rlr-ngrbzme mz kxdrka'-ngrng  
Nzabrtz-krdr mz da kxtrka kcng tzalelr.

<sup>4</sup> Nzpivxityl da kxtubq,  
X nzbilvzlr nzale-krdr alwx.

<sup>5</sup> Nzatrkatyl nigr, leplz nemqng,  
Mz nzaetqti-krbzlr drtqgr.

<sup>6</sup> Kxnetung nznibqtilr olvz kxznabzong, x doa  
kxznzbzszng,  
X lr mrkzbleng kx mnckrng badr.

<sup>7</sup> Nzrpilr kx, "Trtxpnzngr nzmckr Yawe nigu.  
X trycneu mz drtwr Gct rdr da lcong  
tqaletikung."

### *Yawe Obqplxle Nzaokr Drtwr Leplz*

<sup>8</sup> A' nimu kx nardr mqngi, nalalztqamamu bange.  
?Myx mzli kx nayrplapx-krlzu-rnamu?

<sup>9</sup> ?Mz drtwrmu rpianu kx Gct kc tqwz-ngrde  
nradrtqgu x mzku,  
Nradrtqde ngq x mzte mwi?

<sup>10</sup> X sc tqayrplapxpele lr mrkzbleng.  
?Myx kxmule, trtxpnzngr nzayrplapx-kz-  
krde nimu?

X alvztrle leplz amrlx.  
?Mz drtwrmu trpnzngr da kx krlzle?

<sup>11</sup> Yawe obqplxle nzaokr drtwr leplz,  
X krlzle kx drtwr kx nzyrlqlr mane. ✨

### *Mrlz Nzpnanatikr Yawe Leplz Nedeng*

<sup>12</sup> Yawe, namrlzbz mz krkcng tqpnanatqng,  
Mz nzalvztr-krm nidr mz loukxtr scm.

- 13 X trnarlrpx-ngrnqu nzxpu-krdr, a' amnc-  
zpwxq nidr,  
Vz vz mzli kx ayrkro-ngrn kxdrka'-ngrng mz  
gq.
- 14 Yawe, trpctxpx-ngrnqu leplz nemqng,  
X tr-rlasz-ngrnqu nigr kcng tqmcpqx.
- 15 Mzli kc navzm, nzaclvekr kxnzrmailng sa  
natubq,  
X krkcng nabzdr tqlqngi sc tzabrtz-ateng.
- 16 Yawe, nim txpwz kx tum mz nibrnge,  
X nim kztenge mz nzarlax-krbzme ninge  
mz kxdrka'-ngrng.

*Yawe Tu-zvzbzle Mz Nibr Kxnztubqng*

- 17 Nzmu trnaokatrwwq ninge,  
Mzli trnaboiu x ninge kc tqbzpex.
- 18 A' mzli kc tqkqle-ngrne nim mz nzxpu-krnge,  
Lolvz-amqngiq ninge mz nivz lrm.
- 19 X mzli kc tqtalvzongr drtwrnge,  
Zvz amqrpe' drtwrnge x abrtz-moux.
- 20 Px-ngrn nzngi-te-krmu badr kxnztung  
kxdrka'-ngrng  
Mz nznzlvzo-krdr loukxtr scm.
- 21 Murde nzyrlwrpx-lxblr-ngdrdr mz nzrpwa'-  
krdr kxnztubqng,  
X nzaprc-krdr kxnzmrlzng mz nznribqng.
- 22 A' Yawe, Gct rnge, nide lrpalc nyznge,  
X butqbr kc tqrlakitrx.
- 23 Yawe, Gct rgr, sa naodatile nidr mz nqm q krdr  
kc tqtrka,  
Mz nzrtxlvlz-krdr alwx ngrdrng amrlx.

## **Sam Kranzpnu-rpwxmz-nrade-nzlvqn (95)**

*Namnclzbzku Mz Yawe, King Kc Tqngi Kxrpalz*

*Nangrbzku Mz Yawe*

- <sup>1</sup> Nangrbzku mz Yawe mz nzabrtzngr.  
Murde nide butqbr kc tqrlakitrku.
- <sup>2</sup> Na-awibzku bade  
Mz nzngr-kato-krbzku bade mz nabz kxyr-  
lvi!
- <sup>3</sup> Murde Yawe nide Gct kc tqmyalz-esz'ngr,  
X King kc tqmyaszlze kxnmncng mzllxl  
amrlx.
- <sup>4</sup> Me boongr yc mz mqde.  
X nyz-kzde newz kxmyalzng.
- <sup>5</sup> Prla x drtc' nyzdeng  
Murde wz-ngrde mz nzngini-krde Kxrpalz.
- <sup>6</sup> Na-angioku Yawe kc tqwz-ngrde nigu  
Mz nzyrngzlvzo-krgu nide.
- <sup>7</sup> Murde nide Gct rgu, x nigu leplz nedeng,  
Apuku sip kx acveleng.

*Naxlrku Natqde*

- X naxlramu natqde mzbq ka,  
Mz nzrpi-krbzle bamu kx,
- <sup>8-9</sup> “Bzkq nabzmu mqngipe, da kc tzwailr melr-  
mqmung.  
Murde kxmule-esz' nzmz-zvzlr nzrkati-krbo  
da kxmrlzting badr,  
Mz nzmnc-krdr mrkc lzke, a' otablkr badr mrkc  
Meriba,  
X nzatalzlr ninge mrkc Masa, mz nzxpqbrlr-  
krdr ninge.

- 10 Mz yiz lcng nzpnu-pwx ngyati zvz ngr drtwrnge nidr.  
Murde nidr leplz kx nzvz-rbrng mz nabzdr x trnzvz-nqblqlru nqm q kringeng.
- 11 X mz nzangya-krmlr drtwrnge, sc tqesalzpep kx,  
Trtxpnzng nprtr-krdr mz nzmnc-zpwxngr kc nakabo badr.” ✧

## **Sam Kranzpnu-rpwxmz-nrade-esz'mz (96)**

*Naglqlzku Yawe, King Kc Tqtubq*

*Takitrde Nzrglqlzng*

- 1 Nigu lr nrlc amrlx  
Nangr-ngrbzku mz Yawe nabz kxmrna!
- 2 Na-angrlvzku nide  
Mz nzyapwxtipx-krng kx arlapxle nigu.
- 3 Napipxbzku mz leplz amrlx  
Da kxmatq x da kxmyapxbz kcng tqaletileng.
- 4 Takitrde nzrglqlzng Yawe kc tqmyalz-esz'ng,  
Murde nzmrlue-krde namyaszlze kxnm-ncng mzlilxlr amrlx.
- 5 Lr mrkzbleng nzangio-tpwzlr mqngr da kxn-zlz,  
A' Yawe tpxwz kx rwzng bongavz x nrlc atwrnrng.
- 6 Mz nzmncpx-krm Yawe Mangr-nzangiongr,  
Xngibzku zmrlue, zyzlr, zmatq x zluli rdeng.

*Lr Nrlc Naglqlzlr Yawe*

---

✧ **Sam Kranzpnu-rpwxmz-nrade-nzlvqn (95):11** Hibu 3:7-11, 15; 4:3, 5, 7

- 7-8 Napibzku mz lr mrkzbleng kx naglqlz-kzlr nide  
Mz zmatq, zluli, x zmrlue lcnq.  
Murde takitrde nzale-krqu da lcnq,  
Mz nzrtwz-krqu da bade mz makoa nyzde.
- 9 Na-angioku Yawe murde tr-esz'ngr.  
Na-amrlueku nide x narnrctrpzku bade.
- 10 Eu, napipxbzku mz neidung amrlx kx Yawe nide King r nrlic, x atu-amqngile nrlic mz trnzyngrrl-krdeu.  
X sa na-acivele lr nrlic amrlx mz nzrsakrl-rngr.

*Nzactive-krde Tubq*

- 11 Nimu bongavz x drtc' naelalvzamu nide!  
X nim prla x dalrmqng amrlx drtwrmu naelalzm!
- 12 Nimu nardzng x dalrmqng amrlx na-abrtz-kzamu!  
Nimu nounc ngr peto amrlx na-angrlvz-kzamu Yawe.
- 13 Murde sa tqvzm mz nzactive-krde lr nrlic.  
X nzayzlu-krbzle da mz leplz amrlx sa namrlz x tubq.

**Sam Kranzpnu-rpwxmz-nrade-rlimz (97)**

*Na-abrtzlvzku Yawe, King Kc Tqmyatxlz-esz'ngr*

*Zmatq Ngrde*

- 1 Mrlz lr nrlic amrlx nzabrtz-krdr murde Yawe nide King kc tqmyatxlz-esz'ngr.  
X lr trmctu naelalz-ngrm drtwrdr kz nide.

- <sup>2</sup> Zbo kxve x nzlo nzngrlelvzlr nide.  
X nzaclve-krde leplz mrlz x tubq.
- <sup>3</sup> Nyr rtwayznepx kai mz nzvz-krde,  
Nyr kx nangcng enqmi kcng tztulvz-ngrdr  
nzti rde.
- <sup>4</sup> Bzlrpc ngrde kx pcpxle pnamilxtiler nrlc,  
X drtc' ycngrlrlzm.
- <sup>5</sup> Yawe nide Kxetu r nrlc tulvzo.  
X mz nzmc-krdr nide newzng nzwxonng nza-  
puls nzwxonng gq.
- <sup>6</sup> Lr Heven amrlx nzpplxlr nztubq-esz'ngr-krde,  
X lr nrlc amrlx nzmclr nzmyatxlz-zlvz-krde.

*Myaszpxle Kxnmncng Mzllxl*

- <sup>7</sup> Krcng amrlx tzangioler kx trngiu Yawe Gct  
angidr, drtqdr la namya zlvz.  
X kxnmncng mzllxl amrlx nzmu na-  
angioler nide. ☆
- <sup>8</sup> Yawe Gct rgr, nigr lr Jerusalem x lr mztea amrlx  
ngr nqvi lr Judz abrtz-zlvz-ngrgr nim  
Nzayrplapx-krm enqmi rgrng.
- <sup>9</sup> Murde lr nrlc amrlx nzmnczbzng mz zmatq  
ngrm,  
X nzmyalz-zlvz-krm myaszpxle kxnmncng  
mzllxl amrlx.

*Namnczbzku Bade*

- <sup>10</sup> Nigu kcng tzmrlztilr Yawe napxtpx-ngrgu da  
kxtrka.  
Murde tu-zvzbz mz nibr kxntubqng mz  
nzarlappx-krbzle nidr mz mq kxdrka'-  
ngrng.
- <sup>11</sup> Yawe amrlzle kxntubqng, kx nabzdr lqngi.

- Murde na-abrtzlvzlr nzngini-krde Gct kxtr.  
12 Delc, nigu kcng tztubqng na-abrtzlvzku Yawe,  
Mz nzawi-krbzku bade.

## **Sam Kranzpnu-rpwxmz-nrade-rtqmz (98)**

*Na-angrlvzku Yawe, King Kc Tqmatq-esz'ngr*

*Na-angrlvzku Yawe*

- 1 Nangr-ngrbzku mz Yawe nabz kxmrna mz  
nzale-krde da kcng tqmyapxbzng.  
Murde aovxiole enqmi rdeng mz nzetukr  
zmatq ngrde.  
2 X sc tqaelwapxpe-ngrbzle nztubq-krde mz lr  
mrkzbleng amrlx,  
Mz nzarlapx-krbzle leplz nedeng mz mq  
enqmi rdrng.  
3 X aodule nigu lr Israel mz nzatutr-zvz-krde  
natqde.  
Murde leplz mz nrlc tulvzo nakrlzlr kx  
arlapxle nigu.

*Naglqpxku Nide*

- 4 Nigu leplz amrlx mz nrlc na-angrlvzku Yawe  
Mz nabz kx yrlvi.  
5 Naglqpxku nide  
Mz nzayrni-krbzku bade gita,  
6 X mz nzvxu-krbzku trpu.  
Na-angrlvzku Yawe, kc tqngi King!

*Nangrbzku Bade*

- 7 Nimu prla x drtc' x dalrmung amrlx  
Drtwrmu naelalzm!

<sup>8</sup> Nimu lue na-amqmq-lzbqamu mz nztalio-krmu  
mz nabzde.

X nimu newz na-angrlvzamu Yawe!

<sup>9</sup> Nigu amrlx nangrbzku bade.

Murde sa tqvzm mz nzacive-krde lr nrlc,

X nzayzlu-krbzle da mz leplz sa natubq x  
narsakrlrngr.

## **Sam Kranzpnu-rpwxmz- nrade-rpwxmz (99)**

*Na-angioku Yawe, King Kc Tqtr-esz'ngr*

*Naglqlzku Drtqde*

<sup>1</sup> Yawe nide King, kx myaszlzle enjrl kcnq tz-  
matqng tztu-ngalelvzlr tron nyzde.

X leplz amrlx mz nrlc tulvzo narnrcti-lzbqtr-  
ngrbzlr bade.

<sup>2</sup> Yawe matq-esz'ngr Jerusalem.

X nzmyalz-esz'ngr-krde myaszpxle lr  
mrkzbleng amrlx.

<sup>3</sup> Leplz amrlx naglqlzlr drtqde,

**Murde nide kc tqtr-esz'ngr.**

*Naglqlzku Gct Rgu*

<sup>4</sup> King kc tqrninr, mrlz-zvzbz bam da kxmrlz.

Delc nzacive-zvz-krm nigr tqtubq-zvz-ngrde  
x rsakrlrngr.

<sup>5</sup> Nayrngzobzku mz nanyc Yawe,

Mrkc tqwxbu-ngrde mz tron nyzde.

Na-angioku x naglqlzku Gct rgu,

**Murde nide kc tqtr-esz'ngr.**

*Naglqlzku Yawe*



- 6 Mosis x Eron nidr pris neng Yawe, x profet  
Samwel krka'bz bade.  
Nzyrnitrpzng bade x ayzlubzle natqdr.
- 7 Ycmnepxm badr mz nabz dcbz,  
X nzvz-nqblqlr natqde x lou scdeng amrlx.
- 8 Yawe, nim Gct rgr,  
X ayzlume natqgr, nigr leplz nemqng.  
Kxmule-esz' ayrplapx-kaiq nigr mz alwx ngr-  
grng,  
A' sc tqaelwapxpe-ngrn kx nim Gct kx krlzle  
nzipq-krde leplz.
- 9 Naglqlzku Yawe, Gct rgu, mz nzangio-krngu nide  
mz newz kxtr nyzde,  
**Murde nide kc tqtr-esz'ngr.**

## Sam Kratrtqki-esz' (100)

*Na-awi-ngrbzku Mz Yawe Nzaodu-krde Nigu*

*Na-angioku Nide*

- 1 Nigu leplz amrlx mz nrlc  
Na-angrlvzku Yawe!
- 2 Na-angioku x naglqpxku nide  
Mz nzelalz-krm drtwrgu!
- 3 Nalxngitiku kx Yawe nide Gct, x nigu leplz  
nedeng murde wz-ngrde nigu.  
X apuku sip ngr nardzng nyzde.

*Na-awibzku Bade*

- 4 Mz nzvztr-krngu mz naonrx x makoa ngr Mangr-  
nzangiong Yawe,  
Navz zvz nzawi-krbzku bade x nzangio-kz-  
krngu nide.
- 5 Murde Yawe mrlz-esz'ngr.

X aodule nigu mz nzatutr-zvz-krde natqde.

## **Sam Kratrtqki-esz'-nrade-esz' (101)**

### *Nztubqkr King R Israel*

Nabz ne Devet.

- <sup>1</sup> Yawe, nangr-ngrbo bam  
Nabz ngr da kxtubq x nzangidatingr.
- <sup>2</sup> X namnc-nqblqx nztubqkr nqm q krm mz  
nzokatr-krm ninge.  
X nabznge nalqngi zvz mz nzmnc-krgr badr  
lr ma nyznge.
- <sup>3</sup> Tr-rlr-ngrpwc'u nzprtr-krm da kxtrka brma.  
X pxtpx-ngrne krkcng tzesablqtilr nim.
- <sup>4</sup> Delc, nartctx-ngrne nqm q kr kxdrka'-ngrng,  
X nayrlqpx-lzbqng mz da kvz-rbr.
- <sup>5</sup> Sa narpwa'-ngrbo krkcng tzipikiti-awalr  
kxnmnc-aepztrpzng badr.  
X kxnglqpx-lzbqng trmrlzu mz nzobq-  
krnge.
- <sup>6</sup> A' kxnglxngiti-zpwxlr nim nanginidr kztengeng,  
X kx nabzdr lqngi sa nawztrpqng bange.
- <sup>7</sup> A' krkcng tzesabrng x tzipokia-zvzng,  
Trtxpnzng nzmnc-trkrmlr bange.
- <sup>8</sup> Murde mz zbq kang kqlu sa nalolvztix kxdrka'-  
ngrng  
X namaszlrpx-ngrne nidr mz mzteadau  
nyzm.

## Sam Kratrtqki-esz'-nrade-li (102)

*Apux Zsikapu Kc Tqmrbr Ani*

*Nzmnc-krnge Esz'-krnge*

- 1 Yawe, lalztqm mz nzkrka'-krbo bam.  
X xlrn nzyrni-krnge mz nzokatr-krm.
- 2 Mzli ka tqprtzngrm nzxpungr bange,  
Bzkq mnc-rlrume bange.  
A' ayzlu-anim natqng  
Mz nzkqle-krnge nim.
- 3 Nrkrdrdqng nzpqrde apule nyr.  
X mzli trnaboiu ninge kc tqbzpex, tqapupex  
zsikapu kc tqmrbr ani.
- 4 Nabzng talvzo apupele nabr kxglr,  
X trmupewxu.
- 5 Bztipenge nzyrningr mz nzetqkr drdqng.  
X nginitxpenge nrvr-nrbalq.
- 6 Apux nc kx nzrtclzng mepz, x sc tqtaligxpe,  
Mz nzmnc-krnge esz'-krnge.
- 7 Mnzx, a' trkrlzpewxu nzmwingr.  
Apux ncblo kx trpnzng kxnginide kx naok-  
latile nide.

*Apux Brmrda*

- 8 Enqmi rngeng nzatrkatizvzlr ninge mz  
nzycmne-krdr.  
Nzpitrpzlr drdqng mz nzrpibqti-krdr leplz.
- 9 Yawe, nzvzkr drtwrnga dekc tqkrlcng nelzng  
tqngi dakxnzng nange,  
X drle mzke' dekc tqngi lue pqng.
- 10 Murde ngyati zlwz drtwrm ninge.  
X apux brmrda kc tqrtcxpe-ngn.

11 Nzmnc-krnge apule zmyo ngr milzpq  
Kc tqmrbr mz nzyrkrpxkr ngrlx.

*A' Nzngini-krm King Tqyc Tqyc*

12 Kxmule-esz', a' nzngini-krm King tqyc tqyc.  
Nrpr ngr ncblo amrlx sa nadcpz zvx mz  
drtwrdr nim.

13 Murde sa nayc mz drtwrm Jerusalem.  
X mzli ka mzli r nzokatrpe-krmle.

14 Kxmule-esz' enqmi rm nzodatipelr mztea lc, x  
trkape,  
A' sc tqsutibe drtwrgr x tqvztibe drtwrgr.

15 Yawe, lr mrkzbleng amrlx sa na-amrluelr  
drtqm.  
X king amrlx mz nrlc sa na-amatqlr nim.

16 Murde mzli kc na-aelwapx-ngrn nzluligr  
zmatq ngrm,  
Mz nzwz-mou-krm Jerusalem,

17 Drtwr ngrde kx ayzlu-ngrme nzkrka'-krgr,  
Nigr kcng trpnzngr scgr da.

*Krkcng Mztr Trnzmcka*

18 Nayroku da kcng tqaleting Yawe,  
Murde krkcng mztr trnzmcka naglqpx-kzlr  
nide.

19 Kxnamu nzyr-krngule sele: Yawe mnc Heven,  
Mz ma nyzde kc tqtr tqmyalz, x sc tqobqom  
mz nrlc.

20 Xlrle nzyrni-krngu mz presin,  
X aopxbzle drtqgu, nigu kcng tzpipx kx  
nanibqng.

21-22 X xlrpe-kzle nzngkrkr leplz ngr mrkcng amrlx  
Mzli kc tzyrlwr-lxblr-ngrdr Jerusalem,  
Mz nzangio-krdr nide,

X nzglqpx-krdr drtqde.

*Trtxpnzngr Nzrtekqtrngr Nim*

- <sup>23</sup> Yawe, ngi-batrpe' nzyangrnnga-krnge,  
Mz nzamrbctr-krme nzlu-krnge, mzli ka  
tqngi-oblabengr.
- <sup>24</sup> A' rpibo bam kx, "Gct rnge, nzlu-krm tqyc tqyc.  
Suti drtwrnge nakrlz-zpwxbo nzngi-lrtzlvz-  
krnge, x ninge kc tqbz-atex.
- <sup>25</sup> Mzli kc mz noude wz-ngrn nrlc,  
Bongavz x dalrdeng amrlx.
- <sup>26</sup> Nrlc x bongavz sa nayrkrpxng kalr.  
A' nim txpwz kx namnctx alo.  
Mzli trnaboiau x sc tztrkapeng, tzapupelr lrpz  
kxblzlongr,  
Kx nzrtctxngr x nztekqtr zvz mz kxmrna. ✧
- <sup>27</sup> A' trtxpnzngr nzrtekqtrngr nim.  
X trtxpnzngr nzbz-krm mz kzdq mzli. ✧
- <sup>28</sup> Delc doa negrng sa namnc-zpwxng mz nrlc,  
Murde sa na-aclve-angidrq nidr."

## Sam Kratrtqki-esz'-nrade-tq (103)

*Nivz Lrde Tqyc Tqyc*

*Aodu-zvzle Ninge*

- <sup>1</sup> **Naglqpxx Yawe mz nabznge atwrnrngr!**  
Naglqpx-zvzx drtqde kxtr.
- <sup>2</sup> Na-aoti zvz drtwrnge nivz lrde,

---

✧ **Sam Kratrtqki-esz'-nrade-li (102):26** Matiu 24:35; 2 Pita 3:10; Nzaelwapxng 20:11 ✧ **Sam Kratrtqki-esz'-nrade-li (102):27** Hibu 1:10-12; Jemes 1:17

- X da kxmrlz kcng tqalemle bange.  
3 Murde katxpxbzle alwx rngeng amrlx.  
X amrlzle ninge mz zyagox amrlx.  
4 Arlapxle ninge mz nzbzngr.  
Aodu-zvzle ninge.  
5 Okatrlle ninge mz da kxmrlz  
Murde nzlu-krnge naboi x nrkrdrqtqngge nax-  
plr, mz nzapu-krnge lr.

*Ipqpxle Alwx Rgung*

- 6 Yawe okatrlle kxnzobqszong murde ale-zvzle da  
kxtubq  
Mzli kc tqayzlu-ngrbzle da mz leplz.  
7 Aelwa-ngrbzle me pnz drtwrde mz Mosis,  
X zmatq ngrde mz lr Israel.  
8 Yawe mrlz-esz'ngr x aodu-zvzle nigu.  
Drtwrde trngya-aniu, a' okatr-zvzle nigu.  
9 Trkrlzleu nzaboitr-krmle zngya ngr drtwrde  
bagu,  
A' ani txpwz nzipq-mou-krde nigu.  
10 Kxmule-esz' takitrde nzayrlapx-zlwz-krde  
nigu,  
A' ycngdrtwrde nigu, x trayzlupleu bagu mz  
nzvz-nqblq-krde nzvz-rbr-krnung.  
11 Murde sc tqaodu-zvzpele nigu kcng tzamrluelr  
nide,  
Murde nzetu-krm nivz lrde bagu myaszpxle  
bongavz. ✧  
12 X mz nzipqpx-krbzle alwx rgung,  
Apule kx rtctx-ngrbzle rlr, me trpengr  
nzmrc-moungr.

---

✧ **Sam Kratrtqki-esz'-nrade-tq (103):11** Sam 36:5; 57:10; 71:19;  
108:4

- 13 X Yawe amqtrple drtwrgu,  
Da kc tqwai trte nzamqtr-krbzle drtwr doa  
nedeng.
- 14 DcpX mz drtwrde kx nigu leplz kxtrnzxp lung,  
Murde wztX-ngrpwzle nigu mz drtc'.

### *Aodu-zvzle Nigu*

- 15-16 X nzlu-krGu mrbcnepwz,  
Apule nepi kc tqprtm mz nourla, x tqxplr  
mzli kc bea.
- A' sc tqtaope mou milzpq.  
Murde mzli kc nabzng rleplz trpengr nzrmc-  
moung r nidr.
- 17-18 A' Yawe aodu-zvzle x amrlz-zvzle nigu,  
Kcng tzamrluelr nide,
- Mz nzyrlq-angidr-krGu natqde,  
X mz nzlolvz-amqngi-krGu Nzesz'tikr  
Drtwrgu badr.

### *Naglqpx-zvzku Nide*

- 19 King Yawe wxbu mz tron nyzde Heven,  
Mrkc tqaclve-ngrde nrlc atwrnrngr.
- 20 Nimu enjrl kxnzmatq kcng tzvz-nqblqlr  
natqde,  
Naglqpxamu nide!
- 21 X nimu ami ngr Heven kcng tzwztrpzng bade  
mz nzatutr-krbzmu me pnz drtwrde,  
Naglqpx-kzamu nide.
- 22 X nigu amrlx mz nrlc tulvzo naglqpx-kzku  
nide.  
**Naglqpxx Yawe mz nabzng e atwrnrngr!**

# Sam Kratrtqki-esz'-nrade-pwx (104)

*Nabz Ngr Nzrglqlzngr Kxrpalz*

*Kxrpalz*

1-3 **Yawe Kxrpalz, naglqpxx nim mz nabznge.**  
Murde nim Gct kc tqluli, tqmyalz-esz'ngr.

*Bongavz*

Nzmyalz-krm x zmatq ngrm nzngrelvzlr nim  
nzapulr lrpz kx kq-ngrn.

X zyzlr ngrm apule lrpzu scm.

Bongavz apule nqni kxetu kc tqprlxpxq.

X atuome elr nctrpou ngr ma nyzm.

Dcbz apule lika kx lvc-ngrn,

Mz nztwz-krde nim nenq kxwq.

4 Zmatq ngrm batrpzle mz enjrl nemqng nzlvc-  
ani-krdr mz nzapu-krdr nenq.

X menrpa lcng twztrpzng bam nzapu-kzlr  
bzlrpc kc tqpctipx. ☆

*Drct'*

5 Wztioq nrlc mz nou rplz kxmngi,  
Murde trpnzngr nzynglrlr-krde.

6 Mzli kc ayrnrngr, drct' mrbronz prla,  
X newz amrlx akq-atwrnr-ngrde.

7 Zbz mzli kc tqpnanati-ngrn prla sc tqpzneope,  
Mz nzxlz-krde natqm kc tqapule bzlrmei.

8 Prla pzneom mz nar-newzng, vzo krlzobzle  
nabzlwang,

Vzo mrkc tqyrlqzbzme kx nalrlz-ngrmle.



9 X yrlqzbzme bz ngr me naesakingr prla,  
Murde ma tqakq-atwrnr-mou-ngrde drtc'.

*Lue, Dakxnzng, X Ma*

10 Wz-ngrn aulz, nzaulzmqng mz nabzlwa amrlx,  
Lue lcng nzvzong x lue kxetung nzyrleng mz  
mzlr newz amrlx.

11 Animol amrlx nzrmnqng lue lcng,  
Mz nzbrlxkzkr drtwrdr.

12 Utc nzwzpe-ngrng ma nyzdr x nzng-rzvzng  
Mz nounc mz nqlvi r lue lcng.

13 Adcme tewa mz ma nyzm bongavz. Dcom mz  
newz amrlx.  
X amrlzle drtc' murde kxnzlung kcng tqwz-  
ngrn namnc-zpwxng.

14 Wz-ngrn nabr x dakxnzng nztuting mz drtc'  
Nangi nan animol x leplz.

15 Rkame waen kx na-aelalz-ngrm drtwrgr,  
X tolo kx na-qlqngr nrkrdrdqgr,  
X dakxnzng kx naxplrngr nigr.

16 Yawe, nounc nyzm kc tqpetiq  
Nzdo-zlwz-krdr vzpxm mz nzadco-krme  
tewa badr.

17 X utc kang kqlu nzmncpxng mz nounc lcng.  
X nzwzpx-ngrdr ma nyzdr elr.

18 Gout nzmncmqng mz newz,  
X animol kxnztopwzng nzmnc-kapqneng me  
rplzng.

*Mzli Kcng Tqyrlqq*

19 Yawe, wz-ngrn temz nangi noabx ngr mzli,  
X nepi noabx ngr zbzq.

20 Nim kx rwzng nzo ngr nrlckxbq,

Mzli r nzprpx-krm animol kzpeto me nzmnc-  
ngrdrng.

21 Laion nzyrni-katong mz nzrtangr-krdr  
dakxznzg

Kx nakabzme badr.

22 A' mzli kc tqprtzngrm nepi,  
Sc tzyzlupeng ma nyzdr, tzmwipeng.

23 X mz nrlc kxngrlx, leplz nzvzng mz nzale-krdr  
nzwz-krdr,  
Nzwzng vz vz krlzbzle milzpq.

### *Animol*

24 Yawe, animol kcng tqwz-ngrn kqlu-esz'ngr.  
Nrlc ka yrbulzm mz da lcng amrlx tqwz-ngrn  
mz nzyrplapx-krm.

25 Dcpwe yrlwrlz-ngrm nc kxkqlu x rblx nzrlwx-  
krgleng.

Kzdu nc lcng nzetuting x kzdu nztopwzneng.

26 Lcsu kxznkqlung nzvoneng prla.  
X nc kxbe kc tqwz-ngrn drtqde besilr ayone  
kz elr.

### *Mevalu*

27 Animol lcng nzmnc-xglelr nim,  
X rka-zvzbzme nadr dakxznzg.

28 X mz nzrka-krbzme da kxmrlz badr  
Amrlz-zvzq nidr.

29-30 Mzli kc tqrka-ngrbzme zycmini sc tzlupeng,  
Murde nim Kxrpalz.

X ngi-batr-zvzbzme nzlukr animol amrlx mz  
nrlc.

A' mzli kc tqpxtxpx-ngrn nidr, nelzdr vzdzm.

Murde mz nzrkatxpx-krbzme zycmini lc, nzbzng.  
X nzyzlu-moung mz drtc' kc tqwz-ngrn nidr.

*Zluli X Zmatq*

- 31 Nzmyalzkr Yawe navz zvz,  
X nzabrtzlvz-krde nikeng wz-ngrdeng amrlx.
- 32 Mz nzobqo-krmle, drtc' ycngrlrlzm apule  
nengq kx vzm,  
X ngi-batrpzle nzsikapukr trmami mz  
nzmaletkr-krde newzng.
- 33 Na-angrlvz-zvzx Yawe Gct rnge,  
Navz nakrlzbzle nzesakikr nzycmi-krnge.
- 34 Mrlzvxitx Yawe nzabrtzlvz-krde natqngeng mz  
nzngr-krbo bade,  
Murde nide kc tqrngi-batr-zvzm nzabrtz-  
krnge.
- 35 Mrlzvxitx nznibqti-krde kxdrka'-ngrng  
Murde nzatrkatilr nrlc kc tqwz-ngrde mz  
nzpxtpx-krdr nzglqlz-krdr nide.

**Yawe naglqpxx nim mz nabznge.**

Eu. Naglqlz-zvzkr nim.

**Sam  
Kratrtqki-esz'-nrade-nzlvqn  
(105)**

*Gct Angidati-zvzle Nzesz'tikr Drtwrdr Badr  
Lepz Nedeng, Kxmule-esz' Nzvz-rbrng*

*Nqm q Kr Gct*

- 1 **Naglqpxku Yawe,**  
Na-awibzku mz Yawe mz nzmyalz-esz'ngr-krde.  
X napipxbzku mz lr mrkzbleng da kcng  
tqaletileng.
- 2 Na-angrlvzku mz nzangio-krngu nide.

X napipxku da kxnzkc tipxng kcng tqwz-  
ngrdeng.

<sup>3</sup> Nabilvzku drtqde kxtr.

X nigu kcng tzamrluelr nide drtwrgu nae-  
lalm.

<sup>4</sup> Namnc-xgleku Yawe x nzxplr-krde.

X nasuti drtwrgu nzxngi-krbzku nzulrde.

<sup>5-6</sup> Vzpxmgu mz nqvi lr Ebraam, kxnzawz ne  
Yawe,

X nqvi lr Jekop kc tqmcpdle.

Delc nadcpd zvdz mz drtwrgu rkx kcng tqmatq  
tqaleleng,

X nztubqkr nqm q krde.

### *Nzesz'tikr Drtwrgu Badr Gct*

<sup>7</sup> Yawe nide Gct rgu.

X kapxbzle natqdeng mz leplz amrlx mz nrlc.

<sup>8</sup> Nzesz'tikr Drtwrgu badr tqyc tqyc.

X trmrbrtru mz drtwrde nzesalz-krde.

<sup>9</sup> Nzesz'tikr Drtwr lc tzyrlq-kailr mz Ebraam.

X pipx-kzpzle nzesalz-krde lc mz Aesak.

<sup>10</sup> Amqngi-mopwzle mz Jekop x doa nedeng,

Murde navz alo.

<sup>11</sup> Rpibzle badr kx, "Sa nakabo bamu drtc' kc  
Kenan

Murde nangi drtc' nyzmu."

### *Leplz Neng Gct*

<sup>12</sup> A' nqvi lr ncblo lc tqngi nyz Gct nzpipzbeng  
mzli lcde,

Mz nzngini-krdr lr mrkzbleng kx trpnzngr  
me nzmqngio-ngrdr.

<sup>13</sup> X nzayo-tpwzng

Mz nzrlasz-krdr kc mrkzble x nzvzki-mou-  
krdr mrkzble.

- 14 A' Yawe tr-rlrpx-ngrdeu nzaovxiongr nidr,  
Murde aclvele nidr mz nzlc-amq-krbzle mz  
king kxnzkqlung,  
15 Mz nzrpi-krbzle badr kx, "Bzkq atrkatibzmu  
leplz nengeng kx mcpxx.  
X bzkq aetqbzmu drtq menrpa nenge lcng."

*Drtwr Kx Yrlq Gct*

- 16 Mz nibr kzdung mzli, Yawe atwzlr-ngrmle dzbi  
mz drtc' nyz leplz nedeng,  
X katxpx-kzle dakxnzng nadr amrlx.  
17 A' atwzlr-kai-ngrde kzdq ncblo Ijpt kx nangibz  
lrpzki badr.  
Krlcde Josip, mrlx Jekop, kc tzamwalr murde  
nanginide kxnzawz-nrbalq.  
18 X mz nibrde sc tqmncpxpem mz presin,  
X nzatolva-ngrdr nide mz nqvi.  
19 Vz vz x natqde sc tqyokaetipxpele  
nzmwiblekr king r Ijpt,  
Mz nzipx-krde natq angidr kc tqkabz Yawe  
bade.  
20 Zbz king r Ijpt kc tqaclvele mrkcng kqlu,  
Aopxbzle drtq Josip mz nzkapx-krmlele mz  
presin.  
21 X sc tqyrlqpele Josip nzngini-krde kxetu elr,  
Murde na-aclvele dalr Ijpt amrlx.  
22 Zbz Josip rngisc zmatq mz nzrkapx-krbzle natq  
mz kxnzetung amrlx,  
X mz nzalvztr-krde ncblo kcng tzyrplapxng.  
23 Mz nibrde Jekop badr doa nedeng sc tzvzpeng  
Ijpt,  
Mz nzmnc-krdr elr, murde dzbi lc tqtaope mz  
drtc' nyzdr.

*Nzayrplapxkr Gct Lr Ijpt*

- 24 Nqvi lr Jekop nzmncing Ijpt trtqki r yiz, x  
Yawe batrpzle nzkqlunepx-krdr.  
X nzxplr-krdr myaszpxle lr Ijpt, enqmi  
rdrng.
- 25 Delc lr Ijpt tzngyatingr drtwrdr leplz nedeng  
kcng tzangiokr nide.  
X sc tzatratipelr nidr mz nzawz-nrbalq-  
krdr leng x sc tznibqtipe-kzpzlr doa ncblo  
nedrng mzli kc mztr tzm-cngrdr.
- 26 Delc Yawe tqatwzlr-ngrbzle Mosis kxanzawz  
nede,  
Nidr mz Eron kc tqmcpdle, murde naokatr  
leplz nedeng Ijpt.
- 27 X sc tzale-ngrdr r kx ngr Gct kxmatq kxkqlu elr,  
Mz nzngi-batr-krbzle nzwzng da kxzk-  
tipxng mz mqdr x mz natqdr.
- 28 Awx-nzlo-ngrbz Yawe mrnyzdr,  
A' natqde trnzvz-nqblqpwlru lr Ijpt.
- 29 Ngi-batrpzle nzlrtpxkr lue nyzdrng mepyr  
X nzbztingr nc nedrng.
- 30 Drtc' atwrnrngr yrbuti mz frck,  
X nznulvzpx-kzplr ma nyz king.
- 31 Yawe kapxle natqde  
X mc badr mclrla nzyrkrpx-pnz-ngrng nr-  
larnrlc nyzdr.
- 32 Atwzlr-ngrmle muli-aes apule tewa kxdc,  
X bzlrpc tqptipx zlwz mrnyzdr.
- 33 Odatile nqvi lr dakxnzng mz nrlanc nyzdr  
X plameitio-kzle nounc nyzdr amrlx.
- 34 Yawe kapxle natqde

X blzmr kionabr kx rblx nzrlwxngr  
nzlvcmqng.

35 Nzngqtilr dakxnzng kxnzpeting  
Mz nrlanc nyzdr amrlx.

36 Zbz Yawe sc tqnibqtipe-kzle doa ncblo kx  
ayrngr  
Mz ma nyz lr Ijpt amrlx.

*Nzokatrkr Gct Lr Israel*

37 Mz nibrde sc tqmailzpele lr Israel mz nzrlasz-  
krdr Ijpt, nzrtwzng silvz x gol.

X trpnzng nidr kxnzyagoxng, a' nzxplrng.

38 X lr Ijpt nzabrtzlvzlr nzrlasz-krdr nidr.

Murde nzmwxltilr da kx naprtzbx badr mz  
nzlolvz-mou-krdrleng.

39 Yawe yrlqzbzle dcbz ngrlx murde navz-nqblq  
leplz nedeng,

X mz nrlckxbq yrlq-kzpzle nyr nayzlrzbz  
badr.

40 Nzrlxbzng bade dakxnzng x atwzlo-ngrmle  
kio kxkqlu

X dakxnzng kxkqlu kx nakrlcng nelzdr.

41 Ayrlepzmle lue mz kzdq rplz kxetu,

X lue lc yrle lzke apule lue kxvo.

*Me Pnz Drtwr Gct*

42 Delc Yawe sc tqyc-zvzng mz drtwrde natqde  
kxtr

Kc tqpibzle mz kxnzawz nede, Ebraam.

43 Zbz sc tqmailzpxpele leplz nedeng kcng tqm-  
cpxle,

X nzng-zvzng x nzmaliq-zvz-kzng mz  
nzabrtz-krdr.

44 Kabzle drtc' ngr lr mrkzbleng mz leplz nedeng,

- X nztwz-kzlr nrlanc nyzdrng x da amrlx kx  
nzvzpxmqng mz nzwz-krdrng.
- 45 Murde leplz nedeng navz-nqblqlr loukxtr sc-  
deng  
X nayrlq-angidrlr natqdeng.  
**Naglpqxku Yawe.**

## **Sam Kratrtqki-esz'-nrade-esz'mz (106)**

*Gct Arlapx-zvzle Leplz Nedeng, Kxmule-esz'  
Nzvz-rbrng*

*Nzawingr*

- 1 Naglpqxku Yawe!**  
Murde aodu-zvzle nigu.  
Awi-ngrbzku bade nzmrlz-esz'ngr-krde.
- 2** Trpnzngr leplz kx rkrlz nzrpiwx-angidrngr rrx  
amrlx kcng tqwz-ngrde,  
X nzrglqlzngr amrlx trkrlzpxpwzleu  
nzmyalz-esz'ngr-krde.
- 3** Yawe, natqm rpile kx sa namrlzbx mz leplz kcng  
tzaleng da kxtubq,  
X trpnzngr da kxtrka mz nzao-krdr drtwrdr.
- 4** Nadcpxngr mz drtwrm ninge, mzli kc naokatr-  
ngrn leplz nemqng,  
X aprtr-kzpz ninge badr, mzli kc na-arlapx-  
ngrn nidr.
- 5** Murde na-axvctr-kzpo badr mz nzamnc-zpwx-  
krm nidr,  
X mz nzabrtz-krdr x nzbilvz-krdr nzngini-  
krdr leplz nemqng.



*Mrkc Ijpt*

- 6 A' axvctr-lzblq-kzpzkr mz melrmqgrng mz alwx  
ngrdrng.  
X vz-nqblq-kzkr nzvz-rbr-krdr mz da kxtrka.
- 7 Mzli kc tzmncngr melrmqgrng Ijpt,  
Trnzkrly-zpwxlr rux kcng tqaletiqng,  
X trnzaotiu drtwrdr nzwrde kcng kqlu tqaelwa-  
ngrbzme nivz lrm badr.  
X mrkc Prla Bla nznzlvzolzr nim kc tqmyalz-  
esz'ngr.

*Mrkc Prla Bla*

- 8 Kxmule-esz', a' arlapxq nidr mz nzvz-nqblq-  
krde nzesalz-krm.  
Murde na-aelwapx-ngrn nzmyapxkr zmatq  
ngrm.
- 9 Lclvzq Prla Bla x sc tqakipx-lzblqpe x noude  
pzlz-kzp.  
X sc tqmailzpeq leplz nemqng elr.
- 10 Arlapxq nidr mz nzaopx-krbzme drtqdr mz  
mq lr Ijpt,  
Enqmi rdr kcng tzpctxpx-ngrdr nidr.
- 11 A' prla yrle-etr mou x akq-pnzle enqmi rdrng,  
X trpnzngr nidr kx rlapx.
- 12 Mzli lcpe sc tzlxngiti ate leplz nemqng  
natqmqng,  
X sc tzngrepeng mz nzglqlz-krdr nim.

*Mrkc Lzke*

- 13 A' mzli trboiu sc tqmrbrtrpe mz drtwrdr  
nikeng aletiq,  
Mz nzvz-nqblq-kai-krdr me pnz drtwrdr x  
nim kc ate.
- 14 Mzli kc tzmnc-ngrdr lzke nzabzlr nim,

Mz nzrlx-krbzlr ncvr animol, murde drtwrdr  
rbxl nzesapx-krdr.

- 15 X kabzme badr da kc tzsuti drtwrdr,  
Vzmi zyagox kxtrka mz nzayrplapx-krm  
nidr.

*Kxnzrnzlvzolzr Mosis*

- 16 Mzli lcng li kzdung ncblo tznzlvzolzr Mosis,  
Ncdr Eron kc tqngi kxnzawz kxtr nem.
- 17 Zbz drtc' glqwi x lvxpx-lzbq mz nzyrtzmq-  
amrna-krde kxnzrmailz lcng,  
Datan ncdr Abiram, nidr badr lr ma nyzdr x  
kztedrng amrlx.
- 18 X atwzlr-kz-ngrpe' nyr mz kzdq ncblo x kx-  
drka'ngr kc-kzng tzvz-nqblqlr nide,  
X nzngcting amrlx ngrdr.

*Mz Nou Newz Saenae*

- 19 X mz nou Newz Saenae nzwz-ngrdr mz gol kc  
mqngr kzu.  
X sc tzangiopelr nide.
- 20 Nztekqtrlr nzangio-krdr Kxrpalz kc tqmyalz,  
tqrwzngz kzu amrlx,  
Mz nzangio-alzu-krdr mqngr kzu kc tzwz-  
ngrdr esz'-krdr. ☆
- 21-22 Trycneu mz drtwrdr nim kc tqarlapxle nidr.  
Tqrtrngzbx rlx kxmatq mrkc Ijijt,  
Tqvwz-ngrde da kcng tqmrlzvxing elr,  
X tqalele da kcng tzkctipxng mrkc Prla Bla.
- 23 Delc tqrpipe-ngrn kx naodatipeq leplz  
nemqng.  
A' Mosis kc tqmcpxq, awxobzle zngya ngr  
drtwrm, x trodatiwq nidr.

---

☆ **Sam Kratrtqki-esz'-nrade-esz'mz (106):20** Rom 1:23

*Nzpxtxpx-krdr Drtc' Kxmrlz*

- 24 A' mz nibrde nzpxtxpx-ngrdr nzprtrngr mz  
drtc' kxmrlz kc tqkabzme badr,  
Murde nzmwxlr-zlwzng x trnzlxngitilru  
nzesalz-krm.
- 25 Nzmnc-tpwzng lzke x drtwrdr lctrpz mz  
kztedrng mz nzlitr-krbz drtwrdr bam.  
X trnzvz-nqblqlru nim.
- 26 Zbz sc tqesalzpebzme badr  
Kx sa nanibqtiq nidr lzke.
- 27 X sa nangi-batrpzme mz doa nedrng nzakitikr  
nrlc nidr,  
Mz nzmnc-krdr badr kxtrnzrlxngitiung x  
nabztineng mrkzbleng.

*Nzangio-krdr Baal*

- 28 Zbz mz Newz Peo, leplz nemqng nzprtr-kzpzng  
mz nzangio-krdr gct kc drtqde Baal.  
X nzmu-kzng blz krde, kxmule-esz' nide gct  
kxbz kxnzlj.
- 29 Delc tqngyatingr drtwrm nidr  
X sc tqdwatipebz zyagox kx nabz-ngrdr.
- 30 A' Finizs twzpele zmatq x nibqle doa kcng li  
tqvzkipxm nzkxpungr,  
X zyagox kc sc tqayrkrpxpeq.
- 31 Nzwzkr Finizs lc tubq mz nzobq-krm.  
X nzryapwxtipxngr nide trpnzng nzmrb-  
krde.

*Mz Aulz Ngr Meriba*

- 32-33 Mz aulz ngr Meriba, nzangyati-kzpzlr  
drtwrm.  
X da kcng tzalelrng atalvzobzle drtwr Mosis,  
X sc tqvz-rbrpe mz nzymne-ani-krde.

Delc tr-rlr-ngrpwzmeu nzprtr-krde mz drtc'  
nyzm,  
X nzxpx-krde lc vzpxm mz natq kc tqpibzle  
Mz leplz lcng nardr tqmqngi.

*Nzprtr-krdr Mz Drtc' Nyz Gct*

<sup>34</sup> Mz nzprtrkr leplz nemqng mz drtc' nyzm  
Pibzme badr kx nanibqtilr lr Kenan kcng  
tzmncng elr.

A' nzpctxpx-ngrdr nzvz-nqblq-krdr natqm,  
Mz nzrlr-krbzlr nzrlapx-krdr.

<sup>35</sup> X nzyrlz-etrng badr kxnmnc-mrbrng,  
X nztwzlr nqm qkrdrng.

<sup>36</sup> Nzangioler mqngr drka' rdr.  
X krlc lrpzki r nzodatingr nidr.

<sup>37-38</sup> Nzrlr-ngrbzlr doa ncblo x doa olvz nedrng  
Nzngini-krdr blz kx nzkabz mz mqngr drka'  
kxnlz lr Kenan.

X mz nzpulio-krdr mepyr ngr doa nedrng kxnm-  
rlzng,  
Nzatrkatizlwz-ngrdr drtc' kc tqkabzme badr.

<sup>39</sup> X nzatrkatizlbq-kzng mz da lc tzalelr,  
Mz nzapusrlzbq-krdr olvz kc tqrlaszle kr-  
nalzde.

*Nzakitkr Nrlc Nidr*

<sup>40</sup> Mz nzm-krde lcde, sc tqngyatipe drtwrm leplz  
nemqng,

X pctxpx-ngrn nidr.

<sup>41</sup> Rlrpx-ngrn nzaovxiokr kxnmnc-mrbrng nidr,  
Murde na-aclvepeng enqmi rdrng.

<sup>42</sup> X enqmi lcng nzayrplatipxlr nidr,  
Mz nzmncz-krbzlr badr.

<sup>43</sup> Nzwrde kqlu kx arlapx-ngrn nidr,

A' sc tqsutu zvz drtwrdr nzmncngr kx na-  
atrkatingr nim.

*Nyzlu-mou-krmlr Mz Drtc' Kc Tqkabz Gct  
Badr*

<sup>44</sup> A' mzli kc tzyrni-ngrbzlr bam, xlrbzme natqdr.  
X vztitx drtwrm nidr murde nzxpu-krdr.

<sup>45</sup> Leplz lcnq nemqng, dekc tqycngr mz drtwrm  
Nzesz'tikr Drtwrmu Badr,  
X trayrplapx-zvzwq nidr, murde aodu-zvz-  
kzq nidr.

<sup>46</sup> X ngi-batrpzme nzyckr mz drtwr enqmi rdr  
Kcng tzaovxiolr nidr.

*Nzkrka'-krgr*

<sup>47</sup> Yawe, Gct rgr, arlapx nigr mz mq kxtrnzrlxn-  
gitiung,

Mz nzvzmi-kr-mope' nigr mz drtc' nyzgr.

Murde na-awibzkr bam

X naglqlzkr drtqm kxtr.

*Nabz Kx Yrkrpxngr Buk Krapwx*

<sup>48</sup> Naglqlzku Yawe, Gct rgu, nigu lr Israel,  
Tqvzpe, tqvzpe. Naglqlzku Yawe.

Leplz narpilr kx, "Eu, angida!"

**Naglqpxku Yawe.**

**Buk Kranzlvqn**

*Sam 107—150*

## **Sam Kratrtqki-esz'-nrade-rlimz (107)**

*Gct Ayzlu-zvz-ngrbzle Natq Leplz Nedeng*

### *Nzawingr*

- 1 Na-awi-ngrbzku mz Yawe nzmrlz-esz'ngr-krde.  
Murde aodu-zvzle nigu.
- 2 Naglqlz-zvzku nide,  
Murde arlapxbzle nigu mz mq enqmi rgung,
- 3 Mz nzkapx-krmle nigu mrkzbleng mz nrlc  
tulvzo.  
Murde nayrlwr-lxblrku mz drtc' nyzde.

### *Kxnzayoneng Lzke*

- 4 Kzdung nigu nzayoneng lzke,  
Me trpnzngr lrpzki kx narmcti-ngrdr mztea  
kx namnc-ngrdr.
- 5 Kztegu lcng nzbrtale-zlwzng, nzbrlxkz-zlwzng,  
X mztr telvrting.
- 6 **Zbz sc tzkqlepelr Yawe,**  
**Kc tqkatxpxpebzle nzxpu-krdr.**
- 7 Mailzle nidr mz lrpzki kxtubq,  
Vz, vz nzkrlybzlr mztea kx namnc-zpwx-  
ngrdr.
- 8-9 Rkabz lue mz kxnzbrlxkzng,  
X dakxnzng kxmrlzting mz kxnzbrtaleng.  
**“Awi Yawe, mz nivz lrm kc tqyc tqyc, eu.**  
**Okatr-zvzq nigr. Awi Yawe, mz nivz lrm.”**

### *Kxnmncng Mz Presin*

- 10 Kzdung nigu nzatolva-ngrng mz presin,  
Mz nzmncpx-krmle me tungr nzlo.
- 11 Murde nznrlvzolzr lou sc Gct kc tqmyatxlz-  
esz'ngr,  
X drtqdr sa kz nzrlolvzngr nzalvztr-krdeng.
- 12 Delc tqngi-batr-ngrbzle nzetqkr drtqdr mz  
nzwz-kato-krdr.

X nzyangrngapeng, a' trpnzngr kx naokatrle  
nidr.

13 **Zbz sc tzkqlepelr Yawe,**

**Kc tqkatxpxpebzle nzxpxu-krdr.**

14 Aopxbzle drtqdr mz da kc tzatolva-ngrdr,  
X vzmipxmleng mz nabz nzlo mz zyzlr.

15-16 Zmatq ngrde myaszpxle naonrx ngr presin,  
Mz nzodati-atwrnr-krdele.

**“Awi Yawe, mz nivz lrm kc tqyc tqyc, eu.**

**Okatr-zvzq nigr. Awi Yawe, mz nivz lrm.”**

*Kxnzyagoxng*

17 Kzdung nigu nzpctxpx-ngrdr Yawe mz  
nzngqngu-krdr,

X ayrplapxle nidr mz alwx ngrdrng mz  
nzbatr-krbzle nzyagox-zlwz-krdr.

18 Mzli lc nzpxpe-ngrdr nzmungr,  
X nabzpeng.

19 **Zbz sc tzkqlepelr Yawe,**

**Kc tqkatxpxpebzle nzxpxu-krdr.**

20 Yawe amrlzle nrkrdrdqdr mz zyagox lcng mz  
nzymnetx-krpwzle.

Delc tzrlapx-ngrdr mz nzbzngr.

21 **“Awi Yawe, mz nivz lrm kc tqyc tqyc, eu.**

**Okatr-zvzq nigr. Awi Yawe, mz nivz lrm.”**

22 Abrtz-zlwz-ngrgr nim nzkatxpx-krbzme  
Nzxpxu-krgrngq. Abrtz-zlwz-ngrgr nim.

Naglqpx-zvzkr nim mz nzngr-krgr nabz,  
X mz nzale-krgr blz. Naglqpx-zvzkr nim.”

*Kxnzalilvcneng Mz Lcsu*

23 Kzdung nigu nzalilvcneng mz lcsu prla,  
Murde nzrtrngztibzlr nzmabz-krdr elr.

24 Kztegu lcng nzmclr zmatq ngr Yawe,

Mz da kx aleting dcpwe.

25 Mzli kc tqycmneti-ngrdr nenq, x trlipu r nenq  
kc tqwqpe.

X batrpzle nzvzdz-krm ebio wq.

26 Ebio lc glqtxlzle lcsu scdr wq.

X twzo-moule mrbrobz mz mzlirdr mz kztedeng.  
Trlipu lc avzdzmle nelzdr x alibzle drtwrdr.

27 Dea-ngrdr tqvzne x nztaneng nzapulr ncblo  
kxnmnqng.

X trpengr da kx nakrlzlr kx nartrngztibzlr.

28 **Zbz sc tzkqlepelr Yawe,**

**Kc tqkatxpxpebzle nzxpu-krdr.**

29 Ycmnebz mz nenq x sc tqamaope,

Mz ebio x nrw x kc tqvope. ✧

30 Kztegu lcng nzabrtztx-zlwz-ngrdr nzvopekr  
nrwx,

X sc tqmailztrpeng Gct mz nabzn kc naok-  
itrlr.

31 **“Awi Yawe, mz nivz lrm kc tqyc tqyc, eu.**

**Okatr-zvzq nigr. Awi Yawe, mz nivz lrm.**

32 Napipxbzkr nimq mz mz lrtzlvzng,

X mz leplz amrlx. Napipxbzkr nimq.”

*?Nzayrplapxngr O Nzamrlzngr?*

33 Yawe apztx-atwrnr-ngrde lue kxnzetuting,

X aesakile nzyrlelz-krm aulzng,

34 X apiz-kzle drtc' murde trpnzng da kx nalvcpu  
mrlcde,

Mz nzayrplapx-krde kxdrka'-ngrng kcng  
tzmncng elr.

35 A' me ngi drta'ngr ngi nabzdeng kx lrngr lue,

---

✧ **Sam Kratrtqki-esz'-nrade-rlimz (107):29** Sam 65:7; 89:9;  
Matiu 8:26; Mak 4:39; Luk 8:24



X drtc' kx mingrting yrlelz-ngrm aulzng.

36 Murde navzmimle melrmqgung kxznbrtaleng  
namncng mrlcde,

Mz nzwz-krdr mztea nyzdr kx namnc-ngrdr.

37 Nzrwz-ngrng nrlanc x nzpetilr nounc,

X nzrnginanqng dakxznzng x nranc kxkqlu.

38 Amrlz-zvzle nidr x ngi-batrpzle nzmika-krdr  
doa kxkqlu,

X nzkqlunepxkr animol nedrng.

*?Kxnzyrplapxng O Kxdrka'-ngrng?*

39 Mzli kznike leplz nzobqszo-ngrdr nigu

Mz nzatalvzo-krbzlr drtwrgu x nzaetq-zlwz-  
krbzlr drtqgu,

40 Gct kc tqobqszo-ngrde kxnzetung kxnzglqpx-  
lzbqng,

X batrpzle nzayone-krdr nzapulr kx  
trpnzngr me tutrngr nzvzne-krdr.

41 A' katxpxbzle nzxpxu-krngu, nigu leplz txneng,

X aclevele nigu mz nzapu-krngu sip nedeng.

42 Kxnztubqng nzmclr nqm q krde x nzabrtz-  
zlwz-ngrdr.

A' kxdrka'-ngrng nzw-x-nabu-txpwnzng.

43 Krcng tzyrplapxng nakrlzlr da lcng

Mz nzaotikr drtwrdr nzetukr nzaodukr  
Yawe nigu.

## Sam Kratrtqki-esz'-nrade-rtqmz (108)

*Mnc-xgle-tpwzkr Nim Mz Na-aovxio-krm En-  
qmi Rgrng*  
Nabz ne Devet.

*Sa Na-angrlvzx Nim*

<sup>1-2</sup> Sa na-angrlvzx nim mz nabznge atwrnrngr mz  
nzayrni-krbo gita bam,

Murde abrtr-zvzbo drtwrnge bam.

Nilz r nepi adwalzmle ninge mz zbq kang kqlu.

A' mz nzdwalz-krmc mz nourla kx topwz,

Na-apule nabz nenge adwalzmle nepi,

Mzli lc tqglqlzpex nim.

<sup>3</sup> Yawe, sa na-awibo bam mz mzlr lr mrkzbleng,  
X na-angrlvzx nim mz mzlr neidung.

<sup>4</sup> Murde nzaodu-zvz-krm myalz krlzlezle bongavz,  
X nzangidati-zvz-krm natqm. ☆

<sup>5</sup> Lr Heven namclr nzmyalz-esz'ngr-krm,  
X lr nrlc namclr nzaovxio-krm. ☆

*Gct Ayzlu-ngrmle Natqgu*

<sup>6</sup> Mz zmatq ngrm, arlapx nigr kcng tqaodu-zvzq,  
X ayzlu-ngrme natqgr.

*Da Kc Tqpi Gct*

<sup>7</sup> Gct, natqmqng nzvzpxmqng mz Mangr-  
nzangiongr, mz nzrpi-krdr kx,  
“Mzli kc na-aovxio-ngrne, sa na-akipxbo mz leplz  
nengeng

---

☆ **Sam Kratrtqki-esz'-nrade-rtqmz (108):4** Sam 36:5; 71:19;  
103:11 ☆ **Sam Kratrtqki-esz'-nrade-rtqmz (108):5** Sam  
57:7-11

Drtc' kcng mz nrlar LueJodzn rliir.

<sup>8</sup> Murde neidu lr Gilead nengeng.

X nqvi lr Manase nenge-kzng.

X neidu lr Efrem tum mz nibrng.

X nqvi lr Judz kx na-aclve-zvzng mz zmatq  
rnge.

<sup>9</sup> A' enqmi rmung trna-aovxiolru nimu.

Murde lr Moab sa nawztrpqng bange

X lr Edom sa nametxmng bange.

X sa namalqlvzx nzmilxtxo-krnge lr Filistia.”

### *Natq King*

<sup>10</sup> ?Gct, sa na-atutrq natqm lc mz nzokatr-krm  
ninge,

Nzprtr-krnge mz lrpalvc ngr mzteadau  
nyzdr lr Edom?

<sup>11</sup> Murde mzli kc axtxpeq nigr,

X trokatrwq ami negr mz nzotangr.

<sup>12</sup> Gct, okatrp nigr mz nzota-krgr badr enqmi  
rgrng mzli ka.

Murde mane nzmnc-xgle-krgr ncblo  
nzarlapx-krdr nigr.

<sup>13</sup> X krlzkr kx mz nzmnc-krme bagr,

Sa narnzlvzokr enqmi rgrng mz nzokatr-  
krm. ☆

## **Sam Kratrtqki-esz'-nrade-rpwxmz (109)**

### *Kxnzpiqtilr Doa Ne Gct*

Nabz ne Devet.

*Kxnzatrkatilr Ninge*

- 1 Gct, glqlz-zvzx nim.  
Bzkq anabume bange x obqlvz-txpwzme ninge.
- 2 Murde kxdrka'-ngrng kxnzesabrng nzymnestr-ngrdr ninge  
Mz nzpokiatitr-krdr ninge.
- 3 Nzatrkatikrdr ninge trpnzng noude,  
A' nzrpiting natq kx trmrlzu.
- 4 Kxmule-esz' aodux x krka'-ngrneng nidr,  
A' nzayzlu-alzuplr mz natq ngr nzpokianger.
- 5 Kxmule-esz' alebo badr da kxmrlzting mz  
nzngini-krnge kztedr,  
A' nzale-alzupqng bange da kxtrka mz  
nzapu-krdr enqmi rngeng.

*Bzkq Amrlzq Enqmi Rnge*

- 6 Yawe, suti drtwrnge kx na-ayrplapxq ncblo kc  
tqycmne-atrkatile ninge  
Mz nzvz-nqblq-krde natqngce kcng napibo  
bam mz nzngini-krnge kxnzawz nem.  
Mzli kc navz-ngrde mz kot, kzdq kxdrka'ngr  
natubz mz nibrde,  
X mrlz kzdq enqmi rde nangingide majzstret.
- 7 Bzkq rlr-ngrbzme nzaovxio-krde,  
A' nzkrka'-krde na-aelwapx-ngrde nzvz-rbr-  
krde.
- 8 Bzkq amrlzq nide, a' nabz ani,  
X natekqtr ncblo kzble mz nzngini-krde  
kxrmailz. ☆
- 9 Nabzsz-kzle doa nedeng x olvz rde,  
Murde trpengr kx na-aclve-angidrle nidr.

---

☆ **Sam Kratrtqki-esz'-nrade-rpwxmz (109):8** Aposol 1:20

- 10 Naodatitxde ma nyz doa nedeng,  
Murde navztxneng mz nzrlx-krdr dakxnzng.
- 11 Mz nzrka-niwzlr-krdr trau kx rlxti trtedr,  
nayrkrtxpxngr dztudrng amrlx.  
X lr mrkzbleng napnatibzlr da kx atatrple  
mz nzwz-krde.
- 12 Bzkq kx nivz lrde mrlzbz bade,  
X bzkq kx ycng drtwrde doa nedeng.
- 13 Nabzng badr lr ma nyzdeng amrlx,  
Murde bzkq kx nardctipx mou drtwr nqvi  
lrde.
- 14 Nadcpz mz drtwrm nqmq kr melrmqdeng kc  
tqtrka,  
X bzkq ipqpxq alwx ngr lxede.
- 15 Mrkc Heven nadcpz zvz mz drtwrm alwx  
ngrdrng,  
A' mz nrlc enqmi lcng namrbtr alo mz  
drtwr.

### *Alwx Rdeng*

- 16 Rlxtibo bam da lcng murde mrlx lc trpnzng  
kx mrlzti nivz lrde,  
A' armzkiti x rnibqti leplz txneng kx-  
trnzrngiscung x kx drtwrdr talvzo zlwz.
- 17 Mrlzbz bade nzpiliz-zvz-krde leplz.  
Delc mrlzvxitx na-ayzlu-mou-ngrbz bade  
nzpiliz-krdeng.  
X pxtxpx-ngrde nzale-krbzle da kxmrlz mz leplz.  
Delc tqpxtxpx-ngrne nzrka-ngrbz da kxmrlz  
bade.
- 18 Tresakiu nzpiliz-krde leplz.  
Delc nzayzlu-krbzmeleng bade naxngitx-  
pnzbzle.

Mrlz nzpilz-krm nide na-apule lue kx mingrtr mz  
nrkrdrdqde,  
X tolo kx na-alqtipwzle me xvcngr nrvr  
ngrde.

19 X na-apu-kzle lrpz kc tqkq-ngrde  
X amqngitr nrkalo.

*Yangrngazlwz*

20-21 Yawe, Kxetu rnge, kxmule-esz' rlxtibo bam  
nzayrplapx-krm enqmi rngeng

Kcng tzpibqtilr ninge,  
A' rlxti-kzpo bam nzamrlz-krm ninge x nzokatr-  
krm ninge mz nzvz-nqblq-krde Natqm.  
X arlapx ninge mz nzvz-nqblq-krde nzmr-  
lzkr nzaodu-krm ninge.

22 Murde ninge ncblo txne kx tr-rngiscu,  
X drtwrnga vztz zlwz.

23-24 Nrkrdrdqngge ngi nrvr-nrbalqpe mz  
trnzmupe-krpwc'u,  
Mz nzapu-krnge zmyo ngr milzpq kc  
namrbr-anipe.

X apunepe-kzx br kc tqlycne tqwqplxne nenq,  
Mz nzyangrngazlwz-krnge.

25 Kx nzmc ninge nzyrpalelvzlr ninge,  
X nzmcpxmlr nctqdr bange.

26 Yawe, Gct rnge, okatrp ninge, kxanzawz nem!  
Arlapx ninge mz nzvz-nqblq-krde nzaodu-  
krm ninge.

27 Murde enqmi rngeng nakrlz-zpwxlr kx ar-  
lapxq ninge  
Mz zmatq ngrm kx xplr-esz'ngr.

28 Yawe, kxmule-esz' enqmi rngeng nzpibqtilr  
ninge, a' amrlz ninge,

- X aovxio nidr murde nabilvzx nim.
- 29 Batrprz nzavzo-lzbq-krdr,  
Murde nzamyati-krbzme drtqdr naopx mz  
mz leplz.
- 30 Yawe, sa na-awi-zlwzbo bam,  
Mz nzglqlz-krnge nim mz mzlir leplz  
nemqng.
- 31 Murde nim kc tqtubz mz nibr ncblo txne,  
Mz nzarlax-krm nide mz mq kxnzabetitrlr  
nide, murde nabz-ngrde.

## Sam Kratrtqki-esz'-nzpnu-esz' (110)

*King Kxetu Kc Tqngi Nardr Pris Ne Yawe*  
Nabz ne Devet.

### *King Kxetu*

- 1 Yawe rpibzle mz King kc tqngi Kxetu rnge kx,  
“Wxbu mrlc tqmatq-esz'ngr mz nrlarnge  
kxrtc,  
Navz nakrlz-zpwxzbzle mzli kc nangi-batr-  
ngrbo mz enqmi rmqng nzmetx-krbzlr  
bam.” ✧
- 2 Murde Yawe sa nangi-batr-kzpzle nzetunepxkr  
zmatq ngrm mz nzvzpx-krme Jerusalem,  
Mz nzaovxio-krm enqmi lcnq.
- 3 X mzli lcde, drtq leplz nemqng sa navq zlwz  
nzprtr-krbzlr mz ami nem,

---

✧ **Sam Kratrtqki-esz'-nzpnu-esz' (110):1** Matiu 22:44; 26:64;  
Mak 12:36; 14:62; Luk 20:42-43; 22:69; Aposol 2:34-35; 1 Korint  
15:25; Efisz 1:20, 22; Kolosia 3:1; Hibru 1:3, 13; 8:1; 10:12; 12:2

Murde namailzq nidr mz zmatq ngrm kc  
tqluli, tqtr.

X obla nemqng sa navzmqng naprtr-kzpzng bam  
mz nzaxplr-mou-krdr ami nem.

Na-apubzlr badr mi kc tqvzom mz nzrka-  
krbzle nzlungr kxmrna mz nabr.

### *Nardr Pris*

<sup>4</sup> X Yawe esalz-ngrde drtqde x trnatekqtrleu  
drtwrde.

Rpile kx, "Nim King nenge, nangini-alo-  
kzp pris mz nzvz-nqblq-krde nzwzkr  
Melkesidek." ✧

<sup>5</sup> X Yawe sa natubz mz nibrm,  
Mz nzmiltxo-krde king kxnzkqlung mz  
zngya ngr drtwrde.

<sup>6</sup> X sa na-ayrplapxle lr mrkzbleng mz nznibqti-  
krde nidr amrlx.

X sa na-aovxio-atwrnr-ngrde king rdrng mz  
nrlc tulvzo.

<sup>7</sup> X nim, King rnge, mz nzvz-krm lc, nzxplr-kato-  
krm sa namatqnepx kz.

X sa na-aovxio-atwrnr-ngrn nrlc.

## **Sam Kratrtqki-esz'-nzpnu- esz'-nrade-esz' (111)**

### *Nqm q Kr Gct*

#### *Kzdq Nabz Ngr A, B, C*

<sup>1</sup> Awi Yawe! Glqpxku Yawe!

Bilvzx nide mz nabznge atwrnrngr, mz  
nzyrlwr-lxblr-krgr badr leplz nedeng.

---

✧ **Sam Kratrtqki-esz'-nzpnu-esz' (110):4** Hibru 5:6; 7:17, 21



<sup>2</sup> Clvele nrlc x da kcnq tqwz-ngrde, tqaletileng  
nzmyalzng.

*Delc, leplz amrlx na-aotingr drtwrdr da lcnq  
mz nzabrtzlvz-krdrle.*

<sup>3</sup> Eu, da lcnq amrlx nzaelwapx-ngrdr zmrlue x  
zmatq rde.

*Glpqxku nztubq-krde kc tqvzpe tqvzpe.*

<sup>4</sup> Ipqlc nigu mz zmrlz ngrde kxmyalz x ycngr  
drtwrde nigu.

*Jzsle nigu x nalc zvz mz drtwrgu rlx ngr-  
deng.*

<sup>5</sup> Kabzle dakxnzng mz leplz kcnq tzamrluelr nide.

*Lolvz-amqngile mz drtwrde da kx esalz-  
ngrbzle badr.*

<sup>6</sup> Mz nzaprc-krbzle drtc' ngr lr mrkzbleng mz doa  
nedeng,

*Nide kc tqaelwapx-ngrbzle zmatq rde badr.*

<sup>7</sup> Okatrlc nidr mz nzaclve-krdeng kxtubq.

*Prlxpx-zvzle da angidr x nzrsakrlrngr.*

<sup>8</sup> Rkapx zvz natq kx rsakrlrngr.

*Sa na-atutrleng murde nqmz krde mrlz x  
tubq.*

<sup>9-10</sup> Takitrdc nzangio-krgr drtdc kxtr mz nzam-  
rluengr murde

*Vz-nqblq-zvzle nzesalz-krde x*

*Witi nelzde nzarlax-krde leplz nedeng.*

*X aelwapx-ngrgu nzyrplax-krgr mz  
nzamrlue-krgr nide.*

*Yawe kabzle nzrkrz-angidrngr mz krkcnq  
tzyrlq-angidrlr natqde.*

*Zbq kalvz nzrglpqxngr nide navz zvz x  
tqvzpe, tqvzpe.*

## Sam Kratrtqki-esz'-nzpnu-esz'-nrade-li (112)

*Nqmq Kr Ncblo Ne Gct*

*Kzdz Nabz Ngr A, B, C*

- <sup>1</sup> Awibzku mz Yawe! Murde amrlzle ncblo kx  
Bilvzle natqde x amrluele nide.
  - <sup>2</sup> Clvele mrnyzde kcngr naxplrng mz nzaclve-krdr.  
Doa nedeng kxnztubqng, sa na-amrlz Gct.
  - <sup>3</sup> Esalz-ngrbz Gct bade da kxmrlzting kxkqlu.  
Gct okatrle nide murde natubq.
  - <sup>4</sup> Ipq ncblo lc kztedeng mz nzvz-nqblq-krde  
zmrlz ngrde, nzryckr drtwrde, x nztubq-  
krde.  
Jzsle da kx naokatrle leplz kc-kzng, mz  
nznngini-krbzle lrpzki badr.
  - <sup>5</sup> Kabzle da kxkqlu mz krkcng trnzrngiscung.  
Lalztqgbzle mz Gct x alele da kx rsakrlrngr  
mz nzwz-krde.
  - <sup>6</sup> Murde ncblo kxtubq kxtr-rnrcti-lzbqu  
Nadcpz vzvz mz drtwr leplz.
  - <sup>7</sup> Obqtix-zvzle Yawe x  
Prlpxle kx nabzde trtaprlzpuu mz nrpa  
kxtrka.
  - <sup>8</sup> ?Rnrcti-lzbq-ngrde? Trtingr, a' tu-amqngile.  
Sa namcle nzaovxiokr Yawe enqmi rdeng.
  - <sup>9</sup> Tresakiu nzrka-krbzle da mz kxrsuti drtwr.  
Vz vzvz nzayzlu-krbz Gct bade mz nqmq krde  
lc tqtubq.
- Wxbu me matq mz mzlr leplz.
- <sup>10</sup> X angya drtwr kxdrka'-ngrng mzli kc  
namc-ngrdr nide.

Ycpwz pipz kxdrka'-ngrng lcnng sa namrbr, x  
mane nzmadtqi-krdr nqngidr mz zngya.  
Zbz da amrlx kcng tqmrlzbx badr sa nangitx  
brmrda x sa na-apulr zsikapu kx ngilia.

## Sam Kratrtqki-esz'-nzpnu- esz'-nrade-tq (113)

*Naglqlzku Yawe Mz Nzarmyalz-krngu Drtqde*

**1 Naglqlzku Yawe!**

Nigu kxnzawz nedeng na-armyalzku drtqde.

**2** Nayzuo mzli ka nzrglqpxngr drtqde  
Tqvzpe, tqvzpe.

**3** Mz zbx kang kqlu nigu leplz mz nrlc tulvzo  
Na-awi-ngrbzku bade nqm q krde.

**4** Murde aclve-atwrnr-ngrde lr mrkzbleng amrlx.  
X nzetukr zmatq ngrde krlzlbzle bongavz.

**5** Trpnzng r kx apule Yawe kc tqngi Gct rgu,  
Mz nzwxbutxlz-krde mz tron nyzde Heven.

**6** Sc tqobqlvztile bongavz x drtc',  
Mz nzaclve-angidr-krdeleng.

**7** Murde naokatrle leplz kx trnzrngiscung,  
Mz nzkapx-krmle nidr mz nzxpxu-krdr.

**8** X armyalzle nidr murde nangingidr nradrtq  
kxnetung  
Kcng tzmailzlr leplz nedeng.

**9** Ngi-batrpzle mz olvz kvz-nrbalq nznrgine-  
krde doa kxnztopwzng,  
Murde na-abrtz-ngrde doa nede lcnng.

**Naglqlzku Yawe!**

## **Sam Kratrtqki-esz'-nzpnu-esz'-nrade-pwx (114)**

*Naglqlzku Yawe Mz Zmatq Ngrde*

- <sup>1</sup> Mzli kc lr Israel nzrlasz-ngrdr Ijipt,  
Mz nznngini-krdr lr mrkzbleng elr,
- <sup>2</sup> Lr Judz lcng tznnginipedr leplz kxnztrng ne  
Yawe,  
Mz nzaclve-krde drtc' nyzdr, Israel.
- <sup>3</sup> Prla Bla akipx-lzbq x pzlzm.  
X LueJodzn lvxpxbzle lrpzki badr.
- <sup>4</sup> X mzli lc newz x nra nzyameng,  
Nzapulr nzblc-abrtznekr nei sip.
- <sup>5</sup> ?Myx kxmule, Prla Bla tqakipx-lzbq-ngrde,  
X LueJodzn tqlvxpx-ngrde lrpzki?
- <sup>6</sup> ?X nike nzyamengr newz x nra amrlx  
Mz nzapu-krdr nzabrtzkr nei sip?
- <sup>7</sup> Da kcng tqwzngn Yawe nzvz-nqblqlr natqde.  
Nzelalvzlr nzaelwapx-krde zmatq ngrde, mz  
nznngini-krde Gct r lr Israel.
- <sup>8</sup> Murde batrpzle nzyrlepx-krm lue mz rplz,  
Lue lc tqngi aulz mz rplz.

## **Sam Kratrtqki-esz'-nzpnu-esz'-nrade-nzlvqn (115)**

*Naglqlzku Yawe Mz Nznngini-krde Gct Angidr*

*Bzkq Angioku Mqngr Drka'*

- <sup>1</sup> Yawe, nim txpwz kx takitrde nzarmyalzngn, a'  
trngiu nigr.  
Murde nim txpwz kx aodu zvz x trataowq  
natqm kcng tqyrlqq.

<sup>2</sup> Delc trtakitrdeu lr mrkzbleng nzrpi-zvz-krmlr  
bagu kx,  
“?Myxpe Gct rmu?”

<sup>3</sup> Murde Gct rgu mncom Heven,  
X rngisc zmatq ngr nzale-krde nikeng suti  
drtwrde.

<sup>4</sup> A' kxnmnc-mrbrng nzangiolr mqngr da kxnlz  
Kcng tzwzngl leplz mz mqdr.

<sup>5-7</sup> A' mqngr da kxnlz lcng trnzycmneung x  
trnzobqung.

Trnzxlrungr, trnzycminiung,  
X trnzrtcngiung da.

Trnzrmaleung x trnzvzneung.

<sup>8</sup> Leplz kcng tzwz-ngrng mqngr drka' lcng tzlz  
X krkcng tzangiolr nidr nzapu-kzlr nidr mz  
trnzrngisc-krdru zmatq.

Nznabung, mztr mwi, nradrtqdr ngq, trnzycngl-  
rung,

Trnzrtcngiung da, trnzxngitrungr, x  
trnzvzneung.

*A' Na-angio-tpwzku Yawe Gct Rgu*

<sup>9-11</sup> Nimu kcng tzaxvctr-lzbq-kzpqng bagr mz  
nzangio-krgr Yawe,

X nimu pris nedeng mz nqvi lr Eron,  
X nigu lr Israel amrlx na-abtrtpzku drtwrgu  
bade.

Murde nide temz ngr lomrgu kc tqyrputrngr  
nipna.

<sup>12-13</sup> Yc zvz mz drtwrde nigu x sa na-amrlz-zvzle  
nigu.

A' sa na-amrlzle nimu kcng tzaxvctr-lzbqmqng  
mz nzangiongr nide,

X nimu nqvi lr Eron, x nigu lr Israel amrlx.

- Kxmule-esz' nigu leplz txneng o kxnzetung,  
14-15 Krka'-ngrne kx Yawe kc tqwz-ngrde Heven x  
nrlc  
Na-amrlz-ebir-ngrde nimu badr doa ne-  
mung.
- 16 Heven mztea nyz Yawe,  
A' kamle bagu, nrlc ka.
- 17-18 X nigu kxnzung mz nrlc ka na-awibzku  
bade,  
Murde kxnzbpeng kcng tzyrtzmqpeng mz  
gq, rblx nzglqlz-krdr nide.  
Naglqlzku Yawe na-abzo mzli ka x tqvzpe tqvzpe.  
Naglqlzku Yawe!

## **Sam Kratrtqki-esz'-nzpnu- esz'-nrade-esz'mz (116)**

*Naglqlzku Yawe Mz Nzxlr-krmle Natqgr*

*Nabz Ngr Nzaovxiongr*

- 1-2 Yawe xlrmlle natqnge. Mrlzti-zlwzx nide.  
Kqle-zvzx nide. Yawe xlrmlle natqnge.
- 3 Ycpwz pipz nzbz-krnge, x sc tqmwxlr-ngrne.  
Nabzngc talvzo-ngrde ycpwz pipz nzbz-  
krnge.
- 4 Sc tqkqlepex nide mz nzrpi-krbo bade kx,  
“Yawe, arlapx ninge!” Sc tqkqlepex nide.
- 5 Zmrlz ngr Yawe myalz-esz'ngr mz nzokatr-krde  
leplz.  
Ycngc drtwrde nigu. Zmrlz ngr Yawe myalz-  
esz'ngr.
- 6 Okatrle kxtrnzxplrung, murde arlapxbzle ninge  
Mz nzkxpu-krngeng. Okatrle kxtrnzxplrung.

7-8 Amnc-zpwx-moule ninge. Trmetx-ngrpwc'u  
mz enqmi.

Trbz-ngrneu, tryrni-ngrneu. Amnc-zpwx-  
moule ninge.

9 Navz-nqblq-zvzx nide x me pnz drtwrde.

Mz nzmnc-krnge mz nrlc navz-nqblq-zvzx  
nide.

### *Nzawingr*

10-11 Kxmule-esz' ycpé pipz nzmwxlrtilzblq-  
krnge,

A' mzli kc tqkxpu-zlwz-ngrne,

Pipxx murde abrtrpo drtwrnge mz Yawe,

X krlzx kx mane nzbtrtkr drtwrnge leplz. ✧

12 Kxmule-esz' rblx nzayzlu-krbo mz Yawe

Da kxmrlzting kcng tqaletimleng bange,

13 A' sa natwzmc bade waen,

Nangi dalr nzawi-krbo bade mz nzarlax-  
krde ninge.

14 X sa nakabo bade nike esalz-ngrbo bade,

Mz nzangiopx-lxblrkr leplz nedeng.

15 X napipxbo badr kx, "Drtwr Yawe vztz zlwz

Mz nzmnc-krde nzbzkr kzdq doa nedeng.

Delc tqmrlz-ngrbzle bade nzarlax-krde nigu,

Tqmyaszpx-ngrde nzrlrpx-krde nzbz-krqu."

16 Yawe, ninge kxnzawz nem, da kc tqwai lxenge  
mzli kc.

Awi mz nzarlax-krm ninge mz nzbzng.

17 Kabo bam blz kx na-awi-ngrbo bam,

Mz nzkrka'-krbo bam.

18 Delc tqka-ngrbo bam da kc tqesalz-ngrbo bam,

Mz mzlr leplz nemqng,

---

✧ **Sam Kratrtqki-esz'-nzpnu-esz'-nrade-esz'mz (116):10-11** 2  
Korint 4:13

- 19 Mz nzamrlue-lxblr-krgr nim Mangr-  
nzangiongr Jerusalem.  
Naglqlzku Yawe!

## Sam Kratrtqki-esz'-nzpnu- esz'-nrade-rlimz (117)

*Naglqlzku Yawe Mz Nzaodu-zvz-krde Nigu*

- 1 Glqpxamu Yawe nimu lr mrkzbleng amrlx.  
X nimu leplz mz nrlc tulvzo naglqlz-kzamu  
nide. ✧
- 2 Murde nzaodu-zvz-krde nigu etu-esz'ngr.  
X nzngida-angidr-krmle bagu tqyc tqyc.  
Naglqlzku Yawe!

## Sam Kratrtqki-esz'-nzpnu- esz'-nrade-rtqmz (118)

*Naglqlzku Yawe Mz Nzaovxio-zvz-krde*

*Aodu-zvzle Nigu*

- 1 **Aodu-zvzle nigu. Awi-ngrbzku bade  
Nzmrlz-esz'ngr-krde. Aodu-zvzle nigu.**
- 2 Aodu-zvzle nigu. Lr Israel amrlx  
Napipxku kx, "Aodu-zvzle nigu."
- 3 Aodu-zvzle nigu. X nimu pris nedeng  
Napipxamu kx, "Aodu-zvzle nigu."
- 4 Aodu-zvzle nigu. X nimu kcng tzaxvctrmqng,  
Napipx-kzamu kx, "Aodu-zvzle nigu."

*Nabrti Drtwrgu Yawe*

---

✧ **Sam Kratrtqki-esz'-nzpnu-esz'-nrade-rlimz (117):1** Rom  
15:11



- 5 Mzli kc tqmnc-ngrne mz nzkxpungr, kqlex  
Yawe,  
Ayzlumle natqnge x aopxbzle drtqnge.
- 6 Trtxpnzngr nzmwxlr-krnge, murde Yawe tu-  
zvzm mz nibrnge.  
X trtxpnzngr leplz kx krlzle nzatrkatikrde  
ninge. ☆
- 7 X sa namcx nzaovxio-krbzle enqmi rngeng,  
Murde mnc mz nrlarde nyznge.
- 8 Mrlzvxitx nzmnc-xgle-krngu nzokatrkr Yawe  
Murde myaszpxle nzokatrkr leplz nigu.
- 9 X mrlzvxitx nzabrtr-krbzku drtwrgu bade mz  
nzrlapx-krngu,  
Murde myaszpxle nzmctitr-krbzku mz  
kxnzrmailzng.

*Aovxiox Mz Zmatq Ngrde*

- 10 Aovxiox mz zmatq ngrde mzli kc enqmi rngeng  
Tztu-ngalelvz-ngrdr ninge. Aovxiox mz  
zmatq ngrde.
- 11 Aovxiox mz zmatq ngrde mzli kc tzavztio-  
ngrdr  
Ninge mz trtxki. Aovxiox mz zmatq ngrde.
- 12 Aovxiox mz zmatq ngrde dzbe meningilo lc.  
Nzapulr nabr kx ngc. Aovxiox mz zmatq  
ngrde.
- 13 Kxnzyrkrtilzlr ninge mz nzotangr, ycpwz pipz  
na-aovxio-krdr ninge.  
A' Yawe kx okatrle ninge.
- 14 Nide oa kx xplr kc tqmailzle ninge mz vea,  
X tqarlapxle ninge.

---

☆ **Sam Kratrtqki-esz'-nzpnu-esz'-nrade-rtqmz (118):6** Hibu  
13:6

*Yawe, Oa Ngr Vea*

- 15-16 Mz nzmnc-krdr matelq ngr vea nyzdr,  
Ncblo ngr vea nedeng nzngr-abrtz-ngrdr  
nzaovxio-krde, nzrpi-krdr kx,  
“Yawe, oa ngr vea, kc tqaovxio zvz  
Mz zmatq ngrde. Yawe, oa ngr vea.”
- 17 Delc trbz-ngrneu, a' lubex  
Murde napipxbo da kcng tqmatq tqaleting  
Yawe.
- 18 Kxmule-esz' rlrpx-ngrde nzakxpu-zlwz-krdr  
ninge,  
A' trngiu dalr nzbz-krnge.

*King Badr Leplz Nedeng Nzvztrpqng Mangr-  
nzangiongr Nzawi-krbzlr Mz Yawe Nzaovxio-krdr*

- 19 King malqtrpz yz, rpile kx, “Lvpxxm bange  
naonrx ngr Mangr-nzangiongr Yawe,  
Murde navztrx elr mz nzawi-krbo bade.”
- 20 X pris neng Yawe nzayzlubzlr natqde kx, “Krlc  
naonrx nyz Yawe,  
X kxnztubqng txpwz kx navztrng elr.”
- 21 Mz nzvztrkr King elr, rpile kx, “Yawe, awi-  
zvzbo bam murde ayzlu-ngrme nzkrka'-  
krnge,  
Mz nzarlaxp-krme ninge mz mq enqmi rn-  
geng.”

*Leplz Neng Yawe Amrlx Nzangiopx-lxblrlr  
Nide*

- 22 Leplz amrlx kcng tzyrlwr-lxblrng Mangr-  
nzangiongr nzrpilr kx,  
“Rplz kc etu tzpxtxpx-ngrdr ncblo kcng tzrwz-  
ngrng ma,

- Nzaelwapxngr kx nide nou rplz kc  
tqmyatxpx-zlwzبز." ☆
- 23 Da lc Yawe kxrwngr.  
X abrtztx-zlwz-ngrgu.
- 24 Krlc zbq kx wzpxngr Yawe.  
X na-awi-ngrbzku bade.  
Murde nide kc tqrbatrp zbq lc  
Nzrmulvzngr nzaovxio-krqu mz vea.
- 25 Ayzlu-ngrmle natqgu kx, "Yawe, arlapx nigr  
Mz nzokatr-krm nzaovxio-krqu."
- 26 Yawe, glqlzkr nide kc tqvzm mz drtqm.  
Glqlzkr nide mrka mz Mangr-nzangiongr. ☆
- 27 Yawe nide Gct kc tqokatr-zlwzle nigu.  
Delc naelami-ngrgu leu ngr nzaovxiongr,  
Mz nzvz-ngale-krqu olta nyzde  
Kc tqtr-esz'ngr.
- 28 Yawe, nim Gct rnge x na-awi-ngrbo bamq  
Nzmyalz-esz'ngr-krmq. Yawe, nim Gct rnge.
- 29 **Aodu-zvzle nigu. Awi-ngrbzku bade**  
**Nzmrlz-esz'ngr-krde. Aodu-zvzle nigu.**

## **Sam Kratrtqki-esz'-nzpnu- esz'-nrade-rpwxmz (119)**

*Yawe, Natqm Mrlzvxi*

*Kzdq Nabz Ngr A, B, C*

*Alvztr-zvz-ngrn Ninge mz Natqm*

---

☆ **Sam Kratrtqki-esz'-nzpnu-esz'-nrade-rtqmz (118):22**  
Matiu 21:42; Mak 12:10-11; Luk 20:17; Aposol 4:11; Efsizs 2:20;  
1 Pita 2:7 ☆ **Sam Kratrtqki-esz'-nzpnu-esz'-nrade-rtqmz**  
**(118):26** Matiu 21:9; 23:39; Mak 11:9-10; Luk 13:35; 19:38; Jon  
12:13

- 1 Awi Yawe! Namrlzbz mz leplz kx trnzvz-  
rbrung,  
A' nzvz-nqblqlr Loukxtr scm,
- 2 X namrlz-kzpz mz krkcng tzlxngitilr natqm,  
X nzrtangrtilr nim mz nabzdr atwrnrngr,
- 3 X krkcng tzalelr da kxtubq,  
X nzo-zlilr lrpzki rm.
- 4 Alvztr-zvzq nigr  
Murde nalolvz-amqngikr nqm q krm.
- 5 Navz zvz  
Nzrtangrti-krnge me pnz drtwrm.
- 6 Murde ma tqmyangr drtqnge  
Mz nzaoti-zvzkr drtwrnge Nzryrngrkxtr.
- 7 Alqngitipeq ninge,  
Glqlz-ngrne nim nztubqkr nabznge.
- 8 Alex da kx pitimeng bange.  
A' bzkq amnctxn ninge esz'-krnge.  
*Bilvz-zlwzx Nzti Rm*
- 9-10 Bzkq rlr-ngrme nzrlasz-krnge nim,  
Murde sa tqabzx nzwztr-krbo bam mz drtwr  
kxpq.  
Nzlolvz-amqngikr obla natqm okatrle nide  
Mz nztu-amqngi-krde mz nzmncngr kxtubq.
- 11 Abrtz-ngrne Nzryrngrkxtr  
Murde natubq-zvzbo mz nzobq-krm.
- 12 Yawe, glqlzx nim.  
X suti drtwrnge nzkrly-zpwx-krnge nqm q  
krm.
- 13 Natqnge etu zvz  
Mz nzipx-krnge Loukxtr scm.
- 14 Nzabrtzngr kx vzpxm mz nzvz-nqblq-krnge  
nim  
Myaszpxle nzrngisc-krnge trau kxkqlu.

- 15 Nadcpx mz drtwrnge me pnz drtwrm.  
Mz nzaoti-zvzkr drtwrnge nzalvztr-krmqng.
- 16 Bilvz-zlwzx nzi rm,  
X trmrbrtru mz drtwrnge natqm.  
*Clve Ninge Mz Louxtr Scm*
- 17 Clve ninge murde ninge kxnzawz nem,  
X nayrlq-zvzx natqm mz nzmnc-krnge.
- 18 Okatrp ninge mz nzrmcti-krnge  
Da kxmrlzting kx nzprpxmqng mz Louxtr  
scm.
- 19 Ninge kvztime nrlc.  
Bzkq yrlq-kapqme bange me pnz drtwrm.
- 20 Pq zvz mz drtwrnge  
Nzkrzl-krnge nqm q krm.
- 21 Ayrplapxq kxnzglqpx-lzbqng  
Keng tznzlvzolzr natqm.
- 22 Bzkq rlrpx-ngrn nzobqszo-krdr x nzyrpalelvz-  
krdr ninge,  
Murde vz-nqblqx natqm.
- 23 X kxmule-esz' kxnzeturung nzpikitulr ninge,  
A' sa tqotr-zvzngr drtwrnge nzalvztr-  
krmqng.
- 24 Clve ninge mz Nzryrngrkxtr  
Murde abrtz-ngrne nzmilz-krdr ninge.  
*Da Kx Mailzle Ninge Nangi Lrpzki Rm*
- 25 Drtqngewetx-zlwzpe x ycpe pipz nzbz-  
krnge.  
Ka-mop nzlungr bange, mz nzvz-nqblq-krde  
natqm.
- 26 Mzli kc tqplzpx-ngrbo bam alwx rngeng, ayzlu-  
ngrme natqngewetx,  
X alvztrpe' bange nqm q krm.
- 27 Okatrp ninge mz nzkrlz-krnge Louxtr scm,

Murde na-aoti zvz drtwrnge nzwz-krmqng  
kcng tqmyalz.

- 28 Nzrtxlvlzkr nzvzkr drtwrnge etutx-zlwzpe.  
Amqtrp drtwrnge da kc tqwai nzesalz-krmle.
- 29 Okatrp ninge mz nzo-zli-zvz-krnge nzti kxtubq,  
X alvztrp bange Nzryrngrkxtr mz zmrlz  
ngrm.
- 30 Pnzpe drtwrnge kx navz-nqblq-zvzpepex nim,  
Mz nzale-zvz-krnge me pnz drtwrm.
- 31 Yawe, bzkq rlrpx-ngrn nzamyati-ngrm  
drtqnge,  
Murde lolvz-amqngix nzalvztr-krmqng.
- 32 Da kx mailzle ninge nangi lrpzki rm  
Mz nzokatr-krm ninge.  
*Esalz-ngrn X Angidatiq Natqm*
- 33 Eu Yawe, alvztrp bange me pnz drtwrm,  
Murde nayrlq-zvzx.
- 34 X okatrp ninge mz nzvz-nqblq-krnge Loukxtr  
scm,  
Murde naesz'-ngrde nabznge.
- 35 Abrtz-ngrne lrpzki rm  
Mrkc tqmailz-zvz-ngrn ninge.
- 36 Okatrp ninge mz nzpqtikr drtwrnge natqm,  
Murde myaszpxle nzrngisc-krnge da kxkqlu.
- 37 X bzkq rlr-ngrme nzsutikr drtwrnge da kx-  
mane,  
A' axplr-mop ninge mz nzo-zli-krnge nzti rm.
- 38 Angidatim bange nzesalz-krmqng,  
Da kc tqwaibzme mz leplz kcng tzamrluelr  
nim.
- 39 Okatrp ninge murde mwxlrtix enqmi rngeng  
nzxtrnga-krdr ninge.  
A' mrlz-esz'ngrm bange nzpnana-krmqng.

40 Esalz-ngrm bange kx na-alvztrq ninge,  
Murde nztubq-krm naka-mople bange nzx-  
plrng.

*Gct, Brti Drtwrnge Drtwr Kcng Tqyrlqqng*

41 Gct, arlapx ninge mz nivz lrm,  
Mz nzungidati-krm nzesalz-krmqng.

42 Murde na-ayzlu-ngrbo natq krkcng tzyrpalelv-  
zlr ninge,  
Mz nzbrtikr drtwrnge natqm.

43 Okatrp ninge mz nzrpi-zvz-krnge da angidr,  
Murde brti kz drtwrnge drtwr kcng tqyr-  
lqqng.

44 X nzmqngitr-zlwzkr drtwrnge mz Loukxtr scm  
Tqvzpe, tqvzpe.

45 X drtqng sa naopx mz nzvzne-krngeng  
Murde o-zlix lrpzki rm.

46 X trtxpnzng nrzmyamikr naonge  
Nzpipx-krbo natqm mz kxnzeturng.

47-48 Gct, abrtz-ngrne nzyrlq-angidr-krnge  
Nqm q krm x me pnz drtwrn.

Murde nzmrlzmqng bange x nzmatqng mz  
drtwrnge.

X na-aoti zvz drtwrnge nzalvztr-krmqng.

*Ipqpeq Ninge Mz Nzdcpxkr Mz Drtwrn  
Nzesalz-krm*

49 Ipqpeq ninge mz nzdcpxkr mz drtwrn  
nzesalz-krm.  
Murde obqtippz zmlz ngrm.

50 X amqtrple drtwrnge mz mzlr nzxpung.  
Murde rmcti-ngrne nzlungr mz nzrlwx-  
krnge Loukxtr scm.

51 Kxmule-esz' kxnzqlppx-lzbqng nzxtrnga-ngrdr  
ninge,

- A' tresablqtiwxu Nzryrngrkxtr.
- 52 Yawe, mz nzaotr-zvzkr drtwrnge Lou scm kc  
bqnc,  
Okatrple ninge.
- 53 Drtwrnge apulzmle nyr,  
Mz nzpctxpxkr kxdrka'-ngrng nqm q krm.
- 54 Mzli ka tqlobe-ngrne mz nrlc,  
Natqm nangi zvz nabz nenge.
- 55 Yawe, mwible-zvzx nim mz nrlckxbq,  
X suti drtwrnge nzyrlq-angidr-krnge me pnz  
drtwrm.
- 56 Iklr ninge murde nabznge napq,  
X na-ale-zvzx nzalvztr-krmqng.  
*Jzs Ninge, Murde Suti Txpwz Drtwrnge Nim*
- 57 Jzs ninge, murde suti txp wz drtwrnge nim,  
X mrlzm bange nzlolvz-amqngi-krnge  
natqm.
- 58 Mz nabznge atwrnrngr, rlx tibo bam  
Nzmlzti-krm ninge da kc tqwai nzesalz-  
krmle.
- 59 Mzli kc tqdwa-rbrti-ngrne lrpzki rnge mz nzvz-  
nqblq-krnge nim,  
Yzlu-mopwc' nzo-zli-krnge nzti rm.
- 60 X trasatiwxu nzyrlq-krnge Loukxtr scm.  
A' rnekititxpwo nzale-krnge me pnz drtwrm.
- 61 X kxmule-esz' prtzx mz trtxki sc kxdrka'-ngrng,  
A' trmrbrtru mz drtwrnge Nzryrngrkxtr.
- 62 Tulzmc mz nzawi-krbo bam mzli kc mz aurn-  
rlc,  
Murde drtwr kcng tqyrlqq tubq-esz'ngr.
- 63 Ninge kzte krkcng tzamrluelr nim,  
Tzalelr nzalvztr-krmqng.



- 64 Yawe, mz nzaodu-krm kc tqyc-ngalelvzle nrlc  
tulvzo,  
Alvztrp bange nqmq krm.  
*Kxakrlz, Alvztrp Bange Lrpzki Rm*
- 65 Kxetu, aleme bange da kxmrlz,  
Mz nzvz-nqblq-krde nzesalz-krm.
- 66 Kxakrlz, alvztrp bange nzrkrlzngr x drtwr  
kxmrlz,  
Mz nzlxngiti-krnge Nzryrngrkxtr.
- 67 Mzli kc ena vz-rbrpex, x ayrplapxq ninge,  
A' mzli ka ale-zvzpx da kxtubq mz nzobq-  
krm.
- 68 Mz nzmrlz-esz'ngr-krm x nqmq krm kx mr-  
lvxi  
Alvztrp bange nqmq krm.
- 69-70 Drtwrnge elalzm mz Loukxtr scm.  
A' kxnzqlqpx-lzbqng trpnzngr nzrkrlz-krdr.  
Kxmule-esz' nzpokiatitrlr ninge,  
A' lolvz-amqngi-zvzx nzalvztr-krm mz drtwr  
kxbr.
- 71 Mrlzm bange nzayrplapx-krm ninge,  
Murde nakrlz-ngrne nzvz-rbr-krnge.
- 72 Kxakrlz, natqm nzmrlz-krmle bange  
Myaszpxle blzmr trau mz nrlc.  
*Loukxtr Scm Mrlzm Bange*
- 73 Lalztqm mz nzkrka'-krnge murde nakrlzx me  
pnz drtwrm,  
Murde wz-ngrn ninge x aclve-angidrq ninge.
- 74 Krkcng tzamrluelr nim na-abrtzlvzlr ninge  
Mz nzlxngiti-krnge natqm.
- 75 Yawe, krlzx kx takitrde nzayrplapx-krm ninge

- Murde vz zvz nzokatr-krm leplz nemqng. ☆
- 76 Amqtrp drtwrnge mz nzaodu-zvz-krm ninge,  
Da kc tqwai nzesalz-khme bange.
- 77 Mz nzabrtzlvz-krnge Loukxtr,  
Nayc mz drtwrm ninge, murde ma tqbzx.
- 78 Amyatxbz drtq kxnzqlqpx-lzbqng mz  
nzpokratitr-krdr ninge,  
Murde aoti zvz drtwrnge nzalvztr-krm.
- 79 Batrpz mz kxnzamrluelr nim nzaxvctr-lzbq-  
krmlr bange,  
Krkng tzkrlz-angidrlr Loukxtr scm.
- 80 Lod, batrpz mz nabzng nztubq-krde mz  
nzobq-krm,  
Murde drtqng ma tqmya.
- Mevalu, Mailz Ninge Murde Navz-nqblqx Me Pnz  
Drtwrm*
- 81-82 Mevalu, mewepengr drtqng x mzke'  
ngqbqtxtrpebz  
Mz nzaenzli-krnge nim.
- ?Myx mzli kx na-arlapx-ngrn ninge,  
Mz nzangidati-krm nzesalz-krm kc tqbrti  
drtwrnge?
- 83 Kxmule-esz' nzobqszonge apux da kx nzrtctx-  
pengr,  
A' dcpz zvz mz drtwrnge me pnz drtwrm.
- 84 ?Myx mzli kx naykrpxngr nzkxpu-krngeng?  
?X myx mzli kx na-ayrplapx-ngrn krkng  
tzatrkatilr ninge?
- 85 Kxnzqlqpx-lzbqng nzekqng gq kx nangi trtxki  
rnge,  
Mz nzpctxpx-krdr Loukxtr scm.

---

☆ **Sam Kratrtqki-esz'-nzpnu-esz'-nrade-rpwxmz (119):75** Hi-  
bru 12:10

86 Mailz ninge mz nzbtrtkr drtwrnge Nzryrngrkx-  
trng amrlx.

Murde trpnzngr badr nou nzatrkatikrdr  
ninge.

87 Kxmule-esz' ycpwz pipz nzayrkrpx-krdr ninge,  
A' sc tqlolvz-amqngix nzalvztr-krmqng.

88 Mevalu, arlapx ninge mz nzaodu-krm ninge.  
Murde nayrlq-angidrx natqm.

*Natqm Tqyc Tqyc*

89 Natqm tqyc, tqyc,  
X yc amqngi zvz Heven.

90 Wz-ngrn nrlc x yc amqngi zvz.  
Delc tqbrti-zvzngr drtwr nim.

91 Da amrlx mz nrlc nzvz-nqblqlr me pnz  
drtwrm,  
Murde nzwztrpzng bam.

92 Trbz-ngrneu nzkxpu-krngeng,  
Murde Loukxtr scm okatrle ninge mz  
nzaelalz-krmle drtwrnge.

93 X trtxpnzngr nzmrbtrkr mz drtwrnge Nzryrn-  
grkxtrng,  
Murde nzrpwa'-ngrmlr bange mz nzvz-  
rbrngr.

94 Arlapx ninge, murde ninge doa nem,  
X abz-zvzx nzale-krnge nzalvztr-krmqng.

95 Kxmule-esz' kxdrka'-ngrng nzyrlqlr br ngr  
nznibq-krdr ninge,  
A' na-aoti zvz drtwrnge nqm q krm.

96 Natqm tqyc tqyc,  
Kxmule-esz' da kxmyapxbz amrlx nzyrkr-  
pxng,

*Okatrp Ninge Mz Nzo-zli-krnge Nzti Rm*

97 Oliq-zvzx nzaotikr drtwrnge Loukxtr scm,

- Murde mrlz-zlwzm bange.
- 98 Nzrkrlz-krnge myaszpxle enqmi rngeng,  
Murde Nzryrngrkxtr yc zvz mz drtwrnge.
- 99 X nzwzkr narngge myaszpxle kxnzalvztrlr  
ninge,  
Murde ale-zvzx me pnz drtwrm.
- 100 X nzyrplapx-krnge myaszpxle lrtzlvzng,  
Murde yrlq-angidrx natq kx kame bange.
- 101 Yrlqpx-lzbqngge mz nzmncngr kxdrka'ngr,  
Mz nzvz-nqblq-krnge da kx tubq mz nzobq-  
krm.
- 102 Trpxtpx-ngrneu drtwr kcng tqyrlqq,  
Murde nzalvztrlr ninge.
- 103 Natqm nzlqngi-esz'ngr-krde mz nzxlrngr  
Myaszpxle nzmrlzkr dakxnzng amrlx.
- 104 Okatr-zvzq ninge mz nzalvztr-krm murde  
nakrlzx nzi kxtubq.  
Delc tqmamwe-ngrne nqm q kx vz-rbr amrlx.  
*Pqtr Zvz Mz Drtwrnge Natqm*
- 105 Pqtr zvz mz drtwrnge natqm,  
Kc tqngi zyzlr ngr nzi rnge mz nzmailz-krm  
ninge.
- 106 Nzesalz-krngeng nayrlq-angidr-zvzxng,  
Mz nzo-zli-krnge nztubqkr lrpzki rm.
- 107 Okatrp ninge da kc tqwai nzesalz-krmle,  
Murde nzxpu-krngeng amrlx ma tznibqlr  
ninge.
- 108 Yawe, alvztrp bange nzaolvz-krmqng  
X abrtzlvz nabz nenge mz nzangrlvz-krnge  
nim.
- 109 Kxmule-esz' da kxtrka prtzm bange,  
A' trmrbrtru mz drtwrnge Loukxtr scm.

- 110 X kxmule-esz' kxdrka'-ngrng nzamwitiolr  
ninge trtxki,  
A' vz zvz nzatutr-krnge nzalvztr-krmqng.
- 111 X lolvz-amqngi-zvzx Nzryrngrkxtrng,  
Murde nzaelalzmlr drtwrnge.
- 112 Pnzpe drtwrnge kx navz-nqblq-zvzx me pnz  
drtwrn,  
Murde nzokatrngr kx vzpxm elr vztx alo.  
*Rblxm Bange Nzmlzti-krnge Krkcng Drtwrdr  
Tqlitprz Bam*
- 113 Rblxm bange nzmrlzti-krnge krkcng drtwrdr  
tqlitprz bam,  
A' mrlz-zlwzm bange Loukxtr scm.
- 114 Nim me rlakitr x temz ngr lomrnge kc  
tqyrputrngr nipna,  
X abrtprpo drtwrnge mz natqm.
- 115 Esablqtix kxdrka'-ngrng  
Murde navz-nqblqx nqm q krm.
- 116 Bzkq mya ngr drtqnge nzbtrtkr drtwrnge nim,  
A' arlapx ninge da kc tqwai nzesalz-krmle,  
murde ma tqbzx.
- 117 Natu-ngrme mz nibrnge mz nzarlapx-krm  
ninge,  
Murde namatq zvz mz drtwrnge drtwr kcng  
tqyrlqq.
- 118 Pxtxpx-ngrn krkcng tzpxtxpx-ngrdr Nzryrn-  
grkxtr.  
Murde nzesabrng x nzpokiang.
- 119 Obqszoq kxdrka'-ngrng mz nzapu-krdr dcvi.  
Delc tqmrlz-ngrm bange nzalvztr-krmqng.
- 120 Rnrcti-lzbqng m znmwxlrti-krnge nim,  
Murde ma trtubqwxu mz nzobq-krm.  
*Suti Drtwrnge Nzryrngrkxtr*

- 121 Suti drtwrnge nzarlapx-krme ninge mz mq  
enqmi rngeng,  
Murde nqmq krnge rsakrlrngr x tubq.
- 122 Bzkq rlr-ngrbzme mz kxnzglqpx-lzbqng  
nzatrkatikrdr ninge.  
A' amnc zpx ninge.
- 123 Mzke' ngqbqtxtrpebz mz nzaenzli-krnge  
Nzvz-nqblq-krm nztubqkr nzesalz-krm.
- 124 Alvztrp bange nqmq krm  
Mz nzaodu-zvz-krm ninge.
- 125 Okatrp nzyrplapx-krnge,  
Murde nakrlz-angidrx nzaolvz-krmqng.
- 126 Yawe, mzli r nzayrplapx-krm leplz dekape.  
Murde nznzlvzo-zvzlr Loukxtr scm.
- 127 Mz nzmu-krde lcde, natqm nzmrlz-krmle  
bange  
Myaszpxle da kx lqlwx amrlx.
- 128 Sa natubq-zvzm bange nzalvztr-krmqng am-  
rlx.  
X mamwe-ngrne nqmq amrlx kx vz-rbr.  
*Takitrde Nzlolvz-amqngi-krnge Nzalvztr-krmqng*
- 129 Takitrde nzlolvz-amqngi-krnge nzalvztr-  
krmqng  
Murde nzmrlz-zlwzng.
- 130 Natqm apule zyzlr,  
Murde aelwa-ngrbzle lrpzki kxtubq mz leplz  
amrlx.
- 131 Nzsutikr drtwrnge nqmq krm apule nzbr-  
lxkztikr drtwrnge lue,  
Murde narmcti-ngrne nzlungr angidr.
- 132 Nayc mz drtwrm ninge,  
Da kc tqwaibzme mz krkcng tzamrluelr nim.

- 133 Okatrp ninge mz nzvz-nqblq-krnge me pnz  
drtwrn,  
Murde alwx ma tqmailz-rbrle ninge.
- 134 Arlapxbz ninge mz mq leplz kcng tzakxputilr  
ninge,  
Murde nayrlq-zvzx da kx tubq mz nzobq-  
krm.
- 135 Okatrp ninge mz nzxngi-krnge nim,  
X alvztrp bange Nzryrngrkxtr.
- 136 Trtakitrdeu nzrnzlvzongr Loukxtr scm.  
X yrnitx-zlwz-ngrne alwx ngrdr lc.  
*Vz-nqblq-zvzq Nzmnncngr Kxtubq*
- 137 Vz-nqblq-zvzq nzmncngr kxtubq-esz'ngr,  
X drtwr kcng tqyrlqq rsakrlrngr.
- 138 Natq kcng tqkapxq nzabrkitr drtwr,  
Murde nztubq-zvzng.
- 139 Zngya ngr drtwrnge apule nyr kc tqngc,  
Murde enqmi rngeng mrbrtr mz drtwrdr  
Nzryrngrkxtr.
- 140 Nzesalz-krm pq zlwz mz drtwrnge  
Murde angidati-zvzme bange.
- 141 Kxmule-esz' leplz nzobqszolr ninge,  
A' trmrbrtru mz drtwrnge nzalvztr-krmqng.
- 142 Yawe, nztubq-krm tqyc, tqyc,  
X Loukxtr scm ngi da angidr zvz.
- 143 Delc kxmule-esz' nzxpungr x nzvzkr drtwr  
nzpztmng bange,  
A' abrtz-ngrne nzo-zli-zvz-krnge nzti rm.
- 144 Vz zvz nzokatr-krm ninge nzmc-krnge  
Nztubq-zvzkr natqm, murde ma tqbzx.  
*Wztx-ngrpwo Nzkrka'-krbo Bam*
- 145 Wztx-ngrpwo nzkrka'-krbo bam.  
X ayzlum natqngc, murde nao-zlix lrpzki rm.

- 146 Yrnimi-zvzbo bam nzarlapx-krm ninge,  
Murde nayrlq-angidrx Loukxtr scm.
- 147 Kqle-zvzx nim mz nourla kxtopwz mz  
nzokatr-krm ninge,  
Murde abrtrpo drtwrnge mz nzesalz-krm.
- 148 Obqtx-zvzx mz nrlckxbq,  
Mz nzaotikr drtwrnge me pnz drtwrm.
- 149 Mz nzaodu-zvz-krm ninge, xlrn natqnge,  
X mailz ninge mz nzalvztr-krmqng.
- 150 Kxmule-esz' kxnzxpqbrlr-ngrdr nqm q krm  
Nzesolvztilr ninge, a' trmwxlrxu.
- 151 Murde eso-aepztrpe' bange,  
X drtwr amrlx kcng tqyrlqq da angidr zvz.
- 152 Wz-ngrn natqm murde nayc-alo,  
Da kc tqwai nzkrnz-krngele, abzo mzli kc pnz.  
*Xlrn Natqnge Da Kc Tqwai Nzesalz-krmle*
- 153 Xlrn natqnge x arlapx ninge mz nzxpu-  
krnge,  
Murde dcpz zvz mz drtwrnge Loukxtr scm.
- 154 X pipxbz mz leplz kx nqm q krnge tubq,  
Da kc tqwai nzesalz-krmle, murde ma tqbzx.
- 155 Kxdrka'-ngrng trtxpnzngz nzrlapx-krdr,  
Murde trnzrtangrtilru nzti rm.
- 156 Yawe, axplr mou ninge mz nzetukr nzaodu-  
krm,  
Murde vz-nqblqx me pnz drtwrm.
- 157 Kxmule-esz' enqmi rngeng nzqqlu-zlwzng,  
A' trtxpnzngz nzesablqti-krnge Nzryrngrkxtr.
- 158 Pxtxpx-ngrne kx drtwrdr litrpz bam,  
Murde trnzlxngitilru da kxtubq mz nzobq-  
krm.
- 159 Yawe, arlapx ninge mz nivz lrm,  
Murde mrlzm bange nzalvztr-krmqng.



- 160 X natqm mąngio mz da kxtubq.  
Delc drtwr amrlx kcng tqyrlqq nztubq-kzng.  
*Yrlq-angidrx Nzalvztr-krmąng*
- 161 Yawe, kxnzeturng nzatrkatikrdr ninge  
trpnzngr noude,  
A' amatq-zlwzx natqm.
- 162 Apux bcnyr kc tqrmctile da kxpqtr mz nabzde,  
Murde abrtz-ngrne Nzryrngrkxtr
- 163 Trkam bange natq ngr nzpokianger,  
A' mrlzm bange natqm.
- 164 Glqpx-zvzx nim mz zbq kang kqlu,  
Murde drtwr kcng tqyrlqq tubq-esz'ngr.
- 165 Krkcng tzmrlz badr Loukxtr scm, nzmnc-  
zpwıng.  
X trpnzngr doa x da kx na-ataole nidr.
- 166 Yawe, brti drtwrnge nzarlax-krm ninge,  
Mz nzale-zvz-krnge da kx pitimeng.
- 167 Lolvz-amąngix nqmą krm,  
Mz nzmrlz-zlwz-krmle bange.
- 168 Yrlq-angidrx nzalvztr-krm,  
Da kc tqwai nzmc-krmle.  
*Zyzlr Ngrm Napnamilxtile Nabzng*
- 169 Zyzlr ngrm napnamilxtile nabzng,  
Mz nzayzlu-krmle natqng mż nzvz-nqblq-  
krde nzesalz-krm.
- 170 Lalztq-ngrm nzkrka'-krnge,  
X arlapx ninge mż nzvz-nqblq-krde natqm.
- 171 Naglqlz-zvz-ngrne nim  
Mz nzalvztr-krmle bange nqmą krm.
- 172 Na-angrlvzx nzesalz-krm,  
Murde drtwr amrlx kcng tqyrlqq tubq-  
esz'ngr.
- 173 Oliqm mż nzokatr-krm ninge,

Murde lolvz-amqngi-zvzx me pnz drtwrm.

174 Yawe, obqtipxx nzarlapx-krm ninge,  
Murde mrlzm bange Loukxtr scm.

175 Okatrp ninge mz Nzryrngkxtr  
Murde naglqppxx nim mzli ka tqlu-ngrne.

176 Zmrlz ngrm nakqlelvzti-zvzle ninge.  
Murde kxmule-esz' vecpx-lzbqbo bam,  
A' trmrbrtitru mz drtwrnge lrpzki rm.

## Sam Kratrtqki-esz'-nznpu-li (120)

### *Ncblo Ngr Nrwx*

Nabz kx nzngnelzng Jerusalem mz nzangiongr.

1 Mzli kc tqmnc-ngrne mz nzcxpung, kqlex  
Yawe,  
X ayzlu-ngrmle natqng.

2 Rpibo bade kx, "Yawe, arlapxbz ninge  
Mz leplz kxnzpokiayang x nzesabrng."

3 ?Nimu leplz kxnzpokiayang,  
Krlzpeamu da kx nawaisrng Yawe nimu?

4 Sa na-ayrplapx-zlwzle nimu  
Mz nipna sc ncblo ngr vea x mz nyr kxpq  
zlwz.

5 Nzmcn-lxblr-krgr trka-zlwzm bange,  
Apule kx mnckr badr leplz kxdrka'-ngrng.

6 Mzli boitx zlwz mnctibo bamu,  
Nimu leplz kcng tzpxtpx-ngrdr nrwx.

7 Dekc mzli kc tqryapwxtr-ngrne mz nrwx,  
Suti alzu drtwrmu nzotangr.

## Sam Kratrtqki-esz'-nznpu-li-nrade-esz' (121)

### *Gct Acive-zpwxle Nigu*

Nabz kx nzngrnelzngr Jerusalem mz nzangiongr.

<sup>1</sup> ?Myx me narmcti-ngrne kxnaokatrle ninge?

?Sa navzom mz newz ngr nrlc ka?

<sup>2</sup> Trtingr. Murde Yawe Kxrpalz kc tqwz-ngrde  
bongavz x drtc',

Nide txpwz kx naokatrle ninge.

<sup>3-4</sup> Da zpwx! Murde Yawe obq zvz,

X acive-angidrlle nigu lr Israel,

Mz nzapu-krngu sip nedeng.

A' tramau x trmwiu, murde ma tqtaoku.

<sup>5</sup> Yawe ngi tegu badr,

X tu-zvzm mz nibrgu,

<sup>6</sup> Murde trtxpnzngr doa x da kx na-atrkatille nigu

Mz nrlckxgrlx x mz nrlckxbq.

<sup>7</sup> Yawe arlapxle nigu mz nzkxpu-krngung amrlx,

Murde namnc-zpwxku.

<sup>8</sup> X acive-zvzle nzvz-krngu x nzmnc-krngu,

Mzli ka x tqyc, tqyc.

## Sam Kratrtqki-esz'-nznpu-li-nrade-li (122)

### *Jerusalem Ngi Mzteadau Nyz Yawe*

Nabz ne Devet kx nzngrnelzngr Jerusalem mz nzangiongr.

<sup>1-2</sup> Drtwrnge elalzm mz nzrpi-ngrm bange  
kx, "Navzdzpeku mz Mangr-nzangiongr  
Yawe."

Zbz sc tqvztrpekr mz naobz ngr mzteadau  
nyzde.

<sup>3</sup> Jerusalem lc nzlrnzio nzwzng,

X mzte opx nzmwitr-lxblrkr ma ngrdeng.

<sup>4</sup> Nigu neidu lr Israel vzmgu mrlcde mz nzawi-  
krbzku mz Yawe,

Da kc tqwai nzpi-krdele.

<sup>5</sup> X Jerusalem ngi mzteadau nyz king rgung, kcng  
tzvzpxmqng mz nqvi lr Devet.

X nzaclvelr leplz nedrng elr mz nzwxbuo-  
krdr mz tron.

<sup>6-7</sup> Delc, nakrka'-ngrgu Jerusalem mz nwrpi-krqu  
kx, "Gct rgr, aclve zpwx nigr lr Jerusalem,

Murde leplz nemqng kcng tzmrlztilr nim

Namnc-zpwxng mz ma nyzdr,

X narmctilr nrwx mz nzmncpx-krmlr mz  
drkq ngr mzteadau nyzm.

<sup>8-9</sup> Yawe, rlxrtibzkr bam

Kx na-aclve-kzpzme lr mrnyzgr x kztegrng  
kcng tzmncng elr.

Amrlz zvz leplz amrlx kcng tzmncng elr

Mz nzmrlzti-krdr Mangr-nzangiongr nim.

Eu, angida."

## **Sam Kratrtqki-esz'-nznpu-li- nrade-tq (123)**

*Yawe, Nayc Mz Drtwrm Nigr*

Nabz kx nzngnrelzng Jerusalem mz nzangiongr.

<sup>1</sup> Yawe, mnc-xglex nim

Mz nzwxbu-krm mz tron nyzm Heven.

<sup>2</sup> X nzmnc-xgle-zvz-krgr nim navz navz nakrlzb-  
zle mzli kx ycng mz drtwrm nigr.

Murde apukr ncblo x olvz kx nzawzng kx  
nzmnc-xglelr kxnzetu rdrng.

<sup>3</sup> Yawe, nayc mz drtwrm nigr mz nzokatr-krm  
nigr.

Murde kxnzakxputing nzapusr-ngrdr nigr  
brmrda.

<sup>4</sup> X drtqgr satxtrpebz nzxtrngatitrkr kxnzrngis-  
cng nigr,

X kxnzglqlz-lzbqng nzobqszo-zvzlr nigr.

## **Sam Kratrtqki-esz'-nzpnu-li- nrade-pwx (124)**

### *Yawe Arlapxe Leplz Nedeng*

Nabz ne Devet kx nzngnelzng Jerusalem mz  
nzangiongr.

<sup>1</sup> Nigu lr Israel nakrlz-angidrku

Kx Yawe ngi-te-zvzku badr mz nzotangr.

<sup>2</sup> X mz nzngi-te-zvz-krgr badr

Mzli kc enqmi rgung nzrpilr na-atrkati-ngrdr  
nigu,

<sup>3</sup> Rblxbz badr nzmilxto-krdr nigu

Mz nzngyati-zlwzkr drtwrdr nigu.

<sup>4-5</sup> X trznibqlru nigu mz nzapu-krdr srkau kx  
mrilvzole nigu.

X nrc kxetu ngr srkau lc trabooleu nigu.

<sup>6</sup> Delc na-awi-ngrbzku mz Yawe

Mz trnzrlr-krpwzleu nigu mz mq enqmi  
rgung.

<sup>7</sup> Mzli lc sc tqapupeku utc mz nzdwapx-krmgu  
mz br sc kxnzmmwang,

X drtqgu opxpe murde Yawe pingebzle br  
scdr.

- 8 Yawe nide Kxrpalz kc tqwz-ngrde bongavz x drtc',  
X Mevalu kc tqokatrle nigu, mz zmatq drtqde.

## **Sam Kratrtqki-esz'-nzpnu-li-nrade-nzlvqn (125)**

### *Kxnztubqng X Kxdrka'-ngrng*

Nabz kx nzngnelzng Jerusalem mz nzangiongr.

- 1 Nigc kcng nzabrtrpzlr drtwrdr mz Yawe,  
Apuku Newz Saeon kx trycnglrur, a' tutx alo.
- 2 X Yawe apule newz kcng tztu-ngalelvzlr Jerusalem,  
Murde vz zvz nztu-krmle mz nibrgu, nigu leplz nedeng.
- 3 X tr-rlr-ngrpwzleu mz kxdrka'-ngrng nzaclve-alo-krdr mrnyzgu, nigu kxnztubqng.  
Murde ma tqvz-nqblqku nqm q krdr kxtrka.
- 4 Delc Yawe, krka'-ngrgr kx na-amrlzq nigr lr Israel kxnztubqng  
Mz nzyrlq-angidr-krgr natqm.
- 5 A' mzli kc na-ayrplapx-ngrn kxdrka'-ngrng,  
Mrlzm bagr nzayrplapx-kz-krm kzdung nigr  
Kcng tzpxtxpx-ngrdr nzvz-nqblqngr nim.  
A' amnc zpwx nigr lang.

## **Sam Kratrtqki-esz'-nzpnu-li-nrade-esz'mz (126)**

### *Yawe Amnc-zpwx-moule Lr Jerusalem*

Nabz kx nzngnelzng Jerusalem mz nzangiongr.

- 1 Mzli kc Yawe tqamnc-zpwx-mou-ngrde nigu lr Jerusalem,  
Opxm kx trngiu da zpwx, a' rmwibleku.
- 2 Mzli lcde, yrpale-twzku x ngr-katoku, mz nzabrtz-zlwz-krgru.  
Zbz sc tzrpipe lr mrkzbleng kx, "Yawe rwz-ngrbz da kxetuting kx okatr-ngrde nidr."
- 3 X abrtztx-zlwz-ngrgu  
Da lcdeng tqetuting tqwz-ngrmleng bagu.
- 4 Delc Yawe, na-amnc-zpwx-mou-ngrde nigu mzli ka,  
Da kc tqwai tewa nzdc-krde x lrti-moungr ningali kx pztipeng.
- 5 Murde leplz kcng tzyrning mzli kc tzpe-ngrdr dakxnzng mz drtc',  
Na-abrtzng mzli kc narkqlz-ngrdr.
- 6 X leplz kcng tzyrning mzli kc tzrtwz-ngrdr dakxnzng kx napetilr mz nrlanc,  
Sa nangr-abrtzng mzli kc nartwz-ngrmlr dakxnzng brma mz mzli r nzrkqlzng.

## **Sam Kratrtqki-esz'-nznpu-li-nrade-rlimz (127)**

### *Nqvi Lr Ncblo*

Nabz ne Solomon kx nzngnelzngr Jerusalem mz nzangiong.

- 1 Nzmu Yawe trnangiu Kxetu r nqvi lrgu le,  
Mane nzaetunepx-krgru nqvi lrgu.  
Nzmu trna-aukztileu lr mrnyzgu,  
Mane nzaclve-krgru nidr.
- 2 Nzmu trna-abrtzpwzkuu drtwrgu mz Yawe  
Mz nzrka-krmle dakxnzng bagu,

Mane nzo-rlangr mz nzwz-katongr x nzyzlu-  
ngrm mz nina,  
Murde krlz-kzle nzrka-krmle da bagu mzli kc  
tqmwi-ngrgu.

<sup>3-5</sup> X Yawe nide kz kx rkam doa kxnztopwzng mz  
nqvi lrgu,  
Mzli kc tqngi-oblaben-grgu.

Murde mzli kc tqngi-lrtzlvzpe-ngrgu, doa lcng  
na-acvelr nigu.

Sa namrlzbz mz ncblo kc mrlxde tqkqlu.  
Murde mzli kc kzdq ncblo narnqnti-lzbq-ngrdr  
bade,

Mrlxdeng sa natubzng mz nibrde.  
X mz nzrka-krbz kxnzrmailzng drtwr kxtubq,  
Drtqde trnamyau murde nztu-krbz mrlx-  
deng lcng mz nibrde.

## **Sam Kratrtqki-esz'-nzpnu-li- nrade-rtqmz (128)**

### *Trte Kx Mailzle Lr Ma Nyzde*

Nabz kx nzngnelzng Jerusalem mz nzangiongr.

<sup>1</sup> Yawe sa na-amrlzle trte kx amrluele nide,  
X o-zli-zvzle nzti rde.

<sup>2</sup> Murde da kx naokatrle lr ma nyzde navzpxm  
mz nzwz-krde,  
X na-abrtz-ngrde nzmnc-zpwx-krdr.

<sup>3</sup> Olvz nalzde na-apule nc bia kc nrade tqkqlu,  
Murde doa nedrng kalr na-apulr nrtr ngr nc  
brpi mz nzwxbu-ngalelvz-krdr nyr pnrde.

<sup>4</sup> Delc Yawe tqamrlz-ngrde  
Trte kx amrluele nide.

<sup>5-6</sup> Yawe, mz nzmncpx-krme Mangr-nzangiongr,



Amrlz nigr lr Israel, murde namnc-zpwxkr.  
X trtegr lcng namc-zvzlr da kxmrlzting kcng  
tqaleme bagr, nigr lr Jerusalem.  
X namc-kzlr nzmncr doa ne doa nedrng, x  
sc tzbz-ateng.

## **Sam Kratrtqki-esz'-nzpnu-li- nrade-rpwxmz (129)**

### *Enqmi r Lr Israel*

Nabz kx nzngrnelzng Jerusalem mz nzangiongr.

<sup>1</sup> Nigu lr Israel nadcpz mz drtwrgu kx enqmi  
rgung nzatrkatiłr nigu

Yzuo mzli kc tqpipzbe-nrggu mrnyzgu.

<sup>2</sup> A' kxmule-esz' enqmi rgung nzatrkati-zlwzlr  
nigu,

Yzuo mzli kc tqpipzbe-nrggu mrnyzgu, a'  
trnzaovxio-pnzlr nigu.

<sup>3</sup> X kxmule-esz' nzikla-zlwzlr nigu,

X bzmrde mnz-aboitxtr-alom mz nibrgu,

<sup>4</sup> A' Yawe kc tqtubq-esz'ngr,

Aopxpebzle drtqgu mz mqdr.

<sup>5</sup> Delc Yawe, nigr lr Saeon rlxtibzkr bam,  
nzmaneutipx-krbzme enqmi rgrng amrlz,

Murde drtqdr namyatx-zlwzng.

<sup>6</sup> X ayangrng nidr

Mzli lc tztopwzbe-ngrdr.

<sup>7</sup> Murde ma tqtakitrde nidr nzota-moungr,

Nzmu enqmi rgr kc-kzng tzrlxtibzlr badr  
nzokatr-krdr nidr mz vea.

<sup>8</sup> X bzkq rlrpx-ngrn nzrpi-krbz badr kx,

“Amrlzkr nimu mz drtq Yawe!”

## Sam Kratrtqki-esz'-nznpu-tq (130)

*Nzoliq-zvzkr Yawe Mz Nzokatr-krde Lepz Nedeng*

Nabz kx nzngrnelzngr Jerusalem mz nzangiongr.

<sup>1</sup> Yawe, kqlex nim mz nzokatr-krm ninge  
Mz mzlir nzkxpu-krngeng.

<sup>2</sup> Lalztqm mz nzkrka'-krnge, kx Kxetu,  
X ayzlum natqng.

<sup>3</sup> Yawe, nzmü napx-ngrn nzipqpx-krm alwx  
rgrng,  
Trpnzngr kx narlapxbz mz nzayrplapxngr.

<sup>4</sup> A' oliq-zvzq nzipq-krm nigr,  
Murde na-amrluekr nim.

<sup>5-6</sup> Yawe, obqtipxx nzokatr-krm ninge.  
X brti drtwrnge kx sa na-atutrq natqm.

Da kc tzwai kxnzaukzng mz nzaenzli-krdr rngalx  
nzpnamilxtilz-ani-krmle,  
Murde nzkrzlzr kx nepi sa naprkilz-zvzm mz  
nourla kang kqlu.

A' suti zlwx drtwrnge nzvz-ani-khme,  
Myaszpxle nzsutikr drtwrdr nzprtz-krm  
nepi.

<sup>7</sup> X nigu lr Israel, na-abrtrpzku drtwrngu mz Yawe,  
murde aodu-zvzle nigu.  
X oliq zvz nzarlapx-krde nigu.

<sup>8</sup> X sa naxpepxle nigu  
Mz alwx ngrgung amrlx.

## **Sam Kratrtqki-esz'-nzpnu-tq-nrade-esz' (131)**

### *Apux Doa Kx Yrpz Lxede*

Nabz ne Devet kx nzngnelzng Jerusalem mz nzangiongr.

<sup>1</sup> Yawe, trglqpx-lzbqpc'u bam, mz nzvz-lvi-krnge bz kc tqyrlqme bange.

X tramatq-lzbqwxu murde naptrpo mz kxnzetung mz nzymnetr-krdr mz da kxmyaszpxle nzrkrlz-krnge.

<sup>2</sup> Murde abrtz-ngrne nzapu-krnge doa kxtpowz kx yrpz lxede.

Delc tqmnc-zpwx-ngrne mz nrlc.

<sup>3</sup> X nigu lr Israel navz zvz nzabrtr-krbzku drtwrgu mz Yawe, Murde namnc-zpwx-kzku.

## **Sam Kratrtqki-esz'-nzpnu-tq-nrade-li (132)**

### *Nzesz'tikr Drtwr Yawe Ncdr Devet*

Nabz kx nzngnelzng Jerusalem mz nzangiongr.

*Devet Suti Drtwrde Nzrwzng Mangr-nzangiongr Yawe*

<sup>1</sup> Yawe, na-aoti drtwrm nzxpkur Devet, Mz nzwztr-krbzle bam.

<sup>2</sup> Nim Gct kc tqrninr tqangio Jekop. X Devet esalzbz bam.

<sup>3-4</sup> Rpibzle kx, "Yawe, trtxpnzng nrvz-krnge ma nyznge o mz nelvq nyznge,

X trtxpnzng nrama-krnge x nzmwi-krnge,

<sup>5</sup> A' nawzti-kaix dq ma kx namnc-ngrn,

Mz nznngini-krm Gct r Jekop.”

*Devet Rmctile Bokis Kc Tqyclz-ngrm Nzesz'tikr Drtwrdr Badr Gct*

<sup>6</sup> Mzli kc Devet badr ncblo nedeng tzmnc-ngrdr Efrata,

Nzxlrlr nrpa ngr Bokis kc tqyclz-ngrm Nzesz'tikr Drtwrdr Badr Gct.

X sc tzmctipelr mz mztea Jerim mz nrlarn-rlc lcde.

<sup>7</sup> X sc tzipipelr kx, “Naglqpeku Bokis lc mz Tentkxtr nyz Yawe.

Mz nzangio-krngu nide mrkc tqwxbu-ngrde mz tron.”

<sup>8</sup> X sc tzipipebzlr mz Gct kx, “Yawe, vzm mz Tentkxtr nyzm,

Murde namnc-zvzq mrkc tqycngr Bokis ngr zmatq ngrm.

<sup>9</sup> Murde pris nemqng nayapwxtipxbzlr nztubq-esz'ngr-krm mz leplz nedrng,

Kcng na-angrlvzlr nim.”

*Nzesz'tikr Drtwr Yawe Ncdr Devet*

<sup>10</sup> Yawe, mzli ka bzkq ptxpx-ngrn king rgr kc tqmcpxbzme,

A' atutr nzesalz-krbzme mz kxnzawz nem, King Devet.

<sup>11</sup> Murde esalz-ngrbzme bade da kx trnzkatxu, Mz nzrpi-krbzme bade kx, “Sa nayrlqbo dq

mrlxm kx nanginide king kx na-aclvele lr Israel mz nibrm. ☆

<sup>12</sup> X nzmu mrlxdrng nayrlq-angidrlr nzesz'tikr drtwrgr badr,

---

☆ **Sam Kratrtqki-esz'-nzpnu-tq-nrade-li (132):11** Aposol 2:30

X navz-nqblqlr natqngc kc tqkapxbo badr,  
Sa nangini-zvzdr king,  
Badr mrlxdrng, tqyc tqyc.”

*Mevalu Kc Navzpxm Mz Nqvi Lr Devet*

- <sup>13</sup> Yawe, rlxibzkr nzamrlz-krm king nem.  
Murde mcpxq Jerusalem nangi mztea nyzm,  
<sup>14</sup> Mz nzrpi-krm kx, “Krlc mztea kx namnc-alo-  
ngrne,  
Mz nzvz-nqblq-krde me pnz drtwrncg.  
<sup>15</sup> Sa nakabo mz lr mztea nyzngc lc da kxmrlzting  
kxkqlu.  
X sa na-aputrx kxtrnzrncgiscung murde  
nelzdr nakrlc x naesatxpx zpwx.  
<sup>16</sup> Sa nabatrpo mz pris nengeng nzyapwxtipx-  
krbzlr mz leplz nengeng nzarlax-krncg  
nidr,  
Murde leplz kxnztr lcnq namalqlvzlr ninge.  
<sup>17</sup> Sa nayrlqx king kc tqmatq Jerusalem kx  
navzpxm mz nqvi lr Devet,  
X nzaclve-krde trtxpnzngc nzesaki-krde.  
<sup>18</sup> Sa na-amyalz x nide mz nzalao-krbo kraon mz  
narde,  
A' sa nabatrpo nzmyakr drtq enqmi rdeng.”

## **Sam Kratrtqki-esz'-nzpnu-tq-nrade-tq (133)**

*Nzesz'tikr Drtwrgu*

Nabz ne Devet kx nzngcnelzngc Jerusalem mz  
nzangiongcr.

<sup>1</sup> Lqngipx x mrlzvxi

- Mzli kc leplz tzmnc-tr-lxblr-ngrdr mz  
nzesz'tikr drtwrdr.
- <sup>2</sup> Nzesz'tikr drtwr lqngipx apule nzyrleokr tolo  
mz nar Eron x nrpnr naode, krlzo-kzpzle  
lrpzde,  
Mzli kc tzaelu-ngrde tolo mz nzngini-krde  
Nardr Pris.
- <sup>3</sup> X nzesz'tikr drtwr mrlzvxi apule nzdcokrm  
tewa  
Mz newz nyzgung mrkc tqmingr zvz.  
Murde da kc tqmrlzting amrlx tqkam Yawe bagu  
nzvzpxmqng Jerusalem,  
Myapxbz nzmnc-zpwx-zvz-krqu mz drtc'  
nyzgu.

## **Sam Kratrtqki-esz'-nzpnu-tq- nrade-pwx (134)**

### *Naglqpxku Yawe*

- Nabz kx nzngnelzng Jerusalem mz nzangiongr.
- <sup>1</sup> Naglqpxku Yawe, nigu kxnzawz nedeng.  
Naprrtku mz Mangr-nzangiongr nide.
- <sup>2</sup> Glalzku mqgu Mrkc Tqtr.  
Glqpxku Yawe mz nrlckxbq.
- <sup>3</sup> X krka'-ngrgr kx Yawe na-amrlzle nimu mz  
nzmnc-krde Mzteadau nyzde.  
Nide kc tqwz-ngrde bongavz x drtc'.

## **Sam Kratrtqki-esz'-nzpnu-tq- nrade-nzlvqn (135)**

### *Nigu Nqvi Lr Israel Naglqlzku Yawe*

- Nabz kx nzngnelzng Jerusalem mz nzangiongr.

*Mcpx Gct Nqvi Lr Israel*

1-2 **Naglqlz-zvzku Yawe,**

Murde nide Gct rgu.

X nigu kxnzawz nedeng na-amrlueku nide

Mz nzkrka'-krmu mz Mangr-nzangiongr x  
makoa ngrde.

3 Na-amatqku nide murde mrlz-esz'ngr.

X na-angrlvz-ngrgu nide nivz lrde.

4 Murde mcpyle nqvi lr Jekop, nigu lr Israel,

Mz nzngini-krgru leplz nedeng.

*Kxrpalz*

5 Krlzku kx Kxetu rgu, Yawe, nide Gct kc  
tqmyatxlz-esz'ngr,

Myaszlze kxnzmncng mzlilxlr amrlx.

6 Vz-nqblq-tpwzle me pnz drtwrde mz da kx  
alele

Kxmule-esz' mz bongavz, nrlc, prla, x me  
boo-ngrng.

7 Wz-ngrde zbo nzvzdz-krdr mz lclxlr mz bon-  
gavz,

X bzlrpc nzvzmi-krm trlipu le.

X batrpzle nzwqkr nenq.

*Kxaovxio*

8 Sc tqnibqtile ncblo kx ayrnrngr Ijpt,

Kr neng leplz x kr neng animol.

9 Rwngr da kxnzkctipxng kxkqlu mrlcde,

Mz nzayrplapx-krde king rdr x kxnzetu ne-  
deng.

10 Aovxiole lr mrkzbleng kxkqlu

Mz nznibqti-krde king kxnzxplr-zlwzng.

11 Krlcng King Sihon, King Og, x kzdu-kzng king

Kcng tzaclveng mz drtc' Kenan.

- 12 X drtc' nyzdrng katimleng bagu,  
Nigu lr Israel, da kc tqwai nzpi-krmlele bagu.

*Gct Angidr*

- 13 Nqm̄q kr Yawe tqyc tqyc.  
X nzrkrlzng drtqde tqvzpe tqvzpe.
- 14 Yawe sa napipxbzle mz leplz nedeng kxnvz-  
rbrng o trtingr,  
X sa na-aodu-zvzle nidr.
- 15 Kxnm̄c-mrbrng nzangioldr m̄qngr da kx nzlz,  
Kcng t̄wzngr ncblo mz silvz x gol.
- 16 M̄qngr da kxnlz lcng naodr x mztr ycbz,  
A' trnzycm̄neung x trnzr̄mcung da.
- 17 Nradrtqdr x nctqdr ycbz,  
A' trnzxl̄rung da x trnzycmini-kzung.
- 18 Leplz kcng t̄rwz-ngrng nzapu-kzlr m̄qngr  
lcng.  
Murde nznabung, trnzobqung, nradrtqdr  
ngq, x trpnzngr nzlungr badr.

*Lr Israel Naglqlzlr Yawe*

- 19 A' Nigu nqvi lr Israel, naglqlzku Yawe.  
X nimu pris, nqvi lr Eron, na-amrlue-kzamu  
nide.
- 20 X nimu kxnvz nedeng, nqvi lr Livae, na-  
amatqamu nide.  
Nigu amrlx kcng tzamrluelr nide, na-  
angrlvzku nide.
- 21 Na-angioku Yawe Jerusalem, mz Newz Saeon.  
**Naglqlz-zvzku Yawe.**



## **Sam Kratrtqki-esz'-nzpnu-tq-nrade-esz'mz (136)**

### *Aodu-zvzle Nigu*

#### *Kxrpalz*

- 1 Aodu-zvzle nigu. Awi-ngrbzku bade  
Mz nzmrlz-esz'ngr-krde. Aodu-zvzle nigu.
- 2-3 Aodu-zvzle nigu. Kxetu r kxnzetung  
Myaszlzle kxnmncng mzlilxlr. Aodu-zvzle  
nigu.
- 4-5 Aodu-zvzle nigu. Wz-ngrde r kx kxmatq,  
Bongavz mz nzyrplapx-krde. Aodu-zvzle  
nigu.
- 6 Aodu-zvzle nigu. Wznedz-ngrmle drtc'  
Me boongr prla. Aodu-zvzle nigu.
- 7-8 Aodu-zvzle nigu. X wz-ngrde nepi  
Nayzlr mz nrckxngrlx. Aodu-zvzle nigu.
- 9 Aodu-zvzle nigu. Wz-ngrde temz badr vri  
Nayzlrng mz nrckxbq. Aodu-zvzle nigu.

#### *Aovxiole Enqmi Rgung*

- 10 Aodu-zvzle nigu. Nibqtile enqmi rgung,  
Kxmztr nzmc kai ne lr Ijpt. Aodu-zvzle nigu.
- 11 Aodu-zvzle nigu. Rkamilzmle nigu  
Lr Israel mz mzlir lr Ijpt. Aodu-zvzle nigu.
- 12-14 Aodu-zvzle nigu. Mz zmatq ngrde kx xplr,  
Akipxle Prla Bla. Aodu-zvzle nigu.  
Aodu-zvzle nigu. X mailzkimle nigu,  
Leplz nedeng mz nzti rde. Aodu-zvzle nigu.
- 15 Aodu-zvzle nigu. A' rtco-ngrde prla  
King x ami r lr Ijpt. Aodu-zvzle nigu.
- 16 Aodu-zvzle nigu. X mailztrle nigu

- Leply nedeng lzke. Aodu-zvzle nigu.  
17-18 Aodu-zvzle nigu. Nibqtile king kxnzxprrng.  
Apoopemle king kxnzmatqng. Aodu-zvzle  
nigu.  
19 Aodu-zvzle nigu. Nibqle King Sihon,  
King r lr Amctq. Aodu-zvzle nigu.  
20 Aodu-zvzle nigu. X aovxiole King Og,  
Kc tqngi king r lr Basan. Aodu-zvzle nigu.  
21-22 Aodu-zvzle nigu. Aprcmle drtc' nyzdr  
Bagu, nigu lr Israel. Aodu-zvzle nigu.

### *Aclve-zvzle Nigu*

- 23 Aodu-zvzle nigu. Trmrbrtru mz drtwrde  
Nzkxpu-zlwz-krngung. Aodu-zvzle nigu.  
24 Aodu-zvzle nigu. Arlapxbzle nigu  
Mz mq enqmi rgung. Aodu-zvzle nigu.  
25 Aodu-zvzle nigu. X rkabz dakxnzng  
Mz krkcng tzlung amrlx. Aodu-zvzle nigu.  
26 Aodu-zvzle nigu. Glqlzku Gct kc Heven,  
X awibzku bade, aodu-zvzle nigu.

## **Sam Kratrtqki-esz'-nzpnu-tq-nrade-rilmz (137)**

### *Rblx Nzng-abrtz-krgr Mz Nzmc-krgr Bxbilon*

- 1 Kx dcpz mz drtwrgr nzodatingr Jerusalem,  
Sc tqyrnipekr mz nzwxbune-krgr mrkzble  
mz nqlvi r ningaling Bxbilon.  
2 X gita negrng adotxlzpekrng  
Mz nounc kx nztung mrlcde.  
3 Krkcng tzlolvztilr nigr, tzxtrnga-ngdrdr nigr,  
nzrpimlr bagr kx,  
“Ngr-ngrmamu du bagr nabz kxtr nemung.”

- 4 A' mz drtwrgr rpikr kx, “Rblx nzngr-abrtz-krbzkr mz Yawe,  
Mz nzmnc-krgr mz mztea nyz kxtrnzrlxngi-  
tiung.
- 5 Murde nzmu kx tqmrbrtitr drtwrnge Jerusalem,  
Namrbrtitr kz drtwrnge kxmu nzayrni-  
krnge gita nenge.
- 6 X nzmu kx tqrblix nzdcpx-kaikr Jerusalem mz  
nabznge,  
Narblx kz nzngr-krnge nabz ngrdeng.”
- 7 Yawe, nadcpxpwz mz drtwrm alwx ngr lr  
Edom.  
Murde mzli kc lr Bxbilon tzodati-ngrdr  
Jerusalem,  
Sc tzrpibzlr badr kx, “Odatiamu!  
Odatiamu x natutx-lxlrngr.”
- 8 Yawe, rlxtibzkr bam nzamrlz-krm ncblo kc  
naodati-atwrnr-ngrde lr Bxbilon,  
Mz nzayzlu-krbzle badr da kcng tzwaisr-  
ngrdr nigr. ✧
- 9 Murde na-abrtz-ngrde nzlolvzti-krde doa lcong,  
Mz nztamyrtitx-krde nidr.

## Sam Kratrtqki-esz'-nzpnu-tq-nrade-rtqmz (138)

### *Drtq Yawe X Natqde*

Nabz ne Devet.

- 1 Yawe, awibo bam mz nabznge atwrnrngr.  
X angrlvzx nim mz mz kxnzmatqng.

<sup>2</sup> Lxlvrkibo Mangr-nzangiongr nim mz nzglqlz-krnge drtqm.

X awi-ngrbo bam nqmq krm,  
Nzaodu-krm, x nzangidati-krm.

Murde drtqm x natqm nzmyatxpx-esz'ngr.

<sup>3</sup> Mzli kc tqkrka'-ngrbo bam, ayzlume natqnge,  
Mz nzaetunepx-krm nzxplr-krnge.

<sup>4</sup> Yawe, king amrlx mz nrhc sa naglqlzlr nim,  
Mz nzxlr-krdr nzmrlzkr natqm.

<sup>5</sup> X sa na-angrlvzlr kxmu nzale-krmqng da,  
Mz nzmhc-krdr kx myatxlz-esz'ngrn.

<sup>6</sup> Kxmule-esz' myalz-esz'ngrn, a' sc tqaclve-zvzq  
kxznzavzo-lzbqng.

X avzome kxznzqlppx-lzbqng.

<sup>7</sup> X kxmule-esz' nzxpungr nzprtmqng bange, a'  
amnc-zpwxq ninge.

X tu-zvzme mz nibrnce mz nzngyatikr drtwr  
enqmi rngeng ninge.

X arlapxq ninge mz zmatq ngrm.

<sup>8</sup> Yawe, krlzx kx sa na-angidatiq drtwr amrlx  
kcng tqyrlq-pz'liti-ngrn ninge.

Murde nzaodu-krm tqyc tqyc.

Bzkq esaki nzaclve-krm krkcng amrlx tqwz-  
ngrn.

## **Sam Kratrtqki-esz'-nzpnu-tq-nrade-rpwxmz (139)**

*Nzrkrlzkr Yawe Myatxlz-esz'ngr X Krlz-kzle  
Nqmq Nr Nabzm*

Nabz ne Devet kx yrbzle mz kxrmailz ngr dzbe  
kxznzngng.

*Obqplxq Nabznge*

- 1 Yawe, obqplxq nabznge,  
X krlz-atwrnr-ngrn ninge.
- 2 Krlzq da amrlx kcng tqalex.  
Kxmule-esz' mncme rlru, a' krlz-zvzq nzaokrnge drtwrnge.
- 3 Kxmule-esz' wzx o amax, a' sa tqmc-zvzq ninge.  
X krlz-kaiq da amrlx kcng nartrngztibo mz z bq kxes z'.
- 4 Abzo pnz mzli kc trycmneka-ngrne  
Nzkrlz-kai-krm natq kznike napixng.
- 5 Zmatq ngrm okatrle ninge  
Mz nztu-ngalelvz-krde ninge.
- 6 Nzkr lz-krm ninge etu zlwz.  
X trtakitrpwc'u nzrkr lz-krm.

*Esz'-ngrn Nrlc*

- 7 ?Drlve kc navzkix murde trnamcwq ninge?  
Trpnzng r kxnamule lc murde esz'-ngrn nrlc.
- 8 X kxmule-esz' vzdzx Heven, a' sc tqmncq elr.  
X kxmule-esz' bzx x nzyrtzmqnge, a' sc tqmnc-kzq elr.
- 9 Kxmule-esz' alilvc-kzx me prkilzm nepi  
O me takiole,
- 10 A' sc tqmncq elr mz nzokatr-krm ninge  
X nzrmailz-krm ninge mz mqm.
- 11 Kxmule-esz' mnc-kapqx mz nzlo  
X mz drtwrnge nrlckxngrlx nangitx nrlckxbq,
- 12 A' nzlo x nrlckxbq rblx nzamnc-kapq-krdr ninge,  
Murde nzlo x zyzlr kxnamu-tpwzlr esz' mz nzobq-krm.

*Nzlrmtio-krm Ninge*

- 13-15 Murde mzli kc tqmclq ninge mz nelz lxenge  
Nim txpwz kx rkrly nzmnc-lrpipx-krmc mrl-  
cde.  
Wz-ngrn dalr nrkrdrdqng x nrvr rngeng.  
X amwitr-lxblr-kzqng amrlx, mz nzvz-nqblq-  
krde me pnz drtwrm.  
X kctipxx x awitx-ngrbo bam  
Nzlrmtio-krm ninge.  
16 X mzli kc trnmckangr mzke',  
Yrlqpe-kaiq me nakrlzbx me nangi bz ngr  
nzlu-krnge.

*Rblxm Bange Nzao-krm Drtwrm*

- 17 A' rblxm bange nzkrly-angidr-krnge nzao-krm  
drtwrm  
Murde nzqqlu-zlwzng.  
18 A' nzmu narlwxxleng drtwrge mrbrtrpz,  
Murde nzmyaszpxlr drta' ngr prla amrlx.  
X kxmule-esz' nayrkrpx nzrlwx-krngeleng,  
A' tryatrkapc' nzkrly-angidr-krnge nim.

*Kxdrka'-ngrng*

- 19 Murde rblxbep bange drtwr ngr nqm q krm.  
? Memule tqasa-ngrn nzayrplapx-krm kxdrka'-  
ngrng?  
? Myx kxmule trnamilxtxokalq nidr?  
20 Murde nzpiti-ngdr nim natq kxtrka,  
X nznrlvzolzr nqm q krm.  
21-22 Yawe, pxtxpx-ngrne krkng tpxtxpx-ngdr  
nim x ni-kzdr enqmi rngeng.  
Murde trnmnczpwzung mz zmatq ngrm.

*Aelwa-ngrm Bange Nqm q Krnge Kxtrka*

- 23 Gct, obqplxti zpwx nqmq nr nabznge  
Mz nzkriz-krm nza0-krnge drtwrnge.
- 24 Murde na-aelwa-ngrme bange nqmq krnge  
kxtrka,  
X namailzq ninge mz nzti kxtubq.

## Sam Kratrtqki-esz'-nzpnu-pwx (140)

### *Kxna-atrkatiir Ninge*

Nabz ne Devet kx yrbzle mz kxrmailz ngr dzbe  
kxznzngng.

### *Arlapxbz Ninge*

- 1 Yawe, arlapxbz ninge mz kxdrka'-ngrng  
Kcng tzsuti drtwrdr nzatrkatikrdr ninge.
- 2 Nzryrlq-zvzng drtwr kxtrka mz nabzdr,  
X nzapqtr-zvzlr drtwr ngr nzotangr.
- 3 Natqdr nzlvati apule nipna kr ningidoe kc tqrtq,  
Mz nzrpikitingr x nzrpibqtingr. ☆

### *Mz Mq Enqmi Rngeng*

- 4 Yawe, arlapxbz ninge mz zmatq ngrdr.  
X acive-angidrbz ninge mz krkcng tzryrlqng  
drtwr kx na-atrkati-ngrdr ninge.
- 5 Sc tzglqpx-lzbqng nzamwi-kapqlr trtxki kx  
naprtz-ngrne mz nzatu-krdr br mz nzti  
rnge.  
X tzryrlqng drtwr kx nalolvz-ngrdr ninge.

### *Nim Gct Rnge*

- 6 Yawe, xlrn nzkrka'-krnge,

Murde rpi-zvzbo bam kx, “Yawe, nim Gct rnge.”

<sup>7</sup> Kxetu rnge, nzxplr-krm arlapxle ninge.

X amyaq narnge mz nzvecngr.

<sup>8</sup> Bzkq rlr-ngrbzme nzungidatigr drtwr kcng tzyrlq kxdrka'-ngrng lcng

Mz nzbilvz-krdr nzlolvz-krdr ninge, kxmule-esz' nzsuti zlwz drtwrdr.

### *Ayrplapx Nidr*

<sup>9</sup> Enqmi lcng tztu-ngalelvzlr ninge.

Batrpz nzayzlu-krbz badr natq ngr zngya kcng tzipmlr bange, murde nangq-moule nidr.

<sup>10</sup> X nyr natatiom nangc-ngrdr,

X nartctiongr nidr mz gq kx trnarlapx-ngrdru.

<sup>11</sup> Suti drtwrnga kx krkcng tzpokiang nzmnc-krdr mz drtc' natangqneo.

X da kxtrka nadwatibzle krkcng tzota-zvzng mz nzodati-krde nidr.

### *Okatr Ninge*

<sup>12</sup> Yawe, krlzx kx tu-zvzbzme mz nibr kx trpnzng scde zmatq,

X okatrq kxnzkxpung mz nzatubqti-krm da kx vz-rbr.

<sup>13</sup> Leplz kxnztubqng sa na-awibzng bam,

X namnc-zvzamu badr.



## Sam Kratrtqki-esz'-nzpnu-pwx-nrade-esz' (141)

*Arlapxbz Ninge Mz Zmatq Ngr Alwx X Kxdrka'-ngrng*

Nabz ne Devet.

<sup>1</sup> Yawe, kqle-zvzx nim. Xlrm natqnge.

Vz-anim x okatrp ninge. Yawe, kqle-zvzx nim.

<sup>2</sup> Abrtzlvz nzkrka'-krnge nzvzdz-krbzle bam na-apule zsikapu ngr bqlr nc ninz kc tzangcbz bam.

X nzglalz-krnge mqnge na-apubzle bam blz ngr milzpq.

<sup>3</sup> Yawe, mailz ninge murde ma tqrpitix natq kxtrka,

A' nzymne-krnge natubqpwx.

<sup>4</sup> Bzkq rlr-ngrme nzsutikr drtwrnge da kxdrka'ngr,

Murde ma tqprtrpo badr kxnzaleng alwx

Mz nzale-krdr da kxvz-rbr,

X ma tqprlvz mzke' da kxtrka.

<sup>5</sup> A' mz nzprtr-krbo badr, mrlzvxitx nzayrplapxngr ninge.

Murde nzatubqtingr apule tolo ngr nzamrlzngr.

Bzkq narng mngi,

Murde krka'-zvz-ngrne kx nayrlqpx-lzbqnge mz nzvz-rbr-krdr.

<sup>6</sup> X ncblo sa na-abrtz-ngrdr natq ngr nzatubqti-krnge nidr

Mzli kc namc-ngrdr nzbzkr kxnzetu r kxdrka'-ngrng mz nzayrplapxngr nidr.

- 7 X nrvr ngrdr sa natwzbetxne mz drtc'  
Mz nzapu-krdr lrdz kcng tqalvxlz nrc.
- 8 Yawe, nim Gct rnge, abrtr-zvzbo drtwrnge bam.  
Nanginim lrpalc nyznge, murde ma tqmnc-  
lxlr.
- 9 Mailz ninge murde ma tqprtzx mz trtxki sc  
kxdrka'-ngrng,  
X ma tqtaox mz gq kx nzekqtilr.
- 10 Mrlzvxitx nzdwatr-mou-krdr mz br scdr,  
A' drtqnge naopx zvz.

## Sam Kratrtqki-esz'-nzpnu- pwx-nrade-li (142)

### *Aopxbz Drtqnge Mz Nzxpukrngeng*

Nabz ne Devet mzli kc tqmncpx-ngrmle mz  
butqbr.

- 1 Yawe, yrni-katobo bam,  
Murde naokatrq ninge.
- 2 X pibo bam da kx lctr-ngrbz drtwrnge,  
X nzxpungr kcng tqprtzmqng bange.
- 3 Kxmule-esz' nabznge baonepe, a' nim kc tqrt-  
wayz zvz mz nzvz-krnge.  
Murde enqmi rngeng nzryrlq-kapqpeng  
trtxki mz lrpzki rnge.
- 4 X kx obq-ngalex kc nrlc, trpnzngr kx mcx kx  
naokatrle ninge,  
X trpnzngr kz kx na-acle-zpwxle ninge.
- 5 Yawe, kqlx nim,  
Murde nim me rlakitr, x nim nou nzmnc-  
zpwx-krnge.
- 6 Ayzlum natqnge  
Murde nabznge talvzo zlwz.

- <sup>7</sup> Aopxbz drtqngē mē nzkxpu-krngēng murde na-  
awibo bam,  
X kxntubqng natu-ngalelvzlr ninge mē  
nzglqlz-krdr nim mē nzamlz-zlwz-krm  
ninge.

## **Sam Kratrtqki-esz'-nzpnu- pwx-nrade-tq (143)**

### *Nzadwatrlr Ninge Mz Nzlo*

Nabz ne Devet.

### *Xlrm Nzkrka'-krnge*

- <sup>1</sup> Yawe, xlm nzkarka'-krnge x ayzlum natqngē,  
Murde tubq-esz'ngrn x angidati-zvzq.  
<sup>2</sup> Bzq ayrplapxq ninge, kxnzawz nem,  
Murde trpnzngē leplz mē nrlc kxtubq mē  
nzobq-krm.  
<sup>3</sup> Enqmi rngēng nzmaneuilr ninge x nznzbrti-  
olr ninge mē drtc',  
X nzadwatrlr ninge mē nzlo, apux kxbz kx  
mnczm mē gq.  
<sup>4</sup> Nabzngē baonepe,  
X talvzo zlwz.  
<sup>5</sup> A' amqtrx drtwrngē mē nzaotikr drtwrngē zbq  
kcng tqvztxpeng.  
X dcpx mē drtwrngē da kxnzkctipxng kcng  
tqalemeng bagr.  
<sup>6</sup> Delc tqglalz-ngrbo mēngē bam,  
Murde brlxkztitx zlwz drtwrngē nim.

### *Ayllum Natqngē*

- <sup>7</sup> Yawe, ayzlu-anim natqngē murde nabzngē  
baonepe.

- Bzkq rlaszq ninge, murde ma tqbzx.  
8 A' pi-zvzm bange mz rngalx kang kqlu kx aodu-  
zvzq ninge,  
Murde abrtrpo drtwrnge bam.  
X mailz ninge mz lrpzki kx nao-zlix,  
Murde mnc-xgle-zvzx nim.  
9 Yawe, bzkq rlr-ngrbzme mz enqmi rngeng  
nzlolvz-krdr ninge,  
Murde nim me rlakitr.  
10 Gct rnge, alvztrp bange nzale-krnge me pnz  
drtwrm.  
X rtwayzm bange mz zmrlz ngrm, murde  
namnc-zpwx.  
11 Yawe, arlapx ninge da kc tqwai nzpi-krmle  
murde ma tqbzx.  
X tum mz nibrnge mz nzkxpu-krngeng am-  
rlx, murde tubq-esz'ngrn.  
12 Lolvzting enqmi rngeng x miltxo alo nidr.  
Murde aodu-zvzq ninge, kxnzawz nem.

## **Sam Kratrtqki-esz'-nzpnu- pwx-nrade-pwx (144)**

*Sa Namrlzbz Mz Leplz Mrkcng Amrlx Tqamrlz*  
*Yawe*  
Nabz ne Devet.

### *Mevalu Rnge*

- 1 Yawe, glqpxx nim, murde nim butqbr nyznge.  
X alvztrpe' bange nzrpnangr x axplr q ninge  
mz nzotangr.  
2 Brti drtwrnge nzngini-krm lrpalc nyznge.  
Nim Mevalu kx xplr x me rlakitr.  
Nim temz ngr lomrnge kc tqyrputrngr nipna.

- X okatr-zvzq ninge mz nzaovxio-krnge lr  
mrkzbleng.
- <sup>3</sup> ?A' memule tqmatq-ngrgr mz drtwrm?  
?X memule tqmrlzti-ngrn nigr leplz txneng?
- <sup>4</sup> Nzmrbcnekr nzlukr leplz apule nzyrplaokr nrc  
kxesz'.  
X apu-kzle zmio kc tqmrbr mz milzpq.
- <sup>5</sup> Yawe, lvxpx bongavz mz nzvzo-krme.  
Maletr newz murde nasikapung nzapulr tr-  
mami.
- <sup>6</sup> Atwzlor-ngrm bzlrpc mz nzaodaliti-krm enqmi  
rngeng.  
Pnzting nidr mz nipna scmqng murde  
navotxng.
- <sup>7</sup> Yawe, rtrngztiom ninge mz nzokatr-krm ninge,  
Na-apule kx veclzme ninge me boongr prla.  
X arlapxbz ninge mz mq lr mrkzbleng.
- <sup>8</sup> Murde nzmrlzti-tpwzlr nigr mz nzymne-krdr.  
A' trnzatutrlru nzesz'tikr drtwrgr badr.

### *Nzkrka'-krnge*

- <sup>9</sup> Gct, sa nangr-ngrbo bam nabz kxmrna.  
X na-angrlvzx nim mz nzayrni-krnge gita.
- <sup>10</sup> Murde okatr-zvzq king nemqng mz nzaovxio-  
krdrng.  
X sc tqarlapxpebzme ninge mz toki r vea  
kxmalc, murde ninge kxnzawz nem.
- <sup>11</sup> Mzli ka arlapx-mopwz ninge mz mq lr  
mrkzbleng murde nzmrlzti-tpwzlr nigr  
mz nzymne-krdr.  
A' trnzatutrlru nzesz'tikr drtwrgr badr.
- <sup>12</sup> Delc mz nzkqlukr enqmi rgrng,  
Krka'-ngrgr kx na-amrlzq nigr lr mrnyzm.

Murde obla negrng naxplrneizm mz nzapu-krdr  
nounc kx xplr.

X olvi negrng naxplr-kzng x mztr nalqngi mz  
nzapu-krdr nctrpou ngr ma nyz king.

<sup>13</sup> Dalr nrlanc nyzgrng nalvc-angidrng,

Murde bxli scgrng nayrbu zvz mz dakxnzng.

X animol negrng naeloting

Murde neidrng nayrlwrtxne.

<sup>14</sup> X kxnzrmailz rgrng na-ale-zpwxlr nzwz-krdr,

Murde leplz ma tztangetrplr drkq ngr mztea  
nyzgr mz nzvzmi-krdr nigr mrnyzdr,

X lr mztea nyzgrng ma tzodalineg mz  
nzvzdz-krm nelzdr.

<sup>15</sup> Yawe, leplz kcng tqokatrq mz da lcng, sa na-  
abrtz-ngrdr nzmnc-zpwx-krdr.

Murde leplz amrlx kcng tqnginim Gct rdr sa  
namnc-zpwx-zvzng.

## **Sam Kratrtqki-esz'-nzpnu- pwx-nrade-nzlvqn (145)**

*Zluli X Zmatq Ngr Yawe*

Nabz ngr nzrglqpxngr ne Devet.

*Kzdq Nabz Ngr A, B, C*

<sup>1</sup> Awi-zvzbo bam mz nzglqpx-krnge nim,

Murde nim Gct rnge x mnclzbo bam.

<sup>2</sup> Bilyzx nim mz nzawi-krbo bam.

X sa naglqpx-zvzx nim mz zbq kang kqlu.

<sup>3</sup> Clveq nrlc mz zmatq ngrm kx trpnzng kxrkrzl.

Yawe, myatxlz-esz'ngrn x takitrde ngr-  
glqlzng nim.

- 4 Doa nemqng sa nayapwxti-zvzbzlr mz doa nedrng,  
Da kcng tqetuting tqmatq tqaletiqng.
- 5 Eu, x sa na-aoti-zvz-kzx drtwrnge nzwz-krmqng kxmrlzvxing,  
X nzetu-esz'ngr-krm mz zmatq.
- 6 Gct, sa nayapwxtipx leplz da kxnzkctipxng kcng tqwz-ngrn.  
X sa napipxx nzmyalz-esz'ngr-krm.
- 7-8 Ipq-aniq leplz murde yc mz drtwrm nidr.  
Murde nivz lrm x nzaodu-krm tqyc tqyc.  
Jzsiq leplz mz nztubqngr x sa na-angrlvzlr nim.  
Sa nalepxlr nrpa ngr nzmrlz-esz'ngr-krm.
- 9 Kxetu, mrlztiq leplz amrlx,  
X yc zlwx mz drtwrm doa amrlx kcng tqwz-ngrn.
- 10 Leplz nemqng amrlx sa na-awibzng bam,  
X doa amrlx kcng tqwz-ngrn sa naglqlzlr nim.
- 11 Mz nrlc tulvzo, sa nayapwxtipxlr nzmyalz-esz'ngr-krm,  
X nzetukr zmatq ngrm mz nzngini-krm king.
- 12 Nrpa ngr nzwz-krmqng etu, mz da kxmrlzting kcng tqwz-ngrn mz nzaclve-krm,  
Sa nakrlz leplz amrlx.
- 13 Obqom mz nrlc mz nzaclve-krm kc tqyc tqyc,  
X nzngini-krm king tqvzpe tqvzpe.  
Pipx-zvzq natq kx na-angidatiq,  
X aelwapx-zvzq nivz lrm mz da amrlx kcng tqaleq.
- 14 Rngiscm zmatq kx okatrle leplz kcng tzkxpung,  
X axplrlle nabz leplz kcng tqtalvzo.
- 15 Sa narkabzme dakxnzng mz kxnzlung amrlx,

- Mz nzmnc-xgle-krdr nim mz da amrlx.
- 16 Tekqtrq nzbrtale-krdr mz nzakrlc-krbzme nelzdr,  
X drtwrdr esatpxp zpwx.
- 17 Vz zvz nzale-krm da kx tubq-esz'ngr,  
X aelwapx-zvzq nivz lrm mz da amrlx kcng tqaleq.
- 18 Wxbu-aepztrpzme mz krkcng tzkqlelr nim,  
Mz nzbrti-zpwxkr drtwrdr nim.
- 19 Xlrq nzyrnkr leplz kcng tzamrluelr nim,  
X ayzlubzme natqdr mz nzarlapx-krm nidr.
- 20 Yawe, tu-zvzbzme mz nibr leplz kx nzmrlztilr nim,  
A' odati-atwrnr-ngrn kxdrka'-ngrng.
- 21 Zbq kalvz sa naglqlzx nim.  
X krkcng tzlung tqwz-ngrn, nzangio-krdr nim tqvzpe tqvzpe.

## **Sam Kratrtqki-esz'-nzpnu-pwx-nrade-esz'mz (146)**

*Na-abrtxtrpwzku Drtwrgu Mz Yawe*

- 1 **Naglqlzku Yawe!**  
Na-angiox nide mz nabznge.
- 2 Naglqlzx Gct rnge mzli ka tqlube-ngrne,  
X na-angrlvzx nide.
- 3 Bzkq abrtzpzku drtwrgu mz kxnzrmailzng,  
Murde leplz trnzkrzlru nzarlapx-krdr nigu.
- 4 Nabzng x nzyrtzmqng mz drtc',  
X mzli lcpwz drtwr kcng tzyrlqlr botxpx-kzpz.
- 5 A' nangi da kxmrlz nzabrtr-krbzku drtwrgu mz Yawe.



Murde takitrde mz nzmnc-xgle-krqu Gct r  
Jekop.

<sup>6</sup> X Yawe nide Kxrpaz,  
Kc tqwz-ngrde bongavz, nrhc, x prla, x daldrng  
amrlx.

X atutr-zvzle natqdeng amrlx.

<sup>7</sup> Nzatubqti-krbz Yawe da mz kxnzkxpung tubq.  
X rka-zvzbz dakxnzng mz kxnzbrtaleng.

X aopxbzle drtq kxnzmnczbzng mz mq  
enqmi rdrng.

<sup>8-9</sup> X nide kz kx aopxbzle mzku.

X atulzmlc kxnzobqszong.

Yawe acvele lr mrkzbleng kx mnckung badr.

X okatrle kxnzbzszng x kxnzabzong.

Mrlztile kxnztubq nedeng,

A' odatile drtwr kcng tzyrlq kxdrka'-ngrng.

<sup>10</sup> Yawe ni-alode King!

Nzacvckr Gct rgu, nigu lr Jerusalem, tqvzpe  
tqvzpe.

**Naglqlzku Yawe!**

## **Sam Kratrtqki-esz'-nzpnu- pwx-nrade-rimz (147)**

*Yawe Amrlzle Nigu Leplz Nedeng Mz Zmatq  
Ngrde*

*Yawe Rngisc Zmatq Kx Xplr*

**<sup>1</sup> Naglqlzku Yawe!**

Mrlzvxix nzangrlvz-krqu Gct rgu.

Brngzvxix x takitrde nzglqlz-krqu nide.

<sup>2</sup> Yawe yrlq-zpwx-moule Jerusalem,

- Mz nzvzmi-kr-mople lr Israel kcng tzlolvzt-  
ing enqmi rdrng.
- <sup>3</sup> Rka-mopwz nzabrtzngr mz leplz lcng drtwrdr  
tqtalvzo,  
Mz nzawxo-krbzle drtwrdr apule kx pnutib-  
zle kxsqki rdr.
- <sup>4</sup> Krlzle me krlzbx nzkqlukr vri,  
X yrlqtibzle drtqdrng amrlx.
- <sup>5</sup> Yawe etu-esz'ngr x rngisc zmatq kx xplr.  
X trpnzng kx rkrlzlbz nzyrplapx-krde.
- <sup>6</sup> Atubxlzle kxnzobqszong,  
A' rnzbrtiole kxdrka'-ngrng mz drtc'.

### *Mnc-xgleku Zmatq Rde*

- <sup>7</sup> Nangr-ngrgu nabz kx yrlvi mz nzayrni-krbzku  
gita mz Yawe,  
Mz nzawi-krbzku bade.
- <sup>8</sup> Murde yrlqtibzle dcbz mz bongavz x adco-  
ngmle tewa nalrprngr drtc',  
Murde nalutingr nabr kxvo mz nra.
- <sup>9</sup> Rkatz dakxnzng mz animol amrlx,  
X aputrle nei utc amrlx mz nzyrni-krbzlr  
bade mz dale ngr nelzdr.
- <sup>10</sup> Delc trmrlz-ngrpwzleu mz Yawe nzabrtr-  
ngrbzku drtwrgu mz nzxplrkr hcsi ngr vea  
negung,  
X nzaovxiokr ncblo ngr vea negung.
- <sup>11</sup> A' mrlzbx bade krkcng tzamrluelr nide,  
X tzmnc-xglelr nzaodu-zvz-krde nidr.

### *Zmatq Ngr Natqde*

- <sup>12</sup> Nigu lr Jerusalem kcng tzangioldr Yawe mz  
Newz Saeon,  
Naglqlzku nide, kc tqngi Gct rgu.

- 13-14 Murde amqngitibzle naonrx ngr Jerusalem  
x bz ngr mrnyzgr.  
Amrlz-zvzle lr mzteadau nyzde,  
X amnc-zpwxle nigu leplz nedeng amrlx  
Mz nzrka-krmlle bagu da kxmrlzting.
- 15 Mzli kc tqycmnepx-ngrde  
Dalr nrlc nzvz-nqblq-anilr natqde.
- 16 Mz mzli r zbao, sncu prlxlvztxde drtc' apule  
lrpz kxprki.  
X dcbz vzom mz nrlc apule zskapu.
- 17 X muli-aes rlxom mrkcng amrlx.  
Murde da amrlx lcng nayclzbzng mz zmatq  
ngr zbao.
- 18 A' mz nzycmne-mou-krde, nrlc kc tqpppe,  
X nzwqkr nenq kxpq ayrle-mouleng lue kcng  
tqngi aes.
- 19 X natq lc tqmatq tqvim Yawe bagu, nigu leplz  
nedeng,  
Murde nayrlq-angidrku nzalvztr-krdeng x  
Loukxtr scde.
- 20 Trpipxpwxleu lou scdeng mz lr mrkzbleng,  
A' nigu txpwz, mz nzngini-krqu leplz nedeng.  
**Naglqlzku Yawe.**

## **Sam Kratrtqki-esz'-nzpnu- pwx-nrade-rtqmz (148)**

### *Nzrglqlz-zvzngr Yawe*

- 1-2 **Glqlz-zvzamu Yawe**, nimu lr Heven amrlx.  
Nimu enjrl nedeng, glqlz-zvzamu Yawe.
- 3 Glqlz-zvzamu Yawe, nepi ncdr temz.  
X nimu vri amrlx, glqlz-zvzamu Yawe.
- 4 Glqlz-zvzamu nide, dalr bongavz amrlx.

- X nimu lue kcng wq, glqlz-zvzamu nide.  
5 Glqlz-zvzamu drtqde. Kxrpalz wz-ngrde nimu,  
Mz natq kx kapxle. Glqlz-zvzamu drtqde.  
6 Natqde tqyc tqyc. Yrlqti-lxblrbzle  
Me namnc-alo-ngrnamu. Natqde tqyc tqyc.  
7 Glqlz-zvzamu Yawe, nimu nc x mepwz amrlx  
Ngr prla x me boongr. Glqlz-zvzamu Yawe.  
8 Vz-nqblqamu natqde, bzlrpc x muli aes.  
Dcbz, nenq x tewa, vz-nqblqamu natqde.  
9 Glqlz-zvzamu Yawe, newz x nra amrlx.  
Nimu nounc ngr peto, glqlz-zvzamu Yawe.  
10 Glqlz-zvzamu nide, animol x utc amrlx.  
X da kx nzngrlaneng, glqlz-zvzamu nide.  
11 Naglqlz-kzku Yawe, nigu lr nrlc amrlx.  
Kxnzeturng x kxnzrmailzng, naglqlz-kzku  
Yawe.  
12 Naglqlz-kzku nide, nigu obla x olvi.  
Itoto x lrtzlvzng, naglqlz-kzku nide.  
13 Naglqlzku drtqde, nigu amrlx ngrgu.  
Drtqde myatxlz-esz'ngr. Naglqlzku drtqde.  
Nzmyalz-esz'ngr-krde myaszlzle drtc',  
X bongavz kz. Nzmyalz-esz'ngr-krde!  
14 Naglqlz-zvzku Yawe, nigu lr Israel nedeng.  
Axplrle x aodule nigu, **naglqlz-zvzku Yawe.**

## **Sam Kratrtqki-esz'-nzpnu- pwx-nrade-rpwxmz (149)**

*Nzbilvz-krqu Nzaovxiokr Yawe*

### **1 Naglqlzku Yawe!**

Nangr-ngrbzku bade nabz kxmrna.

Naglqlzku nide mz nzyrlwrpx-krm leplz ne-  
deng mz Mangr-nzangiong nide.

- <sup>2</sup> Nigu lr Israel na-abrtzlvzku Yawe mz nzngini-krde Kxrpalz.  
X nigu lr Jerusalem naelalz-ngrm drtwrgu King rgu.
- <sup>3</sup> Naelabzku bade  
Mz nzrta-krqu kcte x nzayrni-krqu gita.
- <sup>4</sup> Murde Yawe abrtz-zlwz-ngrde nigu leplz nedeng,  
X aovxiole enqmi rgung mz nzmnc-xgle-krqu nide.
- <sup>5</sup> Delc nigu kxnztrng nabilvzku nzaovxio-krqu.  
X nangr-abrtzku mz nrckxbq krlzbzle mz nrckxngrlx.
- <sup>6</sup> Naogu namalqlvzlr Gct.  
X narmaleku toki r vea mz mqu.
- <sup>7</sup> Murde na-ayzlvzku da mz lr mrkzbleng,  
Mz nzatutr-krqu nzaryplapxkr Gct leplz lng.
- <sup>8</sup> X nape-amqngiku king rdrng,  
Badr kxnzrmailz rdrng amrlx mz nzaovxio-krqu nidr.
- <sup>9</sup> Mz nzamatqkr Gct nigu, rlr-ngrmle bagu, nigu leplz nedeng,  
Nzprtr-krqu mz nzatutr-krde natqde mz nzayrplapx-krqu lr mrkzbleng.  
**Naglqlzku Yawe!**

## Sam Kratrtqki-esz'-nzpnu-nzlvqn (150)

### *Naelabzku Mz Yawe*

- <sup>1</sup> **Naglqlzku Yawe** mz nzmnc-krde Mangr-nzangiongr,

X nzmnc-krde Heven kc tqmyalz.

<sup>2</sup> Na-angrlvzku nide nzmyalz-esz'ngr-krde  
Mz nzale-krde da kcng tqmatq.

<sup>3-5</sup> Naelamibzku nrasrpwale

X natz-katobzku bade kcte.

Naelabzku bade navzmi nzayrpla-krdu da,  
Nzrta-krdu da, x nzayrlewz-krdu da mz  
mqgu.

Navxubzku trpu x ncblei.

X na-ayrniku gita x ukzlele mz nzglqlz-krdu  
nide.

<sup>6</sup> Nigu kxnzung amrlx, naelalz-ngrm drtwrgu  
Yawe.

**Naglqlzku Yawe!**

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 21 Feb 2024 from source files dated 31 Aug 2023

fb2b7f06-e254-5fb7-b59d-ee21d5d7a93f